


清楚衡雲峰沙門智祥集

法華授手

【下冊】



佛陀教育基金會印贈

一切佛經，及闡揚佛法諸書，無不令人趨吉避凶，改過遷善。明三世之因果，識本具之佛性。出生死之苦海，生極樂之蓮邦。讀者必須生感恩心，作難遭想。淨手潔案，主敬存誠。如面佛天，如臨師保。則無邊利益，自可親得。若肆無忌憚，任意褻瀆。及固執管見，妄生毀謗，則罪過彌天，苦報無盡。奉勸世人，當遠罪求益，離苦得樂也。

妙法蓮華經授手卷第五之二

清楚衡雲峰沙門智祥集

④二口安樂行。分二。⑤一長行。又二。⑥一標章。

又文殊師利。如來滅後。於末法中。欲說是經。應住安樂行。

此卽口淨。末世弘經。若語有不正。爲禍亦甚。⑦二釋行。分二。⑧一止行。

若口宣說。若讀經時。不樂說人。及經典過。

宣說。是對眾之語。讀經。是自課之言。若說若讀時。皆不可說人與經典過也。法華已前。七方便之權。

法。乃佛隨機說不了義。人若聽受容有樂偏小之過。法本隨機。何過之有。若言法有過。則人懷惱亂。非口安樂也。

亦不輕慢諸餘法師。不說他人好惡長短。於聲聞人。亦不稱名說其過惡。亦不稱名讚歎其美。又亦不生怨嫌之心。

此教弘經人。不可恃圓教而輕小乘法師也。天台云。不說人長短者。凡世人皆惡聞其失。故不談短。好譽者必善毀。故不稱長。此是不說一切人。次別舉聲聞。况聲聞根性不定。讚之必退。大取小。毀之

則大小俱失。所以毀讚俱不應也。不生怨嫌者。若謂所承之人及所稟之法。妨害我道。卽是怨心。若謂其人法鄙劣。卽是嫌心。心機一動。聲說卽發。杜說過之源。故不生怨嫌也。⑤二觀行。

善修如是安樂心故。諸有聽者。不逆其意。有所難問。不以小乘法答。但以大乘而爲解說。令得一切種智。上旣觀諸法空。心已住於畢竟空理。無所取著。卽善修安樂心也。旣不執大輕小。則所說法不逆聽意。有難問而答以大乘者。是漸令入佛智。故曰令得種智也。⑥二偈頌。分三。⑦一頌標章。

爾時世尊欲重宣此義而說偈言。

菩薩常樂安隱說法於清淨地而施牀座以油塗身
澡浴塵穢著新淨衣內外俱淨安處法座隨問爲說
此處頌意與長文各不相涉乃如來無礙慧隨便
爲說前謂口淨此又教身心并潔也菩薩欲得安
隱說法必須內外俱淨清淨地者謂外離十惱內
智如如卽入如來室施牀座卽觀一切法空以油
塗身得身安樂澡浴塵垢除其患惱著新淨衣具
其忍力卽著如來衣安處法座卽登如來座三者
俱備乃能說法故曰隨問爲說也。④二頌行法

若有比丘。及比丘尼。諸優婆塞。及優婆夷。國王王子。羣臣士民。以微妙義。和顏爲說。

前未達法相。故須依遠離行。庶使二俱無過。今旣達法相。乃以微妙義。和顏爲說也。法華全俗卽真。令人樂聞。故曰微妙。和顏者。歡喜說法也。

若有難問。隨義而答。因緣譬喻。敷演分別。以是方便。皆使發心。漸漸增益。入於佛道。

難問有二。一是智者設問。反復辯論。互相激揚。發所未發也。二是愚者疑決未判。故法師或引因緣。或立譬喻。爲彼開敷心地。分別名相。皆使發心。從

權近實。而入佛道也。

除懶惰意。及懈怠想。離諸憂惱。慈心說法。

慈心說法。頌無怨嫌。謂慈心。則不嫌不怨。故離諸憂惱也。說法。則唯精唯進。故除諸怠惰也。

晝夜常說。無上道教。以諸因緣。無量譬喻。開示眾生。咸令歡喜。衣服臥具。飲食醫藥。而於其中。無所希望。但一心念。說法因緣。願成佛道。令眾亦爾。是則大利。安樂供養。

此頌觀門。長行但云。以大乘法答。今言說無上道。上言令得一切種智。此言願成佛道。知音云。此由

慈心說法故。獲大利益也。其安樂有五。一晝夜無
間說。二緣喻無量說。三咸令歡喜說。四不望四事
說。五齊成佛道說。慈心說法一句最重。故曰是則
大利等。(辛)三頌行成。

我滅度後。若有比丘。能演說斯妙法華經。心無嫉恚。
諸惱障礙。亦無憂愁。及罵詈者。又無怖畏。加刀杖等。
亦無擯出。安住忍故。

末世說法者。能如上說。不唯不招危害。亦且得功德
不盡也。知音云。無危害亦有五。一無憂愁。二無罵
詈。三無怖畏。四無刀杖。五無擯出。凡此者皆由說

法無嫉恚故諸惱不生也

智者如是善修其心能住安樂。如我上說其人功德。千萬億劫算數譬喻說不能盡。

此明具諸功德也。謂千萬億劫說不能盡其効在善修其心一句。如不善修其心尙不能免患况其德耶。△問。文標口安樂而所言者全歸乎意。如云除

惰懶意慈心說法。但一心念心無嫉恚以至善修其心。何嘗言口安樂。答。文雖標三意則無二。身非意不行。口非意不動。意爲身口之本。故常言也。

④三意安樂行。分二。⑤一長行。分三。⑥一標章。

又文殊師利菩薩摩訶薩。於後末世。法欲滅時。受持
讀誦斯經典者。

此標章處。便言法欲滅時者。正在後五百歲鬪諍
堅固之時。若菩薩法師。欲讀誦是經。須先正其意。
意正則法法皆如也。④二釋行。又二。⑤一止行。

無懷嫉妬諂誑之心。亦勿輕罵學佛道者。求其長短。
此釋明行相。所以得意安樂也。天台云。夫二乘欲
出生死。故先除貪欲。菩薩欲化眾生。故先除嗔見。
嫉是嗔垢。諂是見垢。嫉妬違慈悲之心。非化他之
法。諂誑乖智慧之道。非自行之法。若智慧被障。將

何以上求佛果。若慈悲有妨。將何以下化眾生。故菩薩欲正其意。最須棄之。亦勿輕罵等者。此皆不應倚圓呵別求權之短。若有輕惡罵詈。則退彼善根矣。

若比丘。比丘尼。優婆塞。優婆夷。求聲聞者。求辟支佛者。求菩薩道者。無得惱之。令其疑悔。語其人言。汝等去道甚遠。終不能得一切種智。所以者何。汝是放逸之人。於道懈怠故。

此明七眾人等大小乘兼雜。當以正眼等視。設各有所執。宜因事而治。隨機轉化。毋令惱之。使彼窺

見大乘平等法門。無所不攝。故令永斷疑悔。安心於道也。語其人言下。出所惱之詞。謂法師不應以圓理呵責小乘。况權人望大。本懼迂迴。故曰去道甚遠。小乘既無志願。終不能得佛道。既厭生死。終不能化眾生。故曰放逸懈怠也。

又亦不應戲論諸法。有所諍競。

戲論者。不決定說。諸法。卽世出世間染淨等法。菩薩於末世弘經。須說生死染法。決定不淨。涅槃聖法。決定不凡。幸勿混亂。而亦不宜主大說小。而成諍競。如是說法。則意安樂矣。⑤二觀行。

當於一切眾生起大悲想。

此正對前無懷嫉妬諂誑之心。謂說法者。當於三界十二類生。宜以大悲拔諸苦惱。是其本意。而嫉妬之心。不宜懷也。

於諸如來起慈父想。

此對前勿輕罵等。諸如來。意該三世。謂凡學佛道者。卽是當來成佛之眾。如弘經者。旣以如來爲父。又豈于諸來者。而反生輕罵。求其長短耶。

於諸菩薩起大師想。於十方諸大菩薩。常應深心恭敬禮拜。

此對前求三乘人勿得惱之。諸菩薩卽此土并十方一切菩薩。當深心恭敬如大師想。豈得於三乘而反生惱亂說其過耶。

於一切眾生平等說法。以順法故。不多不少。乃至深愛法者。亦不爲多說。

此對前不應戲論等。謂平等。則無諍競。順法。則不戲論。不多少者。隨機器之利鈍也。④三行成。

文殊師利。是菩薩摩訶薩。於後末世。法欲滅時。有成就是第三安樂行者。說是法時。無能惱亂。得好同學。共讀誦是經。亦得大眾而來聽受。聽已能持。持已能

誦誦已能說。說已能書。若使人書。供養經卷。恭敬尊
重讚歎。

此結證第三安樂行也。由我能平等說法。不唯人
不惱我。而且自有聲應氣。求爲我好同學。展轉受
持。展轉恭敬。以至流通不盡也。庚二偈頌分二。

辛 一頌行法。

爾時世尊。欲重宣此義。而說偈言。

若欲說是經。當捨嫉恚慢。諂誑邪僞心。常修質直行。
不輕憊於人。亦不戲論法。不令他疑悔。云汝不得佛。
此頌止行。止諸惡法不行。唯常修質直一句。是所

當行也。

是佛子說法。常柔和能忍。慈悲於一切。不生懈怠心。十方大菩薩。愍眾故行道。應生恭敬心。是則我大師。於諸佛世尊。生無上父想。破於憍慢心。說法無障礙。此頌觀行。言菩薩愍眾行道。則不爲自求。如是大師。我當恭敬也。餘則對長行可知。②二頌行成。第三法如是。智者應守護。一心安樂行。無量眾所敬。頌謂有智之人。當守一心。心既歸一。無行不成也。直指云。此章大約以正智爲體。正智現前。故意業清淨。能慈一切。能敬一切。能遠諸惡。能生諸善。上

契佛心。下契凡心。自然爲人天所敬仰也。

④四誓願安樂。行二。庚一長行。又二。辛一明行法。

又三。壬一標章。

又文殊師利菩薩摩訶薩。於後末世。法欲滅時。有持是法華經者。

此標示第四誓願安樂行。以身口意。與慈悲俱。則一理平等。以一理之智說法。無法不圓。無生不度。其安樂可勝言哉。⑤二行法。

於在家出家人中生大慈心。於非菩薩人中。生大悲心。

此明當以慈悲徧濟眾生也。直指云。前三章廣舉七眾。今言在家。卽已發心之優婆塞等。出家。卽已發心之比丘等。雖皆發心。但信解而已。其未證得自覺聖智。故應於彼起大慈心。與之平等法樂也。非菩薩人者。卽前所戒十種勿近之人。爲彼未知如來平等大慧。雖具有佛性。而三界煩惱深重。故應於彼起大悲心。與之拔苦。使同證菩提也。應作是念。如是之人。則爲大失。如來方便。隨宜說法。不聞不知不覺。不問不信不解。

此教菩薩法師。於所度之境。作念起誓。爲度生之

由也。直指謂。三界內外凡小之人。有失如來平等大慧。此依正因佛性作念也。如來方便隨宜說法。不聞不知不覺。此依緣因佛性作念也。不聞不信不解。此依了因佛性作念。作是三念。愍彼出家在家之眾。故當對十方佛前。起大慈悲。而自誓願度彼。同住是法之中。

其人雖不聞不信不解。是經。我得阿耨多羅三藐三菩提時。隨在何地。以神通力。智慧力。引之令得住是法中。

此正發誓也。直指云。因彼凡小不聞此經。是何義

理設得請問。而又不信。由不信則不解。故應發願云。我得菩提時。隨在何地。當以神通智慧之力引之。令住實相之中。此承上大慈大悲二心所及也。何地者。卽得道後。或此方他方。乃未定之稱。神通智慧。卽般若解脫德也。住是法中。卽法身德也。此四行正與四弘誓等。善哉願力不可無也。有志者宜深悉之。⑤三結成。分二。⑥一總結無過。文殊師利。是菩薩摩訶薩。於如來滅後。有成就此第四法者。說是法時。無有過失。

此結誓願安樂行也。天台云。今總結無過失者。以

其立大誓願。卽入如來室。則無瞋過。知四眾有失。卽坐如來座。則無懈怠過。以誓制其心。卽著如來衣。則無諂曲過。無此諸過。則爲行成。

癸 二別結慈悲

常爲比丘。比丘尼。優婆塞。優婆夷。國王王子。大臣人民。婆羅門居士等。供養恭敬。尊重讚歎。虛空諸天。爲聽法故。亦常隨侍。若在聚落城邑。空閑林中。有人來欲難問者。諸天晝夜常爲法故。而徯護之。能令聽者。皆得歡喜。

以慈行成故。攝得四眾人天。供養聽法。誓願成故。

感佛神力諸天衛護如來座成不著。於法故聽者。皆歡喜也。

所以者何。此經是一切過去未來現在諸佛神力所護故。

此釋誓願行成。三世諸佛尙皆守護。况諸天耶。知音云。照法師品。此經是諸佛秘要之藏。不可妄授與人。諸佛世尊之所守護等意。又應知行處住忍辱地等。是著如來衣。近處觀一切法空等。是坐如來座。此節慈悲心。是入如來室。三法成就。是真安樂行也。①二正歎經。分二。②一法說。又二。③一顯

昔不得。

文殊師利是法華經。於無量國中。乃至名字不可得聞。

此正申明諸佛所護之故。爲下立喻章本。謂此妙法本來尊重。故持經者。亦因之而尊重矣。十方無量國土。欲聞其名。尙不可得者。由此經是諸佛秘要之藏。恆常守護。豈妄授于人者耶。

◎二明今始得。

何況得見受持讀誦。

因無量國中不聞名字。則今日得見聞受持者。皆

是如來四無量心之所致也。若菩薩法師不具諸忍。不發誓願。豈能爲如來護持。守成其化哉。

⑤二譬說分二。⑥一不與珠譬。又二。⑦一開譬。

文殊師利。譬如強力轉輪聖王。欲以威勢降伏諸國。而諸小王。不順其命。時轉輪王起種種兵而往討伐。此喻近從上章諸佛護念而無量國中不聞而來。蓋舉此一喻。以結一十四品開權顯實之總案也。起世經云。增劫時有四轉王。次第出世。一須彌四天下。人壽五萬歲時。有鐵輪王出世。王一天下。奮戈始定。人壽六萬歲時。有銅輪王出世。王二天下。

震威乃服。人壽七萬歲時有銀輪王出世。王三天下。遣使卽降。人壽八萬歲時有金輪王出世。王四天下。望風而化。皆以正法旋轉應運。故曰輪王。直指云。約事。輪王喻佛。強力喻佛雄猛。威勢喻華嚴。權實二智。諸國喻二十五有。及界外權土。降伏喻以智破惑。小王不順。喻凡小妄執偏邪難化。王兵討伐。喻用三十七品助道之法。及五十五位差別觀行。討伐生死魔軍。以清一眞法界。約理。王喻本覺之理。威勢喻根本智。諸國喻陰處界三及七大等法。小王喻諸心。王心所。兵伐喻依權智。從三漸

次至五十五位。終至等妙二覺。徹始徹終。一念圓明。十方坐斷。則根身器界。應念化成。無上知覺。王見兵眾戰有功者。卽大歡喜。隨功賞賜。或與田宅聚落城邑。或與衣服嚴身之具。或與種種珍寶。金銀琉璃。碑礫瑪瑙。珊瑚琥珀。象馬車乘。奴婢人民。

○兵眾喻權智。有功喻破我法二執。歡喜喻眾生證初住。三平等理。隨功賞賜。喻依理起行。從因感果不爽。賞賜有七種。喻七聖法財。一田宅。喻大乘止觀。二聚落城邑。喻五十五位如如理。三衣具。喻如如智。四珍寶。喻差別理行。五車乘。喻權實二智。

六人民。喻差別智行。已上總明四十年間權智與羊鹿牛車相等。

唯髻中明珠。不以與之。所以者何。獨王頂上有此明珠。若以與之。王諸眷屬。必大驚恠。

天台云。此喻法華非時不說。非機不演。髻喻權。珠喻實。實爲權隱。如珠在髻也。頂上喻極果。出分段生死爲小功。出變易生死爲大功。未有大功。而賜髻珠。諸臣皆疑恠也。喻眾生大機未動。爲說法華。二乘則疑。菩薩必恠也。①二合譬。

文殊師利。如來亦復如是。以禪定智慧力。得法國土。

王於三界。而諸魔王。不肯順伏。如來賢聖。諸將與之
其戰。

此以法合喻。明經功殊勝也。直指云。佛合輪王。禪
智合威勢。得法性土。王於三界。合降伏。諸國諸魔
不伏。合小王不順。自三乘以上爲賢。三賢已上爲
聖。總以四教及五十五位。則如來賢聖悉皆攝盡
矣。與之共戰者。卽以五十五位觀智。敵破我法二
執及五十種陰魔也。

其有功者。心亦歡喜。於四眾中。爲說諸經。令其心悅
賜以禪定。解脫無漏根力。諸法之財。又復賜與涅槃

之城。言得滅度引導其心。令皆歡喜。

天台云。根力。卽五根五力也。修此根力。卽不漏落六道生死。故名無漏。涅槃。卽小乘真空。能防見思之非。禦生死之敵。故名城。直指云。有功者。指四教證果而言。四眾者。對因地言。諸經指四十年小乘諸教。以因感果。各適其意。故眾心悅也。此合聖王賞賜一節。禪定合田宅。解脫無漏合聚落。根力合衣具珍寶。涅槃城合城邑。引導令喜。結上令其心悅。

而不爲說是法華經。

此合聖王不與髻珠一句。蓋欲待其時也。

⑤二方與珠譬。分二。⑥一開譬。

文殊師利。如轉輪王。見諸兵眾有大功者。心甚歡喜。以此難信之珠。久在髻中。不妄與人。而今與之。

解髻喻開權。與珠喻顯實。四十年秘而不說。故云不妄與人。⑦二合譬。

如來亦復如是。於三界中爲大法王。以法教化一切眾生。見賢聖軍。與五陰魔煩惱魔死魔共戰。有大功勳。滅三毒。出三界。破魔網。爾時如來亦大歡喜。

此舉法合喻也。直指云。如來王於三界。非止四天

下也。佛爲法王。非止輪王也。以法教化。令離苦得樂。非止強力成威勢也。妙樂云。見賢聖等者。大集經云。知苦壞陰魔。斷集離煩惱魔。證滅離死魔。修道壞天魔。今不言天魔者。以小乘多斷三魔。已有壞天魔義。由道成必降魔也。有大功者。如來見小乘除界內苦集。名與陰戰。至般若後。破無明。出變易。名大功。故今三毒等。且在小乘中說。三毒卽貪嗔癡。在見惑中。名邪三毒。在思惑中。名正三毒。不出見思二惑。如來見諸賢聖已斷見思。出三界外。不爲魔網籠罩。破無明出變易。故云大歡喜也。

此法華經。能令眾生至一切智。一切世間。多怨難信。先所未說。而今說之。

凡聞此經者。普皆成佛。故云至一切智。多怨難信者。謂此經不易說也。多怨。如五千退席。難信。如中下之機。故前謂如來現在猶多怨嫉也。先所未說者。以機未熟。故而今說者。時節成就也。

文殊師利。此法華經。是諸如來第一之說。於諸說中。最爲甚深。末後賜與。如彼強力之王。久護明珠。今乃與之。

此舉法喻雙結。惟此一實。更無餘事。故曰第一。惟

佛與佛。乃能知之。故曰甚深。慧命既續。佛卽示滅。故云末後賜與。末三句引喻雙結。以明顯實希有。文殊師利。此法華經。諸佛如來秘密之藏。於諸經中。最在其上。長夜守護。不妄宣說。始於今日。乃與汝等而敷演之。

此以法結盡前文也。謂此經乃十方三世如來所共愛樂者。長夜守護。是秘藏。不妄宣說。是密藏。正以此秘密之法。最上最切。非他法諸經可比。正如輪王髻珠最尊最秘最所護惜。非他田宅寶物可比。今日既以此最尊最秘之法。爲汝等敷揚。則汝

等得之。又安可以他法諸經尋常視之也。然此中經意。雖歸重於法。其實教受持者。自生尊重。淨身口意。而堅固誓願。以圓足末世弘經之安樂行也。

④二偈頌。分二。①一頌行法。又二。②一超頌行法。爾時世尊。欲重宣此義。而說偈言。

常行忍辱。哀愍一切。乃能演說。佛所讚經。

長行中總明行成。今頌中別顯也。常行忍辱。頌著忍辱衣行成。哀愍一切。頌入室行成。乃能演說。頌坐座行成。⑤二正頌行成。

後末世時。持此經者。於家出家。及非菩薩。應生慈悲。

斯等不聞。不信是經。則爲大失。我得佛道。以諸方便。爲說此法。令住其中。

於家出家二句。是所度之人。慈悲爲能度之心。斯等下三句。爲起誓之由。我得佛道下四句。是正行誓願也。辛二頌歎經。分二。壬一頌開譬。

譬如強力轉輪之王。兵戰有功。賞賜諸物。象馬車乘。嚴身之具。及諸田宅。聚落城邑。或與衣服。種種珍寶。奴婢財物。歡喜賜與。如有勇健。能爲難事。王解髻中明珠賜之。

此頌譬喻。前十二句頌喻權智。末四句頌喻實智。

眞俗雙超。曰勇健。擔荷大法。曰難事。⑤二頌合譬。如來亦爾。爲諸法王。忍辱大力。智慧寶藏。以大慈悲。如法化世。見一切人。受諸苦惱。欲求解脫。與諸魔戰。爲是眾生。說種種法。以大方便。說此諸經。

此頌法合。如來自舉忍辱。爲修行大力。以釋成頌。常行忍辱一句。是慰諸菩薩。安住忍行。自調而調彼也。蓋如來智慧寶藏。皆從忍辱而生也。以大慈悲如法化世。亦是釋成上章生二種心。而於諸法不戲論而來。見一切下。正示慈悲拔濟也。

旣知眾生。得其力已。末後乃爲。說是法華。如王解髻。

明珠與之。

此頌法喻雙結。一章以明顯實希有。

此經爲尊。眾經中上。我常守護。不妄開示。今正是時。爲汝等說。

此頌獨舉大法單結。以明顯實希有也。解釋修行方法竟。⑤三結行成之相。分三。④一結勸四行。

我滅度後。求佛道者。欲得安隱。演說斯經。應當親近。如是四法。

此總結行成。以明感徵之相勸修行也。四法。卽四種安樂行法。

④二三障清淨。分三。⑤一報障轉得現報。

讀是經者。常無憂惱。又無病痛。顏色鮮白。

此下舉三報轉。以勸持經。天台云。此報障轉也。無憂惱。卽無苦受。是現世心安報。無病色鮮。是現世身安報。此所以轉現報也。

⑥二業障轉得生報。

不生貧窮。卑賤醜陋。

○此業障轉也。貧窮等。乃業感之果。今因持經。從前縱有如是業因。至將來必不生如是果。此所以轉生報也。⑦三煩惱轉得後報。分二。⑧一別明煩

惱障轉。

眾生樂見。如慕賢聖。天諸童子。以爲給使。

○此明貪障轉也。多貪者。爲人忽慢。又障生梵世。今旣爲人樂見。則不忽慢。天童給侍。則得生梵世。此所以轉後報也。

刀杖不加。毒不能害。若人惡罵。口則閉塞。遊行無畏。如師子王。

○此明嗔障轉也。捨嗔則除內刀箭。逢害則外刀不傷。故云刀杖不加。嗔是害慈悲之毒藥。慈悲旣隆。則毒不能害。嗔是惡口腑臟。內旣無嗔。則罵者

口自閉塞。由無諸恐畏事。所以遊行無畏。如師子王也。

智慧光明。如日之照。

○此明癡障轉也。愚癡能障智慧。今癡障既除。使智慧朗徹。如日之照。△前轉三障滅三毒者。由此秘密藏中攝法無盡也。然此經在處。諸佛歡喜。故持者無憂。此經能度一切生死。故持者無病。此經如優曇華。一塵不染。故持者顏色鮮白。此經具無量妙德。故持者不窮。此經爲諸佛守護。使持者不生卑賤。此經萬善莊嚴。令持者不生醜陋。三障既

法華指掌疏卷五之二
三
轉三毒潛消。所以如慕賢聖。如師子王。如日之照。以三如字。顯露此法。了無餘矣。

⑧二總明一切障轉。

若於夢中。但見妙事。見諸如來。坐師子座。諸比丘眾。圍遶說法。

此下總結前四安樂行。成之相。但長文祇有長夜守護一句。至頌中。則廣彰長夜所守護之妙事。至奇至妙也。又前轉三障等。是現生後世書分功德。若於夢中等。是現生後世夜分功德。然妙事以夢見言者。一則驗其行成寤寐恆一。二則明諸法空。

相實無所有。正顯持經者理事雙融。自他俱寂。不爲凡情聖見之所迷。而圓證法華三昧矣。直指云。約事。卽承上一十四品。應念現前於夢寐中。約理。是行解功勳所至。但不作聖解爲上。若於夢中兩句總標。次別出妙事。有七種。一夢中見佛處座四眾圍遶。△問。至人無夢。何如來偏以夢言。答。夢與想。皆意識所發。况此識於遠行地後得純無漏。豈行四行菩薩得無夢耶。且弘經法師。念念以濟人。事急。正興慈運悲之際。豈盡同寒灰枯木之了無生意耶。然如來說如此等夢。皆欲興起在會發願。

弘經之想。想成而夢必至矣。

又見龍神。阿修羅等。數如恆沙。恭敬合掌。自見其身。而爲說法。

二夢中見無數八部恭敬圍遶於我。而我爲彼說法。直指云。此亦承法師品爲八部懸記憶念。應現於夢中也。

又見諸佛。身相金色。放無量光。照於一切。以梵音聲。演說諸法。

三夢見諸佛應身放光說法。○此承寶塔品分身諸佛雲集。應念現於夢中也。

佛爲四眾。說無上法。見身處中。合掌讚佛。聞法歡喜。而爲供養。得陀羅尼。證不退智。

四夢見佛爲四眾說法。見身處彼大會之中。聞法歡喜。證入等覺。○此承三周說法開權悟實。應念現於夢中也。

佛知其心。深入佛道。卽爲授記。成最正覺。汝善男子。當於來世。得無量智。佛之大道。國土嚴淨。廣大無比。亦有四眾。合掌聽法。

五夢佛知己根熟。卽爲授記。成最正覺。○此承三周普記知子心意泰然等。賜大白牛車。并記刳國

莊嚴等事。應念現於夢中也。

又見自身。在山林中。修習善法。證諸實相。深入禪定。見十方佛。

六夢見入山修習爲因。證實相是果。因果圓成。見十方佛。○此承序品所見諸聖真修之境。應念現於夢中也。天台判此。爲十行十向十地行相。

諸佛身金色。百福相莊嚴。聞法爲人說。常有是好夢。又夢作國王。捨宮殿眷屬。及上妙五欲。行詣於道場。在菩提樹下。而處師子座。求道過七日。得諸佛之智。成無上道已。起而轉法輪。爲四眾說法。經千萬億劫。

說無漏妙法。度無量眾生。後當入涅槃。如烟盡燈滅。七夢見佛八相成道。天台云。此或是初住位之佛。仍前次位寄談極果耳。夢作國王。卽是降兜率託胎降生三相。捨宮殿五欲詣道場。卽是出家之相。成道必降魔。卽是成道降魔二相。轉法輪入涅槃。二相如文。烟盡燈滅。卽機盡應亡也。直指云。此段大意有三。一謂法師能依四行弘經。則已貫徹五十五位階級。但因中密行。未及至果。是將成未成之相。故隨心現起於夜夢中。令法師歡喜安隱。自銳其志。取足道果。此是如來冥加之力也。二者。法

師既具四行之因。定有一真之果。故先夢權行。漸次取證。至後智滿。乃夢入相成道。以終道行首尾一如也。三者。法師雖則依因取果。至如來地。然亦迹門幻事。如水月空花。心佛眾生。皆是夢事。更有本門大旨。眾生心佛。皆悉不到。故重重舉夢。以起下文開迹顯本之大案也。④三總結行成。

若後惡世中。說是第一法。是人得大利。如上諸功德。此四句總結一品大案。後惡世者。畢竟難化之時也。第一者。卽最上妙法。畢竟難信之旨也。若能於難化之時。說難信之法。此人必能成就四安樂行。

教化眾生。如上晝夜所具大利功德。自應得矣。直指云。古以迹本兩門分。今時那畔。其迹門從序品至此品止。謂之開權顯實。廣明轉識成智。依因取果。是有修有證之相。亦有序正流通。序品挈全經大綱。爲序分。自方便品至授學無學人記品。三周說法。三乘人預獲道果之記。爲正宗分。從法師品至安樂行品訖。爲流通分。此從古所訓也。按法師品。品召藥王統舉一十八眾。凡聞一句一偈。皆爲授記。則九界攝盡無遺。此爲迹門十信位因行。然但證十八界全真之理。未與七大融會。故於現塔品。

會歸四智一如。三身一體。始本不二。依正雙融。以證真俗如如之實相。至達多品。以顯大法有師久受方克。復舉龍女當下成佛不在多時。於此則難易見消。冤親一致。以完迹門顯實大案。正宗之旨。於此已終。故言下召眾流通時。新記各誓弘經。佛不印可。而故視入十萬億大菩薩眾。而自誓忍苦弘經。以住持佛法。故名持品。此是迹門十住位因行。文殊知是事忍。不及法忍。乃代請弘經之式。佛爲妙闡四安樂行門。令諸菩薩安心忍地。直造真際。故名安樂行品。此是迹門十行位因行。上旣云

迹。則知有本。故繼之以涌出品耳。迹門開三顯一
一大科已竟。

妙法蓮華經授手卷第五之二

音釋

嫌 戶兼切不 鬪 丁候切
平於心也

憊 莫結切 寤寐 上音誤
輕易也

挈 苦結切

法華授手卷第五之二

三

妙法蓮華經授手卷第五之三

清楚衡雲峯沙門智祥集

從地湧出品第十五

品節云。此品顯自心發悟恆沙性德現前。乃盡持經之妙。由前得記聲聞。雖願持經。自力不充。難入生死。要假他力。所以佛令調護其心。亦有所未安也。今則有八恆河沙菩薩。從他方來。各願守護持經。而如來不許者。以從外來故。所謂從門入者。不是家珍。故云我自六萬恆河沙眾。此顯體用雙彰。故眷屬同等也。以此性德持經。方能妙契法身。

所以詣虛空向二世尊者。正顯生滅見謝延促同時。故五十小劫謂如食頃。由稱性行成。故四上首皆以行名。意顯以此持經方稱如來本懷也。然性德之境。殊非心識可知。故彌勒與八千恆沙皆生疑念。乃云不識一人。故與諸佛侍者同時請問也。此非小緣。所以先勉以被精進鎧發堅固意。始能受。而如來自言。今欲顯發宣示諸佛智慧自在神通力。師子奮迅力。威猛大勢力。盡在於此。豈細事哉。是如來之意甚深。非口耳知見可能及也。然如來謂此諸大眾皆是我成道已來所教化者。致令

會眾皆起疑念。謂我等目擊世尊成道四十年中。所教化者。無不知之。而此地湧之眾。皆所未見也。況此之大眾。皆久植德本。福慧雙修之人。我等久蒙佛教。而行解尙劣弱如此。何以少時便能成此勝化。故說父少子老之喻。以述疑情。殊不知此是如來顯本之妙。以祛二乘生滅之見。而明法身常住不滅也。故次繼以明壽量。直指云。此下一十四品。古科爲開迹顯本。蓋前十四品約主伴。皆屬迹門。主卽化身釋迦。機則轉凡成聖。乃至助化之眾。皆從他方來。終非法身真主。法性真機。若夫法性

眷屬。敵破本迹。直顯威音那畔無壞無成無修無證體用如如之妙境。故曰開迹顯本。今此品爲本門之序。由安樂行品獲益殊勝。故感他方聖眾。自誓於此土弘經。而佛不許可者。正爲涌出品開端。其聲未息。而無量菩薩從地涌出。正爲顯本之相也。地表當人本覺性地。卽前謂忍辱地也。涌出者。正顯最後生相無明頓破。涌出自性恆沙妙德也。依事得名。故曰從地涌出。又迹門爲三乘人開示佛之知見。屬今世門頭。本門爲地上菩薩悟入佛之知見。屬實際理地。非迹無以詣本。非本無以立

迹。本迹互融。體用一致。任運隨心。逢源自在。故曰從地涌出。

②二本門開迹顯本。分三。③一本門序分。從此下至汝等自當。因是得聞。分爲兩科。④一明地涌之相。分三。⑤一他方菩薩弘經。

爾時他方國土諸來菩薩摩訶薩。過入恆河沙數。於大眾中起。合掌作禮。而白佛言。世尊。若聽我等。於佛滅後。在此娑婆世界。勤加精進。護持讀誦書寫供養。是經典者。當於此土而廣說之。

天台云。他方菩薩既聞迹門流通弘經福大。咸欲

發願住此弘宣。是故請也。△持品中。如來力勸發願持經。猶恨其無人。新記見募覓之切。只得發願於他方。實畏難忍苦於娑婆也。今幸如是多眾捨彼就此。可謂如其所願。向下返止而不許者。良有故也。此諸菩薩曰。若聽我等。此一聽字。便是密得如來顯本之心。冥知佛不許可。故姑請耳。如來亦藉此眾。是從他方來。而非本有。況此妙法。從來不借他人力。若此處允許弘通。何以能召下方本有之眾。故知向下說壽量現神力種種妙用。皆從此不許中發。此卽便爲廢跡顯本之原委矣。

⑤二如來止荅不許。

爾時佛告諸菩薩摩訶薩眾。止。善男子。不須汝等護持此經。所以者何。我娑婆世界。自有六萬恆河沙等菩薩摩訶薩。一一菩薩。各有六萬恆河沙眷屬。是諸人等。能於我滅後護持讀誦廣說此經。

此正以顯本。而欲召下方菩薩之引也。天台云。如來止意有三。一則他方菩薩。各有已任。恐住此而廢彼也。二則於此土。結緣事淺。恐無巨益。三則若許此。則不得召下方眾。眾若不來。近迹何開。遠本何顯。由此三意。故止耳。召下亦有三意。一是我弟

子應弘我法。二以緣深廣。能益徧此土。三又得開
近顯遠。故召下也。△更須知。顯本之意。原爲新記
人識見狹小。未能深窮妙法淵底。染淨之見未忘。
苦樂之相不泯。故假下方菩薩。以明之也。新記人
但知離此外。別覓淨處樂處。故不願居此。殊不知。
此最苦處是最樂之境。極染處是極淨之場。地卽
一眞心地。六萬者。卽六根之數。恆沙菩薩。卽自性
本具之稱性功德也。各有六萬恆沙眷屬者。卽顯
根根塵塵周徧法界。是展轉無盡之意。然必謂下
方者。乃甚深無量處。故迹門三止身子。便得三根

授記。今本門一止諸菩薩。便要使三根人同臻一
眞妙境。有此深意。故云我自六萬等也。然未召
之先。而不出者。由我未滅故。須待我滅之後。自能
於此廣說是經。意更微妙。看者當須細省。

⑤三下方涌出之相。分二。⑥一經家敘相。

佛說是時。娑婆世界。三千大千國土。地皆振裂。而於
其中。有無量千萬億菩薩摩訶薩。同時涌出。是諸菩
薩身皆金色。三十二相。無量光明。先盡在此娑婆世
界之下。此界虛空中住。

此明佛止諸菩薩時隨念卽成地震眾湧之相也。

天台云。地裂者。開迹顯本也。其中者。常寂光也。下方者。法性之淵底也。下不屬此。空不屬彼。卽中道也。直指云。世界振裂者。表發本門後得智。一念入十種金剛道定。頓破生相無明也。所謂迷時爲火宅。悟後卽眞常。眾從地出者。正示自性心地開顯之相。所謂從天降下不爲貴。從地涌出始爲奇也。身金色者。表性具神用。皆從中道智體所生。下方虛空者。表住忍辱謙卑之地。△三千國土地皆振裂。無量菩薩同時湧出。好光景也。學者幸勿作文字看過。於此明得。始見靈山一會儼然未散。

是諸菩薩聞釋迦牟尼佛所說音聲。從下發來。所說音聲者。卽聞我娑婆世界自有六萬恆河沙等語。乃聞聲卽至也。要解云。此以真說。彼以真聞。文殊所謂心聞洞十方之意。從下發來四字。大有關要。實由聞字而生。則聞爲能發之因。從下四字爲所現之境。從者有所原本也。下者由內及外也。發者卽一念相應。不覺而有也。來者卽感而遂通。一時現前也。

一一菩薩皆是大眾唱導之首。各將六萬恆河沙眷屬。況將五萬四萬三萬二萬一萬恆河沙等眷屬者。

况復乃至一恆河沙。半恆河沙。四分之一。乃至千萬。億。那由他分之一。况復千萬億。那由他眷屬。况復億萬眷屬。况復千萬百萬乃至一萬。况復一千一百。乃至一十。况復將五四三二一弟子者。况復單已樂遠離行。如是等比。無量無邊。算數譬喻所不能知。

天台云。所將眷屬者。若人情往望。謂領六萬五萬者爲多。三二一者爲少。單已者爲隻獨也。若依文往尋。有况復字。則六五萬者少。單已者多。故偈云。單已無眷屬。其數轉過上。若依法門。一一皆是導師。能引眾人。至於寶所。當知一已非獨。六萬非多。

直指云。數有六層。初以六萬。減至一萬。爲一層。次以一恆河。減至半恆河。四分之一。爲二層。又次以千萬那由他。分之一。爲三層。又次以千萬那由他。減至億萬。爲四層。又次以千萬百萬。減至一萬。爲五層。又次以一千一百。減至五四三二一。弟子。爲六層。以對六根。主伴重重無盡。通屬十地。已至等覺之境。至單已無眷屬。是妙覺果海。不墮眾數。故曰樂遠離行。以妙覺遠離能所。眞常獨露之謂也。

④二菩薩來儀。分五⑤一三業供養。

是諸菩薩從地出已。各詣虛空七寶妙塔。多寶如來。

釋迦牟尼佛所到已。向二世尊。頭面禮足。及至諸寶樹下。師子座上佛所。亦皆作禮。右遶三匝。合掌恭敬。以諸菩薩。種種讚法。而以讚歎。住在一面。欣樂瞻仰於二世尊。

此經家所敘聖眾來儀也。直指云。詣空禮二如來足者。表妙行一一回向真如。以契本始二覺也。禮分身者。表後行之契前行也。行智冥交。故以讚覺者。而讚歎之也。△欣樂瞻仰四字。便是諸菩薩之深心本願。欲冀如來一發明之。是所以顯如來久遠教化之本也。

是諸菩薩摩訶薩從初湧出。以諸菩薩種種讚法而讚於佛。如是時間。經五十小劫。是時釋迦牟尼佛默然而坐。及諸四眾亦皆默然。五十小劫。佛神力故。令諸大眾謂如半日。

此明因契於果無久近相也。要解云。聖人神智方便法門。能延一日。以爲一劫。能促一劫。以爲一日。蓋道無遷變。情有頃久。猶如夢人不移一時。而夢歷多歲。則頃久之情。初無定也。故聖人對機。示現延促。而本無延促。所言菩薩讚佛經劫。則於促示延耳。又令大眾謂半日。則於延現促耳。所以然者。

法華指掌疏卷之三
將欲顯發宣示諸佛智慧自在神通之力。使忘延促之情。而深證實相也。華嚴云。一念普觀無量劫。無去無來亦無住。如是了知三世事。超諸方便成十力。夫能一念普觀無去來住。則了斯延促皆方便耳。

爾時四眾亦以佛神力故。見諸菩薩徧滿無量百千萬億國土虛空。

四眾肉眼。礙而非通。而能見無量國土者。假佛通力故也。要解云。夫於眾一多互陳。於時延促互現。於境通礙互用者。以明物量無窮時無止分無常。

而警發常情。使去其倒心。限意。依無礙智。圓融妙達。由是契進壽量祕說。而得入佛慧。成就佛身故也。是故此品事法。雖爲顯迹勸持。而實爲壽量引發也。（康）二陳問訊詞。

是菩薩眾中。有四導師。一名上行。二名無邊行。三名淨行。四名安立行。是四菩薩於其眾中。最爲上首唱導之師。

此明諸菩薩讚畢問安也。天台云。於恆河沙眾。而但舉四人者。欲擬開示悟入四十位耳。如華嚴但舉法慧功德林金剛幢金剛藏。說四十位也。唱導

法華授手卷第五之三

九

者。啟發法門名唱。引接物機名導。知音云。四導師。應四安樂行爲名。住慈悲室名上行。據法空座名無邊行。無希望名淨行。住忍辱地名安立行。上標六萬等。表師資或具六度。此爲四攝法乃六度之綱領。故曰於其眾中最爲上首。

在大眾前。各其合掌。觀釋迦牟尼佛。而問訊言。世尊。少病少惱。安樂行不。所應度者受教易不。不令世尊生疲勞耶。爾時四大菩薩而說偈言。
世尊安樂。少病少惱。教化眾生。得無疲倦。又諸眾生。受化易不。不令世尊。生疲勞耶。

天台云。世尊已離世間有漏五陰。豈有病惱。蓋欲示同人法。順土常儀。故此問耳。此但問訊釋迦。而不及多寶等者。是彼自敘師資之儀也。少病惱者。佛念六道眾生苦果無窮。故病。此約身言。三乘煩惱不斷。故惱。此約心言。若凡小順化。則如來安樂。此是問佛自處。下所應度者。是問化他。應以滅度者。而令滅度。不生疑難。可謂易度。九界眾生。能順佛語意。佛則不致有疲勞想耳。○三佛答安樂。爾時世尊。於菩薩大眾中。而作是言。如是如是。諸善男子。如來安樂。少病少惱。

此荅初偈所問也。如來荅以二如是者。則顯菩薩所問有深意存焉。明知世尊不許他方菩薩弘經。而召本弟子者。意在顯發本門大事故。問所應度者。受化易不。則世尊因之可以顯本。故荅云。如汝所問。恰當我心也。

諸眾生等。易可化度。無有疲勞。所以者何。是諸眾生。世世已來。常受我化。亦於過去。諸佛恭敬尊重。種諸善根。此諸眾生。始見我身。聞我所說。卽皆信受。入如來慧。

此荅次偈所問也。天台云。易度有二。一根利德厚。

者。世世已來。常受大化。始見我身。卽稟華嚴。入如來慧。果熟易零。此一類眾生。則易度也。

除先修習學小乘者。如是之人。我今亦令得聞是經。入於佛慧。

○二根鈍德薄者。世世已來。不受大化。爲此等人。故。須開頓說漸三藏法中。令調伏之。此聞法華。入於佛慧。大窾云。所以者何。下。釋易度之意。言利根者。我於過去爲沙彌時。曾教化之。今一見我身聞我法。卽入佛慧。若過去學小乘者。四十年中。徐徐引誘。今聞妙法。亦入佛慧矣。此如來密知菩薩發

願持經。故密以度生之法授之也。庚四偈讚隨喜。爾時諸大菩薩而說偈言。

善哉善哉。大雄世尊。諸眾生等。易可化度。能問諸佛。甚深智慧。聞已信行。我等隨喜。

此本門聖眾。因聞佛述新記。遠近因緣。二俱殊勝。故同聲稱讚也。稱善哉。讚大雄。是知如來將欲顯發。宣示諸佛智慧等三種威力也。能問諸佛二句。是別讚彌勒智積大樂說等之詞。我等隨喜者。是同志者其慶。然此隨喜二字。非同汎論。故後如來獨歎發隨喜心一句。庚五如來述歎。

於時世尊。讚歎上首諸大菩薩。善哉善哉。善男子。汝等能於如來發隨喜心。

菩薩前來以善哉讚佛。曰大雄世尊。今如來以善哉歎弟子。曰發隨喜心。是各善其善也。如來善能於久遠劫化度眾生。則無生不度也。菩薩善能於如來發隨喜心。則無行不成也。然此獨讚能隨喜者。爲欲密開壽量之遠本。唯此等菩薩。乃堪領受也。①二彌勒陳疑。分二。②一此土菩薩疑。又二。③一長行疑念。

爾時彌勒菩薩。及八千恆河沙諸菩薩眾。皆作是念。

我等從昔已來。不見不聞。如是大菩薩摩訶薩眾。從地湧出。住世尊前。合掌供養問訊如來。

天台云。此下是第二疑問序也。直指云。慈氏及八千恆沙大士。以迹疑本故。皆其作念。序品以權疑實。賴之以顯實。今復以迹疑本。亦復賴之以顯本也。蓋慈氏與諸菩薩。皆是從因至果。位居等覺。但爲新記引發故問。從昔已來不見不聞。亦復不知稱性流出。故疑從地湧出也。則知開迹顯本。乃爲破最後生相無明。以成一眞法界。始明悟入佛之知見。④二偈頌正問。分五。

庚 一問從何所來

時彌勒菩薩摩訶薩。知入千恆河沙諸菩薩等心之所念。并欲自決所疑。合掌向佛。以偈問曰。無量千萬億。大眾諸菩薩。昔所未曾見。願兩足尊說。是從何所來。

彌勒爲補處尊。已是承任之人。而妙法中。權實本迹。無不了了。然所以求教請決者。意爲將來與諸菩薩作龍華三會授記之原本也。故本迹二門。皆彌勒陳疑。關係非小。此言彌勒知入千等心之所念。則已爲彼露其頭鼻。但以并欲自決所疑一句。

爲蓋覆耳。然偈中所舉大眾菩薩。而不及二乘人。天等。顯此境是等覺位。中生相未忘之見。非泛泛可得而疑。若權小人。天能疑者。又不待彌勒問矣。須知通經前後。彌勒能幾問耶。今打頭便問個此從何來。要知此處大好一問。豈實不知來處者耶。

庚二問何因緣集。

以何因緣集。巨身大神通。智慧叵思議。其志念堅固。有大忍辱力。眾生所樂見。爲從何所來。

以何因緣集一句。是正問。下皆發其所疑。謂我觀此諸菩薩。身相廣大。神通無量。福似足矣。智慧三

昧禪定解脫不可思議。慧似足矣。兼之志念堅固。忍力弘深。又爲一切人天二乘權小眾生之所樂見。但不知爲何所求而來也。前云從何所來。是單問來處。此云爲何所來。謂是何因緣而來至此也。益知從地湧出者。不爲自求。又見彌勒所疑所請。亦有關係。庚三敘其數量。

一一諸菩薩。所將諸眷屬。其數無有量。如恆河沙等。或有大菩薩。將六萬恆沙。如是諸大眾。一心求佛道。是諸大師等。六萬恆河沙。俱來供養佛。及護持是經。將五萬恆沙。其數過於是。四萬及三萬二萬至一萬。

一千一百等。乃至一恆沙。半及三四分。億萬分之一。千萬那由他。萬億諸弟子。乃至於半億。其數復過上。百萬至一萬。一千及一百五十與一十。乃至三二一。單已無眷屬。樂於獨處者。俱來至佛所。其數轉過上。如是諸大眾。若人行籌數。過於恆沙。劫猶不能盡知。此問地湧之眾。師資皆不可量。大菩薩者。卽所謂神通智慧眾生。樂見之大菩薩也。將六萬恆沙。是所領之眷屬。况恆河廣四十里。其長不知經幾千萬里也。其中沙細如麵。今雖曰六萬恆河。亦不過隨佛自語。豈能知其數哉。今若師若資。皆來供佛。

及護是經。頌中唯此兩句。是一結局也。且大菩薩本有六萬恆沙。而所領之資。或六萬五萬。以至半恆河沙。偈中。一云其數過於上。二曰復過上。三曰轉過上。是知師者多。而弟子亦多。增數多而少數亦多。至於獨一無眷屬者。猶不可數。如是多中之眾。豈是一佛一師之所成就。且彌勒意中。疑佛云。不須汝等。我自六萬恆沙菩薩。今見如是之多。豈我世尊一已所化哉。庚四問師爲誰。

是諸大威德。精進菩薩眾。誰爲其說法。教化而成就。從誰初發心。稱揚何佛法。受持行誰經。修習何佛道。

若不因彌勒問個誰字。焉得知毘盧有主。法身有師。闡明無量壽佛。而致廣大神通耶。謂如是具大威德成大精進者。必領受不易。但不知與彼說法者爲誰。而教化成就至於此也。教化成就者。乃最後師也。又不知最初發心。從誰引發。至於中間。稱揚者何等佛法。受持者何等經教。修習者何等佛道。接連用數番誰何字。問得最妙。疑得極好。致使如來答處。便不可思議也。

庚五請決眾疑。

如是諸菩薩。神通大智力。四方地震裂。皆從中湧出。

世尊我昔來。未曾見是事。願說其所從。國土之名號。
我常遊諸國。未曾見是眾。我於此眾中。乃不識一人。
忽然從地出。願說其因緣。

此總束前問意。再四伸明。始見欲悟之心切也。如
是諸菩薩。如是妙神通。如是大智慧。此皆等覺位
中親見親知之境。四方震裂者。據理乃生住異滅
四相銷鎔。而本覺妙理於中道顯發。故曰昔所未
見也。我常遊諸國者。明唯識境中無處不周。竟未
見此。今日一旦忽然湧出。誠不可思議。但不知此
恆沙妙性。何因而有。何緣而具。

今此之大會。無量百千億。是諸菩薩等。皆欲知此事。是諸菩薩眾。本末之因緣。

此舉眾會。皆欲知此一事者。以其見處同疑念亦同。總皆欲究明此從地湧出始本二覺之妙智。本爲何因。末爲何緣也。是諸菩薩等。卽今會生疑者也。是諸菩薩眾。卽地湧之不識者也。

無量德世尊。惟願決眾疑。

彌勒至此。可謂明修棧道。意謂要知從前無量菩薩。卽是世尊無量妙德。是則前問從何所來。以何緣集。并及本末因緣。而彌勒自答已竟。此後如來

對荅之下。說壽量。現神力。但明無量德中之一二德耳。戊二他土菩薩疑。

爾時釋迦牟尼分身諸佛。從無量千萬億他方國土來者。在於八方諸寶樹下。師子座上。結跏趺坐。其佛侍者。各各見是菩薩大眾。於三千大千世界四方。從地湧出。住於虛空。各自其佛言。世尊。此諸無量無邊阿僧祇菩薩大眾。從何所來。

此正揭示當人本具圓行。將來亦如釋迦分身雲集。正等無二也。直指云。諸佛侍者。各質本師者。欲共知此本地風光也。蓋分身是果。地湧是因。以果

證因。故如此問。不然。則徒成過文矣。

爾時諸佛。各告侍者。諸善男子。且待須臾。有菩薩摩訶薩。名曰彌勒。釋迦牟尼佛之所授記。次後作佛。已問斯事。佛今荅之。汝等自當因是得聞。

分身諸侍者。皆大菩薩。與今會彌勒等無有二。而同疑同問。理所應然。且各各本師不荅。是各推其本。故以待釋迦酬荅。使之因是得聞也。妙樂云。彌勒所問不輕。世尊一向未曾顯說本門大事。因茲荅問。廣顯長壽。故須如來自開。所以分身不應荅也。△問。前云四眾承佛神力。見無量百千萬億國。

土。既能圓見。豈不圓聞。况彌勒與八千恆沙菩薩。出眾請問。可謂驚羣動眾。何分身侍者。竟不此聞。又復各問本主耶。荅不見道。分身侍者。與彌勒無二。彌勒既如是疑問釋迦。則侍者亦當疑問本師也。二則因此唱發彌勒後當作佛。益知分身侍者。皆未來分身諸佛。如是開彰。使彌勒與諸侍者。成未來靈山一會儼然。又在目前矣。本門序分竟。

①二本門正宗。從此去至分別功德十九行偈止。
分二。②一誠許。分二。③一長行。

爾時釋迦牟尼佛。告彌勒菩薩。善哉善哉。阿逸多。乃

能問佛如是大事。

如來讚善。而當機實有可讚之功。若彌勒不問。則師資徒然。問訊一翻。有甚奇特。由此一問。使本門大業開彰。故曰乃能問佛如是大事也。阿逸多。此云無能勝。卽彌勒名也。

汝等當共一心。被精進鎧。發堅固意。

直指云。迹門是身子等被精進鎧。故得打破化城。而歸寶所。獲三周授記。開示佛之知見。以取如來極果。爲報身佛也。今本門是等覺人被精進鎧。踏翻寶所。粉碎太虛。以成一真法界。是謂悟入佛之

知見。乃爲一生叅學事畢也。由此如來以三業加持。當共一心。是口加持。被精進鎧。是身加持。發堅固意。卽意加持。此是誠勉。向下許說。

如來今欲顯發宣示諸佛智慧。諸佛自在神通之力。諸佛師子奮迅之力。諸佛威猛大勢之力。

今欲顯發四字。是如來許說本門大事因緣。後乃一一宣明指示。其文不出壽量品諸佛智慧。卽如來壽量。諸佛與如來。俱是通稱。智慧與壽量。元無異理。則知今欲宣示者。卽壽量也。諸佛智慧。乃壽量總相。下自在神通等三力。皆壽量別相。言諸佛

自在神力者。卽後文云。諸善男子。今當分明宣牛
汝等。此正應宣示二字。若著微塵。及不著者。盡以
爲塵。一塵一劫。我成佛已來。復過於此百千萬億
阿僧祇。如此長遠壽量。豈非自在力耶。又云。自是
已來。我常在此娑婆世界。說法教化。亦於餘處百
千萬億阿僧祇國。導利眾生。豈非神通力耶。又云。
於是中間。我說燃燈佛等。入於涅槃。以種種方便。
說微妙法。能令眾生發歡喜心。豈非師子奮迅力
耶。又云。見諸眾生樂於小法。德薄垢重者。便謂如
來難可得見。眾生聞如是語。生難遭想。渴仰於佛。

便種善根。豈非威猛大勢力耶。故知今欲顯發。皆此等力。如此則三種力。俱有歸屬。

⑤二偈頌

爾時世尊。欲重宣此義。而說偈言。

當精進一心。我欲說此事。勿得有疑悔。佛智叵思議。
汝今出信力。住於忍善中。昔所未聞法。今皆當得聞。
我今安慰汝。勿得懷疑懼。佛無不實語。智慧不可量。
所得第一法。甚深叵分別。如是今當說。汝等一心聽。
當精進一心。頌被精進鎧。是誠慎之詞。我欲說此事。
頌諸佛智慧。言今欲宣示本門大事。若有疑悔。

則不能悟入此境。佛智叵思議。願自在神通。况諸佛所有自在神通。本不可思議。然汝今騰疑啟請。便知有本門大事可證。故出於二乘信力之上。住於菩薩忍善之中。堪當此法。故我今安慰於汝。慎勿懷疑生懼也。佛無不實語兩句。願師子奮迅。謂我所說法。如師子奮迅。捉象捉兔。皆用全力。說大說小。皆實不妄也。所得第一法兩句。願威猛大勢之力。謂如來威猛大勢。最爲第一。豈是思議分別所能知者。我故教汝當精進一心。勿得有疑懼也。如是今當說兩句。是許說。如是二字。指上三種神

力。今當說者。正說如來壽量。明諸佛智慧。故令一心聽受。①二正說。分三。②一正開近顯遠。又分二。③一略開明動執生疑。又二。④一略陳開顯。又二。⑤一長行。又二。⑥一雙答。

爾時世尊說此偈已。告彌勒菩薩。我今於此大眾。宣告汝等。阿逸多。是諸大菩薩摩訶薩。無量無數阿僧祇。從地湧出。汝等昔所未見者。我於是娑婆世界。得阿耨多羅三藐三菩提已。教化示導。是諸菩薩。調伏其心。令發道意。

此去盡壽量品。正開近顯遠。阿逸多是疑問之機。

下舉地湧之眾。乃今會所不識者。向問是誰所化。今答是我。問從誰發心。答是我調伏。令發道意。此諸菩薩。皆於是娑婆世界之下。此界虛空中住。向問從何所來。今答云。此界虛空中住。此界者。是不離當處也。虛空者。卽第一義空也。⑤二雙釋。於諸經典讀誦通利。思惟分別。正憶念。此釋明所答之義。天台云。師知弟子修智斷二德。於諸經分別。是修智。正憶念。是修斷。正答前稱揚何佛法受持行。誰經修習。何佛道。謂此眾大小乘諸經悉皆通達。以正憶念。修習佛道也。

阿逸多。是諸善男子等。不樂在眾。多有所說。常樂靜處。勤行精進。未曾休息。

此申明住下界之義。謂汝問常遊諸國未見是眾者。由其不樂在眾。而樂靜處也。

亦不依止人天而住。常樂深智。無有障礙。亦常樂於諸佛之法。一心精進。求無上慧。

汝問不識一人者。由不依止人天而住也。知音云。良以此眾精進。彌勒懈怠。此眾讀誦通利。彌勒棄捨習誦。此眾不依人天。彌勒常遊族姓。一一背馳。安得而識之哉。此段總答以何因緣集一句。由此

大眾常樂深智。以至一心求成佛道。是此因緣而
來集也。④二偈頌。分二。⑤一頌雙答。

爾時世尊。欲重宣此義。而說偈言。

阿逸汝當知。是諸大菩薩。從無數劫來。修習佛智慧。
悉是我所化。令發大道心。此等是我子。依止是世界。
常行頭陀事。志樂於靜處。捨大眾憤鬧。不樂多所說。
如是諸子等。學習我道法。晝夜常精進。爲求佛道故。
在娑婆世界。下方空中住。志念力堅固。常勤求智慧。
說種種妙法。其心無所畏。

前問處節節言誰。此答處歷歷言我。方見問答有

據也。阿逸下。頌荅所習之道。所事之師。捨大眾憤
鬧。卽是不親近國王大臣及沙彌等。不樂多所說。
卽不近外道婆羅門等。如是諸子。雖樂寂靜似乎
小乘。而又精進修習佛道。晝夜不怠。爲求下三句。
頌所住之處。志念下四句。頌上求下化。一一與長
行前後互知。⑤二頌雙釋。

我於伽耶城。菩提樹下坐。得成最正覺。轉無上法輪。
爾乃教化之。令初發道心。今皆住不退。悉當得成佛。
我今說實語。汝等一心信。我從久遠來。教化是等眾。
此卽爲下節張本。知音謂。長行云我於娑婆成菩

提。况娑婆一大千量。佛以徧法界身。化地湧眾。似無可疑。故頌以伽耶等言。據迹之人。但見伽耶一會。豈能化其多眾。今言是我教化發心。以至當來成佛。實所難信。此彌勒等有父子老之疑也。我從久遠來兩句。爲後說壽量伏案。旣云伽耶得道教化。而又言久遠教化。使人知此久眾卽是新化。則彌勒等。益難信也。非談法身壽量。人惡乎能知。

⑧二因疑更請。分二。⑨一長行。又二。⑩一疑。

爾時彌勒菩薩摩訶薩。及無數諸菩薩等。心生疑惑。怪未曾有。而作是念。云何世尊於少時間。教化如是。

無量無邊阿僧祇諸大菩薩。令住阿耨多羅三藐三菩提。

此執迹而疑本。以爲顯本之肇端也。少時間。舉世尊於現生成道未久。其所化如是之多。而且人人福慧具足。由此生疑不信。故作念請決也。

⑤二請分三。⑥一法說。又二。⑦一執近生遠疑。

卽白佛言。世尊。如來爲太子時。出於釋宮。去伽耶城不遠。坐於道場。得成阿耨多羅三藐三菩提。從是已來。始過四十餘年。世尊云何於此少時。大作佛事。以佛勢力。以佛功德。教化如是無量大菩薩眾。當成阿

耨多羅三藐三菩提。

伽耶。此云山城。去菩提場二十里。城甚險固。城西南五六里。至伽耶山。谿谷杳冥。峯巒危險。印度國俗稱靈山。四十年者。說法頌云。阿含十二方等入。二十二年般若談。法華在般若後說。故云四十餘年。直指云。此出疑情有三。一滯於化迹。而晦三世平等。二滯於一會化機。而晦於恆沙性具。三滯於有修有證。而晦無修證理。故疑詞先舉爲太子時。二居伽耶不遠。三明成道不久。此皆眾所共知。云何少時作此大事。次下返釋云。莫非是佛勢力。是

佛功德。乃能如是耶。此獨疑於佛。

① 二執遠生近疑。

世尊。此大菩薩眾。假使有人於千萬億劫。數不能盡。不得其邊。斯等久遠已來。於無量無邊諸佛所植諸善根。成就菩薩道。常修梵行。

彌勒既不知其人。而又言久植善根者。則亦見其所疑所請也。據本文。卽因聞佛歎住處德業甚深莫測。故此疑也。

② 二譬說分二。① 一開譬。

世尊。如此之事。世所難信。譬如有人。色美髮黑。年二

十五。指百歲人。言是我子。其百歲人。亦指年少。言是我父。生育我等。是事難信。

此因事迹相反。故舉返喻徵究。以便顯本也。直指云。譬如有人。喻佛。色美髮黑。喻迹門應身。年二十五。喻太子出家得道。僅四十餘年。所謂於少時間。此以近迹疑遠。指百歲人爲子。喻地湧菩薩。皆久修德業。終非今日新成之佛所化。百歲人指年少爲父。喻諸菩薩詣空禮讚。是以遠本疑近也。况父子之義。本自相當。而父子之年。何獨相反。故曰是事難信。但此中執定迹門化身爲主。而疑本門大

用非伴。初則以迹疑本。不期因本破迹。此皆是善巧方便之間也。惟此主伴相返。以爲正意。其餘必不謬配。①二合譬。

佛亦如是。得道以來。其實未久。而此大眾諸菩薩等。已於無量千萬億劫。爲佛道故。勤行精進。善入出住。無量百千萬億三昧。得大神通。久修梵行。善能次第。習諸善法。巧於問答。人中之寶。一切世間甚爲希有。今日世尊。方云得佛道時。初令發心。教化示導。令向阿耨多羅三藐三菩提。

此奉法合喻標顯本之致也。直指云。佛亦下三句。

合色美至年二十五。而此大眾下。合百歲人是子。此中不出十度。無量劫爲佛道。卽智度。勤行精進。卽進度。善入出住。卽禪度。無量三昧。卽慧度。得大神通。卽願度。久修梵行。卽戒度。修諸善法。卽施度。巧問荅。卽方便度。人中寶。卽力度。甚爲希有。卽忍度。以忍居後。合住柔和忍地。今日世尊下。合百歲人。指年少爲父。天台云。九次第定。是善入。師子奮迅三昧。是善出。超越三昧。是善住。此藏通意也。從初地至十地。名善入。十地入重立門。再修凡夫事。名善出。妙覺徧滿。名善住。別教意也。畢法性三昧。

名善入。首楞嚴三昧。名善出。王三昧名善住。圓教
意也。癸三請荅。

世尊得佛未久。乃能作此大功德事。我等雖復信佛
隨宜所說。佛所出言未曾虛妄。佛所知者。皆悉通達。
世尊下兩句。是實所難信語。我等下三句。是意知
如來發言有準。謂我故知如來欲彰遠本。是隨宜
說。化地湧眾。皆不妄說。知無不達。是不謬說。此唯
我彌勒輩。獨所知也。若未學初機。須要如來宣明
乃可。

然諸新發意菩薩於佛滅後。若聞是語。或不信受。而

起破法罪業因緣。唯然世尊。願爲解說。除我等疑。及未來世諸善男子。聞此事已。亦不生疑。

天台云。今所請者。正爲未來及今新發意者。由行淺信輕喜生誹謗。謗則墮苦。不退者雖能信而不謗。不能增道。若爲分別。令謗者則生信。信者則增道矣。△我等雖復信。總爲新發意者。聞語生疑。彌勒自己明明說出。則知彌勒之疑。原與智積文殊無異。反覆辨難。無非欲後學決疑堅信。以成無上菩提也。知音問。喻中有少父指老子。老子指少父。法中但合少指老。不合老亦指少何也。荅。究文應

有。或譯人忽略。然義直重父。少子老一邊。故不合老指少也。問。經文何處見老認少爲父。答。前初涌出時。禮讚三世十方訖。然後獨問訊釋迦。是老認少處。①二偈頌分二。②一頌法說。

爾時彌勒菩薩。欲重宣此義而說偈言。

佛昔從釋種。出家近伽耶。坐於菩提樹。爾來尙未久。此頌執近迹。謂見出家成道人。所其知。其實未久。此諸佛子等。其數不可量。久已行佛道。住於神通力。善學菩薩道。不染世間法。如蓮華在水。從地而涌出。皆起恭敬心。住於世尊前。是事難思議。云何而可信。

此頌疑遠本。謂眾不可紀。復是久修。其神通三昧。超過一切。皆宿學也。以蓮華在水一句。上喻不染世法。下喻從地涌出。如此者。皆循循恭謹於如來前。則有似爲如來所化。論其事實懸遠。觀其情又逼真。此實所難信者也。

佛得道甚近。所成就甚多。願爲除眾疑。如實分別說。此頌結請答。謂世尊成道若久。此不足疑。所化之眾淺少。亦不足疑。今以少近之時。化此難思之眾。不唯未來障深慧淺者爲疑。卽今現受化者。亦未免不疑也。如此之事。若非如來宣示顯發。則返增

其累。

⑤二頌喻說。

譬如少壯人。年始二十五。示人百歲子。髮白而面皺。是等我所生。子亦說是父。父少而子老。舉世所不信。喻意一如前釋。但長文於父言色美髮黑。頌中於子言髮白面皺。乃前後互現也。

世尊亦如是。得道來甚近。是諸菩薩等。志固無怯弱。從無量劫來。而行菩薩道。巧於難問答。其心無所畏。忍辱心決定。端正有威德。十方佛所讚。善能分別說。不樂在人眾。常好在禪定。爲求佛道故。於下空中住。

彌勒既謂不識一人。又焉知彼志固無怯。遠劫行道。以至忍辱心決定。十方佛所讚耶。其所謂不識。正是識之極矣。但欲爲新發意及未來實不識者。令其證到彌勒不識之境。

我等從佛聞於此事無疑。願佛爲未來演說令開解。若有於此經。生疑不信者。卽當墮惡道。願今爲解說。是無量菩薩。云何於少時。教化令發心。而住不退地。如來垂教之心固切。而菩薩輔化之誠亦殷。彌勒之請詞。步步迫切者。非謂佛不微細垂慈。只要行人信根堅固。洗除心垢。漸入佳境。稍著疑情。便墮

惡道。其悲愍深懷。慈濟苦心。真與佛等矣。略開明
動執生疑已竟。

妙法蓮華經授手卷第五之三

音釋

鎧可亥切 祛邱於切 棧仕限切 憤音鬧 鑿鏡去聲 皺音縐

妙法蓮華經授手卷第五之四

清楚衡雲峯沙門智祥集

如來壽量品第十六

品節云。此品來意。由彌勒騰疑。世尊說壽。以顯本迹之妙。竭盡私衷。破二乘生滅。以極法身之理。隨緣普應。隱顯無礙。始知如來智慧甚深無量。其智慧門難解難入也。意謂修學人。不透法身。終非實證。不名佛知見也。寶塔品中。雖遠假多。寶如來。竅啟法身。而諸大眾。但信多寶。而不識釋迦。同是一身一智慧力。以諸聲聞所見。知鹿苑說法者。爲

眞佛更不知猶有向上事耳。又聞將欲滅度。重起
生滅之心。雖聞授記。但知佛說。未悟佛心。終難遠
取菩提之果。然悟旣非眞。修豈是實。則如來出世
本懷。畢竟不盡。前雖多方指示。尙是依他。至此如
來極盡神力。露出本懷。故示法身壽命無量也。且
醫師一喻。明滅而不滅。直使二乘了生而非生。親
證法身。眞因已植。而此品顯理已圓。至下品但分
別功德而已。大窾云。此經自最初說無量經。入無
量定。放無量光。以顯如來事事無量。在方便譬喻
二品。顯如來善巧無量。藥草品見法雨無量。化城

品顯劫數無量。知見無量。所化聲聞弟子無量。寶塔品見分身無量。地涌品見所化菩薩無量。雖然。如皆如來應化邊事。然未極顯法身慧命平等無量也。故此品專言如來壽命無量。顯於塵點劫前成道已竟。故名如來壽量品。△如來是總十方三世之通稱。壽量乃聖凡同具之一理。眾生執相妄而分長短。如來洞源底。而證無生。至於降神示生。以及唱滅等。皆對機示現。今欲爲新記人祛生滅知見。啟最後玄關。故極顯天真之無量壽也。是以名品。②二廣開明斷惑生信。分二。③一誠信重請。

又分三。④一如來誠信。

爾時佛告諸菩薩及一切大眾。諸善男子。汝等當信解如來誠諦之語。復告大眾。汝等當信解如來誠諦之語。又復告諸大眾。汝等當信解如來誠諦之語。

誠諦。卽真實無妄之謂。如來四十年間。權巧方便。事事說盡。獨此遠本未彰。非故爲鄭重遲迴也。纔一開口。苟非信不及。便是解不透。不信不解。不將此段大事。向虛妄中了却耶。今見會眾信根旣純。時節已至。何容特地隱忍。然未語之際。三番喚醒。三番垂誠。總要會眾信發解生。信得及。自解得透。

解得透由信得及。是信之一字。實解悟根源也。

⑧二會眾重請。

是時菩薩大眾。彌勒爲首。合掌白佛言。世尊。惟願說之。我等當信受佛語。如是三白已。復言。惟願說之。我等當信受佛語。

在如來自謂。則曰誠諦。在彌勒等聞之。卽佛語也。佛語未有不誠諦者。如來三喚。彌勒等卽三番願請。如來三誠。彌勒等卽三番承當。胸中已知有一段微妙信得及矣。只是世尊不會說出。故解悟無因也。所以三請之後。又復重懇。其求解之念。誠切

且至矣。⑧三世尊再誠。

爾時世尊。知諸菩薩三請不止。而告之言。汝等諦聽。既三請不止。且再四承當。非篤信者不能。世尊已知彌勒等可堪承受也。然必重喚汝等。再囑諦聽者。良以此事甚深微妙。惟恐偶生疑障也。

⑨二正答所問。分二。⑩一長行。又二。⑪一法說。又二。⑫一三世益物。又二。⑬一明過去益物。復二。⑭一出機近情。

如來秘密神通之力。一切世間。天人及阿修羅。皆謂今釋迦牟尼佛。出釋氏宮。去伽耶城不遠。坐於道場。

得阿耨多羅三藐三菩提。

如來秘密等。正應前品誠許云。今欲顯發宣示諸佛智慧。以至諸佛自在神通三種之力。至此以下。正是顯發。前言諸佛自在神通。此言如來秘密神通。正許說相照也。如來。卽品題所舉十方三世之通稱。秘密等。卽品題壽量二字。此一句總前諸佛智慧等數句。秘者。唯三世如來之所證。密者。惟一切諸佛之所護。神。謂九界不能測。通。謂三世不可易。曰如來壽量。曰諸佛智慧。意卽一句。而本門要義全居此耳。一切世間等。總舉九界滯近迹而不

知遠本。故曰皆謂釋迦爲新成之佛。此亦牒前彌勒疑辭也。⑤二破近顯遠。分二。⑥寅一特顯久遠。又二。⑦卯一法說。

然善男子。我實成佛已來。無量無邊百千萬億那由他劫。

此下正破執遣迷。以顯久遠之本。上誠諦聽當信者。此也。如來旣說成佛久遠。則謂伽耶近成父少子老之執。可破矣。⑧卯二喻說。又分三。⑨辰一舉喻爲問。

譬如五百千萬億那由他阿僧祇三千大千世界。假

使有人抹爲微塵。過於東方五百千萬億那由他阿僧祇國。乃下一塵。如是東行盡是微塵。諸善男子。於意云何。是諸世界可得思惟校計知其數不。

天台云。餘經明數多。但以不可說塵沙等爲喻。今經喻於遠壽。直下塵被點之界已不可說。況不下塵之界。寧當可說。下塵不下塵之界。尙不可說。則下塵不下塵世界之塵。又寧可說耶。然又云復過於此。則又寧可說耶。那由他。此云萬億阿僧祇。此云無數。△前言大通智勝滅度劫量。不過以一三千世界爲塵。下塵之處。亦不過言千國土下一點。

今言以五百千萬億那由他之阿僧祇世界爲塵。又過如是多多國土。乃下一點。則其超數量遠矣。如來說在智佛所爲王子說法。已爲顯本之談。但此時爲下根說因緣。先露一斑。以爲此處定案。至此正顯本處。令新記一閱便領。則不費繁詞矣。益見前誠許中言諸佛自在神通之力。師子奮迅之力。大勢威猛之力。不出此品矣。辰二以不知荅。彌勒菩薩等。俱白佛言。世尊。是諸世界無量無邊。非算數所知。亦非心力所及。一切聲聞辟支佛。以無漏智。不能思惟知其限數。我等住阿惟越致地。於是事

中亦所不達。世尊如是諸世界無量無邊。

此中舉三等人不知。阿惟越致亦名阿鞞跋致。此云不退轉。彌勒答以非算數知。非心力及。則已剝絕三等人命根矣。善哉輔化之誠。恩非淺淺。次則舉出三等人不知之意。謂聲聞緣覺雖有無漏智。以之思惟。則遠矣。限以世界邊際而言。數以微塵世界而言。不退菩薩雖至等覺位。數量不忘。亦所不達。謂亦所不達者。由一分生相未泯。豈識如來秘密神通哉。故祇云如是世界無量無邊而已。

④三合顯長遠。

爾時佛告大菩薩眾。諸善男子。今當分明宣語汝等。是諸世界。若着微塵。及不着者。盡以爲塵。一塵一劫。我成佛已來。復過於此百千萬億那由他阿僧祇劫。此正顯本。直指云。仍以上着塵之國。及中間五百萬億那由他阿僧祇未着塵之國。盡是東方着與不着一切國土。盡抹爲塵。一塵一劫。配佛成道已來。復過如此百千萬億等劫也。要解云。諸佛壽量。悉皆無量。眾生壽量。亦復如是。但迷其智。故妄逐生死。如墮一地獄。至無數劫。豈非無量壽耶。苟不迷墮。與佛何殊。△分明宣語者。以機熟信成。非從

前權巧逗機秘而不言也。言成佛已來。單推過去。已有不可思議劫。返復推窮。則前前無始矣。既知前前無始。便識後後無終。總三世之壽量。曷可終窮哉。△問。若如此。渺漠無終。誰復知斯壽量長遠。答。不見如來謂。今欲顯發宣示諸佛智慧。既曰佛慧。則唯佛知見。故一切聲聞辟支。及不退菩薩。皆不能知見。而獨覺者知見耳。如此難思難量。故謂自在神通之力也。

④二益物所宜。分三。⑤一益物處。

自從是來。我常在此娑婆世界。說法教化。亦於餘處。

百千萬億那由他阿僧祇國。導利眾生。

此明諸佛出世由秘密神通之力也。知音云。雖示現生。而實不生。於塵點劫來。或在娑婆。或化餘國。然刹海固有彼此。而法身徧在導利眾生。此所以成秘密遠本也。△愚謂。前舉壽量。顯法性身。歷三世而無窮。此舉國土。顯法性土。徧十方而無際。以如是身。居如是土。說如是法。化如是眾。於其中間。則何法不說。何生不度。所謂但見皇風成一片。不知何處有封疆。則從始至終。唯一如是也。

④二拂迹疑。

諸善男子。於是中間。我說然燈佛等。又復言其入於涅槃。如是皆以方便分別。

知音云。從塵劫來。以至今日。中間或說得燃燈記。爲發心之始。或說入於涅槃。爲究竟之終。報化非無生滅。皆方便權智之分別。此所以爲神通近迹也。△上言從是來。此言是中間。二是字。卽秘密神通也。看者不可輕忽。此中間二字。亦非淺近。旣舉塵點不思議劫。則中間示現生滅。亦不可思議。燃燈佛舉最後者。等字指燃燈已前不思議劫所事之佛。此皆言示生之方便也。旣曰示生。仍當示滅。

故云又復言其入於涅槃。則不思議劫中間示滅。亦方便也。是知世尊過去無量劫。以方便分別如是妙法。未來無量劫。亦以方便分別。是知虛空可盡。方便無窮也。④三明益物。

諸善男子。若有眾生來至我所。我以佛眼。觀其信等。諸根利鈍。隨所應度。處處自說。名字不同。年紀大小。亦復現言當入涅槃。

上言示生示滅。但未明何故欲示。至此始明其示生滅之所由也。若有眾生。卽指九界言。來至我所者。乃理智冥會。機發感通之時。佛眼。卽大圓鏡智。

普照無遺。此爲能觀。信等。卽五根。乃利鈍之機。是其所觀。以五根中慧。是了因。信進念定四根爲緣。因。則各有利鈍大小之不同也。隨所應度者。由機感不同。則示應有異。處處者。指上百千萬億那由他阿僧祇國言。自說名等。不出報化爲體。而名隨機變。則有不思議名。年大小者。大卽勝應。小者劣應。此亦隨機示壽長短之不同也。卽完上中間二字。亦卽無生示生。乃完足我說燃燈佛等一句。亦復現言等。是應以滅度而化者。則非滅現滅。亦卽完上又復言其入於涅槃也。如是者。總明迹門佛

事。如水月空華。大窾云。究實而論。無一物非如來身。無一名非如來號。無一刹那非如來出現時。無一芥子處非如來寂滅地。塵塵爾。刹刹爾。念念爾。物物爾。豈以一身一名一時一地。可限量哉。此顯過去時以秘密神通作此現耳。

又以種種方便。說微妙法。能令眾生發歡喜心。

上言示生滅不同。此明說小大不異。種種方便。權也。說微妙法。實也。以權說實。同歸真際。見法無二也。然所說法。各稱其性。故令歡喜。此正完上方便分別四字。由是知。前四字中。攝盡權實二教。非尋

常所謂分別也。

①二明現在益物。分二。②一明機感。

諸善男子。如來見諸眾生樂於小法。德薄垢重者。

此節完上自從是來我常在此娑婆世界說法教化也。見諸眾生者。卽鏡智鑑機。別指一類根鈍垢重者爲言。樂小法者。因德薄垢重。無大乘想。所以但執近迹而不達遠本之秘密也。德薄緣了二善功用微劣。垢重見思未除也。由善因微惑垢重。不知遠本。只得爲彼示生滅也。

③二明應化。分二。④一非生現生。又二。⑤一現生

爲是人說。我少出家。得阿耨多羅三藐三菩提。

此申明今日隱勝現劣。示八相成道。欲令下劣之機方便附近也。

然我實成佛已來。久遠若斯。但以方便教化眾生。令入佛道。作如是說。

此總結本迹中所有秘密神通。作如此說也。前二句結示顯本。後三句結示明迹。卯二利益。分二。辰一明形聲。

諸善男子。如來所演經典。皆爲度脫眾生。或說己身。或說他身。或示己身。或示他身。或示己事。或示他事。

諸所言說皆實不虛。

此明現生形聲益物也。說卽聲教。示卽形規。直指云。此廣明本事。舉三事攝一切事。每一事略以體用自他釋之。說已身者。是對十地菩薩。廣明法性身之本末也。說他身者。卽對二乘及六道眾生。廣說應化二身之本末也。又三身總名自身。九界悉名他身。說者。爲發明所有之身因。何所感也。示已身者。是應地上。示法性身也。示他身者。是應九界。示應化等身也。又三身同示已身。其餘隨機應變。皆示他身。示已事者。如法華華嚴之壽量。皆爲已

事阿含方等般若。皆名他事。未結皆實不虛者。謂自他一如。體用一致。若權若實。皆是化他之法。俱不虛也。已上明如來事無礙法界。④二釋不虛。又二。⑤一照理不虛。

所以者何。如來如實知見三界之相。無有生死。若退若出。亦無在世。及滅度者。

此下總釋益物不虛。今先釋形益不虛。天台云。應身不離法身。法身無形。亦無起滅。眾生有起滅之機。感於法身。如來願力應同起滅。故約三界。以明所示不虛也。直指云。此以根本智。釋成三界如幻。

以明所示三事皆夢中佛事。總結歸於一眞清淨之理無礙法界耳。△三界之相一句爲總。則如來於諸相中。皆以佛眼如實知見。無有錯謬。三界眾生有分段變易二種生死。如來見知則無也。二乘有退出之心。有在世滅度之想。如來見知則無也。故楞嚴云。如來自住三摩地中。見與見緣。并所想相。如虛空華。本無所有。非實非虛。非如非異。不如三界。見於三界。如斯之事。如來明見無有錯謬。

此以中道智會歸三界。非實非虛。直指云。已上明

所示三事。皆是眞常湛寂。總結歸眞俗一如。爲理事無碍法界。△如來旣知三界聖凡生死涅槃。總皆如幻。是無有矣。應不必示生示滅。說已說他。如上三事。又何爲而設耶。須知三界之相。雖則非實。而又非虛。六道眾生不達其非異。而視之爲異。二乘聲聞不識其非如。而見之爲如。旣虛實同異之見不忘。又不得不行施設也。以如來之力觀之。虛實之相不可得。同異之相亦不可得。原不似三界人之幻妄知見。則如斯所有生死涅槃。虛實同異。故如來明見皆無錯謬。所以於無生示生。非滅現

滅。至于說已說他。皆實不虛也。明見二字。卽根本智。該攝五眼。②二稱機不虛。以諸眾生有種種性。種種欲。種種行。種種憶想分別。故。

上明二十五有之依土。此明所依之有情也。直指云。二十五有類類善惡。根性不一。故有種種性。依性發業不一。故有種種欲。隨業所遷不一。故有種種行。行復起業。業復起行。故有種種憶想分別。已上舉三相續前之二種。

欲令生諸善根。以若干因緣譬喻言辭。種種說法。所

作佛事未曾暫廢。

此正對機施已他聲益。欲令漸頓之機生種種善根。故現若干已他身事也。直指云。此明佛四智三身拔火宅眾生之苦。使業果不相續也。令者。卽一大時教也。生諸下。指九界總說。以若干下。近則四十年來。遠則應上文自是已來。利生之智。如日旋空。故曰未曾暫廢。已上明如來事事無礙法界。△欲令生諸善根。則九界人。各得其益。而又以若干因緣譬喻言詞。是方便極多。說種種法。是法門亦廣。況又經塵點劫。如此教化則無恠乎所成曰涌

出之眾甚多。初非伽耶近迹可疑也。如是者豈非
師子奮迅之力耶。④二非滅現滅分二。⑤一本實
不滅。

如是我成佛已來。甚大久遠。壽命無量阿僧祇劫。常
住不滅。

如是二字。指上利生佛事未曾暫廢。以明長遠益
物也。謂我自成佛已來。如此方便教化。隨其壽命。
則有無量阿僧祇。常住於此娑婆。及十方無量諸
國土中成就眾生。又豈止今一娑婆之地涌眾耶。
一世界中所成就者。汝等尙自難信。況無量國中

所成就之菩薩數量。汝等又豈能信哉。

諸善男子。我本行菩薩道。所成壽命。今猶未盡。復倍上數。

此舉因況果。以明常住也。因中修積壽量。至今不盡。益知果壽之難盡也。是非大勢威猛力耶。天台云。佛自修圓因。登初住時。已得常壽。倍上無量阿僧祇劫之數。況果壽耶。譬如作太子時。祿已不盡。况登尊極祿用。寧可盡乎。

④二現滅利益。分二。⑤一不滅眾生有損。

然今非實滅度。而便唱言。當取滅度。如來以是方便。

教化眾生。

由上言因中所積壽量。尙不可窮。今何便言滅度。故云今非實滅。然所以唱言滅度者。正爲有一類當示涅槃而得度者。作方便耳。此正爲後醫父伏案。

所以者何。若佛久住於世。薄德之人。不種善根。貧窮下賤。貪着五欲。入於憶想。妄見網中。

此申明方便唱滅之旨。直指謂佛若久住於世。其界外薄德之人。耽着化城。不種菩提善根。界內五趣眾生。貧無福慧。窮昧衣珠。甘爲六道下賤。妄貪

五欲火宅。展轉迷惑矣。三因相續。曰憶想。三緣相生。曰妄見。由是因緣纏繞。故曰網中。

若見如來常在不滅。便起憍恣而懷厭怠。不能生難遭之想。恭敬之心。

前是如來鑒機。此是眾生起惑。六道眾生。既爲憶想妄見之所羅籠。則於佛不生難遭想。不起恭敬心。而返生厭怠憍恣。實可憐也。憍恣。卽增見惑。厭怠。卽生思惑。既不生難遭想。則諦理不明。見不能斷也。不生恭敬心。而道品何修。思不能息也。佛不示滅。則有損無益矣。辰二唱滅於物有益。

是故如來以方便說。比丘當知。諸佛出世。難可值遇。謂佛難值者。欲眾生速發修心也。由眾生樂着小法。見思垢重。聞三身不滅。則不修道。何能契證佛果。

所以者何。諸薄德人。過無量百千萬億劫。或有見佛。或不見者。以此事故。我作是言。諸比丘。如來難可得見。斯眾生等。聞如是語。必當生於難遭之想。心懷戀慕。渴仰於佛。便種善根。是故如來。雖不實滅。而言滅度。

此釋明難遇之意。謂何故言佛難值遇。蓋三乘五

性之人。業輕障淺者。或得見佛。德薄垢重者。過無量劫。不能遇佛。或見或不見。此皆就應化身言也。以此事故。我說佛難值遇。一切眾生聞如是語。先不生難遭想。今得生矣。先懷憍慢。今戀慕矣。先懷厭怠。今渴仰矣。先不種善根。今得種矣。此皆是如來方便示滅之所致也。如是者。豈非師子奮迅之力耶。明三世益物已竟。

⑩二總結不虛。

又善男子。諸佛如來法皆如是。爲度眾生。皆實不虛。此結上文。爲下喻本。謂示生示滅。非釋迦一佛創

式。乃十方三世一切諸佛度生方便之程法。而皆實不虛也。知音云。皆實不虛一句。近應品初誠諦聽之語。遠照方便譬喻藥艸等諸品言無虛妄之文。應知要有此節。始完方便品中諸佛開三顯一前權後實。以至後三變土中多寶佛及分身諸佛之示生示滅。皆實不虛也。⑤二喻說。分二。⑥癸一開譬。又二。⑦子一良醫治子譬。又三。⑧丑一醫父遠行譬。又二。⑨寅一譬應化。

譬如良醫智慧聰達。明鍊方藥。善治眾病。此超譬上我以佛眼觀。有能應之智也。良者善也。

天台云。喻佛內有三達五眼。卽是八術。妙得藥性。外識一切眾生起病之根源也。智慧者。卽權實二智。深知二諦也。聰達者。五眼鑒機。頓漸不差也。十部教。文理甚深。如明鍊方藥。依四悉檀。徧治頓漸眾生煩惱之病。如善治眾病也。△梵語悉檀。此云徧布施。是如來垂化之門也。一世界悉檀。隨方異說。令生歡喜益也。二爲人悉檀。生善益也。三對治悉檀。破惡益也。四第一義悉檀。入理益也。

其人多諸子息。若二十。乃至百數。
○若十是聲聞。二十卽緣覺。百數是菩薩。△前火

宅中。以十喻菩薩。二十喻二乘。百數喻五道。乃迹門中全居三界爲言。今本門所開顯者。皆塵點劫事。故上言我常在此娑婆。已至餘國教化。原爲發明所成就甚多。由薄德之人信之不及。故說壽量長遠如是。所以定將百數爲菩薩也。如天台明菩薩之子。凡有三種。文繁不備。廣如科註中明。

④二譬現滅。

以有事緣。遠至餘國。

○此譬過去應化中現滅也。以此土機生。彼方緣熟。此見應滅。彼見應生。名遠至餘國。⑤二還已復

去華受手卷第五之四

七

去譬分二。寅一譬機感。

諸子於後。飲他毒藥。藥發悶亂。宛轉於地。

○此下譬現在應化益物也。今正譬上機應相關。見諸德薄垢重眾生。於佛滅後着邪師之法。故云飲他毒藥。不知出世要道。云悶亂輪轉諸趣。墮在三界。云宛轉於地。寅二譬應化分二。卯一譬非生現生。又二辰一譬形聲益物。

是時其父。還來歸家。諸子飲毒。或失本心。或不失者。遙見其父。皆大歡喜。拜跪問訊。善安隱歸。我等愚痴。誤服毒藥。願見救療。更賜壽命。

眾生以三界爲家。如來垂慈現迹處處示生。故曰
還來歸家。飲毒者。貪嗔垢重也。失本心者。謂失先
所種三乘善根也。不失者。惑垢稍輕。亦能隨分覺
照也。遙見者。眾生爲見思障故。不得親奉法身。曰
遙見。見聞佛出。皆生喜敬。此明意業淨也。拜跪是
身。問訊是口。謂眾生遇佛。雖未受化。而已得三業
淨矣。善安隱者。如來於法身地上。示現受生。豈非
安穩而歸。我等下。申明眾生遇佛虔懇求救之辭。
願見救療。卽求佛大悲以拔苦也。更賜壽命。卽求
證法身。是乞佛大慈而與樂也。此節譬現形益物。

下節方明聲益。

父見子等。苦惱如是。依諸經方。求好藥草。色香美味。皆悉具足。搆篩和合。與子令服。

○依諸經方者。卽三世如來垂權之法也。藥草。卽諸教中所詮八萬法門。色以譬戒。戒防身口事相。顯彰故。香以譬定。定具諸功德熏一切善法故。味以譬慧。慧能具足種種法味故。又色是般若。照一切法。香是解脫。離一切臭。味是法身。具一切理。空觀如搆。假觀如篩。中觀如合。將此法與一切眾生修行。故名令服。

而作是言。此大良藥。色香美味皆悉具足。汝等可服。速除苦惱。無復眾患。

大良藥等。通喻諸佛所有頓漸聲教禪定解脫。知見波羅密皆已具足。眾生若能如法修行。卽頓超諸有。故曰速除苦惱。苦惱旣除。眾患永息。卽得如醫王善安隱歸矣。眾患卽我法二執。并一切根本煩惱。及分段變易二生死苦。辰二譬利益不虛。其諸子中。不失心者。見此良藥色香俱好。卽便服之。病盡除愈。

惑淺障輕者。不失昔因。聞經開解。便得生死永盡。

此由佛形聲所益。喻如病愈。如今會身子等利根精進。聞法得果。亦得授記。將來成佛之類。是也。

④二譬非滅現滅。分二。辰一不久應死譬。

餘失心者。見其父來。雖亦歡喜問訊。求索治病。然與其藥而不肯服。所以者何。毒氣深入。失本心故。於此好色香藥。而謂不美。

知音云。此喻鈍根懈怠者。如五千退席人。初於序品。未嘗不同眾禮讚。及三請許說後。皆退席而去。故先曰見其父來等。後又曰然與其藥等。所以謂先既同禮訊求治。後不服藥者何也。以入毒

深。失心久故。謂好藥而不美也。

父作是念。此子可愍。爲毒所中。心皆顛倒。雖見我喜。求索救療。如此好藥。而不肯服。我今當設方便。令服此藥。

此去皆喻諸佛唱入涅槃。由秘密神通滅實不滅也。父作是念等。知音云。攝前餘失心者而言。喻佛愍念薄德之人。於佛起憍怠。爲三毒所傷。皆成顛倒也。雖見下。發揮顛倒。見父求療。業屬其顛。與藥不服。猶爲其倒。故佛不得不以滅度而爲教化方便也。此皆敘父所念。

卽作是言。汝等當知。我今衰老。死時已至。是好良藥。今留在此。汝可取服。勿憂不差。作是教已。復至他國。遣使還告。汝父已死。

此正敘父言。天台云。化期將竟。故云衰老。死時已至者。當入涅槃也。佛雖滅而經教存。故云好藥。今留至他國者。卽此方現滅。他方現生也。遣使者。四依菩薩語。眾生云。佛已滅度。但留此法。我今宣說。汝當奉行。知音云。如寶塔中。以大音聲。普告四眾。誰能於此娑婆。廣說妙法華經。今正是時。如來不久當入涅槃也。好藥今留。如佛欲以此妙法付囑。

有在。(辰)二諸子惺悟譬。

是時諸子聞父背喪。心大憂惱。而作是念。若父在者。慈愍我等。能見救護。今者捨我。遠喪他國。自惟孤露。無復恃怙。常懷悲感。心遂醒悟。乃知此藥色香美味。卽取服之。毒病皆愈。

此喻明子悟知非。知音云。有六義。喻滅度化生之妙。一聞父喪心憂。二念父在能救。三惟孤露無恃。四因悲感有悟。五知藥色香美味。六服藥病盡得愈。喻斯眾生聞如是語。生難遭想。心懷戀慕。渴仰於佛。便肯受持讀誦此經。得開示悟入佛知見之

善根也。△一切眾生未聞正法時。皆不覺有本生
父母也。今雖覺有。祇緣曠劫來違背已久。似喪不
存。思之不得。覓之無由。故致心大憂惱。然此憂惱。
便是致悟之由。作是念下。乃思喪考妣之情。未得
法身主宰曰孤。未得慈悲覆被曰露。失父曰無恃。
失母曰無怙。由是感慨情深。心遂惺悟。既悟其心。
便識其法。心法雙明。所以諸惑永滅。毒病皆愈也。

⑤三尋後還來譬。

其父聞子悉已得差。尋便來歸。咸使見之。
既承教開解。悟佛知見。則親證法身。常住不滅。是

尋便來歸意。妄盡真融。物物全彰。父子情忘。頭頭演妙。是咸使見之意。○子二治子實益譬。

諸善男子。於意云何。頗有人能說此良醫虛妄罪不。不也。世尊。

直指云。舉全喻召諸人詢其虛妄。正爲剖破迹門疑關。直造本門實際。會眾被此一撈。粉碎乾坤。故曰不也世尊。謂法不虛傳。修者必證。故無虛妄。開譬已竟。○癸二合譬。

佛言。我亦如是成佛已來。無量無邊。百千萬億那由他阿僧祇劫。爲眾生故。以方便力。言當滅度。亦無有

去。善受戶。余育五之四。

三

能如法說我虛妄過者。

喻既詳陳。合法可知。故曰我亦如是也。成佛已來。無量等。約法身秘密遠本。結其不滅。無有虛妄。爲眾生下。約應身神通近迹。非滅現滅。結其不生。亦無虛妄。無有能說虛妄過者。是總結益物不虛。以完諸佛如來法。皆如是一節。蓋彌勒疑云。如斯之事。世所難信。又慮佛滅後。諸新發意菩薩。聞此起破法因緣。佛則重重校量。誠實不虛。欲使聞者生決定信。由信得益。所以後品如來爲其分別功德也。④二偈頌。又二。⑤一頌法說。又二。⑥一頌三世

益物。又三。①一頌過去成道久遠。

爾時世尊。欲重宣此義。而說偈言。

自我得佛來。所經諸劫數。無量百千萬。億載阿僧祇。
長行最初誠聽許說。頌文則略。此但頌章初秘密
一句。正頌我實成佛已來無量無邊阿僧祇劫。其
塵點之喻。攝頌其中矣。補註云。百生千。千生萬。萬
生億。億生兆。兆生京。京生秭。秭生該。該生壤。壤生
溝。溝生澗。澗生正。正生載也。

常說法教化。無數億眾生。令入於佛道。爾來無量劫。
爲度眾生故。方便現涅槃。而實不滅度。常住此說法。

前四句頌從本垂迹。長行謂我常在娑婆及餘國說法之文。後四句頌方便示滅。警悟眾生。而實眞常湛寂。身智如如。

我常住於此。以諸神通力。令顛倒眾生。雖近而不見。此頌章初神通之力一句。申明佛既常住不滅。眾生何緣不見。蓋眾生與佛本來無間。由法身本體神妙難思。眾生由顛倒心。不能契證。所謂終日行而不自覺。故云雖近不見也。

①二頌現在非生現生。

眾見我滅度。廣供養舍利。咸皆懷戀慕。而生渴仰心。

眾生既信伏質直意柔軟。一心欲見佛。不自惜身命。
時我及眾僧。俱出靈鷲山。

因眾生不見與佛同體法身。近而不滅。但見應化
佛身有滅。故供舍利。懷戀慕質直意軟。唯願見佛。
而不惜身命。以是虔懇故。感佛及僧俱出靈山。有
此近迹也。俱出靈山句。更須活看。

我時語眾生。常在此不滅。以方便力故。現有滅不滅。
餘國有眾生。恭敬信樂者。我復於彼中。爲說無上法。
汝等不聞此。但謂我滅度。

我時下二句。頌顯本。以方便下二句。頌示迹。雙結

現生現滅皆方便耳。餘國下四句。頌此土緣滅彼土緣興。又於餘百千萬億諸國說法也。汝等不聞此此字。卽方便教也。眾生不識如來方便。出彼沒此。便謂我滅度也。①三頌未來應機不滅。

我見諸眾生。沒在於苦惱。故不爲現身。令其生渴仰。因其心戀慕。乃出爲說法。

天台云。此頌未來。長行但寄常住不滅四字。今頌廣演其文。△然我所以示滅者。因眾生沒於苦惱。見佛常在。不生恭敬。而返生憍恣。故不現身。待其渴仰戀慕。因之又出生爲說法矣。此言現身不滅。

下言現土不滅。

神通力如是。於阿僧祇劫。常在靈鷲山。及餘諸住處。衆生見劫盡。大火所燒時。我此土安隱。天人常充滿。園林諸堂閣。種種寶莊嚴。寶樹多華果。衆生所遊樂。諸天擊天鼓。常作衆伎樂。雨曼陀羅華。散佛及大眾。此頌承上或出或沒。或此或彼。皆佛神通之力。有如是也。其實法身住於阿僧祇劫。亦不離此靈山。及餘諸處。益見法身徧一切處。無在不在也。有言三災壞時。世界俱壞。未審佛又在何處耶。然劫壞之見。乃衆生見。而我此土本來安隱。此又見法性。

土真常不滅。亦無存不存也。天人下。明正報不滅。園林下。明依報不滅。此皆出陳實報莊嚴之境。此中亦有無量眾生。遊戲快樂。非比同居之業報深沉者。擊天鼓。表佛無問自說也。雨花散佛等。表佛說賢聖位次也。常作眾樂。表法樂無盡也。如此境界。皆是諸佛智慧神通。發揮本門法性妙境。亘古恆存。亦即拂上三變娑婆之權迹也。

我淨土不毀。而眾見燒盡。憂怖諸苦惱。如是悉充滿。是諸罪眾生。以惡業因緣過阿僧祇劫。不聞三寶名。淨土不毀一句。明理不變。其所以變者。由諸眾生

惡業因緣之所至也。三寶常住世間。而眾生自不能聞。豈他過哉。此頌長行薄德之人。不種善根等。諸有修功德。柔和質直者。則皆見我身。在此而說法。或時爲此眾說佛壽無量。久乃見佛者。爲說佛難值。此頌一類不失本心。因聞法開解者。由久修功德。柔和質直。則成就四安樂行。非罪業眾生不聞三寶者比。故能見我真應之身。聞我本迹之教。爲此等眾故。說壽無量也。若是久不見佛惡業眾生。但只說佛難值。以或時二字。是不定之詞。或時說壽命。或時說佛難值。總皆對機之方便也。此頌結長

行如是我成佛已來甚大久遠等。久乃見佛下。結
頌或有見佛或不見等。

我智力如是。慧光照無量。壽命無數劫。久修業所得。
知音云。前云神通力。今云智慧力。以神則示自他
身事。智則說自他身事。以上頌法身壽量不滅。壽
命下。頌報應身壽量不滅。長文所謂我本行菩薩
道。所成壽命。今猶未盡。是也。故曰久修業所得。△
此四句。總完許說中如來今欲顯發宣示諸佛智
慧一節。謂我向許汝等顯發宣示之智慧。如上所
說。而我智力本迹如是而已。以慧光照無量。結自

在神通力。以壽命無量。結師子奮迅力。久修所得。結大勢威猛力。三皆言力者。由此能破惑除疑。廢迹顯本。使聞者證品獲益。唯此四句結盡全品。

⑩二頌皆實不虛。

汝等有智者。勿於此生疑。當斷令永盡。佛語實不虛。此囑令極生實信。謂汝彌勒等。既聞如上說壽長遠。說法周徧。宜乎於此。不疑其得道近而成就多也。卽有猶豫。當令永盡。須知我如來所說。不誑不妄也。⑪二頌譬說。分二。⑫一頌開譬。如醫善方便。爲治狂子故。實在而言死。無能說虛妄。

此單頌喻意以長行詳譬。故頌略之。○二頌合譬。我亦爲世父救諸苦患者。爲凡夫顛倒實在而言滅。以常見我故。而生憍恣心。放逸着五欲。墮於惡道中。此單頌法合。我爲世父兩句。頌非生示生。爲凡夫二句。頌非滅現滅。以常見我四句。釋明現滅之故。我常知眾生行道不行道。隨所應可度。爲說種種法。常知者。卽以佛眼鑑機。無不明了。隨所應_{可者}。卽現隨類身。說隨類法。此皆不得已。而施方便也。每自作是意。以何令眾生得入無上慧。速成就佛身。此方述成度生本意。可見說權實明本迹。無非要

使一切眾生入無上慧。證得本有如來無量壽而已。正開近顯遠已竟。

妙法蓮華經授手卷第五之四

音釋

怯去劫切剝子了擣刀上聲篩使平音和賀音合葛音差楚
又疾病除也罪不定之辭也不也與弗同切軟作

法華持三昧經卷第五十四

三

妙法蓮華經授手卷第五之五

清楚衡雲峰沙門智祥集

分別功德品第十七

品節云。此品來意。由聞說壽長遠。已悟法身常住。及見三變淨土。了三界唯心之境。以此真信爲因。可契如來常住真果。依此持經。方爲妙利。況法身常住。世間淨土。不離當處。故勉能作如是觀者。是爲深信解相。所以分別功德不可思議。到此生滅情忘。淨穢見泯。妙悟已極。方爲真實持經。故此品天台判五種法師。屬觀行位。是知持經。意在妙悟。

非文字也。故能超越一切有爲功德。天台云。佛說壽量。地湧過去。弟子靈山。現在弟子。得種種益。故言功德。淺深不同。故爲分別。此文是本門第二授記段。若據聞經功德。但屬餘殘。今準當得菩提之言。復同授記。法華論分此文。有法力修行力二種。法力者。由法而成。故名爲力。有五。一證。謂六百八十萬億得無生忍。乃至一生得菩提者。是也。二信。謂入世界微塵數發菩提心者。是也。三供養。謂是菩薩得大法利時。於虛空中。雨天華等者。是也。此三如今品。四聞法。如隨喜品。五讀誦持說。讀誦。如

法師功德品。持者。追指法師安樂行勸持三品。說者。如神力囑累二品。皆屬法力。修行力者。苦行如藥王品。教化如妙音品。護難如觀音陀羅尼二品。示功德如莊王品。護法如普賢品。知音云。此亦諸佛自在神通力所加庇也。不然。何談壽量於少時。而功德遍於大會。豈不速成就哉。正照藥草喻品。如來無量無邊阿僧祇之功德也。④二總授法身記。分三。⑤一經家總序。

爾時大會。聞佛說壽命劫數長遠如是。無量無邊阿僧祇眾生得大饒益。

此總標獲益。曰大會者。統舉九界也。是所益之機。聞佛長遠壽量。是能益之法。得大饒益。具如下釋。

②二如來分別

於是世尊。告彌勒菩薩摩訶薩。阿逸多。我說是如來壽命長遠時。六百八十萬億那由他恆河沙眾生。得無生法忍。

佛召當機。正爲分別。如上聞經所證之功德也。六百下。總牒上品所說之法。無生忍者。天台云。入圓教十住位。故華嚴經云。初發心住。一發一切發。得如來一身無量身。清淨妙法身。湛然應一切。卽此

義也。又華嚴疏云。阿者。入無生義。無生之理。統該萬法。菩薩得此無生。達諸法空。斷一切障也。

復有千倍菩薩摩訶薩。得聞持陀羅尼門。

○聞持陀羅尼。入十行位。大論明三陀羅尼。一聞持陀羅尼。得此者。一切語言諸法。耳所聞者皆不忘失。卽名聞持。二者分別知陀羅尼。三者入音聲陀羅尼。具見翻譯名義。△千倍者。多如上沙數。一千倍也。聞持屬耳根。已上二種。皆屬自覺。此去位愈增。而數愈廣。故此二俱約沙計數。

復有一世界微塵數菩薩摩訶薩。得樂說無礙辯才。

○得樂說等。入十向位。華嚴回向品云。菩薩得決定辯才無盡藏。演說一切佛平等法。是也。△此言一世界。卽小千世界。比上千倍沙數。則又無量矣。此屬舌根利益。

復有一世界微塵數菩薩摩訶薩。得百千萬億無量旋陀羅尼。

○旋陀羅入初地。淨名疏云。旋者轉也。謂旋轉分別。破塵沙惑。顯出恆沙佛法也。△此一世界。卽中千界。以初地證三平等理。六根中。卽意根功德。由意能默容十方三世。故曰得旋陀羅尼也。

復有三千大千世界微塵數菩薩摩訶薩。能轉不退法輪。

○不退義見前。此入第二地。△準下八生。此應十
生得菩提果。已上敘數。從凡至聖。自少增多。明增
數。次下又從中千至小千。自多減少。明減數。可見
得果大者。眾復少矣。

復有二千中國土微塵數菩薩摩訶薩。能轉清淨法
輪。

○此入三地。數約二中千者。一千須彌爲小千。千
倍小千爲中千。千倍中千爲大千。今兩倍中千。是

減數也。清淨法輪者。前二地既已離垢。今第三地能發真如妙光。則所轉之法。皆清淨無染故。

復有小千國土微塵數菩薩摩訶薩。八生當得阿耨多羅三藐三菩提。

○八生入四地。七生入五地。六生入六地。五生入七地。△此約位約數。文不次第配說者。或當時得功德者。不合其位數有之。又佛語巧妙。舉一隅而三隅在也。亦或譯人省文。見其錯綜也。

復有四。四天下微塵數菩薩摩訶薩。四生當得阿耨多羅三藐三菩提。

此有四箇四天下之塵眾。入八地矣。

復有三。四天下微塵數菩薩摩訶薩。三生當得阿耨多羅三藐三菩提。

此有三箇四天下塵眾。入九地。望妙覺。只三生矣。復有二。四天下微塵數菩薩摩訶薩。二生當得阿耨多羅三藐三菩提。

登十地者。有兩箇四天下塵眾。望妙覺。只二生矣。復有一。四天下微塵數菩薩摩訶薩。一生當得阿耨多羅三藐三菩提。

○一生入等覺金剛心。自初住至等覺。位位各破

一品無明。總四十一品。更破一品微細無明。入妙覺位。然本門得道數倍眾經。非但數多。又兼熏修日久。緣本垂迹。處處開引。中間相值。數數成熟。今世調伏。會歸法華也。自法華已後。有得道者。如拈拾耳。拈拾者。謂如田家收拾餘穗也。

復有八世界。微塵數眾生。皆發阿耨多羅三藐三菩提心。

此中舉數。以八世界之塵。則倍上數多矣。眾生但指六根清淨位人。聞佛說壽。卽發正等覺心。則眞因已植。爲未來成佛之人。可謂慧燄相繼。而無盡

也。③三時眾供養。

佛說是諸菩薩摩訶薩。得大法利時。於虛空中。雨曼陀羅華。摩訶曼陀羅華。以散無量百千萬億寶樹下。師子座上諸佛。并散七寶塔中。師子座上釋迦牟尼佛。及久滅度多寶如來。亦散一切諸大菩薩。及四部眾。又雨細末栴檀沉水香等。於虛空中天鼓自鳴。妙聲深遠。又雨千種天衣。垂諸瓔珞。珍珠瓔珞。摩尼珠瓔珞。如意珠瓔珞。遍於九方。眾寶香爐。燒無價香。自然周至。供養大會。一一佛上。有諸菩薩。執持幡蓋。次第而上。至於梵天。是諸菩薩。以妙音聲。歌無量頌讚。

法華指掌疏卷之三
歎諸佛。

○時眾聞深遠法。得大饒益。欲報佛恩。而設供養。亦是寄事。以表領解。上述門開權顯實。菩薩所有悟入。而未見設供。由大事未畢。今本門開顯。大事既彰。彌勒總申領解。故以供養表之也。△此段亦經家敘置。於得大法利時下。宜有彼諸菩薩一句。或省文也。佛既分別諸功德已。而諸菩薩卽陳供標喜見得法喜充滿也。頌中又明釋梵如恆沙無數佛土來。以散供三佛及諸菩薩。是表本門事畢。以因徹果。圓解已證。卽前恆沙眾生得無生法忍。

之瑞也。又雨栴檀等香。表體具十無盡藏戒香。卽千倍菩薩。得聞持陀羅尼之瑞也。天鼓自鳴而妙聲深遠。表具四辯。卽一世界塵數菩薩。得樂說無礙辯才之瑞也。又雨千種天衣。表具忍德。卽是菩薩得旋陀羅尼之瑞也。垂瓔珞。表法身體具萬德。卽是菩薩轉不退清淨法輪之瑞也。徧九方者。以下方攝於本會。表普利九界也。寶爐香徧周至大會。表十地菩薩智德普熏也。幡蓋次第至於梵天。表十地福德普覆。是十生得菩提之瑞也。妙音讚佛。則與佛共處。是等覺隣於極果之瑞也。如此者

皆由如來分別所有功德。至此顯彰。故一時出現。

⑤ 三明當機領解。分三。⑥ 一頌時眾領解。

爾時彌勒菩薩。從座而起。偏袒右肩。合掌向佛。而說偈言。

佛說希有法。昔所未曾聞。世尊有大力。壽命不可量。無數諸佛子。聞世尊分別。說得法利者。歡喜充徧身。如來分別於先。彌勒詳頌於後。師資道合。真異體同情矣。然彌勒既受位。於將來卽已成佛。是知彌勒頌。卽佛頌也。初二句。頌顯本門大事。乃希有法。世尊下二句。頌諸佛自在神通三種力也。無數下。

總頌佛子得益之多。而歡喜無量也。

④二頌如來分別。

或住不退地。或得陀羅尼。或無礙樂說。萬億旋總持。
或有大千界。微塵數菩薩。各各皆能轉。不退之法輪。
復有中千界。微塵數菩薩。各各皆能轉。清淨之法輪。
復有小千界。微塵數菩薩。餘各入生在。當得成佛道。
復有四三二。如此四天下。微塵諸菩薩。隨數生成佛。
或一四天下。微塵數菩薩。餘有一生在。當成一切智。
如是等眾生。聞佛壽長遠。得無量無漏。清淨之果報。
復有八世界。微塵數眾生。聞佛說壽命。皆發無上心。

世尊說無量不可思議法。多有所饒益。如虛空無邊。前八行頌所分別之功德。一如前釋。後四句結利益無窮。蓋彌勒領解既深。知其利益不可思議。因此重舉。令滯迹懷疑者。了然無礙。益知彌勒現迹大有關鍵。③三頌會眾供養。

雨天曼陀羅。摩訶曼陀羅。釋梵如恆沙。無數佛土來。雨栴檀沉水。繽紛而亂墜。如鳥飛空下。供散於諸佛。天鼓虛空中。自然出妙聲。天衣千萬種。旋轉而來下。眾寶妙香爐。燒無價之香。自然悉周徧。供養諸世尊。其大菩薩眾。執七寶幡蓋。高妙萬億種。次第至梵天。

一一諸佛前。寶幢懸勝幡。亦以千萬偈。歌詠諸如來。
如是種種事。昔所未曾有。聞佛壽無量。一切皆歡喜。
佛名聞十方。廣饒益眾生。一切具善根。以助無上心。
此頌時會供養。皆瑞應也。又頌明有無數釋梵諸
天。各持妙花。從無數佛土外來者。爲慶法而至也。
所散香花有如瑞雪。而繽紛有如眾鳥而搖逸。是
皆不思議瑞也。餘則如文可解。末四句結成前瑞。
謂如上許多瑞應不可思議者。由佛名聞十方故。
至諸天遠到。所以花雨無量也。又見所饒益之眾。
皆不思議。所以燒香散花持蓋與讚等種種事業。

皆不可思議。無非助發實相。使見聞咸益也。故曰以助無上心。本門正宗分竟。

③三本門流通。共十一品半經。△問。諸經流通未有如此之多。迹門已有五品。而本門又置十一品半。共一十六品半矣。而序正返少於流通。其故何哉。答。諸佛如來。本爲一大事因緣出現於世。開示悟入佛之知見。眾生不明此者。由法未流通故。使知見不開。無明壅塞。此回如來出世。費盡周旋於四十年中。方便引接。至今會始得一切人天明證此事。故卽各授將來成佛之記。便是此回功成事。

就所以廣說流通者。一則欲新記人圓成因中大
行二利兼修。再則使未來眾生先投大種。至再覩
如來發明大事。庶幾引起不難矣。流通廣意。其在
斯乎。但按經文勢本門正宗。當在如來現神力後。
於時十方世界通達無礙如一佛土處止。其意方
完。然此去三品半經。不過明其弘經功德利已利
人之實證。信毀罪福。其應驗如此。功德既明。罪福
既驗。然後廣現神力。慶已慶人。而正說之能事始
畢。方可付囑流通也。其間意思儘多。臨文始釋。今
爲不廢古置。就此流通。分爲兩段。①一從此至不

法華指掌疏卷五之三
十一
輕品三品半。明弘經功德深重。以勸流通。功德深
重者。卽後四信五品之功德也。分三。⑤一此去至
隨喜品。明因中功德。以勸流通。分二。⑥一現在四
信。分四。⑦一一念信解。又二。⑧一長行。又三。⑨一
舉示其人。

爾時佛告彌勒菩薩摩訶薩。阿逸多。其有眾生。聞佛
壽命長遠如是。乃至能生一念信解。所得功德。無有
限量。

天台云。此去至當知。是爲深信解相。明現在四信。
四信者。一一念信解。未能演說。二畧解言趣。三廣

爲他說四深信觀成。直指云。一念信解者。舉前十
二眾之遺流。以明佛種三世相繼也。因是未來世
諸佛。故召彌勒委付。此中全重能生一念信解。信
必兼解者。解若不明。信是彷彿。不可入道。故前列
十二功德。以信收後。此又補出一解字。而云一念
者。謂初聞如來壽量境界。心中豁然頓開。如千年
暗室。一燈朗照。全暗盡消。蓋千里之程。歸在一步。
刹那三世。理不誣也。故云所得功德無有限量。向
下是較量功德。⑤二總明功德。

若有善男子。善女人。爲阿耨多羅三藐三菩提故。於

八十萬億那由他劫行五波羅蜜。檀波羅蜜。尸羅波羅蜜。羼提波羅蜜。毘黎耶波羅蜜。禪波羅蜜。除般若波羅蜜。以是功德比前功德百分千分百千萬億分不及其一。乃至算數譬喻所不能知。

此以深淺相較。以見事不勝理也。上言一念信解。蓋能信則遠本確有可據。能解則遠本了然洞徹。是一念中。已得法身之理矣。彼行五度者。行非不廣。歷八十萬億等時。非不長。以至廣之。行行於至長之時。而不及一念信解。由彼尙屬力求事迹。此則豁然理源也。須知此一念卽無念。般若與一念

無二故。所以除也。⑤三明位不退。

若善男子。善女人。有如是功德。於阿耨多羅三藐三菩提退者。無有是處。

有如是眞信解生者。於菩提決不退轉。妙樂云。七信名位不退。八信已去爲行不退。大品明別教菩薩退位有魔。不退無魔。圓教初心魔不得便。況不退位耶。⑥二偈頌分三。⑦一格量多少。

爾時世尊。欲重宣此義。而說偈言。

若人求佛慧。於八十萬億那由他劫數。行五波羅蜜。於是諸劫中。布施供養佛。及緣覺弟子。并諸菩薩眾。

珍異之飲食。上服與卧具。栴檀立精舍。以園林莊嚴。如是等布施。種種皆微妙。盡此諸劫數。以回向佛道。前四句。總頌於多劫中行五度也。次十二句。分頌施度。彼以種種微妙。供養三寶。歷八十萬億等劫。而不少衰。布施亦云極矣。而況志非小果。回向佛道乎。回向佛道。應上發菩提心一句。

若復持禁戒。清淨無缺漏。求於無上道。諸佛之所歎。若復行忍辱。住於調柔地。設眾惡來加。其心不傾動。諸有求法者。懷於增上慢。爲斯所輕惱。如是亦能忍。此分頌戒忍二度。戒則求無上。爲諸佛所歎。是何

等戒行。忍。則惡類咸恣。而增慢俱釋。又是何等忍力。非勤求佛慧者。不能如此。

若復勤精進。志念常堅固。於無量億劫。一心不懈息。又於無數劫。住於空閑地。若坐若經行。除睡常攝心。以是因緣故。能生諸禪定。八十億萬劫。安住心不亂。持此一心福。願求無上道。我得一切智。盡諸禪定際。此分頌進禪二度。精進志念。歷無量億劫。而無一息之懈。可謂堅固極矣。禪。則坐卧經行。歷八十億萬劫。而心不少亂。可謂盡禪之邊際矣。要皆是勤求佛慧。非志趨小果者。比禪度。前四句。明修禪之

法以空閑處行坐爲緣。除睡攝心爲因。中四句。明由此因緣而得禪定。故安住多劫。其心不亂。後四句。明由定心生福。由福發願。由願求道。得一切智。而盡定之邊際也。

是人於百千萬億劫數中。行此諸功德。如上之所說。此四句結上五度功德。如此者其功德可謂廣矣。以此殊勝功德。起下較量之意。⑤二追頌人相。有善男女等。聞我說壽命。乃至一念信。其福過於彼。若人悉無有。一切諸疑悔。深心須臾信。其福爲如此。此正頌行此五度功德。百千萬億。不及一念之信。

解也。然不但一念信解功德非算喻能知。卽須臾間絕疑悔。而發深心。其獲福亦與一念信解者等。總見事理之不相伴也。須臾比一念。爲極少之時。其福亦如此者。在悉無深心四字上。喫緊無諸疑悔者。始得深心信解。所以須臾信而福超諸度也。疑悔解見譬喻品。⑤三行位不退。

其有諸菩薩。無量劫行道聞我說壽命。是則能信受。如是諸人等。頂受此經典。願我於未來。長壽度眾生。如今日世尊。諸釋中之王。道場師子吼。說法無所畏。我等未來世。一切所尊敬。坐於道場時。說壽亦如是。

此須得信受之機也。發大心者。多劫行道。是信根已立。則能信能受。卽此信受之因。自能立深願。於未來世。如佛得長壽以度生。如佛坐道場以無畏說法。如佛爲一切天人所敬。亦如佛說無量壽也。若有深心者。清淨而質直。多聞能總持。隨義解佛語。如是之人等。於此無有疑。

深心卽具慈悲。淨心卽具智慧。直心則眾行具足。此三心。爲萬行之本。加以多聞總持。故於佛語若權若實。無不隨義能解也。如是之人。於此壽量。決不生疑。(庚)二畧解言趣。

又阿逸多。若有聞佛壽命長遠。解其言趣。是人所得功德無有限量。能起如來無上之慧。

此第二信其所有功德。勝前一念信解者也。天台云。前但言信解。未能敷說。說涉名數。須善方言。今此具足。故言解其言趣。卽是爲他解說。以說力故。能起自他無上之慧也。庚三廣爲他說。

何況廣聞是經。若教人聞。若自持。若教人持。若自書。若教人書。若以華香瓔珞。幢幡繒蓋。香油蘇燈。供養經卷。是人功德無量無邊。能生一切種智。

此第三信其功德。又勝畧解言趣者也。天台謂廣

聞廣解。廣爲他說。廣修供養。供養外資。令內智疾入。故能生一切種智也。庚四深信觀成。

阿逸多。若善男子善女人。聞我說壽命長遠。深心信解。則爲見佛常在耆闍崛山。其大菩薩。諸聲聞眾。圍遶說法。又見此娑婆世界。其地琉璃。坦然平正。閻浮檀金以界入道。寶樹行列。諸臺樓觀。皆悉寶成。其菩薩眾咸處其中。若有能如是觀者。當知是爲深信解相。

此第四信其功德增勝可知。天台謂。具上三信。加修觀行。入禪用慧。想成相現。能見有餘實報兩土。

相貌。見佛與僧在耆山者。方便土相也。見娑婆等。實報土相也。初二信是聞慧位。廣聞廣說。是思慧位。觀行想成。是修慧位。自淺至深。成六根清淨。十信位也。現在四信已竟。④二滅後五品。分二。庚一。列五品格量。四品功德。五品者。卽隨喜。持誦。勸持。兼六度。正六度之五也。四品功德者。以初品功德。在後功德品中校量。故此但言四耳。文分二。辛一。長行。又五。⑤一直起隨喜心。

又復如來滅後。若聞是經。而不毀訾。起隨喜心。當知已爲深信解相。

天台云。此下明如來滅後有五品人。前二自利。後三化他。若作法師名者。在三不在五也。△如來滅後。則現前無佛。唯法是依。聞經而不毀訾。卽具深信。起隨喜。卽是解生。旣得深信解生。則其功德。與親見佛親聞法等也。⑤二加自持讀誦。

何況讀誦受持之者。斯人則爲頂戴如來。阿逸多。是善男子。善女人。不須爲我復起塔寺。及作僧坊。以四事供養眾僧。所以者何。是善男子。善女人。受持讀誦是經典者。爲已起塔。造立僧坊。供養眾僧。則爲以佛舍利。起七寶塔。高廣漸小。至於梵天。懸諸幡蓋。及眾

寶鈴。華香瓔珞。末香塗香燒香。眾鼓伎樂。簫笛箏篪。種種舞戲。以妙音聲。歌唄讚頌。則爲於無量千萬億劫。作是供養已。

此格量第二品功德也。天台云。慮恐初心之人。世緣紛動。妨修正業。但專誦持此經。則爲頂戴如來。乃至供養眾僧。何也。蓋此經卽是演說如來法身。若專讀誦。則爲頂戴。經文是能詮。如塔能盛。故不須起事塔。實相是所詮。卽法身舍利。故不須安生身舍利。經中已有第一義僧。故不須供養相從僧也。捨事存理。所益弘多。相從僧者。謂從佛有法。從

法有僧也。⑤三兼勸他持誦。

阿逸多。若我滅後。聞是經典。有能受持。若自書。若教人書。則爲起立僧坊。以赤梅檀作諸殿堂。三十有二。高八多羅樹。高廣嚴好。百千比丘於其中止。園林浴池。經行禪窟。衣服飲食。牀褥湯藥。一切樂具。充滿其中。如是僧坊。堂閣若干。百千萬億。其數無量。以此現前供養於我。及比丘僧。是故我說如來滅後。若有受持讀誦。爲他人說。若自書。若教人書。供養經卷。不須復起塔寺。及造僧坊。供養眾僧。

前但自利。此兼利他。此中校量。以理從事。理到則

事到。意非棄事從理。蓋行人力淺。不能兼行。故如
來。但謂我滅度後。有如是受持等。自他俱利者。卽
爲起立僧坊。以至供養眾僧無異。此所以堅其決
定受持也。多羅。亦名貝多。此翻岸形。如此方欒樹。
直而且高。極高長八九十尺。果熟赤色。大如石榴。
人取食之。又有云。一多羅樹。高七仞。七尺一仞。則
高四十九尺。西域記云。南印建那補羅國北。不遠
有多羅林。三十餘里。其葉長廣。其色光潤。諸國書
寫。莫不採用。補註云。八者表入正道。園林表總持。
浴池表入解脫。大涅槃爲禪定窟。柔和忍辱以爲

法華指掌疏卷第三之三
三
衣服。法喜禪悅以爲飲食。⑤四兼行六度行。況復有人能持是經。兼行布施持戒忍辱精進。一心智慧。

妙玄云。上但觀理。未遑涉事。今正觀稍明。卽旁利物。能以少施。與虛空法界等。使一切法趣檀。檀爲法界。餘五度亦然。事相雖少。運懷甚大。此則理觀爲正。事行爲旁。故云兼行六度。是爲第四品。知音云。經雖理勝。持經者不嫌理事兼行。則功德爲尤勝。故又喻如虛空之無邊無量。疾至一切智也。應知此校。上節五度除智。此不除也。

其德最勝。無量無邊。譬如虛空。東西南北。四維上下。無量無邊。是人功德。亦復如是。無量無邊。疾至一切種智。

前但涉理。此則事理俱備。故致功德如虛空之無邊也。不唯功德無邊。而能使行人疾至一切種智。其最勝可悉領矣。此格量第四品功德。其殊勝可知。
⑤五正行六度行。

若人讀誦受持。是經爲他人說。若自書。若教人書。復能起塔。及造僧坊。供養讚歎聲聞眾僧。亦以百千萬億讚歎之法。讚歎菩薩功德。又爲他人種種因緣隨

義解說此法華經。復能清淨持戒。與柔和者而共同止。忍辱無嗔。志念堅固。常貴坐禪。得諸深定。精進勇猛。攝諸善法。利根智慧。善答問難。

妙立云。至五品圓觀稍熟。理事欲融。涉事不妨理。在理不隔事。故具行六度。若布施時。無二邊取著。十法界依正。一捨一切捨。財身及命無畏等施。若持戒時。性重譏嫌等無差別。五部重輕。無所觸犯。若行忍時。生法寂滅等忍。荷負安耐。若行精進。身心俱淨。無間無退。若行禪時。遊入諸禪。靜散無妨。若修慧時。權實二智。究了通達。乃至世智治生產。

業。皆與實相不相違背。具足解釋佛之知見。而於正觀。如火益薪。故云正行六度。○六度中不舉布施者。爲他解說。卽是法施義已兼也。五品中。前三品是聞慧位。兼行六度。是思慧位。正行六度。是修慧位。都是十信前耳。或云。初隨喜品。是入信心位。分一品爲兩心。五品卽十信心。是鐵輪六根清淨位也。○妙樂問。何故現在唯四信。滅後立五品。答。其義旣齊。四五無別。但是滅後。加讀誦爲第一品耳。

阿逸多。若我滅後諸善男子。善女人。受持讀誦是經去華受手卷第五之五

典者。復有如是諸善功德。當知是人。已趣道場。近阿
耨多羅三藐三菩提。坐道樹下。阿逸多。是善男子。善
女人。若坐若立若行處。此中便應起塔。一切天人皆
應供養。如佛之塔。

此格量第五品功德也。已趣道場者。行處也。三菩
提者。近處也。持經自利。兼復利人。其功德已自殊
勝。如虛空之無邊矣。兼復廣行六度。事理雙修。則
是近菩提坐道樹。理固然也。於行坐處起塔。爲天
人所敬。事亦宜然也。所謂簡則全簡。收則全收。一
切具善根。廣饒益眾生。於斯見矣。②二偈頌。分四。

⑤ 一頌第二品。

爾時世尊。欲重宣此義。而說偈言。

若我滅度後。能奉持此經。斯人福無量。如上之所說。
是則爲具足。一切諸供養。以舍利起塔。七寶而莊嚴。
表刹甚高廣。漸小至梵天。寶鈴千萬億。風動出妙音。
又於無量劫。而供養此塔。華香諸瓔珞。天衣眾伎樂。
然香油蘇燈。周布常照明。惡世法末時。能持是經者。
則爲已如上。具足諸供養。

此頌明第二品。能誦持者。卽爲起塔。以諸供養。經
無量劫也。何故。顯悟法身壽量廣大長遠。故不須

海華抄卷第三之三
事相供養也。表刹卽塔尖。⑤二頌第三品。

若能持此經。則如佛現在。以牛頭栴檀。起僧坊供養。堂有三十二。高八多羅樹。上饌妙衣服。牀卧皆具足。百千眾住處。園林諸浴池。經行及禪窟。種種皆嚴好。此頌明第三品。兼行利他。則爲起塔供養我及眾僧也。翻譯名義云。栴檀。義翻與藥。慈恩傳云。樹類白楊。其質涼冷。蛇多附之。華嚴經云。摩羅耶山。出栴檀香。名曰牛頭。若以塗身。設入火坑。火不能燒。又云。修羅戰時。爲刀傷。以此塗之。卽愈。有云。山峯似牛頭。故以爲名。⑥三頌第四品。

若有信解心。受持讀誦書。若復教人書。及供養經卷。
散華香末香。以須曼薝蔔。阿提目多伽。熏油常然之。
如是供養者。得無量功德。如虛空無邊。其福亦如是。
况復持此經。兼布施持戒。忍辱樂禪定。不嗔不惡口。
此頌第四品。兼行六度。疾得種智也。須曼。具云須
曼那。又云蘇摩羅。此云善攝意。其花色黃白。而極
香。樹不至大。高三四尺。下垂如葢。薝蔔。亦云瞻博
迦。此云黃花。花小而香。阿提目多伽者。妙樂云。此
云龍舐花。又云善思夷花。草形大如麻。赤花青葉。
子堪爲油。亦堪爲香。然以此供養。其福已如虛空。

況兼六度。則福不可量也。此不言精進者。於諸度不怠是也。不言智慧者。不嗔不惡口是也。

⑤ 四頌第五品。

恭敬於塔廟。謙下諸比丘。遠離自高心。常思惟智慧。有問難不嗔。隨順爲解說。若能行是行。功德不可量。若見此法師。成就如是德。應以天華散。天衣覆其身。頭面接足禮。生心如佛想。又應作是念。不久詣道樹。得無漏無爲。廣利諸人天。其所住止處。經行若坐卧。乃至說一偈。是中應起塔。莊嚴令妙好。種種以供養。佛子住此地。則是佛受用。常在於其中。經行及坐卧。

前八句頌廣行六度。次明是人一切眾生皆當恭敬也。生心如佛者。天台云。此第五品。初依之人。卽號如來故也。不久詣道樹者。其位已在十信鐵輪。不久得入初住銅輪。能八相作佛也。五品與四品齊同。是修慧位。若論入位。總爲六根清淨位也。而有現未佛世滅後之異。△此地者。卽實相真境。乃一切如來受用之場。今佛子旣得事理圓融。自他并利。廣六度而契真如。則同佛受用。故行住坐臥。皆在厥中矣。列五品格量四品功德已竟。

妙法蓮華經授手卷第五之五

法華授手卷第五之五

音釋

宗錘切 拮均聲 上 穗徐醉切
 舐音確 苦角切 趨鍵 巨展切
 時上紙 梳堅也 音 健 須行切
 上聲切 也音 侔 盡音 續 批民切
 聲切 也音 謀 侯切 平聲 驛 初
 冬限初

妙法蓮華經授手卷第六之一

清楚衡雲峰沙門智祥集

隨喜功德品第十八

品節云。此品來意。由前分別持經功德已爲殊勝。然猶未盡其益。今以一念隨喜之功。超過八十年中。廣以七寶資生。布施四百萬億阿僧祇世界六趣眾生。又令各得四果之福。不如最後人一念隨喜者。正欲顯此說殊勝之益。以堅二乘願樂之心也。天台云。隨喜者。隨順事理。無二無別。喜是慶己。慶人。聞深奧法。順理有實功德。順事有權功德。慶

已有智慧。慶人有慈悲。權實智斷。合而說之。故曰隨喜功德。直指云。前品是親聞佛說壽量所獲功德。此是佛滅後。於流通會中。暫聞是法。一念惺悟。而心生歡喜。卽獲殊勝功德。故名隨喜功德。約義有四。一隨順於人喜生敬。二隨順於法喜生心。三隨順於理喜生解。四隨順於事喜生行。一念之間。人法兼收。理事圓融。故其功德難量。廣如行願品釋。△前品於五位中。唯初隨喜品文。但標人相。未有校量。故彌勒乘機扣佛。廣校初品。方知後四品功德。益見其不可思議也。

⑤二本品格量初位功德分二。⑥辛一問。

爾時彌勒菩薩摩訶薩。白佛言。世尊。若有善男子。善女人。聞是法華經。隨喜者。得幾所福。而說偈言。

世尊滅度後。其有聞是經。若能隨喜者。爲得幾所福。前諸品已經校量。而如來於初品。不盡情發揮者。其意待彌勒問及而發也。今彌勒所問者。正初品人。然隨喜眾生。皆是未來成佛之人。爲彌勒當所授記。故此特問。且亦爲現在持經者。策進深心耳。⑦辛二答。分二。⑧壬一長行。又二。⑨癸一答。內心隨喜人。又四。⑩子一展轉相教。

爾時佛告彌勒菩薩摩訶薩阿逸多。如來滅後若比丘比丘尼優婆塞優婆夷及餘智者。若長若幼。聞是經隨喜已。

此舉能聞之人。先標出四眾。次汎指一切長幼也。餘智者。直指云。是別指一種利根。出如來滅度之後。如此諸人。親於法師座下。聞此經典。豁爾神會。意有所得。故曰隨喜已。

從法會出。至於餘處。若在僧坊。若空閑地。若城邑巷陌。聚落田里。如其所聞。爲父母宗親。善友知識。隨力演說。

此明能隨喜者。自於此經有所領解。出至餘處。將所聞經。隨力爲人而演說也。餘處者。卽隨所到處。乃僧坊城邑等處也。如所聞者。是不增他說。不減己聞也。隨力演說者。乃稱己所聞。隨力多寡。爲彼說也。城卽眾民聚處。黃帝時始築。以盛民也。邑卽都邑。四縣爲都。四井爲邑。陌乃田間路。南北爲阡。東西爲陌。聚落田里等。皆是爲四眾隨力演說之地。此是第一層轉教人也。

是諸人等。聞已隨喜。復行轉教。餘人聞已。亦隨喜轉教。

諸人。卽上父母宗親。聞已者。卽聞隨力演說之少法。而亦能發隨喜心。轉教他人也。此是第二層轉教人。餘人。卽第三層轉教也。

如是展轉。至第五十。

如是指前。展轉起後。次第將前人隨力演說者。遞相傳諭。已至第五十人。今但將最後第五十人一念隨喜之心。所得功德。而校量之。子二立格量本。阿逸多。其第五十善男子。善女人。隨喜功德。我今說之。汝當善聽。若四百萬億阿僧祇世界。六趣四生眾生。卵生。胎生。濕生。化生。若有形。無形。有想。無想。非有

想。非無想。無足。二足。四足。多足。如是等在眾生數者。先舉極多世界。次舉十類眾生。一一世界。各具十類。則眾生數不可量也。六趣眾生。是總舉。梵語補特伽那。此云數取趣。卽數數於諸趣中受生也。又眾生法相生。故名眾生。眾生法者。卽五陰六根。結成色心二種。故卵生。卽魚鳥龜蛇等。胎生。卽人畜龍仙等。濕生。卽含蠢蠕動等。化生。卽轉蛻飛行等。有形。卽休咎精明等。無形。卽空散銷沉等。有想。卽神鬼精靈等。無想。卽精神化爲土木金石等。非有想者。如蒲盧蟲。原無蜂想。因螺羸負之。而成蜂也。非無

想者。如土梟之類。子成而母遭其食。如是相生。則又非無想也。無足等。攝盡無餘也。如是等收上。是總結所當化者之眾生。有如是之廣。次舉能施之人。

有人求福。隨其所欲娛樂之具。皆給與之。一一眾生。與滿閻浮提金銀琉璃。硨磲碼碯。珊瑚琥珀。諸妙珍寶。及象馬車乘。七寶所成宮殿樓閣等。是大施主。如是布施。滿八十年已。而作是念。我已施眾生娛樂之具。隨意所欲。然此眾生皆已衰老。年過八十。髮白面皺。將死不久。我當以佛法而訓導之。

此標所施之物。盡此十類眾生。每一眾生。各與七寶。滿一南洲。又各施象馬車乘并七寶宮殿等。滿八十年。一一眾生。亦復如是。而作是念下。起法施之由。

卽集此眾生宣布法化。示教利喜。一時皆得須陀洹道。斯陀含道。阿那含道。阿羅漢道。盡諸有漏。於深禪定。皆得自在。具入解脫。

卽集者。是總召集四百萬億諸國十類眾生也。宣布者。卽以四諦法輪開示教化咸得悟入。故一時盡證四果。斷界內生死。證界外涅槃也。須陀洹。卽

初果。此云預流。斯陀含。卽二果。此云一來。阿那含。卽三果。此云不來。阿羅漢。卽四果。義見序品。盡諸漏。卽離苦也。得自在。卽得樂也。子三問答明功。於汝意云何。是大施主所得功德。甯爲多不。彌勒白。佛言。世尊。是人功德甚多。無量無邊。若是施主。但施眾生一切樂具。功德無量。何況令得阿羅漢果。當機因聞所立格量。以無量財。施無量世界中。所有無量眾生。而意中領會財施境界。已不可量。財施功德。尙不可量。法施功德。豈能量乎。

子四正與格量。

佛告彌勒。我今分明語汝。是人以一切樂具。施於四百萬億阿僧祇世界六趣眾生。又令得阿羅漢果。所得功德。不如是第五十人聞法華經一偈。隨喜功德。百分千分。百千萬億分。不及其一。乃至算數譬喻所不能知。

此以法較。必不可量也。且如上施主。財施不可校。則固是矣。至於無限人證羅漢果。得深定具解脫。而不及初心人聞一偈。况祇能隨喜者。如是算數譬喻。不及一分。似乎太過非也。要知無量人證四果。總屬權法。是不了義。今一念隨喜此經一偈。植

法華指掌疏卷之六十一
大乘因。決定成佛。此正權實不可及也。譬如貧人
執天子一字。其貴重卽時已勝羣臣。其所貴者。非
在於人。而貴在於一字也。今經校量。亦復如是。
阿逸多。如是第五十人展轉聞法華經。隨喜功德。尙
無量無邊阿僧祇。何況最初於會中聞而隨喜者。其
福復勝。無量無邊阿僧祇不可得比。

前以外校內。此以內校內。謂最後人展轉傳說。其
聞最少。而所得功德尙不可量。又况最初於法會
中。聞一句而能隨喜者。其功德豈易量哉。

癸二明外來聽法人。分四。子一自往。

又阿逸多。若人爲是經故。往詣僧坊。若坐若立。須臾聽受。緣是功德。轉身所生。得好上妙象馬車乘。珍寶輦輿。及乘天宮。

若人者。卽四眾及有智人。爲是經故。則見其信。往詣僧坊。則見其誠。若坐若立。則見其恭謹。非泛常遊玩造次不修者比。須臾聽。雖歷時未久。而道種已投。此得其真因。轉身者。卽隔陰易生也。得上妙車乘。報行詣之功也。珍寶輦輿。報立聽之功也。乘天宮殿。報入僧坊之功也。三者皆由一念誠信。聽此妙法爲因。兼修十善爲緣。子二分座。

若復有人於講法處坐。更有人來勸令坐聽。若分座令坐。是人功德。轉身得帝釋坐處。若梵王坐處。若轉輪聖王所坐之處。

上科自爲。此兼勸他。能分座。有濟人之德。故轉身得處王座。以徧濟臣民也。子三勸他。

阿逸多。若復有人。語餘人言。有經名法華。可共往聽。卽受其教。乃至須臾間聞。是人功德。轉身得與陀羅尼菩薩。共生一處。利根智慧。百千萬世。終不瘖瘡。口氣不臭。舌常無病。口亦無病。齒不垢黑。不黃不疎。亦不缺落。不差。不曲。唇不下垂。亦不褻縮。不龕澁。不瘡。

惡。脗。亦不缺壞。亦不尚斜。不厚不大。亦不黧黑。無諸可

語人勸聽。則利人之心切矣。故利倍廣。而報倍勝。陀羅尼。乃十地位中菩薩既得。與十地位人。共生一處。受報不輕。當知亦具六根功德。利根等屬意。不瘖瘂屬舌。後文鼻修直。卽鼻根。見佛聞法。屬眼耳。餘皆身根。此中單明口報。有音不清曰瘖。一向絕音曰瘂。今由稱名勸聽故。報千萬生不瘖瘂也。自能聽受。卽納妙蓮華於口。故口無臭。此約聲臭。論功德也。舌常下。約色相言。垢黑疎黃。缺落。皆齒

病也。差卽向外。曲卽向內。今由稱經勸聽。於百千
生。齒無如是諸病。此口內相也。唇不下垂等。皆口
外之相。下垂卽長。褰縮則短。龕澁形不堪見。瘡疹
氣不堪聞。缺壞則露。高斜則歪。厚大明其蠢。黧黑
言其滯。今旣稱經勸聽。皆無此病也。口舌俱如此
清淨。故曰無諸可惡也。

鼻不匾匿。亦不曲戾。面色不黑。亦不狹長。亦不窳曲。
無有一切不可喜相。唇舌牙齒。悉皆嚴好。鼻修高直。
面貌圓滿。眉高而長。額廣平正。人相具足。世所生
見佛聞法。信受教誨。

勸人本屬身口。前廣明口報。此兼舉身根。而眼耳
意三根。攝在見佛聞法信受教誨中。是知發稱勸
聽之心。於須臾頃。而感六根清淨於百千生。善哉
妙法。真不可思議者也。①四具聽。

阿逸多。汝且觀是勸於一人。令往聽法。功德如此。何
况一心聽說讀誦。而於大眾爲人分別。如說修行。

舉其旁贊者之功德。校量正持說者。則功德益難
思議矣。故曰何况一心聽說等。知音云。此句伏下
品談法師功德之案。②二偈頌。分二。③一頌內心
隨喜人。分三。④一頌五十人。

爾時世尊欲重宣此義而說偈言。

若人於法會得聞是經典。乃至於一偈。隨喜爲他說。如是展轉教。至於第五十。

此頌次第轉教。至第五十人。前但言聞經。而頌云。乃至一偈。故知前隨力演說者。不過三偈五偈。乃至一偈而已。要知謂聞是經隨喜已。則隨喜二字。最有得力受用。如不然。豈能廣益。子二頌格量本。最後人獲福。今當分別之。如有大施主。供給無量眾。具滿八十歲。隨意之所欲。見彼衰老相。髮白而面皺。齒疎形枯竭。念其死不久。我今應當教。令得於道果。

卽爲方便說。涅槃真實法。世皆不牢固。如水沫泡燄。汝等咸應當。疾生厭離心。諸人聞是法。皆得阿羅漢。具足六神通。三明八解脫。

長文但云宣布法化。示教利喜。此明世皆不牢。如水沫。如泡燄。正使勿貪世樂。而味法樂。是說四諦方便。使之證有餘涅槃也。如謂是身無常無堅速朽之法。是身如聚沫。不可撮摩。是身如泡。不得久立。是身如燄。從渴愛生等也。①三頌正格量。

最後第五十。聞一偈隨喜。是人福勝彼。不可爲譬喻。如是展轉聞。其福尙無量。何況於法會。初聞隨喜者。

此頌較量。從最後自遠況近。乃至最初。展轉殊勝。

可知。癸二頌外聽法分四。子一頌勸聽經。

若有勸一人。將引聽法華。言此經深妙。千萬劫難遇。卽受教往聽。乃至須臾聞。斯人之福報。今當分別說。世世無口患。齒不踈黃黑。唇不厚褰缺。無有可惡相。舌不乾黑短。鼻修高且直。額廣而平正。面目悉端嚴。爲人所喜見。口氣無臭穢。優鉢華之香。常從其口出。此頌勸聽功德。前但言可共往聽。此言是經深妙。萬劫難遇。則見切聽之心。戀慕之極。既能懷慕。是經久而得。優曇華香從其口出。理亦然矣。

①二追頌自往。

若故詣僧坊欲聽法華經。須臾聞歡喜。今當說其福。
後生天人中得妙象馬車珍寶之輦輿。及乘天宮殿。
此追頌自往聽法。言須臾歡喜。卽一念信解。已乘
大乘。入如來室。故感報如是也。②三頌分座聽。
若於講法處。勸人坐聽經。是福因緣得。釋梵轉輪座。
自聽卽得真因。勸聽以爲助緣。由此不思議因緣。
卽得坐如來座。故感報得天王輪王位也。

③四頌正修行。

何況一心聽。解說其義趣。如說而修行。其福不可限。

前隨喜勸聽。自往分座。有如許校量。其正意原爲此科而施也。一心聽者。不止暫時。解其義者。不止四句。如說修行。不止隨喜。偶聞分座勸聽而已。故結云。其福不可限。以前皆屬少分自利功德。旣校量已明。則下六種法師所有利他之德。卽知有如是廣大不可思議也。

法師功德品第十九

品節云。此品由前廣讚持經之大益。尙皆自利。未見利人者之功德。今顯法師得六根清淨。以彰法華三昧之勝益。現前卽登不退。欲以發二乘精進。

不倦之心也。前法師品但以法爲師。是助發之緣。因。今品正顯持經功德。名同義別。然佛性種子。要藉緣薰。使慧命不斷。唯法師功德最爲殊勝。所以次於隨喜品也。天台云。法師義如法師品中說。功德者。前品隨喜功德。謂五品中。初品之初功德。在相似位前。今品功德。謂五品之上六根清淨之功德。卽十信相似位也。以此功德。內外莊嚴。五根清淨。名外莊嚴。意根清淨。名內莊嚴。又從地獄已上至佛。一切色相。悉於身中現者。名內莊嚴。十法界一切色相。以普現三昧而外化者。名外莊嚴。身根

既爾。餘五根亦然。讀誦獲六根清淨。既爾。後之四品加然。相似六根清淨。既爾。分真倍然。○知音問。法師品有六種法師。禮拜供養。胡不言之。答。實論功德。唯受持等四種。自他皆得開悟。本有佛之知見。若夫供養禮拜。唯獲福田。故不校也。若約法供養。亦可攝盡。故藥王本事品。有法供養之校量也。

⑤二明果中功德。以勸流通。分二。④一總列六根功德。

爾時佛告常精進菩薩摩訶薩。若善男子。善女人。受持是法華經。若讀。若誦。若解說。若書寫。是人當得入

百眼功德千二百耳功德八百鼻功德千二百舌功德八百身功德千二百意功德以是功德莊嚴六根皆令清淨

要解云。持法華者。開佛知見。則見聞覺知。無非真覺。證諸實相。則色香味觸。無非真法。以真覺對真法。則萬象徹照。大千一視。故圓持功成。卽得六根清淨功德。自非精心不雜。進道不倦。未易能致。故告常精進菩薩也。數有千二八百者。眾生世界。依器世界而立。以織妄爲界。故有四方。世相遷流。故有三世。惟世與界。二者相涉。三世四方。宛轉十二。

依十二數流變三疊。成千二百。圓持功成。每根各全其用。故有千二百功德。然復於中尅定優劣。以眼見前旁。而不及後。鼻息出入。缺於中交。身合能覺。離不知觸。皆三分缺一。故惟八百功德。此乃權依世論數量。以顯妙用大畧而已。使由常眼對色。而聞佛知見。常耳聞聲。而得其實相。則眾塵不隔。十方廓然。萬象莫逃。大千圓照。則千二八百之功。無足論矣。如經云。父母所生眼。悉見三千界。何復三分之缺。八百之劣耶。故知此體本絕數量也。

④二別作六章解釋。分六⑤⑥⑦⑧⑨⑩⑪⑫⑬⑭⑮⑯⑰⑱⑲⑳㉑㉒㉓㉔㉕㉖㉗㉘㉙㉚㉛㉜㉝㉞㉟㊱㊲㊳㊴㊵㊶㊷㊸㊹㊺㊻㊼㊽㊾㊿

行。

是善男子。善女人。父母所生。清淨肉眼。見於三千大千世界。內外所有山林河海。下至阿鼻地獄。上至有頂。亦見其中一切眾生。及業因緣果報生處。悉見悉知。

○父母所生。卽人人本具者。清淨肉眼。卽眾塵不隔者。眾塵不隔。則正智現前。故大千內外一切色相。悉見悉知。所謂應眼時如千日。萬象不能逃影質者。此也。○問。理則固然矣。事復如何。答。六湛圓明。本所功德。現量如是。但隨所證耳。夫羅漢見大

千。辟支見百佛世界。菩薩見百千界。如來見徹微塵國。非獨果體也。如阿那律。不離父母生身。而能觀大千。猶如掌果。則其中一切烏乎不見。蓋塵消覺淨。真極則一。夫何理然。而事不然也。知音云。見於下。依報橫豎。世界相續也。亦見下。正報善惡。眾生相續也。及業下。業果相續也。下五根準此。

④二偈頌。

爾時世尊。欲重宣此義。而說偈言。

若於大眾中。以無所畏心。說是法華經。汝聽其功德。是人得八百。功德殊勝眼。以是莊嚴故。其目甚清淨。

父母所生眼。悉見三千界。內外彌樓山。須彌及鐵圍。并諸餘山林。大海江河水。下至阿鼻獄。上至有頂處。其中諸眾生。一切皆悉見。雖未得天眼。肉眼力如是。以無所畏心一句。正顯得六根清淨之所以也。大窾云。大抵恐懼。皆生於不足。道力未充。安得無畏。今法師涵養既久。道力既充。神氣亦滿。卽有刀杖罵詈。不足以干其慮。稍有動搖。則目眩心馳。安得清淨乎。○彌樓。此云光明。卽七金之一也。有云。須彌卽彌樓。以其梵音有異。若據今經。云內外彌樓山。須彌及鐵圍。則是兩山。名體皆異也。△準後耳。

根聞十法界。則見亦有之。文缺故也。或佛說巧妙。攝於悉見悉知之間。不然。下五根皆有聲聞菩薩諸佛等。豈獨眼根見不能及耶。○知音問。持經者多。功德未驗。何也。答。不常精進故。卽常精進文字者尙少。况如說修行乎。釋明眼根功德竟。

庚二耳根分二。辛一長行。

復次常精進。若善男子。善女人。受持此經。若讀。若誦。若解說。若書寫。得千二百耳功德。

初標耳根之德。以耳周聽十方無遺。故感功德有千二百。

以是清淨耳。聞三千大千世界。下至阿鼻地獄。上至有頂。其中內外種種語言音聲。

此下明功。眾塵不隔。故曰清淨。常耳者。顯非聖得。卽尋常人所共有者。此一句爲能聞之根。次明所聞之境。種種等。是總標。

象聲。馬聲。牛聲。車聲。啼哭聲。愁歎聲。螺聲。鼓聲。鐘聲。鈴聲。笑聲。語聲。

此別明四聖六凡。發明種種語言音聲一句。先明雜類。象馬及愁歎等皆苦聲。螺鼓及語笑等皆樂聲。

男聲。女聲。童子聲。童女聲。法聲。非法聲。苦聲。樂聲。凡夫聲。聖人聲。喜聲。不喜聲。

此又明六對。皆三界人所有之聲。循道合理。名法聲。非道非理。名非法。此處言聖人聲。爲對凡夫而言也。後另開四聖。方爲正舉。喜不喜聲。與苦樂有別。苦者。如爲生老病死等諸苦所逼而發聲也。樂者。如眾生得最樂境而發聲也。喜不喜乃逆順二境。所以不同苦樂之聲。

天聲。龍聲。夜叉聲。乾闥婆聲。阿修羅聲。迦樓羅聲。緊那羅聲。摩睺羅伽聲。

此八部聲也。其中亦有前六對諸聲。此不繁敘。
火聲。水聲。風聲。地獄聲。畜生聲。餓鬼聲。

此三大聲也。雖曰此三。乃舉大分。其實此中亦有
喜不喜等聲。四大中不言地者。蓋地本無聲。作之
在人。雖於十八變動時。皆地有聲。而非常聲。故不
及也。三途聲。可以易知。

比丘聲。比丘尼聲。

此出家二眾所發之聲也。由多諸善行。故此另舉。
聲聞聲。辟支佛聲。菩薩聲。佛聲。

此四聖聲也。法師由受持此經。則深入法流。必得

如如眞智現前。使聞性稱眞法界。故聞十界。如月
臨江無所不現也。

以要言之。三千大千世界中。一切內外所有諸聲。雖
未得天耳。以父母所生清淨常耳。皆悉聞知。如是分
別種種音聲。而不壞耳根。

此總結諸聲成圓聞也。要解云。信知。謂應耳時。如
幽谷大小音聲。無不足也。不壞耳根者。雖分別種
種。而耳根於中本相如故。無壞無雜。此耳之實相
也。①二偈頌。

爾時世尊。欲重宣此義。而說偈言。

父母所生耳。清淨無濁穢。以此常耳聞。三千世界聲。
象馬車牛聲。鐘鈴螺鼓聲。琴瑟箜篌聲。簫笛之音聲。
清淨好歌聲。聽之而不著。無數種人聲。聞悉能解了。
又聞諸天聲。微妙之歌音。及聞男女聲。童子童女聲。
山川險谷中。迦陵頻伽聲。命命等諸鳥。悉聞其音聲。
地獄眾苦痛。種種楚毒聲。餓鬼饑渴逼。求索飲食聲。
諸阿修羅等。居在大海邊。自共言語時。出於大音聲。
如是說法者。安住於此間。遙聞是眾聲。而不壞耳根。
十方世界中。禽獸鳴相呼。其說法之人。於此悉聞之。
其諸梵天上。光音及徧淨。乃至有頂天。言語之音聲。

法師住於此。悉皆得聞之。一切比丘眾及諸比丘尼。若讀誦經典。若爲他人說。法師住於此。悉皆得聞之。此頌三界六凡一切情無情聲。長行畧。而頌詳之。但缺水火風聲。乃前後互現也。

復有諸菩薩。讀誦於經法。若爲他人說。撰集解其義。如是諸音聲。悉皆得聞之。諸佛大聖尊。教化眾生者。於諸大會中。演說微妙法。持此法華者。悉皆得聞之。此頌四聖。而缺聲聞緣覺。以勝攝劣。須知法師不動跬步。而能聞十方諸佛說微妙法。其智慧福業。隱隱增長。此豈泛泛人可共知耶。

三千大千界。內外諸音聲。下至阿鼻獄。上至有頂天。皆聞其音聲。而不壞耳根。其耳聰利故。悉能分別知。持是法華者。雖未得天耳。但用所生耳。功德已如是。此結頌中。旣言大千內外。又不止聞一三千世界中矣。况聞性周徧。本無邊表。今旣由法力薰成。則界外圓聞。猶不可量也。補註云。迦陵頻伽。此云好聲鳥。其鳥在殼。聲壓羣羽。命命。卽共命。一身兩頭。神識互別。報命則同。故曰命命。光音。二禪中第三天也。徧淨。三禪中第三天也。有頂。卽色界究竟天也。釋明耳根功德竟。

⑧三鼻根分二。⑨一長行。

復次常精進。若善男子。善女人。受持是經。若讀。若誦。若解說。若書寫。成就八百鼻功德。

初標鼻根之德。由缺中交。故少四百。

以是清淨鼻根。聞於三千大千世界上下內外種種諸香。

此敘鼻根之功。初一句標根。聞於下標境。種種下是總標。向後別釋。諸香清淨。由眾塵不隔湛圓。故大千俱聞也。

須曼那華香。闍提華香。末利華香。薝蔔華香。波羅羅

華香。赤蓮華香。青蓮華香。白蓮華香。華樹香。果樹香。梅檀香。沉水香。多摩羅跋香。多伽羅香。及千萬種和香。若末。若丸。若塗香。持是經者。於此間住。悉能分別。此先明人間種種諸香。有麤妙二種。今出其妙。須曼那。此云善稱意。閻提云金錢。末利云鬘。其華可作鬘故。薺蔔云黃花。波羅羅云重生花。多摩羅云性無垢。多伽羅云根。

又復別知衆生之香。象香。馬香。牛羊等香。男香。女香。童子香。童女香。及草木叢林香。若近若遠。所有諸香。悉皆得聞。分別不錯。

此言人間一切麤濁者。雖種類若干。而法師分別。一一不錯。

持是經者。雖住於此。亦聞天上諸天之香。波利質多羅。拘鞞陀羅樹香。及曼陀羅華香。摩訶曼陀羅華香。曼殊沙華香。摩訶曼殊沙華香。梅檀沉水。種種末香。諸雜華香。如是等天香。和合所出之香。無不聞知。

此明聞知天上諸香。△問。鼻以合中知。今云住此而聞。彼還是香來耶。鼻往耶。不然。何以得知。答。此皆持經不思議功力使然。若以鼻香往來疑者。是未得經功之思量取著耳。豈不聞。是經非思量分

別之所能解。唯佛與佛乃能究盡乎。波利質多。云
圓生樹。其根莖枝葉。逆風能聞五十由旬。拘鞞陀
羅。云大遊戲地樹。

又聞諸天身香。釋提桓因在勝殿上。五欲娛樂嬉戲
時香。若在妙法堂上。爲忉利諸天說法時香。若於諸
園遊戲時香。及餘天等男女身香。皆悉遙聞。如是展
轉乃至梵世上。至有頂諸天身香亦皆聞之。并聞諸
天所燒之香。

此明諸天所有身香。并所燒之香。法師無不了知。
及聲聞香。辟支佛香。菩薩香。諸佛身香。亦皆遙聞。知

法苑珠林卷之三
其所在

此明四聖人香。法師無不了知。問。香無形色。何以別知凡聖差別。曰。雖無形色。而貴賤上下。各得其用。此亦持經不思議力。乃能知耳。次下總結。

雖聞此香。然於鼻根不壞不錯。若欲分別爲他人說。憶念不謬。

不壞不錯。言無壞無雜也。要解云。華嚴鬘香長者。善能別知天人龍鬼所有諸香。治諸病香。斷諸惡香。乃至一切菩薩差別地位香。悉皆了達。得調和香法門。表於善惡薰習之法。一切通達而調治和。

融以成萬德法身香也。今鼻根功德能知天上人間諸香。乃至菩薩諸佛身香。亦表持法華者能通達異習。和融衆妙。而證萬德法身之香歟。○知音問。受持讀誦書寫。本屬眼舌身意四根。耳鼻似無干也。而返於聲香。廣衍其文。何也。答。以初時全藉耳聞聲。是此方教體。鼻出入息。以便讀誦。况香爲聖凡同樂。故所詳陳也。⊙二偈頌。

爾時世尊欲重宣此義。而說偈言。

是人鼻清淨。於此世界中。若香若臭物。種種悉聞知。此四句總頌。前但言香。未言其臭。今頌云種種悉

聞知。則臭亦種種聞知也。

須曼那闍提。多摩羅栴檀。沉水及桂香。種種花果香。及知衆生香。男子女人香。說法者遠住。聞香知所在。大勢轉輪王。小轉輪及子。羣臣諸宮人。聞香知所在。身所著珍寶。及地中寶藏。轉輪王寶女。聞香知所在。諸人嚴身具。衣服及瓔珞。種種所塗香。聞香知其身。此別明三界一切諸香。先頌人間勝香。該情無情。輪王有七寶。女寶居一。

諸天若行坐。遊戲及神變。持是法華者。聞香悉能知。此頌天人。文合在後。天女所著衣上。意則順暢。

諸樹華果實。及蘇油香氣。持經者住此。悉知其所在。諸山深嶮處。梅檀樹華敷。衆生在中者。聞香悉能知。鐵圍山大海。地中諸衆生。持經者聞香。悉知其所在。阿修羅男女。及其諸眷屬。鬪諍遊戲時。聞香皆能知。曠野嶮隘處。師子象虎狼。野牛水牛等。聞香知所在。若有懷妊者。未辯其男女。無根及非人。聞香悉能知。以聞香力故。知其初懷妊。成就不成就。安樂產福子。以聞香力故。知男女所念。染欲痴恚心。亦知修善者。地中衆伏藏。金銀諸珍寶。銅器之所盛。聞香悉能知。種種諸瓔珞。無能識其價。聞香知貴賤。出處及所在。

法華指掌疏卷之十一
三
此頌人間雜類情無情香。兼修羅衆。

天上諸華等。曼陀曼殊沙波利質多樹。聞香悉能知。
天上諸宮殿。上中下差別。衆寶華莊嚴。聞香悉能知。
天園林勝殿。諸觀妙法堂。在中而娛樂。聞香悉能知。
諸天若聽法。或受五欲時。來往行坐卧。聞香悉能知。
天女所着衣。好華香莊嚴。周旋遊戲時。聞香悉能知。
如是展轉上。乃至於梵世。入禪出禪者。聞香悉能知。
光音徧淨天。乃至於有頂。初生及退沒。聞香悉能知。
此廣頌諸天。展轉以盡四禪。初生退沒。皆言聞香
能知者。乃香隨事顯也。

諸比丘衆等。於法常精進。若坐若經行。及讀誦經典。或在林樹下。專精而坐禪。持經者聞香。悉知其所在。菩薩志堅固。坐禪若讀誦。或爲人說法。聞香悉能知。在在方世尊。一切所恭敬。愍衆而說法。聞香悉能知。衆生在佛前。聞經皆歡喜。如法而修行。聞香悉能知。此頌四聖香。比丘卽聲聞緣覺。在在方。卽十方所在也。衆生入法會。得利益。以及修行品位。無不聞香悉知也。

雖未得菩薩無漏法生鼻。而是持經者。先得此鼻相。要解云。菩薩離分段身。則六根皆依無漏法生。故

鼻身意。皆言無漏。此鼻相者。卽持經功力。能知種種之鼻相也。天台云。聖人有六根互用之妙。如鼻知好惡。別貴賤。觀天宮莊嚴等。則鼻有眼用。讀經說法。聞香能知。則鼻有耳用。知諸華果實及蘇油香氣。則鼻有舌用。入禪出禪。禪有八觸。五欲嬉戲。亦是觸法。聞香能知。則鼻有身用。知染欲痴恚心。亦知修善本。則鼻有意用。鼻根自在勝用若茲。例五根亦若是也。釋明鼻根竟。⑧四舌根。分二。⑨一長行。

復次常精進。若善男子善女人。受持是經。若讀。若誦。

若解說。若書寫。得千二百舌功德。

此總標其德。以舌能宣揚世出世法。故具千二百。若好若醜。若美不美。及諸苦澁物。在其舌根。皆變成上味。如天甘露。無不美者。

此別示其功。先明變味功能。世人皆知舌惟了味。而不知功德全在說法也。由說法功力。了別好醜苦澁。皆屬妄塵。既入清淨舌根。則塵銷覺淨。皆成上味矣。

若以舌根。於大眾中。有所演說。出深妙聲。能入其心。皆令歡喜快樂。

正出舌根說法功能。以所出之音深。是法無礙。故能入心。由所發之聲妙。是詞無礙。故令喜樂也。

又諸天子天女。釋梵諸天。聞是深妙音聲。有所演說。言論次第。皆悉來聽。及諸龍龍女。夜叉。夜叉女。乾闥婆。乾闥婆女。阿修羅。阿修羅女。迦樓羅。迦樓羅女。緊那羅。緊那羅女。摩睺羅伽。摩睺羅伽女。爲聽法故。皆來親近恭敬供養。

此明法音感至。諸天八部而來聽法。因法師得四無礙。故致親近供養也。已上皆天龍外護。

及比丘比丘尼。優婆塞。優婆夷。國王王子。羣臣眷屬。

小轉輪。王大轉輪王。七寶千子。內外眷屬。乘其宮殿。俱來聽法。以是菩薩善說法故。婆羅門居士。國內人民。盡其形壽。隨侍供養。

此明人間內外護也。知音云。有四等。一僧俗四眾。二國王王子眾。三羣臣眾。四小大輪王眾。乃至一時雲集眾也。故曰乘其宮殿等。以是菩薩下。又出常隨影響眾也。故曰盡其形壽等。

又諸聲聞。辟支佛。菩薩。諸佛常樂見之。是人所在方面。諸佛皆向其處說法。悉能受持。一切佛法。又能出於深妙法音。

不唯但得六凡眾聽法。且又得四聖眾加護也。又不唯諸聖加護。亦且得十方諸佛偏向說法。致能受持。而又能傳說也。②二偈頌。

爾時世尊。欲重宣此義。而說偈言。

是人舌根淨。終不受惡味。其有所食噉。悉皆成甘露。初頌變味。舌淨故味亦淨。一切浮塵皆融爲法味。以深淨妙聲。於大眾說法。以諸因緣喻。引導眾生心。聞者皆歡喜。設諸上供養。

此頌說法功德也。諸緣喻等。乃權巧分別。

諸天龍夜叉。及阿修羅等。皆以恭敬心。而共來聽法。

是說法之人。若欲以妙音遍滿三千界。隨意卽能至。頌感天人八部也。是說法下四句。長行缺文。以此妙法。冥通三際。法師欲令聲遍三千。則隨意卽至。大小轉輪王。及千子眷屬。合掌恭敬心。常來聽受法。諸天龍夜叉。羅刹毘舍闍。亦以歡喜心。常樂來供養。梵天王魔王。自在大自在。如是諸天眾。常來至其所。諸佛及弟子。聞其說法音。常念而守護。或時爲現身。前三行如文可解。後四句頌四聖加護也。常念守護。是智力加持。或時現身。是身面加持也。釋明舌根竟。⑧五身根。分二。⑨一長行。

復次常精進。若善男子善女人。受持是經。若讀若誦。若解說。若書寫。得八百身功德。

此總標其德。由身根離中不知。故缺四百。

得清淨身。如淨琉璃。眾生喜見。

此別明其功。身本不淨。而言得者。乃持經不思議力也。喻如琉璃者。顯是父母所生之身。非指法身也。且琉璃內外明徹。不容纖翳。得如是身。孰不喜見。

其身淨故。三千大千世界眾生。生時死時。上下好醜。生善處惡處。悉於中現。

此明身能應現。先標應現眾生生死之相。是身既如琉璃。則不爲情塵所蔽。如大明鏡。無不朗然。所以一切皆現也。欲得此身清淨應物。須是受持讀誦解說書寫此經。

及鐵圍山。大鐵圍山。彌樓山。摩訶彌樓山等諸山。及其中眾生悉於中現。下至阿鼻地獄。上至有頂。所有及眾生悉於中現。

上言三界眾生。依正昇沉。善惡好醜。悉於中現。此申明善惡好醜之處。鐵圍等在下。乃醜惡處也。彌樓等在上。爲善好處也。此單約欲界而言。阿鼻有

頂。方通三界。上下好醜善惡之處。一切有情無情。悉於中現者。以持經者色身合乎法身。而法身不外乎色身也。

若聲聞。辟支佛。菩薩。諸佛說法。皆於身中現其色相。不唯能現六凡色相。而四聖說法之相。無不明現。可見是身含徧十虛。甯有方所。此皆持經不思議力也。④二偈頌。

爾時世尊。欲重宣此義。而說偈言。
若持法華者。其身甚清淨。如彼淨琉璃。眾生皆喜見。
頌身淨喜見。以驗持經之功也。

又如淨明鏡。悉見諸色像。菩薩於淨身。皆見世所有。唯獨自明了。餘人所不見。

頌能應現。補出如淨明鏡。則鑑無不燭。餘人不見。顯未持此經。不得如是功德。非已智力所能見也。三千世界中。一切諸羣萌。天人阿修羅。地獄鬼畜生。如是諸色像。皆於身中現。

頌生死報應等。總三界依正善惡好醜。

諸天等宮殿。乃至於有頂。鐵圍及彌樓。摩訶彌樓山。諸大海水等。皆於身中現。

此又別申諸相。補出大海水一句。則無不俱含也。

是總頌六凡。

諸佛及聲聞。佛子菩薩等。若獨若在眾。說法悉皆現。
此頌明四聖。或處靜定。或爲說法。皆現身中也。
雖未得無漏。法性之妙身。以清淨常體。一切於中現。
此結明身相爲能現之本。知音云。法師雖未得無
漏法性之身。而於此父母所生之體。有類乎果覺
現相也。○問。叢爾眇躬。胡能若是。答。彈丸之鏡。能
持萬仞之山。頃刻之夢。能現百年之境。然皆有爲
法生滅心也。今經詮佛與眾生平等。其有佛之知
見。持經者能常精進。自然反常合道。復何疑哉。釋

明身根竟。⑧六意根。分二。⑨一長行。

復次常精進。若善男子善女人。如來滅後。受持是經。若讀若誦。若解說。若書寫。得千二百意功德。

此總標其德。以意默容十方世界。故具一千二百。以是清淨意根。乃至聞一偈一句。通達無量無邊之義。

此別明其功。先明深達眾義。聞一句而能通達無量義者。以無量義原出一句故。得一而知廣也。△問。意根何以言聞。答。意以通達爲能。然通達必假聞而後得也。又况此經功德不可思議。得六根互

法華指掌疏卷第六之一
用之妙。而於意根說聞何礙。又五根有同時意識。
所以言聞也。

解是義已。能演說一句一偈。至於一月四月。乃至一
歲。諸所說法。隨其義趣。皆與實相不相違背。若說俗
間經書。治世語言。資生業等。皆順正法。

要解云。或一月一際一歲。而演說一句一偈者。由意
根精了達無量義也。九旬談妙。蓋得諸此。西天歲
分三際。謂雨際熱際寒際。四月。卽一際也。證意實
相。則諸所說法。無非實相。故不相違背。雖說俗事。
亦順正法。解是義者。卽一句中解無量義。故演此

一句得至歲月不盡所以華嚴云於一文字語言中演說無邊契經海正此義也俗間經書卽五經諸史等治世語言卽調理陰陽安置邦國等資生業者卽醫卜數命經營田疇等凡所發言無不與理契此皆意具圓說之功耳

三千大千世界六趣眾生心之所行心所動作心所戲論皆悉知之

要解云此明意根知機由意清淨故通於他心也所行者尋常心也動作者感變心也戲論者分別心也

雖未得無漏智慧。而其意根清淨如此。是人有所思惟。籌量言說。皆是佛法。無不真實。亦是先佛經中所說。

上是凡心通達。此是經功勝力。未得無漏慧者。不能如佛無漏。而持經勝福。聖性冥通。則凡有思量。皆合佛語也。④二偈頌。

爾時世尊。欲重宣此義而說偈言。

是人意清淨。明利無濁穢。以此妙意根。知上中下法。乃至聞一偈。通達無量義。

頌前總標。上中下。卽三乘法。前於一句達無量義。

則三乘法在其中矣。

次第如法說。月四月至歲。是世界內外一切諸眾生。若天龍及人。夜叉鬼神等。其在六趣中。所念若干種。持法華之報。一時皆悉知。

此頌別明其功。皆由持法華之報。所以能圓說能知機也。

十方無數佛。百福莊嚴相。爲眾生說法。悉聞能受持。思惟無量義。說法亦無量。終始不忘錯。以持法華故。悉知諸法相。隨義識次第。達名字語言。如所知演說。此人有所說。皆是先佛法。以演此法故。於眾無所畏。

頌前總結。前四句頌明意根見佛聞法思惟下明聞而後思。知諸法相下。是思而後行。末四句結所說無他。以所演說皆一乘實相。故得無畏也。

持法華經者。意根淨若斯。雖未得無漏。先有如是相。頌雖結顯根勝。而畢竟見經功殊勝也。

是人持此經。安住希有地。爲一切眾生歡喜而愛敬。能以千萬種善巧之語言。分別而說法。持法華經故。頌雖結顯經勝。而又見意根通達若此也。要解云。此經純談諸法實相。開佛知見。故於六根功德。一一發明。倘能脫去情塵。以清淨根。照清淨境。遂見

山林周匝。禽獸嗚呼。撲鼻沾唇。殊形異意。無非實相。無非妙法。卽一身而圓證。遍六處而常彰。本不欠虧。曾無窒礙。經文方便駢旁。開示行人。應須充擴。悟入也。知音云。此品影起下品。常不輕迹。以便現神力。囑累上行等菩薩。於佛滅後。在此娑婆世界。廣其持說也。明果中功德。以勸流通竟。

妙法蓮華經授手卷第六之一

音釋

揮音灰汎音泛築音之六切阡音千田蠕而宣切蛻上內

退蛇蟬所螺音果羸音上羅音羅祗音止泛音販胗音軫尙音快平蹇

堅上聲圖音貶匱音梯窞音蛙歪音彎織音之石切廓音擴開也

窞音欸抵音邸涵音咸眩音覺驗音念跬音窺上聲殼音同殼醜音康

入聲鬱欲音六切歟音雲俱切叢音秦醉切疇音除雷切醜

音撲卜切窞音職日切駢音緹

妙法蓮華經授手卷第六之二

清楚衡雲峰沙門智祥集

常不輕菩薩品第二十

品節云。此品由前明持經功德殊勝故。特示堅持之行。所以如來自叙昔爲常不輕時受持此經。唯以平等佛慧。教化衆生。雖多遭毀辱。絕無一念疲厭之心。故至今日。得菩提果。此持經驗也。以此勸進二乘。當遵此範。末世持經。可無厭患。則退墮之心。無由起矣。又見如來往昔爲此妙法悟守之難。且不唯如來悟守之難。於惡世引經。又爲難之極。

法華持三昧經卷之二
一
難。故世尊憂懸之意深。叮嚀之誠切也。由是歷說持經之行。自提婆達多以來皆明悟守之事。至此遵如來行。然後乃爲精持也。前後諸品。文雖不一。而意實一貫。參會經文。自得其旨。具見如來說法之本意耳。大窾云。前迹門欲諸菩薩聲聞弟子發願持經。故如來引自己曾爲國王忍苦求法。以勵新記也。今欲地涌之衆決志持經。故復引自己曾行道法忍辱如是。以勵今會也。然此品論忍辱。則含三忍四樂之行。論持經。則顯一句全經之益。論功德。則始得六根清淨。終得無上菩提。由此一品。

攝前數品之義。又前品明所證。此明能證。能證之
人名常不輕者。由彼尊法重人。不生輕慢。故能修
忍辱而成菩提也。要解云。常不輕者。釋迦前身威
音王時。精持妙法。廣施利導之迹也。以佛性義。遍
記四衆。於善則拜。逢恚不怒。一切見敬。故號不輕。
不專讀誦。以持無相經。確忍罵辱。以持無我行。無
相無我。所謂精持也。於萬億歲。廣說是經。化萬億
衆。令住正道。使上慢者信伏。隨從。使畢罪者還得
道果。所謂廣利也。蓋前之持經。其五種功。雖圓而
未精。前之蒙利。獲六千德。雖勝而未廣。以其有人

法之緣影存焉。必蘄造於無相無我之妙。其於讀誦。不知所專。不知所忘。其於四衆。不知所敬。不知所慢。使妙行遍彰。億衆自化。敬慢之心。罪福之迹。凡所謂人法緣影者。皆溜然於正遍正等之域。然後爲精持廣益。茲實持經之盡道也。故勸持之文。終於此品。然品以常不輕名者。天台云。內懷不輕之解。外敬不輕之境。身立不輕之行。口宣不輕之教。人作不輕之目。故云爾也。④三此品引信毀罪福。證勸流通。分二。⑤一長行。又三。⑥一雙指前品罪福。

爾時佛告得大勢菩薩摩訶薩。汝今當知。若比丘。比丘尼。優婆塞。優婆夷。持法華經者。若有惡口罵詈誹謗。獲大罪報。如前所說。

涌出品後。世尊荅彌勒。將欲顯發。宣示諸佛三力。則壽量一品。爲自在神通力。分別功德。至法師功德。皆獅子奮迅之力。故告常精進也。今品明大勢威猛之力。故首告得大勢。以爲當機。得大勢卽大勢至也。與常精進藥王等。通在序品。參隨內以待夫。此作流通大行菩薩模範耳。如前所說者。法師品云。若有惡人。以不善心。常毀罵佛。其罪尙輕。若

人以一惡言毀訾在家出家讀誦法華經者。其罪甚重。是也。

其所得功德如向所說。眼耳鼻舌身意清淨。

此指得福。如向所說者。卽法師功德品也。要解云。將顯精持。先舉此者。所以警衆使知持毀之報不謬。而深信精持廣利也。庚二雙開今品信毀分二。辛一明事本。事本者。指威音王佛時。爲不輕行之事本也。

得大勢。乃往古昔。過無量無邊不可思議阿僧祇劫。有佛名威音王如來。應供。正徧知。明行足。善逝。世間

解。無上士。調御丈夫。天人師。佛。世尊。劫名離衰。國名大成。

因叙事本。先叙本師。以師顯本。其本有源也。先叙時代。次叙佛名。知音云。威以形言。音以聲音。王者自在。義兼形聲。而王於威音那畔也。由威故得劫名離衰。由音故得國名大成。如來舉昔因。而偏告得大勢者。大窾云。以末世持經。自非真得大法勢力。具天空海闊之懷。霽月光風之度。則爲境風飄動心海。興波作浪。不得甯帖。不能忍辱。故特告之也。△又威音者。不徒全事。以智德超勝。法音徧布。

也。故威以自全。音以全生。於自他無礙。故稱王也。其威音王佛。於彼世中。爲天人阿修羅說法。爲求聲聞者。說應四諦法。度生老病死。究竟涅槃。爲求辟支佛者。說應十二因緣法。爲諸菩薩。因阿耨多羅三藐三菩提。說應六波羅蜜法。究竟佛慧。

此叙威音亦說三乘也。因無上道。爲說六度。使由是而趣證菩提究竟佛慧。

得大勢。是威音王佛。壽四十萬億那由他恆河沙劫。正法住世劫數。如一閻浮提微塵。像法住世劫數。如四天下微塵。其佛饒益衆生已。然後滅度。

此舉威音如來之壽量無窮。以及正像劫量無際者。爲如來救濟之心與時無間也。故後云。饒益衆生已。然後滅度。又此兩句。更當活看。況衆生無盡。佛亦無終。而云益已滅度者。皆屬一期功勳言耳。此叙最初一威音王佛也。

正法像法滅盡之後。於此國土。復有佛出。亦號威音王如來。應供。正徧知。明行足。善逝。世間解。無上士。調御丈夫。天人師。佛。世尊。如是次第有二萬億佛。皆同一號。

自一佛相繼。而有第二佛也。但言此國。而不標名。

者。直指云。是一真清淨之寂光土也。謂佛與衆生。等同一體。故從上能度之主。并所度之生。總不離此土也。二萬佛同一號。正同二萬燈明。表真俗圓融之相。此叙佛之多。以見釋迦往因之曠遠也。
也。○二明本事。本事者。卽如來因中本所修行之事也。

最初威音王如來。旣已滅度。正法滅後。於像法中。增上慢比丘。有大勢力。

此謂二萬億之最初佛。正像法滅。而人極惡也。增上慢。是意惡。有大勢力。是身口惡。

爾時有一菩薩比丘。名常不輕。

此自叙因名。本是比丘。而以菩薩稱者。顯內秘外現。欲使一切衆生。普皆作佛。是人惡而已固善也。得大勢。以何因緣。名常不輕。是比丘凡有所見。若比丘。比丘尼。優婆塞。優婆夷。皆悉禮拜讚歎。而作是言。我深敬汝等。不敢輕慢。所以者何。汝等皆行菩薩道。當得作佛。

此出得名之由也。要解云。以佛性遍記四衆。四衆容行不等。而不輕以佛性等之。故皆悉禮拜。深敬者。謂皆行菩薩道。皆當作佛。豈可輕慢之也。

而是比丘。不專讀誦經典。但行禮拜。乃至遠見四衆。亦復故往禮拜讚歎。而作是言。我不敢輕於汝等。汝等皆當作佛。

此出所行之行也。天合云。讀誦經典。卽了因性。皆行菩薩。卽緣因性。不敢輕慢。卽正因性。又不輕深敬。是如來座。忍於打罵。是如來衣。以慈悲心。常行不倦。卽如來室也。又深敬。是意業。不輕之說。是口業。故往禮拜。是身業。此三與慈悲俱。卽誓願安樂行也。不專讀而但禮拜。正是持無相經。行無相行。但誠願在遠見。故往四字中發現。非偶然行也。

四衆之中有生瞋恚。心不淨者。惡口罵詈。言是無智比丘。從何所來。自言我不輕汝。而與我等授記。當得作佛。我等不用如是虛妄授記。如此經歷多年。常被罵詈。不生瞋恚。常作是言。汝當作佛。說是語時。衆人或以杖木瓦石而打擲之。避走遠住。猶高聲唱言。我不敢輕於汝等。汝等皆當作佛。

此明得名之緣也。直指云。緣四衆不知菩薩。以平等慧。普利一切。而反謂無智。故生打罵。言我不用如是妄記也。雖歷多年。常被打罵。而仍高聲稱讚。此可見內不以自悟而輕自心。外不以他迷而輕

衆生透頂徹底。以佛知見爲知見也。△此又見達多品云。於多劫中。無有懈倦。是真不違仙人所願也。

以其常作是語。故增上慢比丘。比丘尼。優婆塞。優婆夷。號之爲常不輕。

常不輕名。旣從四衆口授。則四衆人皆知有所常。知有所重。決非痴迷不信者等也。不然。常不輕三字。自何而得。況四衆甚廣。而後獨限于五百衆。遇佛授記者。無非要局面圓成耳。菩薩如是授記。四衆如是不受。針來線去。多少觀瞻。此處又見達多

一翻磨煉也。庚三雙明信毀果報。分三。辛先明信者果報。

是比丘臨欲終時。於虛空中。具聞威音王佛。先所說法華經。二十千萬億偈。悉能受持。卽得如上眼根清淨。耳鼻舌身意根清淨。得是六根清淨已。更增壽命。二百萬億那由他歲。廣爲人說是法華經。

此明功極而驗應也。要解云。始則不專讀誦。而終能聞持多偈。增億萬壽。廣爲人說者。由其無相無我緣影俱忘。故神智眞明。慧命不夭。而冥契若此也。威音雖滅。而法音不滅。故先所說經。可以具聞。

然於空中聞者。示其忘能所絕影像。然後能具此法。故得二十千萬億偈也。以能所忘影像絕故。卽得六根清淨功德也。前舉六根功德。方明所證之法。今舉不輕。乃示能證之人。

於時增上慢四衆。比丘。比丘尼。優婆塞。優婆夷。輕賤是人。爲作不輕名者。見其得大神通力。樂說辯力。大善寂力。聞其所說。皆信伏隨從。是菩薩復化千萬億衆。令住阿耨多羅三藐三菩提。

向所以爲人輕賤者。由保惜未忘。只得久忍疲勞。今一旦功深力極。如風躍雲開。妙行徧彰。始轉輕

賤。爲尊重矣。若不因輕賤。復何以得大神通力。具聞增壽也。樂說辯力者。卽億歲廣說也。大善寂力者。卽六根清淨眞常功德也。菩薩旣增那由他。而四衆隨從者。壽亦與等也。此處又見四衆與菩薩終非兩箇。

命終之後。得值二千億佛。皆號日月燈明。於其法中。說是法華經。以是因緣。復值二千億佛。同號雲自在燈王。於此諸佛法中。受持讀誦。爲諸四衆說此經典。故得是常眼清淨。耳鼻舌身意諸根清淨。於四衆中。說法心無所畏。

命終者。法執盡也。前言臨欲終時尙未捨命。乃將證將斷時也。由初聞此經。得一念歡喜。故不能疾斷。而反增法喜。如那由他也。今旣得命終。始能盡斷盡證。所以得真俗融事理俱。而發本明耀。故有如日月燈與雲自在燈也。日月燈。乃三無差別之智。雲自在燈。乃無礙妙智。由是正智如如。故能於衆中。說法無畏。

得大勢。是常不輕菩薩摩訶薩。供養如是若干諸佛。恭敬尊重讚歎。種諸善根。於後復值千萬億佛。亦於諸佛法中。說是經典。功德成就。當得作佛。

此皆行不輕行後。所事之佛。所修之善。以此福智莊嚴。始成無上正覺。要解云。引威音王日月燈雲自在。意明不輕積德。致道宣布法華源流之遠也。要使說是經。則如威音王而得大無畏。明是道。則如日月燈而相繼無窮。布是利。則如雲自在而潤覆無極。凡精持廣利。期造乎此。天台云。是比丘是菩薩。皆指不輕也。此文就信者論三報。一現報。謂得六根清淨。二生報。謂值燈明佛。三後報。謂值二千億佛等。

得大勢。於意云何。爾時常不輕菩薩。豈異人乎。則我

身是。

此結會古今。出權實本迹。皆一人也。

若我於宿世不受持讀誦此經。爲他人說者。不能疾得阿耨多羅三藐三菩提。我於先佛所。受持讀誦此經。爲人說故。疾得阿耨多羅三藐三菩提。

此舉往行以勸當修也。其文一反一正。先用反言。以勸信順。謂我於往昔。若不持說此經。則佛果胡能克證。次則正言。由我於先佛世持說故。令我疾得無上菩提也。前云命終後值四萬億佛。末後又值若干諸佛。則所歷之時。可謂久矣。而今自謂猶

爲疾得。可見菩提事不易成也。

①二明毀者果報。

得大勢。彼時四衆比丘。比丘尼。優婆塞。優婆夷。以瞋恚意輕賤我故。二百億劫。常不值佛。不聞法。不見僧。千劫於阿鼻地獄。受大苦惱。畢是罪已。復遇常不輕菩薩。教化阿耨多羅三藐三菩提。

此明毀者得善惡兩果報也。天台云。由謗毀故。千劫受苦。是惡果報。由聞佛性名。下大乘種。復遇不輕教化菩提。是善果報也。妙樂云。逆之得罪。順之得果。今日入會。由遠因不忘也。以是義故。上慢尙

成遠因。聞信甯無現益也。○問。若因謗墮苦。菩薩
何故爲作苦因。答。其無善因。不謗亦墮。因謗墮惡
必由得益。如人倒地。還從地起。故以正謗。接於邪
墮也。

得大勢。於汝意云何。爾時四衆常輕是菩薩者。豈異
人乎。今此會中。跋陀婆羅等。五百菩薩。師子月等。五
百比丘尼。思佛等。五百優婆塞。皆於阿耨多羅三藐
三菩提不退轉者是。

此結會古今處更好看。要知從前若信若毀。若忍
若辱。苦樂邪正。輕賤者不輕者。總只是今日一箇

瞿曇面目。故今信口道出。豈異人乎。天台云。跋陀婆羅。云善守。謂衆生若聞名。畢竟得三菩提。故云善守。又云賢首。位居等覺。爲衆賢之首也。補註云。有作五百比丘尼節句者。大有所妨。其意謂。出家二衆。但舉比丘。在家但舉優婆塞。又謂。千佛因緣經。但云思佛等。恐缺畧尼字。若據正法華云。師子月等五百比丘比丘尼。又加優婆夷。乃成四衆。則師子月。自是比丘。不應稱尼。故云有所妨也。今考因緣經云。思佛千優婆塞。得無生忍。鬱多羅母善賢比丘尼等五百比丘尼。不受諸漏。成阿羅漢。且

因緣經亦是什譯。豈敢定謂缺畧尼字。又尼思佛之名。未見他經所出。故不敢定言。後若見尼思佛名。方爲允當。④三結饒益勸持。

得大勢。當知是法華經。大饒益諸菩薩摩訶薩。能令至於阿耨多羅三藐三菩提。是故諸菩薩摩訶薩。於如來滅後。常應受持。讀誦解說。書寫是經。

此見經功殊勝。全品得力處。正屬此段。無非教人當信當持也。天台云。經實有力。終感大果。務當勤習五種之行。五種行者。卽五種法師行也。⑤二偈頌。分二。⑥一頌信毀因果。分二。⑦一頌事本。

爾時世尊欲重宣此義而說偈言。
過去有佛號威音王。神智無量將導一切。天人龍神。
所共供養。

此頌該盡二萬億佛。知音云。神智無量。法身也。威也。將導一切。般若也。音也。天人下。解脫也。王也。卽名以頌其實。④二頌本事。又四。⑤一頌雙標二人。是佛滅後。法欲盡時。有一菩薩。名常不輕。時諸四衆。計著於法。

此頌最初佛滅。便有此二種人。不輕是持經之師。四衆是慢法之人。乃信毀對舉也。著法者。卽執我

著相之流。佛藏經云。刀輪害閻浮提人。其失尙少。有所得心說大乘者。其罪過彼。⑤二頌明其得失。不輕菩薩。往到其所。而語之言。我不輕汝。汝等行道。皆當作佛。諸人聞已。輕毀罵詈。不輕菩薩。能忍受之。菩薩往其所。而授法言。是以真熏妄也。具不輕之實。諸人罵詈。而忍受之。是真能融妄也。得不輕之名。⑥三頌信毀果報。

其罪畢已。臨命終時。得聞此經。六根清淨。神通力故。增益壽命。復爲諸人。廣說是經。諸著法衆。皆蒙菩薩。教化成就。令住佛道。不輕命終。值無數佛。說是經故。

得無量福漸具功德疾成佛道。

補註云。由四衆輕賤。作不輕名。又以瓦石打擲。一皆能忍。所有罪業。因茲畢盡。是故臨終具聞妙法。便得六根清淨矣。(王)四頌結會古今。

彼時不輕。則我身是。時四部衆。著法之者。聞不輕言。汝當作佛。以是因緣。值無數佛。此會菩薩。五百之衆。并及四部。清信士女。今於我前。聽法者是。我於前世。勸是諸人。聽受斯經。第一之法。開示教人。令住涅槃。世世受持。如是經典。

此頌明古今人法不二也。知音云。彼時下。頌昔因

法華指掌疏卷之二
四
今果之師。見傳法之功德不虛也。時四下。頌昔因
今果之衆。見今佛前聽法非無故也。我於前世下。
見佛昔由勸人聽經爲因。今復開示令住涅槃爲
果也。世世下。明久持不倦。應前若我於宿世不受
持讀誦此經等文。庚二結頌勸持。

億億萬劫。至不可議。時乃得聞。是法華經。億億萬劫。
至不可議。諸佛世尊。時說是經。是故行者。於佛滅後。
聞如是經。勿生疑惑。應當一心。廣說此經。世世值佛。
疾成佛道。

此總訓於此妙法得見得聞。卽勿視此見聞爲易

易也。我自世世勸持此經。不知經億億萬劫。以至不可思議劫。乃得一聞。是此法聞不易也。又經如許多劫。乃得一佛出世。一演是法。是此法說亦不易也。是故我力勸汝等菩薩。於我滅後。應一心持說。勿生疑惑。必至速證無上極果。我爲汝等。保任此事。終不虛也。世尊囑人。到此可謂斬釘截鐵。不啻泣血。吾人誠不可自輕自忽也。已前三品半明弘經功德流通已竟。

妙法蓮華經授手卷第六之二

音釋

範

音范

窾

音苦管切

確

音苦角切
殼堅也

斡

音同

溜

音閔

打

音頂

詈

音利

霽

音際

飄

音縹

鐵

同鉄

妙法蓮華經授手卷第六之三

清楚衡雲峯沙門智祥集

如來神力品第二十一

品節云。此品由前廣說持經之功。復示自持之行。則當機圓悟已極。已遂如來出世本懷。且又得地。涌持經之眾。故如來歡喜。乃極盡神力而印證之也。且欲令當機達平等法界。直令覩佛境於目前。見淨土於當下。法利既圓。法王之家業可付。然品初必以地涌之眾而發起者。正顯自心性德滿足。乃爲法華全體。故如來卽現神力。遍身毛孔皆放

光明。舌至梵天。地皆震動。所謂通身吐露。徹底掀翻也。諸佛同放光明。以顯佛佛道同。十方諸佛同坐光中。空中出聲。遙讚釋迦說法華經者。顯十方諸佛心心相應也。十方世界通達無礙。如一佛土。乃昭廓法身真境。以消二乘限量之心。世尊至此。極盡神力。發揚此經功德不盡者。由如來所有一切之法。一切自在神力。一切秘密之藏。一切甚深之事。皆於此經宣示顯說故。久默斯要。今乃說之。以其難信難解者。今已信解。所謂悟佛知見。而奉持之功德。亦非思量可及。開示至此。顯理已圓。故

盡佛神力。以印證之。所以判此品爲顯理之極也。顯理既圓。故次囑累。舊判自此已下。俱屬流通。直指云。自從地涌出品至此七品。皆是顯本門事業。涌出品顯本門大用。壽量品顯本大體。分別隨喜法師三品顯本大功。不輕品顯本大行。今神力品顯本大果。言大果者。應譬喻品云。如來成就無量知見力無所畏。有大神力。及智慧力。具足方便智慧波羅蜜等。此皆是大果所攝。蓋迹門一十四品。通屬如來智慧。自本門至此七品。又屬如來神力。但前六品。是神力與智慧並行。惟此品。是終本門

大全之旨。而欲掃蕩慧力之迹。故獨現十種神力。於剎那頃。直使十方世界。通爲一土。九界眾生。齊登佛地。以完長者身手有力之案也。天台云。如來義如前釋。神力者。神名不測。力名幹用。不測則天然之體深。幹用則轉變之力大。爲欲付囑深法。現十種神用。故名神力品。①此去八品。總明付囑流通。分爲三段。②一此與囑累二品。明囑累流通。分二。③一明菩薩受命弘經。又二。④一長行。分三。⑤一菩薩受命。又二。⑥一經家敘儀。

爾時千世界微塵等菩薩摩訶薩。從地涌出者。皆於

佛前。一心合掌。瞻仰尊顏。

地涌之眾。本爲弘通大法而來。當時由會眾陳疑請問。佛爲顯本門大事。開導未畢。故不暇陳來意而發願也。然迹本二門流通之機。各有兩層。如迹門如來唱募流通。而新記皆已發願此方他方。實未恰佛本意。但顧視八十萬億菩薩。始有持品及安樂行。而成如法流通也。今本門亦有兩層。前分別隨喜法師三品。亦不盡如來本意。今得涌出大眾各陳本念。則如來懸懷可罄。而此心無慮矣。須知二門流通之眾。前位僅可自利。而後位得真如。

法華指掌疏卷之二十三
三
大用。全身擔荷。故使如來雪釋所懷。現神喜幸。爲
付囑耳。⑤二發誓弘經。

而白佛言。世尊。我等於佛滅後。世尊分身所在國土。
滅度之處。當廣說此經。所以者何。我等亦自欲得是
眞淨大法。受持讀誦。解說書寫。而供養之。

知音云。究其語意。于處之廣狹。心之緩急。較前有
兩不同。於持品諸發願者。何故。藥王等雖各發願
此方他方周旋往返十方持經。然但奉佛命。不得
佛心。故佛不放心瞑目而付囑也。惟此千世界塵
眾發願。舉其處則曰。於佛滅後世尊分身所在國

土滅度之處。是持經之處。無量擴乎。其不止於周旋往返一佛滅後之十方世界也。以佛分身無量。世界亦無量故。舉其心則曰。我等亦自欲得是真淨大法。是持經之心。無倦恢乎。其不同於八十萬億那由他菩薩言。我等敬信佛。悉忍是諸惡。惟願世尊在於他方遙見守護。以畏惡求護。終是賴佛行事。今此大眾。自欲得真淨法。則上不恃佛。下不畏惡。故得佛命。而慙佛心。卽現神力而囑累也。

①辛 二佛現神力。分二。②壬 一所對之眾。

爾時世尊。於文殊師利等。無量百千萬億。舊住娑婆

世界菩薩摩訶薩。及諸比丘。比丘尼。優婆塞。優婆夷。天。龍。夜叉。乾闥婆。阿修羅。迦樓羅。緊那羅。摩睺羅伽。人。非人等。一切眾前。

此去皆經家敘置。佛以十種神力。爲囑累也。知音言。文殊等爲舊住。顯上行等爲新任。况文殊在過去。日月燈佛。爲妙光法師。教入王子。其第八曰。燃燈。則釋迦於燃燈。始發大心。故稱文殊爲舊住。娑婆之耆宿也。今對此眾前。現大神力。是欲將此經付囑本土也。

⑤二正現神力。分爲十科。⑥一出舌表眞。

現大神力。出廣長舌。上至梵世。

此如來以廣長舌。現超世間。徧覆一切大神力也。天台云。現大神力一句爲總。下十種是別。吐舌相者。顯今經所演開三顯一權實本迹授記聲聞因緣譬喻等。一皆誠諦不虛。不然。胡能現此廣長舌相耶。三世不妄語。舌能至鼻。三藏佛舌至髮際。今至梵天。出過凡聖之外。極於淨天之頂。相旣殊常。說彌可信。○二放光顯妙。

一切毛。孔放於無量無數色光。皆悉遍照十方世界。眾寶樹下。師子座上諸佛。亦復如是出廣長舌。放無

量光。

此如來以毛孔光現。充周十方無遮障大神力也。經凡三會放光。最初於眉間白毫放光。但照東方萬八千土者。特於淺近中。示現此境。爲一切未知者。令其知且識也。次於三變土處。亦放是光。照東方五百萬億那由他恆河沙國。如是次第。遍照十方。較前方土增勝。是擴充前境。令其知識深增廣達耳。前但一毛。今則一切毛。前只一色。今無數色。前照少方。今則十方。此所謂以無數方便。漸令人佛智。先則日甚深無量難解難入。至此則透頂透

底。無餘蘊矣。天台云。通身毛孔。遍體放光。周遍十方。無處不明。表二門理一。智境究竟也。上迹門白毫吐耀。始在東方。表七方便。初見一理。今本門既竟。放一切光。照一切土。能令初心因位。終於等覺。究竟佛慧。分身諸佛。亦復如是。此相既同。各於其土利益亦然。癸三延促同時。

釋迦牟尼佛。及寶樹下。諸佛現神力時。滿百千歲。然後還攝舌相。

此如來以暫作久。幻變三際。現延促同時大力也。一時吐舌。延百千歲。非大神力。而何攝收也。還攝。

對上出舌言。直指云。諸佛證得三際平等真俗一
如。乃能延剎那爲一劫。促一劫爲剎那。以其心量
不存。則法界量滅。法界無量。而延促如幻。是佛尋
常受用三昧。但對新機。故曰神力。○四警歎彈指。
一時警歎。俱共彈指。是二音聲。遍至十方。

此如來以彈歎聲。現普徧十方無隔礙大神力也。
攝舌相後。將欲發聲。故曰警歎。警歎彈指。何言神
力。神力在一時俱共四字中見得。蓋三變土中之
分身佛。數量無際。如是多佛。俱共一時警歎彈指。
釋迦不先。分身不後。二種音聲齊遍十方。此非大

神力耶。要知我如來以全體大用。直顯本地風光。使一切人。透脫玄關金鎖。具頂門眼。所謂咳吐掉臂。皆向上機。此正涅槃會上拈花旨也。前此四大神力。係佛身自出。諸分身佛亦然。以下六神力。乃佛聲光之力。及被佛聲光之力。轉次所現也。

⑤五地六種動。

諸佛世界地皆六種震動。

此佛聲光威神之力。動彼十方諸地相也。神力不在震動。而在諸佛世界地皆六種八字上見。如來出世大事本迹二門開彰已畢。故出舌相。以表真

實。會眾見相。已信如來言無虛妄。佛復欲完白毫中圓具十界之相。使人更知不唯一毫如是。則毛孔孔無不皆然。如此者。則色遍十方矣。色既如是。聲亦皆然。所以有警欬彈指俱遍十方之聲也。且色聲但屬眼耳。而鼻舌身意未嘗顯示。故于此又現大神力。致諸佛世界此感彼應。以至六種震動。則是六種震動。正顯六根大用全彰。使會眾因知自己根根塵塵周遍法界。始不疑諸佛智慧何故甚深無量難解難入也。○六普見大會。其中眾生。天龍。夜叉。乾闥婆。阿修羅。迦樓羅。緊那羅。

摩睺羅伽人。非人等。以佛神力故。皆見此娑婆世界。
無量無邊百千萬億眾寶樹下。師子座上諸佛及見
釋迦牟尼佛共多寶如來在寶塔中坐師子座。又見
無量無邊百千萬億菩薩摩訶薩。及諸四眾恭敬圍
遶。釋迦牟尼佛既見是已。皆大歡喜。得未曾有。

此佛聲光不思議之力。令彼十方眾生見勝相也。
眾生卽指前所震動之十方普佛世界中所有一
切眾生也。眾生何由得見娑婆世界無量諸佛及
菩薩四眾等。以佛神力故也。惟佛以神力現示。故
頓使一切眾生同於一時。齊成正覺。開佛知見。知

見既開。則無所不見。雖世界如是廣遠。諸聖如是
眾多。無不分明顯現。圓見無遺。那得不大歡喜。得
未曾有耶。○七空中出聲。

卽時諸天。於虛空中。高聲唱言。過此無量無邊。百千
萬億。阿僧祇世界。有國名娑婆。是中有佛。名釋迦牟
尼。今爲諸菩薩摩訶薩。說大乘經。名妙法蓮華。教菩
薩法。佛所護念。汝等當深心隨喜。亦當禮拜供養釋
迦牟尼佛。

此佛聲光不思議力。令彼十方諸天。見勝勸供。相
也。諸天何由得聞娑婆世界有釋迦牟尼。爲諸菩

薩說此大法。亦以佛神力故也。惟佛以神力現示。故於真俗圓融中。有此聲作此語。知此三寶。告此眾生。教令深心隨喜。則知如此深境。非此深心。不能契會。此禮拜供養。所以不容已也。

○癸 八聞聲至敬。

彼諸眾生。聞虛空中聲已。合掌向娑婆世界。作如是言。南無釋迦牟尼佛。南無釋迦牟尼佛。以種種華香。瓔珞。幡蓋。及諸嚴身之具。珍寶妙物。皆共遙散娑婆世界。

此十方眾生。藉佛光被。聞虛空之音。遂知於佛興

供相也。彼諸眾生。一聞空中之聲。何以便合掌稱名。且遙呈種種寶物。共散娑婆。亦以佛神力故也。惟佛以神力現示。故於盡十方法界。若已若人。總得開佛知見。彼此不分。故各於自所住處。作諸供養也。若論此中本始二覺。則一切人。於第六神力中。已見釋迦與多寶同居一塔。至於分身諸佛一切菩薩。皆已明見。又何用天人再告。須知由聞此聲。又得一翻親切。所以說向娑婆。於處親切。稱如來名。於理親切。既有所向有所尊。則知無不明。此可謂真得佛知矣。⑨九供物成蓋。

所散諸物。從十方來。譬如雲集。變成寶帳。遍覆此間諸佛之上。

此娑婆眾生。亦因佛神力故。遂得見於十方。各各與供。變現之相也。彼花香瓔珞等。來如雲集。何由變成寶帳。覆我諸佛。此非佛神力。斷不能也。要知諸物來從十方。是攝大用於一處。變成寶蓋。是散而復聚。正應如來說無量義經已。又入無量義定。此間諸佛。卽全體也。徧覆者。無佛不俱也。徧覆此間諸佛之上。始是攝大用歸全體。所作已辦。知見已圓。所謂慈蔭妙雲。覆涅槃海。○十通一佛土。

於時十方世界。通達無礙。如一佛土。

此總繳由佛神力。十方世界與娑婆世界。皆悉融通。爲一佛土相也。世界是依正二報之總名。且器界本無分限疆域。皆是強名。而正報眾生。固爲一理。由知見妄生。致令眾塵隔越。所謂無同異中。熾然成異者。皆妄也。虛妄旣立。知見妄分。所以在眼分爲見。在耳隔爲聞。故謂元以一精明。分成六和合也。世尊於無量劫。證此無礙妙理。觀一切人大夜難曉。故特爲此大事。因緣出世。開示之也。今旣開示已極。而一切人知見亦極。是翻前迷境。爲大

覺場。故于十方世界。昔所不通。不達最滯。最礙之所。而今豁然貫徹。故曰通達無礙。如一佛土也。如來始自放光現瑞。出定歎德。開權顯實。廢迹顯本。共二十品經文。妙法深談。至此神力妙現。至此本迹融會。至此生佛同證。至此轉虛妄知見。成諸佛知見。至此無一針鋒處。不是佛知。無一微塵裏。不是佛見。始完如來出世爲一大事。因緣開示悟入之本心本願也。按經意。本門正宗。當終於此。佛現神力已竟。④三結要勸持。分四。⑤一稱歎付囑。爾時佛告上行等。菩薩大眾諸佛神力。如是無量無

邊。不可思議。若我以是神力。於無量無邊百千萬億阿僧祇劫。爲囑累故。說此經功德。猶不能盡。

從前既將出世本懷顯發已竟。而會眾亦一一圓證已竟。故但召下方弟子而付囑也。且現神力時。於文殊眾前者。由文殊於日月燈明時。已領命流通。藥王於日月淨明德佛前。亦已受命流通矣。但於此諸菩薩前。現如是神力。以彼皆耆宿。曾見先佛亦如是現。今復覩相。而流通之意復新。上行等。昔所未見。今一見如是神力。則受命流通之念轉切。必祈滿足菩提而後已。亦使新記聲聞。安心萬

行更無餘想。故告云諸佛神力。此其少分。尙有不思議者存焉。此結證本門正宗大業也。若我以此神力下。方起付囑流通。謂若我以此神力。現於無量劫中。劫劫爲囑累故。宜說此經功德。猶不能盡。是知前段結上。後節起下。則於正宗流通兩楹之中。始有分結。若作一氣解釋。則此神力獨爲流通而舉也。看者當須斟酌。且諸佛如來。凡現神變相。皆有大因緣。故最初欲開權顯實。授三根人記。但略放一光。迹門將畢。而復欲開顯本門大事。則又廣放斯光。今正宗事畢。故現如是十種神力。則興

起流通之意。有在於茲。⑤二結要付囑。以要言之。如來一切所有之法。如來一切自在神力。如來一切秘要之藏。如來一切甚深之事。皆於此經宣示顯說。

此總束前正宗權實本迹所說過者。今皆並舉。總結一經大要。以付囑地湧菩薩。使之得其關要。以便處處流通也。故曰以要言之。如來乃道舉十方三世所有之佛。法卽諸佛如來各各於道場所證之法。而言一切所有者。卽指前正宗最初出定歎德。十界十如。大小權實。三周開顯。授聲聞記。以至

歎美法師。說安樂行。地涌因緣。壽量長遠等。皆是如來所有一切法也。此屬佛之智慧自在神力者。卽前放光動地。延促同時。八十小劫。謂如半日。接大眾於虛空。變娑婆於頃刻。以至如上十種神用。皆是如來一切神力也。此屬佛之神通。秘要藏者。爲諸佛守護。秘卽秘密。要乃緊要。如前光中所現十法界相。豈非秘要。地中所涌多寶妙塔。豈非秘要。下方所出一一菩薩。豈非秘要。龍宮涌出無量化眾等。此皆向所未現者。今於法華。一一顯露。令見聞者。畢到菩提。皆是如來秘要之藏。故謂久默。

斯要也。此屬如來三昧。甚深之事者。卽如文殊明
日月燈佛之事。世尊說大通智勝事。提婆達多事。
龍女成佛事。化地涌眾事。常不輕行事。開權顯實
事。廢迹顯本事。皆爲難測難知。是如來甚深事也。
此屬如來知見。故譬喻品云。有無量三昧智慧神
通知見波羅蜜皆已具足。今欲付囑諸菩薩如此
四法。但撮要而言。故云皆於此經宣示顯說。更須
知此四法。卽五重立義所建立者。一切法。卽妙法
名也。自在神通旣已明見。則疑斷信生用也。秘要
之藏。卽融萬有。而歸一實相體也。甚深之事。因果

該徹。一乘所尙宗也。唯此四句。攝盡一經全旨。斯可見經意。完正宗而總要義。以付囑諸菩薩。始是流通。⑤三勸獎付囑。

是故汝等。於如來滅後。應一心受持讀誦。解說書寫。如說修行。所在國土。若有受持讀誦。解說書寫。如說修行。若經卷所住之處。若於園中。若於林中。若於樹下。若於僧坊。若白衣舍。若在殿堂。若山谷曠野。是中皆應起塔供養。

是故汝等下。召上行等守護流通。然流通畢竟要一心受持讀誦。解說書寫。如說修行。具此六事。堪

當責任。所在國土下。謂凡有此經之處。凡有修行此經之人。逐一命上行等。皆應起塔供養。此是應上四殊勝力。悉屬此經。咸在此人。而繼起慧命也。故當恭敬。⑤四釋成付囑。

所以者何。當知是處。卽是道場。諸佛於此得阿耨多羅三藐三菩提。諸佛於此轉於法輪。諸佛於此而般涅槃。

此正釋其意。上云經卷所在之處。便應起塔者。以經中要說。要在四事。是處者。天台云。卽經在處。以道場釋上甚深之事。得菩提釋上秘藏。轉法輪釋

上一切法。入涅槃釋上神力。此之四要。攝經文盡。故皆應起塔也。所言要者。得菩提是法身。轉法輪是般若。入涅槃是解脫。三法成秘密藏。佛住其中。卽是塔義。庚二偈頌。分二。辛一頌十種神力。

爾時世尊。欲重宣此義。而說偈言。

諸佛救世者。住於大神通。爲悅眾生故。現無量神力。舌相至梵天。身放無數光。爲求佛道者。現此希有事。諸佛警欬聲。及彈指之聲。周聞十方國。地皆六種動。以佛滅度後。能持是經故。諸佛皆歡喜。現無量神力。前四句總頌。諸佛當其出世。住大神通。無非爲救

此未聞佛道者。其所以顯現神力。不止於此。有無量也。亦不過悅樂眾生。令其深造耳。舌相等四句。頌色徧十方。令新舊住娑婆。以及他方雲集九界眾生。咸得聞此正宗大業。各發二利之心。其求是道。何等諄切。故爲之吐舌放光。現此希有。以結證前文之所受也。譬欬等。頌聲徧十方。普諭此界他方。令知佛滅度後流通得人。如來出世本懷。不大慰耶。所以現無量神力。以起後付囑流通也。於前十種神力中。但出此四。餘皆攝於無量二字中。

④二頌結要付囑。分三。⑤一總頌四法。

囑累是經故。讚美受持者。於無量劫中。猶故不能盡。是人之功德。無邊無有窮。如十方虛空。不可得邊際。此總頌四法。但云囑累是經故。以至不可得邊際。具含四義。義既無邊。則受持之人功德。亦無邊也。

⑤ 二別頌四法。分四。⑥ 一頌一切之法。能持是經者。則爲已見我。亦見多寶佛。及諸分身者。又見我今日。教化諸菩薩。

此頌如來一切所有之法。天台云。持法卽持佛身。一切法不出能化能證及所化所證故也。

⑦ 二頌自在神力。

能持是經者。令我及分身。滅度多寶佛。一切皆歡喜。
十方現在佛。并過去未來。亦見亦供養。亦令得歡喜。
神力動相。從歡喜中生。若有能持此經。不唯卽今
諸佛現神稱讚。使三世十方如來。無不如是現神
稱讚也。○三頌秘要之藏。

諸佛坐道場。所得秘要法。能持是經者。不久亦當得。
諸佛於菩提道場。所得秘密微妙難解之法。唯佛
與佛乃能知之。今若能持誦此經。則去道場不遠。
不久亦當得此妙法矣。○四頌甚深之事。
能持是經者。於諸法之義。名字及言詞。樂說無窮盡。

如風於空中。一切無障礙。於如來滅後。知佛所說經。因緣及次第。隨義如實說。如日月光明。能除諸幽冥。斯人行世間。能滅眾生暗。教無量菩薩。畢竟住一乘。上言不久當得此法。是自利。此言樂說無窮盡方。是利他。謂若能持誦此經。則得於法於義言詞樂說。以成四無礙辯。說法無滯。如風入室。了無障礙。既得如是辯才。於如來滅後。凡佛所說一切經法。隨其次第。亦能如佛。以種種因緣譬喻言詞。而爲衆生說。此實相妙法也。自覺覺他。破愚癡暗。喻如日月光明。無所不燭。故能教化無量菩薩。究竟一

乘妙果。豈非如來甚深之事耶。⑤三頌總結勸。是故有智者。聞此功德利。於我滅度後。應受持斯經。是人於佛道。決定無有疑。

此頌總結四法。言若能持此四法。信受斯經。畢竟成佛無疑也。從現神力之後。如來正說流通。故告上行等諸菩薩。總一經要義。不出四法。而重疊發明。本爲囑累。故此結云。是人於佛道決定無有疑。則此段長文並頌。在囑累流通之前。亦是結前起後。盡此之後。立囑累品也。

囑累品第二十二

品節云。此品因前開示顯理已圓。當機悟心已徹。信解已真。而成佛之正因已具。則如來出世之本懷已滿。正若長者父子情忘。卽當委付家業。故說囑累。以終諸弟子之信解也。○自提婆達多至此。十一品經。總爲悟佛知見。合前二十二品。通爲信解。總屬顯理爲因。下六品顯行。以明證入爲果。要解云。以言託之曰囑。以法系之曰累。欲使傳續妙法。利達無窮。故曰囑累。而爲付授流通也。然法會未終。遽說囑累者。此經以智立體。以行成德。前之開佛知見。明一大事。立體之法旣備。故說囑累。以

明佛佛授手之要止此而已。後之以行成德者。唯體前法。推而行之。更無別法。既無別法。則於此囑累宜矣。④二明如來摩頂付囑。分二。⑤一特明付囑。又三。⑥一如來付囑。

爾時釋迦牟尼佛。從法座起。現大神力。以右手摩無量菩薩摩訶薩頂。而作是言。我於無量百千萬億阿僧祇劫。修習是難得阿耨多羅三藐三菩提法。今以付囑汝等。汝等應當一心流布此法。廣令增益。如是三摩諸菩薩摩訶薩頂。而作是言。我於無量百千萬億阿僧祇劫。修習是難得阿耨多羅三藐三菩提法。

今以付囑汝等。汝等當受持讀誦。廣宣此法。令一切
眾生普得聞知。

前品神力。是慶悅眾生。以成法喜。故就座而現。以
顯果體自在。今爲付囑流通。雖是成就菩薩自行。
然佛爲續慧命。是佛已事。故從座起立。而復現神
力也。直指云。舉手表權。摩頂表實。藉諸佛之權。顯
自性之實。始契流通之旨。舉一手而普摩無量諸
菩薩頂。是大神力。此如來以身業加持也。已上是
經家敘置。結證法師品。則爲如來手摩其頭之案。
二曰。我於無量劫。修習是難得法。今以付汝等。是

以口業加持也。三曰。汝等應當一心流布此法。廣令增益。是意業加持也。此結證法師品則爲如來所遣行如來事之案。卽此三處加被。見如來大展慈悲。無恡無畏顯矣。△細玩付囑之詞。曰我於無量劫。修習是難得之法。此中勤苦有不忍具說者。豈獨於阿私仙處。千歲忍苦。爲常不輕時。億劫行道耶。須知歷塵點劫之捨身命。又豈止一娑婆而無芥子許空處耶。總爲得此法之難耳。今以此難得之法。付囑汝等。汝等但憶已之勤苦難得。當思吾之勤苦難得。豈不盡力流通哉。此爲佛囑上行

等之苦切至矣。再觀初曰廣令增益。後曰令一切眾生普得聞知。此又爲吾佛不捨切眾生之苦切至矣。讀者當深生慚愧。

所以者何。如來有大慈悲。無諸慳恡。亦無所畏。能與眾生佛之智慧。如來智慧。自然智慧。如來是一切眾生之大施主。汝等亦應隨學如來之法。勿生慳恡。

此正出囑累之意。所以者何下。至大施主。是佛自舉大體爲宗。教上行等効法而行也。直指云。大慈悲。卽如來室。應安樂品。生二種心。無慳恡。卽如來衣。應方便品。若以小乘法。我則墮慳貪。無所畏。卽

如來座。應前以無畏心說是經典。天台云。佛智慧。卽一切智。如來智慧。卽道種智。自然智慧。卽一切種智。於如來室中。能施眾生三種智慧。乃至座中亦復如是。此卽衣座室中。各具三智。以此三事。弘經益他。令他各得果地三智之用也。汝等下。是囑累上行等効之而普利也。一曰應學。又曰勿悞。如此囑累。可謂諄諄矣。

於未來世。若有善男子。善女人。信如來智慧者。當爲演說此法華經。使得聞知。爲令其人得佛慧故。若有眾生。不信受者。當於如來。餘深法中。示教利喜。汝等

若能如是。則爲已報諸佛之恩。

此正囑於未來世而流通也。天台云。若根深智利。直說佛慧。若不堪者。於餘深法中。示教利喜。佛慧是深而非餘。方便是餘而非深。別教次第。是餘亦深。汝能以餘深之法。助申佛慧。卽善巧報佛之恩也。此名誠付。始完寶塔品中付囑有在之案。

④二菩薩領受。

時諸菩薩摩訶薩。聞佛作是說已。皆大歡喜。徧滿其身。益加恭敬。曲躬低頭。合掌向佛。俱發聲言。如世尊勅。當具奉行。唯然世尊。願不有慮。諸菩薩摩訶薩。

如是三反。俱發聲言。如世尊勅。當具奉行。唯然世尊。願不有慮。

天台云。佛既三業付囑。菩薩亦三業領受。俱發聲。是口領。曲躬等是身領。歡喜是意領。如世尊勅者。領受如來是大施主。卽入室也。當具奉行者。領教無諸慳恡。卽著衣也。願不有慮者。領教無所畏。卽坐座也。△此經本迹二門。如來屢屢教人發願通經。意在大法難行。人亦難信。誰能悟此妙法。徹古通今。誰能以此妙法。益人自益。四十年中。血心苦口。到法華會上。始有回心向此法門者。既能信受。

卽與記成佛。而急急乎使之流通。會中諸菩薩聲聞亦疊疊發願受持。於中或抑或揚。皆是大權方便。策進新行。其實一往尙未決定。至此始摩頂安慰。而再三付囑矣。況摩頂是上愛下之意。曲躬低頭。乃下敬上之儀。上行等至此喜徧通身。益加恭敬。是何等慶快。故亦三番承任。可謂全身擔荷矣。此方結完如來不許他方菩薩弘經之案。

⑧三事畢唱散。

爾時釋迦牟尼佛。令十方來諸分身佛。各還本土。而作是言。諸佛各隨所安。多寶佛塔還可如故。

此見能事既周。則各安所安也。直指云。初爲三周召集。以表圓行圓證。自變土以來。分座而坐。共助法化。至神力品。與佛同放寶光。同現舌相。以表主伴體用一如。由此迹本兩門。一切大會。同見同聞。佛知佛見無不了。大功佐畢。故命各還本土。導利本土眾生。多寶是本覺之理。理無來去。故曰還可如故。△分身諸佛向從十方來者。爲利眾生。從無去來中。示諸來相。今既大功告竣。則退藏於密矣。多寶佛塔向出現時。但曰爾時佛前有七寶塔。竟不言從何所來。昔既不來。今亦何往。所以云還

可如故。此一故字。當須著眼。向如來未放光出定時看。向彌勒文殊未問答時看。向分身諸佛未動步時看。向寶塔未涌現已前看。於此等處。看得親切。始知還可如故的境界。甚不可思議也。

庚二時眾歡喜。

說是語時。十方無量分身諸佛坐寶樹下。師子座上者。及多寶佛并上行等。無邊阿僧祇菩薩大眾。舍利弗等聲聞四眾。及一切世間天人阿修羅等。聞佛所說皆大歡喜。

世尊爲大事出世。開示眾生本覺妙明。自放光出

定已來。若聖若凡。是依是正。無不從頭變弄一過。至令三根同證。十界普圓。生界既空。世界相滅。總爲一眞法界。而復流通有託。慧燄繼於將來。克紹得人。道種遍於沙界。出世本懷。於斯已畢。故至諸佛同慶。海會共歡。當此之時。正是諸佛演圓滿修多羅教。共入普光明殿。天台云。昔慈恩基師。安國涉師。並移此品於勸發品後。若在於此。有八相違。十不可之說。荆溪尊者。於記文中。一一敘破。文繁不錄。知音問。何不命多寶塔還歸下方。答。尙欲留證宿王華之請藥王本事。教妙音來見文殊。受觀

音之分瓔珞。成無盡意之福田故也。又云。本分流
通於此。已訖支別流通。更有六品。首置藥王本事
者。藥王持此經。爲一切眾生所喜見。不惜燒身然
臂。見法師品之所因。及持品之發願也。藥王持經。
於此方之行。則苦矣。於他方之音。則未妙。故受之
以妙音來往品。見八十萬億那由眾周旋往返之
軌範矣。周旋於世界。爲人雖妙。往返於自身。爲己
則不自在。故受之以觀音普門品。見上行等六萬
恒沙之眾。自欲得真淨大法。無非普門自在之業
矣。流通至普門自在。則可謂總一切法持無量義。

故受之以陀羅尼品。流通既至總持。則上合十方諸佛本妙覺心。下合六道眾生同體悲仰。莊嚴妙覺王刹之行至矣。而無以加矣。故受之莊王本事品。妙莊嚴王。乃成佛之果。普賢勸發。爲成佛之因。欲明此經因該果海。果徹因源。則無越乎內樹四德外全萬行。不捨寶威德上王佛國。而來遊戲於娑婆世界。故受之以普賢勸發品。而告終焉。然此六品。於本經各爲一支。別明一行。故名支別流通也。

妙法蓮華經授手卷第六之三

妙法蓮華經授手卷第六之四

清楚衡雲峯沙門智祥集

藥王菩薩本事品第二十三

品節云。此品來意。前既顯理已圓。今當顯行以明入佛知見也。以藥王明行者。意謂雖悟圓理。然於俗諦利生。必資止觀之藥調治之方。淨治無明煩惱。以破我法二執。方爲妙行。而可證入妙果矣。故首問藥王云。何遊於娑婆世界。而行百千萬億難行苦行者。正示二乘初涉生死險道。全仗止觀之力故。以藥王因昔聞妙法華經。得現一切色身三

昧破我法二執。乃能以神力供佛。得受付囑也。然
以身供佛。表破我執。以臂供塔。表破法執。二執全
空。皆因法華三昧之力。顯持經之功。見妙法最勝。
故廣讚經功。凡有修者。無不獲益也。執有分別俱
生二種。初破分別二執。卽登初地。破俱生二執。卽
登佛地。今明破二執。而登地之行。至此乃顯。故判
爲入佛知見明矣。楞伽明菩薩以止觀力。進破二
障。實證真理。從初地至第七地。頓捨藏識。乃入八
地。自此卽得三種意生身。一者。謂三昧樂意生身。
二者。覺法自性意生身。三者。種類俱生無作意生

身。此當八地得現一切色身三昧。正三昧樂意生身也。妙音觀音二品。如次配二種身。以得此身。乃實證之驗也。然此意生身。入定則有。出定則無。故云三昧樂。天台云。藥王本事者。觀經云。昔名星光。從尊者日藏。聞說佛慧。以雪山上藥。供養衆僧。願我未來能治衆生身心兩病。舉世歡喜。號曰藥王。今此經云。名一切衆生喜見。頓捨一身。復燒兩臂。輕生重法。命殞道存。舉昔顯今。故言本物品也。

⑤二後五品約化他流通。分五。⑥一出藥王本事。助弘經法師。以勸流通。分四。⑦一請問。

爾時宿王華菩薩。白佛言。世尊。藥王菩薩云何遊於娑婆世界。

理既圓而行必彰。故有宿王華出請妙行也。直指云。宿卽如如理。是真諦。華卽如如智。是俗諦。王卽理智互融。是中道。以三諦一心。爲理事無礙之妙行。與本迹兩門會衆。發藥王本事。以啟大行關鍵。故如此問也。知音云。當機意謂。娑婆爲五濁惡世。人所畏憚。而藥王於特品。獨發願遊於此土者。未審有何本事。妙樂云。通問遊者。遊必具足十法界身。並如妙音觀音。但別舉苦行。以逗所宜。故請答。

之言。意在苦行也。

世尊。是藥王菩薩有若干百千萬億那由他難行苦行。善哉世尊。願少解說。諸天。龍神。夜叉。乾闥婆。阿修羅。迦樓羅。緊那羅。摩睺羅伽。人。非人等。又他國土。諸來菩薩。及此聲聞衆。聞皆歡喜。

據當機請詞。已知藥王有若干苦行。必難具說。今請世尊。於難說中。說其少分。使此方他方一切會衆。聞而歡喜。必倣風行之。以持此經也。

庚二對答。分二。①一答苦行。又二。②一明事本。

爾時佛告宿王華菩薩。乃往過去無量恆河沙劫。有

佛號日月淨明德如來。應供。正徧知。明行足。善逝。世間解。無上士。調御丈夫。天人師。佛。世尊。

此舉藥王本事之始也。直指云。一悟圓教初住之時。定證心佛衆生三無差別之理。是以所師之佛。號日月淨明德。表三身不住我法雙亡之相。卽此佛號謂之藥也。

其佛有八十億大菩薩摩訶薩。七十二恆河沙大聲聞衆。佛壽四萬二千劫。菩薩壽命亦等。

此叙大小乘法屬。然壽等如來。而獨謂菩薩者。要知皆是補處位人。其日月淨明之德。亦具矣。

彼國無有女人。地獄餓鬼畜生阿修羅等。及以諸難地。平如掌。瑠璃所成。寶樹莊嚴。寶帳覆上。垂寶華繡。寶瓶香爐。周徧國界。七寶爲臺。一樹一臺。其樹去臺。盡一箭道。此諸寶樹。皆有菩薩聲聞而坐其下。諸寶臺上。各有百億諸天。作天伎樂。歌歎於佛。以爲供養。此叙依報莊嚴。女人爲污染之緣。佛旣名淨明。宜其無女人也。三途爲愚痴覆慧。佛旣名日月淨。故無三途苦處也。修羅等以瞋毒爲因。佛旣名淨德。所以無修羅與諸難也。地以琉璃而平如掌者。爲淨德而成也。樹卽智行。臺卽理觀。寶帳以表慈悲。

華幡以喻弘辯。瓶爐周遍。乃衆德畢具。樹臺間隔。乃理智互嚴。樹坐菩薩聲聞。臺作歌讚伎樂。此皆以明如來妙德。依不出正。故一一皆從日月淨明德所建立也。天台問。文無修羅。而下何言修羅等。見其無臂耶。答。國中無實報修羅。權現容亦有之。○補註引嘉祥云。箭道二里也。或取射堞一百二十步。一百三十步。一百五十步者。

①二明本事。分三。②一明佛說法。

爾時彼佛。爲一切衆生喜見菩薩。及衆菩薩諸聲聞衆。說法華經。

藥王往劫。受此妙法薰心。而致德潤其身。故爲一切衆生之所喜見。所以說此經者。其聲清雅。令人樂聞。持此經者。其相端嚴。令人樂見。古佛爲大會說法華經。乃喜見爲之當機也。○二喜見修供。分二。子一現在。又二。丑一修行得法。

是一切衆生喜見菩薩。樂習苦行。於日月淨明德佛法中。精進經行。一心求佛。滿萬二千歲已。得現一切色身三昧。

此初叙藥王本事也。喜見得聞經已。卽能如說修行。言精進經行一心求佛。卽修禪定。而兼五度。滿

萬二千歲者。大窾云。違現業而根塵清淨也。現一切色身三昧者。此精進求佛之驗也。補註云。現一切色身三昧。卽普現色身三昧也。有三義。一者內現。如今經說身根清淨。十界依正於身中現。如淨明鏡現諸色相也。二者外現。如妙音觀音。隨機示現。十法界色身。三內外現。如大集經。觀於己身衆生身諸佛身。悉於己身中現。又見己身衆生身。現於佛身中。衆生身中。亦如是現。⑤二作念報恩。分二。⑥一用法身力。

得此三昧已。心大歡喜。卽作念言。我得現一切色身。

三昧。皆是得聞法華經力。我今當供養日月淨明德佛。及法華經。

此是喜見修行得證。知恩報恩也。三昧非聞法無以得證。法華非佛說。何以得聞。今正作念供佛及法。是所以報恩也。

卽時入是三昧。於虛空中。雨曼陀羅華。摩訶曼陀羅華。細末堅黑栴檀。滿虛空中。如雲而下。又雨海此岸栴檀之香。此香六銖。價直娑婆世界。以供養佛。

此叙以神力供養也。前言得三昧。乃妙用初發之時。今言入三昧。正運用無礙之時也。於虛空中。雨

花香供養。顯此供物不假外緣。於定中運用自然而有。補註云。海此岸者。妙高山海南岸。有栴檀香。此爲最貴。六銖者。二十四銖爲一兩。六銖只重二錢五分。乃四分之一也。

④二用報身力。分三。⑤一以神力燃身。

作是供養已。從三昧起。而自念言。我雖以神力供養於佛。不如以身供養。卽服諸香。栴檀薰陸。兜樓婆畢力迦。沉水膠香。又飲蒼蔔諸華香油。滿千二百歲已。香油塗身。於日月淨明德佛前。以天寶衣而自纏身。灌諸香油。以神通力願而自然身。光明遍照八十億

恆河沙世界。

前以三昧力。運心供養。但盡於理事。則未全。故今
以身作供養也。服諸香。所以淨諸穢也。飲諸油。所
以益諸火也。以神通力願者。妙樂云。不以世火。還
依所得三昧。起利他願。以智觀火。焚難思境。故使
光明起。斯照彼。補註云。薰陸云乳香。出大乘國。葉
似棠梨。兜樓婆云草香。出鬼神國。舊云白茅香。畢
力迦云丁香。沉水出阿那婆達多池邊。名蓮華藏。
然如麻子許。普熏閻浮世界。膠香卽白膠香。云卽
松香。①二恆沙佛共讚。

其中諸佛同時讚言。善哉善哉。善男子。是真精進。是名眞法供養如來。若以華香瓔珞。燒香末香塗香。天繪幡蓋。及海此岸梅檀之香。如是等種種諸物供養。所不能及。假使國城妻子布施。亦所不及。善男子。是名第一之施。於諸施中。最尊最上。以法供養諸如來。故作是語已。而各默然。

其中諸佛。卽八十億恆河沙世界中之諸佛也。同時者。見無先後。異口同音也。由喜見我執破後。則法身當體顯現。親見佛身。親聞佛語。盡十方世界。無不是佛。斯所謂同時也。眞精進者。由喜見聞經

之後。精進經行。一心求佛。滿萬二千歲。至此行德
圓成。親見諸佛。故諸佛讚言。如此修行。是可謂真
精進矣。眞法供養者。證上神力供養。不如以身供
養之言。況神力所現者。亦不過香華等之事相。今
以身然。則捨心成就。不執有我也。我旣空而慧自
具。慧具而法眞矣。故曰眞法供養。然彼華香繒幡
之勝。特外物耳。國城妻子之重。特愛緣耳。皆非眞
法。故所不及。善男子。下。結證然身爲第一之施。最
尊最上。旣稱讚已。而各默然者。一是證得眞法供
養。亦是諸佛神用加被。而各默然受此法供養也。

欲顯真際之理。離言說相。要解云。夫爲法不顧其身。非特佛世也。至人得道。皆能外形骸。忘死生。或喪之若遺土。或喜之如決疣。若楊雄不羨久生。孔聖甘於夕死。凡以達本知常。恃有不忘者存。而蘄脫乎塵垢患累也。且大聖人。又能固以悲願。濟以神力。故燒身然臂。曾無憂悵。世俗或駭其所爲。而至人與遺土決疣一而已矣。若識見未忘。諸蘊違碍。不達法行。空慕其迹者。是徒增業苦。爲妄作之凶矣。○天台別傳云。智者大師初見南嶽思大禪師於光州大蘇山。思授以普賢道傷。令修法華三

昧。誦經。至此是真精進。是名真法供養如來。寂而入定。見靈山一會儼然未散。豁然大悟。獲旋陀羅尼。○問。律制燒身得偷蘭遮罪。燒指得突吉羅罪。此經讚燒何也。答。大小開制。教法不同。如梵網經云。若不燒身臂指供養諸佛。非出家菩薩。故知順小行易。從大誠難也。①三明身然時節。其身火然。千二百歲。過是以後。其身乃盡。

此明身然所歷之時節也。知音謂。所然之身。隨所服香油之力盡而盡也。要解謂。直使六根六塵一切洞徹。故千二百歲。其身乃盡。②二未來。分五。③

一生王家。

一切衆生喜見菩薩。作如是法供養已。命終之後。復生日月淨明德佛國中。於淨德王家。結跏趺坐。忽然化生。

此又明然身之後轉生化生也。知音云。依晉譯。先云。忽然化生。後云。結跏趺坐。其文乃順。化生者。照前彼國無有女人之案。△喜見既得真法。以供如來。是生佛已泯。故曰命終。法執尙未極忘。故又生日月淨明國中淨德王家也。由此淨明之相未窮。淨德之念未了。故又興然臂之舉。表忘法執也。

⑤二說本事。

卽爲其父而說偈言。

大王今當知。我經行彼處。卽時得一切。現諸身三昧。
勤行大精進。捨所愛之身。

箋難云。有本於此偈後。更添供養於世尊。以求無
上慧。兩句。乃後人擅加耳。笈多所譯。亦但六句。法
護譯只四句。△前云於日月淨明德佛法中精進
經行。今旣生此國。而言經行彼處者。卽捨身處也。
我執是其故居。今執破智現。以此望先。爲彼處也。
下皆叙於彼行成之相。

說是偈已。而白父言。日月淨明德佛。今故現在。我先
供養佛已。得解一切衆生語言。陀羅尼。復聞是法華
經。入百千萬億那由他。甄迦羅。頻婆羅。阿閼婆等偈。
大王。我今當還供養此佛。

此以昔所行者。歸功於佛法也。知音云。晉譯偈後
有父王讚善欲同詣佛之文。有此義更足也。一切
衆生。卽十二類。語言最難曉解。補註引寶積經云。
得此三昧者。善能宣說一切語言。於一字中。說一
切字。一切字同於一字。俱舍論云。甄迦羅。亦云矜
羯羅。五十二數中。卽第十六數也。頻婆羅。卽第十

八數也。阿閼婆。卽第二十數也。或云那由他。是百
百萬億。甄迦羅。是千千萬億。頻婆羅。是百千千萬
億。阿閼婆。是萬千千萬億。△再生佛處而再欲興
供養者。由念未盡故也。念未盡。卽法執未忘。故云
今故現在。而復聞經八百千萬億偈。正是俱生法
執現前之相。今復興供。宜其與父同行也。

⑤三往佛所

白已。卽坐七寶之臺。上升虛空高七多羅樹。往到佛
所。頭面禮足。合十指爪。以偈讚佛。

容顏甚奇妙。光明照十方。我適曾供養。今復還親覲。

爾時一切衆生喜見菩薩。說是偈已。而白佛言。世尊。世尊猶故在世。

此明復見前佛之禮讚也。白父是將斷法執之相。臺表行德。乘臺處空而見佛。卽行與理冥。讚佛奇妙。而光照十方。是理與智合。昔供而今復覲。亦明由功勳力也。次言世尊今故現在。正是斷法執之時。故下佛卽唱滅。丑四佛付囑。

爾時日月淨明德佛。告一切衆生喜見菩薩。善男子。我涅槃時到。滅盡時至。汝可安施床座。我於今夜當般涅槃。又勅一切衆生喜見菩薩。善男子。我以佛法

囑累於汝。及諸菩薩大弟子。并阿耨多羅三藐三菩提法。亦以三千大千七寶世界。諸寶樹寶臺。及給侍諸天。悉付於汝。我滅度後。所有舍利。亦付囑汝。當令流布。廣設供養。應起若干千塔。如是日月淨明德佛。勅一切衆生喜見菩薩已。於夜後分入於涅槃。唱言時至。而命敷床座。正顯法執將亡。開敷如如正寢之理。夜卽正位。涅槃乃大寂滅一眞法界之境。又勅下。明付囑大法。總依正二事。並舍利流通。分明交閣。所以夜後分入涅槃也。故後文起塔燃臂。皆是不違師囑。此處文雖日月淨明唱入涅槃。

之語。其實是教喜見破法執之軌也。夜後分。乃最後一念執盡真顯之時。一真獨露。故言入。如此境界。全是一段工夫。若未得實履。終不親切。

⑤五專任持。分四。①一起塔。

爾時一切衆生。喜見菩薩。見佛滅度。悲感懊惱。戀慕於佛。卽以海此岸梅檀爲積。供養佛身。而以燒之火。滅已後。收取舍利。作八萬四千寶瓶。以起八萬四千塔。高三世界。表刹莊嚴。垂諸幡蓋。懸衆寶鈴。

此喜見依命奉行也。而生悲感戀慕者。由法難捨故。以梅檀爲闍維。具見法之至重。而未能易融。故

以至重之功。融至重之法也。火以表智。今破法執。乃重空智。火滅煙消。是理智俱忘。收取舍利者。卽法身顯露也。作八萬四千建立。乃圓具八萬四千法門。使法性周徧於一切處也。補註云。高三世界者。卽三千世界也。小千至初禪。中千至二禪。大千至三禪。云高三者。至四禪也。○此正表法身高出三界之上。下所明一切莊嚴。乃衆德具足之義。

⑤二燒臂。

爾時一切衆生喜見菩薩。復自念言。我雖作是供養。心猶未足。我今當更供養舍利。便語諸菩薩大弟子。

及天龍夜叉等一切大衆。汝等當一心念。我今供養。日月淨明德佛舍利。作是語已。卽於八萬四千塔前。然百福莊嚴臂。七萬二千歲。而以供養。

前云見佛滅而生悲感。以火盡而收舍利。乃喜見頓忘法執之時。今對衆然却百福莊嚴之手。借事以表。欲引諸未得者得。故曰汝等當一心念。此便是受付囑。以法利九界人天也。然我執重而法執輕。本是一翻麤細。二執中各有分別俱生。而又各具一重麤細。故假藥王苦行而表破除之前。以喜見於淨明法中。精進修行。滿萬二千歲。得現一切。

色身三昧者。乃是分別我執已盡。而俱生我執現前。故云得現一切色身。須知色身卽我也。及至飲諸華香等。又滿千二百歲。以神通而自然身。始得我執俱生盡矣。至此便曰命終。命終則我無存。次日復生。以法執猶在故也。所以又近淨明德。又聞妙法華。及至淨明亦滅。而亦燒之。佛既不存。而分別法執乃盡。喜見至此云心猶未足者。則知俱生法執未盡。故不免將百福莊嚴之妙手。一齊燒却。始得執盡情忘。安家樂業矣。但文字鋪張。處處言破我執法執等。其實證斷之時。功窮力極。只一念

間耳。△問。上燒身但經千二百歲。今燒臂何故七萬二千歲耶。答。我執麤而法執極細。麤者易融。故只千二百歲。細者難盡。故經時久而融煉深也。况前爲自行。此屬受付囑而利一切。所以有無量人得現身三昧也。④三利益。

令無數求聲聞衆。無量阿僧祇人。發阿耨多羅三藐三菩提心。皆使得住現一切色身三昧。

法執既盡。則可以繁興大用。一了一切了。一證一切證。故使會衆皆得我盡。而現一切色身。照上汝等一心念。語不虛發也。④四現報。

爾時諸菩薩天人阿修羅等。見其無臂。憂惱悲哀。而作是言。此一切衆生喜見菩薩。是我等師。教化我者。而今燒臂。身不具足。

此是大眾示同憂患。以啟喜見之立誓也。學道人。如此憂惱悲哀。不得不生前喜見。聞佛欲滅。而生悲感。故得然身。身復。然臂。臂生。所以不捨不得。今人天大眾。亦有如是悲感。焉知異日不得如是妙證耶。

於是一切衆生喜見菩薩。於大眾中立此誓言。我捨兩臂。必當得佛金色之身。若實不虛。令我兩臂還復。

如故。作是誓已。自然還復。由斯菩薩。福德智慧淳厚所致。

要解云。兩臂。表我執法執根本也。我執能生煩惱。續生死。法執能生所知。礙正見。捨一存一。則爲二乘。故捨兩臂。必當得佛身也。還復如故者。若果得佛。卽無所捨矣。此非淺薄所能知。故稱淳厚所致。當爾之時。三千大千世界六種震動。天雨寶華。一切人天。得未曾有。

以非常之事。感非常之瑞。人天因是得大法利也。知音云。此雖叙藥王本有之事。實欲佛滅後諸持

經者取法之然。自佛滅度後。誰行精進哉。唯一祖立雪斷臂。堪彷彿耳。特修供養已竟。

⑤三結會古今。分二。⑥一結會。

佛告宿王華菩薩。於汝意云何。一切衆生喜見菩薩。豈異人乎。今藥王菩薩是也。其所捨身布施。如是無量百千萬億那由他數。

此結酬所問也。直指云。當機初問云何遊此。二問若干苦行。佛荅不舉藥王果號。而唯舉因名。至此結會處。始見古今原一人也。又欲結完本事二字。亦欲使之効法而行也。次云。其所捨身等言。此尙

爲一時。而藥王累劫之行。則有無量。此亦結若干
難行苦行之問也。⑤二勸修。

宿王華。若有發心。欲得阿耨多羅三藐三菩提者。能
燃手指。乃至足一指。供養佛塔。勝以國城妻子。及三
千大千國土山林河池。諸珍寶物而供養者。

此勸信處。以內外較量。必見所重也。天台云。一指。
內身也。妻子。外身也。國城等。外財也。外輕內重。故
功福有異。補註云。一指有三節。足一指者。三節俱
燒也。故知能燃手指。是燒一節也。楞嚴云。我滅度
後。其有比丘。身燃一燈。燒一指節等。與此勸修不

異。要解云。夫聖人言行。動必有法。非徒教末化燃
身手以求福也。苟不明此。殘形焚穢。竟何益耶。故
藥王將欲燃身。且以法行淨治根塵。使功行滿足。
然後以神通力。化火自焚。其光能照河沙佛界。後
人欲睇其迹。如斯可矣。荅苦行竟。②二正嘆經。分
三。③一歎能持之人。

若復有人。以七寶滿三千大千世界。供養於佛。及大
菩薩。辟支佛。阿羅漢。是人所得功德。不如受持此法
華經。乃至一四句偈。其福最多。

此雖歎人。其實人因法勝。亦卽歎法也。天台云。七

寶奉四聖。不如持一偈。此以財況法也。蓋法是聖師。能生能養。能成能榮。故人輕而法重也。○四句偈者。凡長文名散華偈。四五言名貫華偈。云一四句者。以少況多也。⑤二歎所持之法。分二。⑥一歎法體。

宿王華。譬如一切川流江河諸水之中。海爲第一。此法華經亦復如是。於諸如來所說經中。最爲深大。天台云。無量義經云。川流河海四水。譬教藥艸喻中。一雲能雨。譬說。今別舉四者。譬乳酪生酥熟酥四味教法。此法華教。譬醍醐海也。說窮本地爲深。

徧一切處爲大。純明佛法。不說餘法。譬如大海同一鹹味。最爲深大也。△海之深廣。容衆流而得大名。經之殊勝。攝羣教而成妙法。然諸經所說。未必不深。雖深而未廣也。此經所談妙法。推過去無始。一切如來無一不說。照未來無窮。所有諸佛無一不演。則豎窮橫徧。佛佛共演。可謂最深最廣矣。至於諸根品類。總攝一乘。十界聖凡。總成圓解。授成佛之廣記。發本迹之玄宗。皆無越於此經。故曰最爲深大。

又如土山黑山。小鐵圍山。大鐵圍山。及十寶山。衆山

之中須彌山爲第一。此法華經亦復如是。於諸經中
最爲其上。

○土山者。土石諸山也。黑山者。俱舍論云。南洲從
中向北。各有三重黑山。鐵圍山。遶小千界。名小鐵
圍。遶中千名大鐵圍。十寶山者。華嚴云。一雪山。二
香山。三柯利羅山。四仙聖山。五乾陀山。此云持雙。
六溫縛拏。此云馬耳。七尼民陀。此云持邊。謂護持
七金山邊。八斫迦羅山。應法師云。卽輪圍也。九宿
慧山。十須彌山。土黑鐵圍。故非是寶。十山雖寶。或
一或二。神與龍雜居。譬餘教說能依之人。卽十地。

四十心。或凡或賢或聖。說所依之理。或俗或真。或中。是爲卑下。須彌乃四寶所成。純天所住。譬此法華所說諦理常樂我淨。如四寶所成。開示悟入者之所依。是故此義最爲高上。△前明深廣。此言高上。見此經是諸佛守護教菩薩法。非餘經所仰望也。

又如衆星之中。月天子最爲第一。此法華經亦復如是。於千萬億種諸經法中。最爲照明。

○星月同是陰精。俱於夜現。星無虧盈。不及於月。譬諸教說於權智。權不卽實。不得自在。此經明權

卽實。實亦卽權。如月能盈虧。相指不二而二。如此卽權卽實之法。故勝餘教也。○月能照夜。明踰衆星。此經照無明長夜。踰於衆經也。

又如日天子能除諸暗。此經亦復如是。能破一切不善之暗。

○日是陽精。獨能破暗。以譬諸經明實智破惑。並是權外之實。破疑不徧。不及此經說施權之意。是卽實而權。已破諸疑。所以權實之語。非獨今經。相卽之言。出自於此。知音云。日能照晝。明破諸暗。此經破一切不善之暗。比衆經不同。以衆經破暗乃

費修證。此經不待修證。但知舉手低頭皆已成佛。則一切惡業黑暗。舉著皆化成佛知見矣。

又如諸小王中。轉輪聖王最爲第一。此經亦復如是。於衆經中最爲其尊。又如帝釋於三十三天中王。此經亦復如是。諸經中王。又如大梵天王。一切衆生之父。此經亦復如是。一切賢聖。學無學。及發菩薩心者之父。

○輪王號令止在四域。帝釋號令齊三十三天。梵王號令統上冠下。譬餘經說三諦三昧。各不相收。不得自在。此經所說。以實相入真。決了聲聞法。是

諸經之王。實相入俗。一切治生產業。不相違背。實相入中。一切諸法。無非佛法。故云一切學無學及發菩薩心者之父。妙樂云。三教菩薩。爲發心者。今經爲彼父。能生彼故。昔謂非子。至此方知。

又如一切凡夫人中。須陀洹。斯陀含。阿那含。阿羅漢。辟支佛爲第一。此經亦復如是。一切如來所說。若菩薩所說。若聲聞所說。諸經法中。最爲第一。

○一切凡夫四果。皆以支佛爲第一者。以明在運無功用意也。餘經要因功用。乃得入流。如四果人。因聞思修。方乃得悟。此經明無作四諦。不雜方便。

自然入於薩婆若海。如辟支佛無師自悟。不立分
果。斷結成聖也。

有能受持是經典者。亦復如是。於一切眾生中。亦爲
第一。

此標於六凡四果之後者。以能持者爲勝。明此經
不思議力也。六凡於此經。故不足論。而四果雖聖。
尙是小乘。爲化城悶守之流。亦不足校也。

一切聲聞辟支佛中。菩薩爲第一。此經亦復如是。於
一切諸經法中。最爲第一。如佛爲諸法王。此經亦復
如是。諸經中王。

○菩薩爲第一者。此明因第一也。餘經明因是七方便。今經明因。出方便外。故云最爲第一。如佛爲法王。此方言果第一也。餘經明果。近在寂場。此經明果。遠指本地。故最第一也。○二歎法用。分三。○子一歎拔苦用。

宿王華。此經能救一切眾生者。此經能令一切眾生離諸苦惱。

○一切眾生。該九界。離苦惱者。離分段變易二種苦也。△前歎法體殊勝。言極於佛。則無可踰。是謂尊之極矣。今歎其用。則亦知其無可能踰。以此經

大悲無盡。蓋在佛知見也。知見既開。何苦不離。非
唯以凡情。麤垢。卽微細變易生死塵垢。亦無所不
盡也。⑤二歎與樂用。

此經能大饒益一切衆生。充滿其願。如清涼池。能滿
一切諸渴乏者。如寒者得火。如裸者得衣。如商人得
主。如子得母。如渡得船。如病得醫。如暗得燈。如貧得
寶。如民得王。如賈客得海。如炬除暗。

大窾云。此經是無盡藏。故能饒益一切衆生。此經
如清涼池。令渴乏者皆得甘露醍醐上味。遍體清
涼故。此經如火。能令寒灰枯木者發智慧燄故。此

經如衣。能令無功德莊嚴者着如來衣故。此經如主。能令無依怙者識眞主故。此經如母。能令弱喪他鄉不知歸者得慈母故。此經如船。能載衆生到彼岸故。此經如醫。能療衆生身心病故。此經如燈。能破生死長夜暗故。此經如寶。能令窮子所須如意故。此經如王。生死苦中得附大願王故。此經如海。煩惱海中得大智寶故。此經如炬。慧燄一發無明頓盡故。△蓋此經大慈無盡。亦在佛知見也。知見既開。何樂不具。不唯凡情得解脫樂。亦令諸聖得佛果無上妙樂也。⑤三總結脫苦。

此法華經亦復如是。能令衆生離一切苦。一切病痛。能解一切生死之縛。

此總結拔苦與樂二妙用也。大窾云。一切苦者。五衰八苦也。一切病。卽身心二病也。生死縛。卽分段變易也。已上雖說種種譬喻以明此法。然畢竟比類不及。故大經云。佛子。如來以一切譬喻。說種種事。無有譬喻能喻此法。何以故。心智路絕。不思議故。△此雖結拔苦。苦盡而樂自生。則與樂之義。在其間矣。

⑤三明持經福深。分二。⑥一舉聞全經得福。

若人得聞此法華經。若自書。若使人書。所得功德。以佛智慧。籌量多少。不得其邊。若書是經卷。華香瓔珞。燒香末香塗香。幡蓋衣服。種種之燈。蘇燈。油燈。諸香油燈。薝蔔油燈。須曼那油燈。波羅羅油燈。婆利斯迦油燈。那婆摩利油燈。供養所得功德。亦復無量。

此處雖舉聞經書寫。其實具足六種法師十種供養。是勸修持此經者。福德無量也。言以佛智籌量。不得其邊者。無非極顯經功難量。非謂佛智見之不到也。薝蔔云金色花。又云黃花。須曼云善攝意花。波羅羅云重生花。婆利斯迦云雨花。雨時方生。

故。又云夏生花。那婆云雜花。摩利云奈花。又云鬢。以其花可作鬢故。以花薰油取其香故。癸二舉聞本品得福。分二。子一格量。

宿王華。若有人聞是藥王菩薩本事品者。亦得無量無邊功德。若有女人聞是藥王菩薩本事品。能受持者。盡是女身。後不復受。若如來滅後。後五百歲中。若有女人。聞是經典。如說修行。於此命終。卽往安樂世界。阿彌陀佛。大菩薩眾。圍遶住處。生蓮華中。寶座之上。

上明受持書寫供養全經功德。此又獨顯聞持一

品功德亦無有量。以此一品亦該全經故。不但一品該攝全經。卽藥王二字亦該攝全經也。大窾云。若有人聞下。乃通舉一切人。次獨約女人顯。女人智劣。能信能持者。便卽轉女成男矣。何以故。況捨身捨臂。非空我空法之大丈夫。不能爲也。後五百歲者。大集經云。佛滅後初五百歲。解脫堅固。二五百歲。禪定堅固。三五百歲。多聞堅固。四福德堅固。五鬪諍堅固。卽後五百歲也。唯此之時。善根鮮少。若女人能持。卽大丈夫。故得福殊勝。命終生極樂者。以能捨娑婆之極愛故。

不復爲貪欲所惱。亦復不爲瞋恚愚痴所惱。亦復不爲憍慢嫉妒諸垢所惱。得菩薩神通無生法忍。得是忍已。眼根清淨。以是清淨眼根。見七百萬二千億那由他恒河沙等諸佛如來。是時諸佛遙其讚言。善哉善哉。善男子。汝能於釋迦牟尼佛法中。受持讀誦思惟是經。爲他人說。所得福德。無量無邊。火不能焚。水不能漂。汝之功德。千佛共說。不能令盡。汝今已能破諸魔賊。壞生死軍。諸餘怨敵。皆悉摧滅。

因得生佛國。則遠離三界生因也。得菩薩神通。顯非小果神通也。無生忍卽入地。眼根淨者。以佛知

見開發明了故也。言見諸佛聞諸音。皆持說此經功德力也。然則法力如此難思者非他。由體踰金剛。水火不能渝其德也。惟能破諸魔殺諸賊。壞諸軍除諸怨。故致千佛共歎。不能令盡也。

善男子。百千諸佛。以神通力共守護汝。於一切世間天人之中。無如汝者。唯除如來。其諸聲聞辟支佛。乃至菩薩智慧禪定。無有與汝等者。

持經者入如來室。坐如來座。爲佛眞子。故十方諸佛共守護也。斯人智慧出過三界。故世智不如。權實並融。則二乘不及。得最上乘。致使權教菩薩無

能與等也。如此者。由持經功力。爲佛所護。故唯除如來也。

宿王華。此菩薩成就如是功德智慧之力。若有人聞是藥王菩薩本事品。能隨喜讚善者。是人現世口中常出青蓮華香。身毛孔中。常出牛頭栴檀之香。所得功德。如上所說。

此菩薩卽指藥王。成就如是功德者。結證前受持此品功德無盡之意。良以藥王不惜身命。原爲流通此經。人能隨喜讚善者。則妙蓮開敷。故香從口出矣。人能聞此品而隨喜者。則通身慶快。如牛頭

栴檀之罕遇也。人能生心隨喜。則難得之法俱得。而身毛孔中。生如是香矣。然此身不淨。今能生香。亦是菩薩輕身重法。破執之驗。且不唯生香。而亦得菩薩如上所有一切諸功德也。補註云。育王經言。阿育王請僧供養。有一比丘。名優鉢羅。口中作鉢羅華香。王疑比丘年少含香。卽勅以水洗口。洗已倍香。王云。久近含此香耶。荅。非含香也。吾於過去迦葉佛時。人壽二萬歲。我爲高座法師。讚歎佛法。故四十九億歲。生人天中。口中常出此香。王聞是已。益加恭敬。今言隨喜讚善者。口出其香。乃現

報也。①二囑累。

是故宿王華。以此藥王菩薩本事品。囑累於汝。我滅度後。後五百歲中。廣宣流布。於閻浮提。無令斷絕。惡魔魔民。諸天龍夜叉。鳩槃荼等。得其便也。

如來獨以此品囑當機者。末法中。唯苦行可以全正命。而致信樂。後五百歲。時極惡矣。南閻浮提。人極苦矣。唯此動佛深慈。故專囑也。惡魔魔民上。該有亦不欲令一句方順。惡魔鬼神。多不欲正。恐有行苦行而流通正法者。一爲魔鬼所着。其害非淺。故又特以此爲囑也。

法華授手卷第六之四

三

宿王華。汝當以神通之力守護。是經所以者何。此經則爲閻浮提人病之良藥。若人有病。得聞是經。病卽消滅。不老不死。

前囑以一品。此囑以全經。言以神力護者。令彼行人。不覺不知其所以成就也。然末世惡魔鬼等。非菩薩神力加持。亦難使行人無諸留難也。獨謂此經爲閻浮提人病之良藥者。以閻浮提人病在不信。而此經能斷諸疑。生諸信也。病在無智。而此經能使悟入佛知見也。病在剛強。而此經教人着忍辱衣也。病在耽諸欲境。而此經能拔衆生處處貪

着也。凡有諸病者。一聞此經。無不消除。病除而法
身長養。故曰不老不死。

宿王華。汝若見有受持是經者。應以青蓮華盛滿末
香供散其上。

前教當機尊重此經。今教供養持經之人。重人實
所以重法也。華以表因。香以表德。以華盛香而供
散者。表慶持經者因德芬芳也。

散已。作是念言。此人不久。必當取草坐於道場。破諸
魔軍。當吹法螺。擊大法鼓。度脫一切眾生老病死海。
教當機作供。必應內外具潔也。外獻香華。內存妙

解。幸勿以已爲聖。彼爲凡也。當知持經者。於不久間。可以入聖流矣。可以證菩提矣。言取草等。不唯理到。亦卽依事而成等正覺也。如世尊於菩提樹下。坐吉祥草座。而成佛道。破魔軍。乃成道前事。轉法輪。乃成道後事。吹螺擊鼓。卽召集九界衆生。說法利益也。

是故求佛道者。見有受持是經典人。應當如是生恭敬心。

此總結勸持。前囑當機一人。如是尊重流通。今普囑凡有求佛道者。若見有受持是經典人。當如上

所說生恭敬心也。正答已竟。○三利益。
說是藥王菩薩本事品時。入萬四千菩薩得解一切
衆生語言陀羅尼。

要解云。喜見聞經。卽得現身三昧。及然身之後。卽
得語言總持。爲證得法身。離諸相見。而洞契妙圓。
故至其然臂。則令聲聞得住現色身三昧也。今說
本事。則菩薩得解語言總持者。蓋由悟其然身然
臂之事。可能離諸見執。洞契妙圓。此所謂以苦行
成圓通也。然皆得三昧。又得總持者。現身三昧。隨
類分形。語言總持。隨類說法。二者蓋常相需。而皆

由妙法所證。故說妙音品時。菩薩衆亦得是三昧
及陀羅尼。庚四多寶結讚。

多寶如來。於寶塔中。讚宿王華菩薩言。善哉善哉。宿
王華。汝成就不可思議功德。乃能問釋迦牟尼佛。如
此之事。利益無量。一切衆生。

末世中人。以有爲爲上。如來欲此妙法流通五濁。
唯苦行易起其心。唯苦行易堅其事故。宿王亦知
唯此可以行闍浮提。可以驅有爲習。特請如來。說
藥王本事。所以欲堅固新記之流通也。多寶如來
原爲證經而至。今見宿王作如是請。世尊作如是

妙法蓮華經授手卷第七之一

清楚衡雲峯沙門智祥集

妙音菩薩品第二十四

品節云。此品正顯法華三昧。實證八地。平等真如。已從此得。進證九地。發真如大用。色心自在。得如幻三昧。居法師位。至等覺。則分身說法。故特以妙音名也。如來於此。放肉髻白毫二光者。髻乃頂相表果。毫以表因。由今因果契證。故以二光表之也。藏識盡淨。故國名淨光。淨智契果。故佛號淨華宿王智也。況此地菩薩。妙契佛心。因供佛而得恒沙

三昧。以果會因。所以釋迦光照其身。從體起用。故願往娑婆。以無作妙力。作諸佛事。故不起於座。以三昧力。化作眾寶蓮華。意顯復作真因也。由此地菩薩淨智妙圓。能轉塵勞。而爲妙行。故與八萬四千菩薩圍遶而來。以因契果。故問訊世尊。妙契法身。故相見多寶。然此經以智立體。初因文殊發起。是以果覺爲本因心。今旣證真如。而復見文殊。乃始本契合。而因果冥符。所以能現身說法也。宜矣。更須知所現之身。乃覺法自性意生身也。與後觀音應身不同。此由出入三昧。故有往來之象。若夫

觀音普門示現。則靡不周徧。觀者應須知此。要解云。妙音者。深體妙法。能以妙音。隨應演說。而流通是道者也。名雖妙音。實彰妙行。觀其往昔。植因於雲雷音王佛所。獻樂奉鉢。斬在妙音說法。妙行隨應。故報生宿王智佛國。果能有是神力。今使學者體其妙行。而隨應說法。闡揚斯道。故說妙音品。爲妙行流通。夫體妙音。則不滯言詮。能隨應。則不局心迹。不滯不局。所以爲妙行也。繼此復有圓行常行。而次前苦行者。將欲以行成德。必精心苦志。然後造妙。造妙然後能圓。能圓然後真契也。

法華指掌疏卷之一
二
④二明妙音來往。勵受學弟子。以廣流通。分六。

⑤一放光東召。

爾時釋迦牟尼佛。放大人相。肉髻光明。及放眉間白毫相光。徧照東方百八萬億那由他恒河沙等。諸佛世界。過是數已。有世界名淨光莊嚴。其國有佛號淨華宿王智如來。應供。正徧知。明行足。善逝。世間解。無上士。調御丈夫。天人師。佛。世尊。爲無量無邊菩薩。大眾恭敬圍遶。而爲說法。釋迦牟尼佛。白毫光明徧照其國。

爾時者。如來說藥王本事之後。欲召妙音來此之

時。從此至文殊問佛是何因緣先現此瑞止。皆是經家結集之文。佛於此特放肉髻光者。以彼淨光莊嚴國中。佛身六百八十萬由旬。菩薩之身四萬二千由旬。雖身量如此。總不出如來大人相光。又是佛欲以菩薩所證大果。而示於人也。放眉間光者。欲以菩薩所修大因。而示人也。前一光照東方萬八千世界。是欲使守寂聲聞。破陰界也。今此二光照東方百八萬億那由他恒河沙等諸佛國土。是欲持經菩薩。破盡塵沙無明。方得到淨光莊嚴世界。成一眞法界也。佛號淨華宿王智者。乃是淨

除法愛。方得行無所染。智無所著。成法身智佛也。釋迦牟尼光照其國。一是表極果同證。一是顯世尊之光遠大不可思議。天台云。大人相者。大相海也。遍體毛功德。不及一好功德。眾好功德。不及一相功德。諸相從下向上。展轉相勝。不及白毫功德。白毫不及肉髻功德。今放最上頂光。召本弟子。以明最極妙法也。此肉髻相。從孝順師長而得。白毫從一道清淨而得。今放此光。所以令弘此法也。問。佛有弟子。布滿十方。何故但放光。召東方妙音。說西方觀音。而不論八方耶。答。此有所表。淨名云。日

月何意行閻浮提。欲以光明除眾暗暝。東是光始。西是其終。有始有終者。其唯聖人乎。未發心者。令其發心。未究竟者。令其究竟。一菩薩既爾。諸眾亦然。一方既爾。諸方亦然。聖不煩文。舉一蔽諸。故但言東西耳。庚二奉命西來。分二。辛一發來緣。又五。

壬一經家敘福慧。

爾時一切淨光莊嚴國中。有一菩薩名曰妙音。久已植眾德本。供養親近無量百千萬億諸佛。而悉成就甚深智慧。

爾時下。敘淨光莊嚴之佛國無數。故曰一切。有一

下。謂彼一切國中。皆有一妙音身。爲當機也。前段但敘妙音所居之國。所事之師。此處正敘妙音也。植德既久。供佛既多。則其福備可知。福既備。而慧斯廣。故曰成就甚深智慧也。

得妙幢相三昧。法華三昧。淨德三昧。宿王戲三昧。無緣三昧。智印三昧。解一切眾生語言三昧。集一切功德三昧。清淨三昧。神通遊戲三昧。慧炬三昧。莊嚴王三昧。淨光明三昧。淨藏三昧。不共三昧。日旋三昧。得如是等百千萬億恒河沙等諸大三昧。

妙樂云。三昧屬定。對慧名福。尙異三教。豈同世有。

又此十六。並是法華三昧異名。得字通冠一十六句。卽證得也。知音云。此亦福慧兩足所致。下經文自有一十六節。而解俾見三昧之實。不然。此中徒訓字面。於義無涉。此十六爲首。其餘三昧尙多。故以等字言也。要解云。三昧。此云正定。亦名正受。謂正定中受用之法也。妙幢相者。摧邪表正。而不住相也。補註云。三千體寂。豎超一切。無相而相。名妙幢相。法華三昧者。深入一乘。證諸實相也。淨德三昧者。眾德真淨。物莫能染也。宿王戲者。本智自在。無所滯著。宿王乃月之異名。權智照機。善巧逗會。

故無緣則照而常寂。不緣生法偏小之慈。不緣而緣。緣於平等大慈故。智印則參合萬法。一心三智。印一切法故。解一切語言者。謂了皆真說。集一切功德者。謂萬德圓備。大品經云。住是三昧。能集諸三昧功德故。清淨三昧者。纖塵不立也。六根無染。互用自在故。神通遊戲者。變現自在也。化物自在。遊諸世間。猶如兒戲故。慧炬以能破痴暗。平等大慧。如炬除暗故。莊嚴王以總攝妙行。性具萬德。緣了莊嚴。融通自在故。淨光明者。得妙智明。大品經云。住是三昧。不得諸三昧垢。又悲華經云。於諸法

中。不見有垢故。淨藏者。得法眼藏。一念淨心。具足
權實功德。含攝一切故。不共者。謂二乘不及也。日
旋者。則大千圓照。實智依空而不住空故。得如是
等恒沙三昧。謂交徹融攝。重重無盡。皆妙音所具
也。由具此故。能成妙行。而流通妙法也。

⑤二被照辭本師。

釋迦牟尼佛。光照其身。卽白淨華。宿王智佛言。世尊。
我當往詣娑婆世界。禮拜親近。供養釋迦牟尼佛。及
見文殊師利法王子菩薩。藥王菩薩。勇施菩薩。宿王
華菩薩。上行意菩薩。莊嚴王菩薩。藥上菩薩。

妙音之來。爰佛所命。若非如來光及。則娑婆無從往矣。故知妙音來往。咸在光中。雖曰過百八萬億那由他恆河沙世界。而實不出此一光。則妙音乃一光中之本有也。此中提出釋迦牟尼光照其身一句。正使人知有所本。而人多忽之。其誰咎歟。妙音既作而白主。乃妙行將興。從體作用也。既曰往詣。曰親近。是不動而動。曰供養釋迦。是行復歸體也。妙音之來。圓行已成。而又曰見文殊者。乃智行成就也。藥王見行能徧治。勇施表萬行繁興。宿王華卽如如之體用。莊嚴王乃妙行之真修。以無上

行。徧濟眾生。其藥上矣。此妙音辭主之本志也。

⑤三師誠勿輕想。

爾時淨華宿王智佛告妙音菩薩。汝莫輕彼國。生下劣想。善男子。彼娑婆世界高下不平。土石諸山穢惡充滿。佛身卑小。諸菩薩眾。其形亦小。而汝身四萬二千由旬。我身六百八十萬由旬。汝身第一端正。百千萬福。光明殊妙。是故汝往莫輕彼國。若佛菩薩及國土。生下劣想。

此本師誠命。乃勵行專精也。天台云。然妙音乃法身大士。故不肅而成。至此見穢。甞生劣想。或恐未

達者。故寄彼而規此耳。夫佛身與理相稱。不得見卑小而忘尊嚴。此約如來座爲誠也。且師及弟子智斷具足。師旣施權。資當隱實。此約如來衣爲誠也。然依報爲正報所感。如來慈臨大千。宜須高須下。勿觀依而忽正。此約如來室爲誠也。△動相旣興。事作無際。故臨行而本師誠重也。○如來放光。本爲勵弟子之真修。懸發妙音。以唱流通。而流通妙法。則人不可簡尊卑。而處不可言高下。淨穢之情。不忘。人我之心。便起。自行不圓。焉能廣益。故智佛誠曰。莫輕善男子下。則釋莫輕依報。佛身下。別

釋莫輕正報。而汝身下。用彼顯此。是故如來現大人相。智佛說大人相。總欲大小俱忘。而流通始克也。⑤四受旨承師力。

妙音菩薩。白其佛言。世尊。我今詣娑婆世界。皆是如來之力。如來神通遊戲。如來功德智慧莊嚴。

本師以莫輕依正爲示。而妙音謂。我今詣娑婆近釋迦。見文殊等。非我之力。乃如來力也。是我今日之行。無非承如來神通遊戲而行。既得佛遊戲。何高下不平之入吾目。卽我身四萬二千由旬。亦皆如來功德智慧所莊嚴也。既得佛智慧莊嚴。又何

彼佛菩薩形相卑小之翳我心哉。須知此如來二字。乃妙音能入娑婆之本領。所以現種種形說種種法。亦皆不離此如實中事也。

⑤五正現發來相。分六。⑥一遣蓮華至。

於是妙音菩薩。不起於座。身不動搖。而入三昧。以三昧力。於耆闍崛山。去法座不遠。化作八萬四千眾寶蓮華。閻浮檀金爲莖。白銀爲葉。金剛爲鬚。甄叔迦寶以爲其臺。

知音云。此節敘妙音來儀。釋第一妙幢相三昧也。以妙卽妙心。幢有催邪輔正功能。故以蓮華而表。

相也。於是下。標起入三昧之式。明妙音與釋迦以
法身相見。所謂不動而昇。塵刹俱徧也。故華嚴云。
菩薩在一佛國。聞法受持。其身不動。以三昧力。於
不可說佛會中。在在現身。亦不起定。各各出生。不
可說三昧身。如是次第。一切諸刹。不可窮盡。是也。
以三昧下。謂妙幢相三昧之力。能卽遠而近。故隔
百八萬億那由他恒沙界外。於靈鷲法座不遠。而
能現寶蓮華也。華以八萬四千言者。一則擴此心
之量。而合法門之數。一則見妙音法屬如是之多
也。閻浮下。敘其華相。西域閻浮河畔。有此檀樹。滴

水入地。土成金色。他金入類。失色如墨。此其最勝者。金剛者。以金成剛。具堅利二義。堅則物不能壞。利則能壞一切也。甄叔迦。此云鸚鵡嘴。西域記云。有甄叔迦樹。其華赤色。大如手。此寶似之。臺卽蓮華中臺也。然妙音將來。先現此相。正相應此經也。故下節文殊問何緣而有此瑞。佛答以聽法華故。其旨可了。○二文殊問瑞。

爾時文殊師利法王子。見是蓮華。而白佛言。世尊。是何因緣。先現此瑞。有若干千萬蓮華。閻浮檀金爲莖。白銀爲葉。金剛爲鬚。甄叔迦寶以爲其臺。

文殊見相發問。所以啟妙音之來意。以便發妙音之所蓄也。⑩三如來酬答。

爾時釋迦牟尼佛告文殊師利。是妙音菩薩摩訶薩。欲從淨華宿王智佛國。與八萬四千菩薩圍遶。而來至此娑婆世界。供養親近。禮拜於我。亦欲供養聽法華經。

知音云。此節雖問答上節。其實卽以妙幢相三昧。而示法華三昧也。△然文殊爲諸人。顯示以發問者。明法華三昧非根本智不能究竟。

⑩四文殊請見。

文殊師利白佛言。世尊。是菩薩種何善本。修何功德。而能有是大神通力。行何三昧。願爲我等說是三昧名字。我等亦欲勤修行之。行此三昧乃能見是菩薩色相大小。威儀進止。惟願世尊。以神通力。彼菩薩來。令我得見。

○此節卽法華三昧致申問答。示第三淨德三昧也。然淨卽法身本來無染。德卽報化。且色相威儀。皆法身中本具之功德也。文殊問種何善本者。欲爲人顯出法身清淨卽諸善之本也。問修何功德者。亦不離此淨法身所起之行。而成功德也。而能

有是神通者。卽具如上善根功德。始能卽遠而近。卽無而有。現諸蓮華。而成此神通也。文殊又問三昧名字。示已欲從淨德之名。入淨德之實。而修行之。庶同聲相應。乃能見妙音之報化身也。以色相等屬報化故。惟願下。謂卽菩薩之身。自非佛力加被。亦不能見也。古云。彩雲影裏仙人現。手把紅羅扇遮面。急須著眼看仙人。莫看仙人手中扇。今文殊求見妙音。而兼色相大小者。是不唯見仙人。而扇亦欲見之者也。△文殊非謂已不見。而必欲求見。意在警覺未證此理者。而進趨也。言種何善根

修何功德行何三昧。意中多少趣向。而能有是大神通力。多少謹仰。我等意欲勤修行之。多少興致。此豈文殊自明所求也。癸五推功多寶。爾時釋迦牟尼佛告文殊師利。此久滅度多寶如來。當爲汝等而現其相。

○文殊求佛示相。佛不親命。而推重多寶佛者。示第四宿王戲三昧也。癸六古佛促行。

時多寶佛告彼菩薩善男子來。文殊師利法王子欲見汝身。

○淨光莊嚴。與娑婆遙隔百八萬億那由他恒河

沙國。妙音既入定於彼。此以一音召來。何其易且近哉。非宿王戲三昧而何。△此更有說。世尊不自召行者。前以光召。而蓮華俱現。則妙音已至矣。今文殊欲令更見色身。若非古佛召行。則色身何從可見。故曰文殊師利欲見汝身。然文殊欲見妙音。是智非行不顯。妙音欲見文殊。是行非智不行也。

④二正發來。分六。⑤一主伴同至。

於時妙音菩薩於彼國沒。與八萬四千菩薩俱共發來。所經諸國。六種震動。皆悉雨於七寶蓮華。百千天樂不鼓自鳴。

○此示第五無緣三昧也。△無緣者。不緣一切諸所緣故。若有所緣。何能沒彼出此。又何能使諸菩薩俱共發來。又何能令華自雨地自動而眾樂自鳴耶。始知無緣慈力覆羣生。如月影臨于澗水也。

⑤二敘相登臺。

是菩薩目如廣大青蓮華葉。正使和合百千萬月。其面貌端正復過於此。身真金色。無量百千功德莊嚴。威德熾盛光明照耀。諸相具足如那羅延堅固之身。入七寶臺。上升虛空。去地七多羅樹。諸菩薩眾恭敬圍遶而來詣此娑婆世界耑闍崛山。到已。下七寶臺。

以價直百千瓔珞。持至釋迦牟尼佛所。頭面禮足。奉上瓔珞。

○此示第六智印三昧也。智卽妙音成所作智。與佛妙觀察智也。印謂佛菩薩二智相印。而不改易也。△又智印者。卽妙音欲來娑婆。現蓮華。奉瓔珞。示種種身。說種種法。已至今八萬四千來者。俱得現一切色身三昧。此界無量菩薩。亦得是三昧及陀羅尼者。是也。所謂森羅及萬象。一法之所印。是菩薩下。正應文殊欲見色相大小也。有八種。一曰如青蓮。天竺有青蓮。其葉修長。青白分明。如眼之

狀故也。二面逾多月。文語似倒。宜云其面貌端正。正使和合百千萬月復過於此。乃爲正。以百千萬月。合爲一月。可謂大矣。而云復過於此。則妙音來此。四萬二千由旬之身未隱。益知文殊所問色相大小。豈不知之問耶。三身皆金色。然金色之身。唯佛乃具。今菩薩有此。正所以得智印三昧也。四身具莊嚴。此莊嚴非瓔珞等外相莊嚴。乃過去所修報。具無量百千功德之所莊嚴。如佛莊嚴也。五威德熾盛。謂此菩薩慈嚴并攝。如所經之國地皆震動者。威也。天雨寶花。眾樂自鳴者。德也。舉此餘可

類推。六光明照耀。此非放光。乃紫金身中所有之常光也。七諸相具足。既曰諸相。又曰具足。則應有三十二相八十種好。不然。何謂具足。八色身堅固。凡色身多皆敗壞。而此菩薩之身。如那羅延。肇法師云。那羅延。天力士名。端正殊妙。勇健無比。而身極堅固也。入七寶臺下。觀而來詣。此等三句。此臺非向所現。八萬四千之蓮華臺也。况前曰甄叔迦。此言七寶。或妙音於彼國。沒與諸菩薩所乘之七寶臺。故曰詣此娑婆也。前曰入臺。後曰下臺。足見文殊問威儀進止。益明矣。以價下明以至重之寶。

而供至尊之佛。卽表以法寶嚴法身也。正應世尊
答文殊語。謂供養親近禮拜於我也。凡此所有。皆
不出妙智一法所印。故曰示智印三昧也。

⑤三問訊傳旨。

而白佛言。世尊。淨華宿王智佛問訊世尊。少病少惱。
起居輕利。安樂行不。四大調和不。世事可忍不。衆生
易度不。無多貪欲。瞋恚愚痴嫉妒。慳慢不。無不孝父
母。不敬沙門。邪見。不善心。不攝五情不。世尊。衆生能
降伏諸魔怨不。久滅度多寶如來在七寶塔中。來聽
法不。又問訊多寶如來。安隱少惱堪忍久住不。

○此示第七解一切語言三昧也。傳彼土之言。問此土之佛。而問訊之辭。皆眾生語言。唯妙音能解。故少病約身問。少惱約心問。起居下。問身之少病。世事下。問心之少惱。已上問能教化主。無多下。問所化機宜。能不具大小。隨眠諸惑不。無不孝下。問眾生俗諦事。不敬下。問眾生出俗事。能降伏下。問眾生真俗修行魔障有無事。皆問現在生佛也。久滅度下。問過去佛往來事。又問訊下。亦問過去佛身心事。天台云。今經三處。問訊病惱。先達以三義通之。一。順同居施化。本境生身。示同人法故。二。約

禮儀法爾而然故。三約三身。通大小故。如涅槃疏云。華嚴是大乘生相。涅槃是大乘滅相。安樂行下。諸不字。除不孝不敬外。餘皆否音。無多貪欲至無慳慢否。句上無字。通貫於下。謂無貪欲乃至無慳無慢否。無不孝至邪見否。三句。其無字。亦貫讀之。謂無不孝乃至無邪見否。善心不一句。攝五情不一句。能攝卽意。所攝卽眼等五情之根。謂攝令寂靜不放逸也。安樂行。行字平聲。△眾生易度以下。皆妙音。藉問訊之言。爲會眾說法也。以貪瞋痴慢。鈍使之四。嫉慳隨煩惱之二。邪見。利使之。一。諸魔。

卽煩惱與陰魔也。此皆二乘所不能疾斷者。有此諸障。則眾生不易度矣。又貪欲至慳慢等十字。是總謂不孝卽瞋恚。亦卽是不善心也。不敬卽愚痴。亦卽邪見所使也。攝五情卽貪欲多。不伏諸魔。乃慳嫉盛。此皆堪忍界中人所熟習。故妙音借如來鼻孔。爲他出氣也。又問訊多寶聽法。乃警人切聽。堪忍久住。是戒人疲勞。藉此發彼。使一切眾生各聽妙音。各解妙語。始見菩薩得解眾生語言之實證耳。不然。妙音辭本師時。彼佛曾無寄言問訊也。倘有此語。必譯人避繁。影畧其言也。

⑤ 四請見多寶

世尊。我今欲見多寶佛身。惟願世尊。示我令見。

○此示第八集一切功德三昧也。△妙音既出於淨華宿王智中。普利羣機。凡所經到處。無不天搖地震。及至娑婆。以瓔珞上佛。可謂功德集矣。若不親見古佛。不爲古佛稱善。又何以名集一切功德耶。⑥ 五世尊通致。

爾時釋迦牟尼佛。語多寶佛。是妙音菩薩欲得相見。妙音欲見古佛。若不假釋迦通致。又何由得見。則相見二字。正是始本圓融。妙音顯露。而得一切功

德集聚之時。看教人須好生體認。所謂鴛鴦繡出
從君看也。⑤六塔中稱善。

時多寶佛告妙音言善哉善哉。汝能爲供養釋迦牟尼佛及聽法華經并見文殊師利等故來至此。

古佛謂供佛聞經。并見文殊。可謂三寶並集。正此之時。塔戶未開。而弘音已震。且道妙音果有見耶。果無見耶。但得皇風成一片。不知何處有封疆。妙哉是法。真不可思議者也。問妙音未發足時。則已爲古佛召發。及至到此。爲何不見。而必欲如來通致耶。答妙音始作。若不因古佛。何由得起。及至舉

法華抄手名錄十一之一
二
作之時。用既彰。而體似隱。今欲假如來契證。使新
記人。不忘所自。始見妙音有在。要知故來至此四
字。字字皆有隱意。正是體用俱到全彰聖化之時
也。奉命西來已竟。(庚)三十方弘經。分二。(辛)一問答
善根神力。又二。(壬)一問。

爾時華德菩薩白佛言。世尊。是妙音菩薩。種何善根。
修何功德。有是神力。

○此示第九清淨三昧也。前文殊見蓮華。興起二
問。一問種何德本。有大神力。二問行何三昧。已欲
効之。三欲求佛加被。見彼色相。逮妙音來。直完第

三請。前兩問猶未結案。故華德復請垂示善根功德也。△問意有二。一問始先種何等善根。二問中間修何等功德。以至今日。有是神通力用也。然此問意。本文殊所發。而文殊及見色相大小威儀進止。便擲之不完所問。必假華德重請。復何意耶。曰。文殊之請。本欲顯發妙音。故釋迦不召而推功古佛。是益見妙音難發也。今既古佛宣召。使妙音遐唱。已得妙音宣揚。卽可以完妙吉祥之本智也。至於華德。本居因位。雖見妙音。未證妙智。是必欲尋因求證。又不得不再請垂示耳。⑤二答。又二。⑥一

答善根

佛告華德菩薩。過去有佛。名雲雷音王。多陀阿伽度。阿羅訶。三藐三佛陀。國名現一切世間。劫名喜見。妙音菩薩於萬二千歲。以十萬種伎樂供養雲雷音王佛。并奉上八萬四千七寶鉢。以是因緣果報。今生淨華宿王智佛國。有是神力。

前是文殊問妙音行體。故佛推多寶。今華德故問行因。因行屬權。所以佛自說也。言過去者。直指云。以妙覺望九地而言。其佛號雲雷音王。九地十地。善慧法雲之相。與不輕命終之後。值二千億佛同。

號雲自在燈同旨。國號現一切世間。刳名喜見。二俱是法雲善慧實報之境。以法雲周徧十方說法。所謂現一切世間也。以法施一切。無不喜見也。萬二千歲下。正示妙行之因。按藥王燃身火然千二百歲。過是已後。其身乃盡。是破俱生法執。能所兩亡。便入九地。今云於萬二千歲。亦是表俱生法執能所俱盡。乃入九地。然九地名善慧。故以伎樂供佛。表善慧之法音也。十萬種。表十波羅蜜門。雲雷音者。謂九地證百萬種三昧。十方諸佛所說世界海法門。皆悉領納不失。所以周旋法界。吼震十方。

故借師而表其資也。此時九地因行之相。復供八萬四千七寶鉢。此表十地之行相也。至十地時。八萬四千煩惱習氣。盡成眞如大用。故以法器表之。由此二事因緣故。生淨華宿王智佛國。此表已入等覺地也。末句結示。如是大因。今生佛家。獲如是大神通也。引此一段。俾本迹兩門。知其九地十地功勳不凡。應宜効之。

華德。於汝意云何。爾時雲雷音王佛所。妙音菩薩伎樂供養。奉上寶器者。豈異人乎。今此妙音菩薩摩訶薩是。

此結會古今。所種善根。所修功德。因果如是。下則廣推因行。

華德。是妙音菩薩。已曾供養親近無量諸佛。久植德本。又值恆河沙等百千萬億那由他佛。

直指云。此段作兩節看。已曾下。是佛叙妙音從七地逆至初地。因行止。故曰已曾供養無量諸佛。久植德本也。又值下。是追叙向行住信四十位。因行。故曰又值恆河沙等諸佛也。舉所侍佛。定見能行之行。校本經藥王與常不輕。三處十地及等妙因行。或以行顯。或以所侍之佛而顯。或以所經劫量

而顯。前後照應。互見可知。△此節所示妙音善根功德。如是之多。所歷之劫。所侍之佛。如是之廣。始見所證清淨三昧如是之妙也。⊙二答神力。

華德。汝但見妙音菩薩。其身在此。而是菩薩現種種身。處處爲諸衆生。說是經典。或現梵王身。或現帝釋身。或現自在天身。或現大自在天身。或現天大將軍身。或現毘沙門天王身。

○此下皆示第十神通遊戲三昧也。以所現身皆神通遊戲故。謂華德。汝但見妙音菩薩一身。而不知彼於種種類中。皆能現身說法也。欲界舉帝釋

自在二天。則夜摩兜率化樂攝入其中矣。色界舉
梵王大自在。餘皆攝盡。不叙空界者。以無形色故。
天大將軍者。天台釋。散脂修摩爲天大將軍。其形
八臂。騎孔雀。擊鷄。持鐸。捉赤幡。統轄三十八部。巡
遊世界。賞善罰惡。故稱天大將軍也。此或統欲色
諸天。有此勇健之軍。以天大二字。揀異毘沙門諸
小將軍也。毘沙門者。智論謂。福德之名。多聞四方。
乃北方天王也。攝東南西等三軍。此明妙音示現
於三界二十八天。現一一形。說此妙法也。

或現轉輪聖王身。或現諸小王身。或現長者身。或現

居士身。或現宰官身。或現婆羅門身。或現比丘。比丘尼。優婆塞。優婆夷身。或現長者居士婦女身。或現宰官婦女身。或現婆羅門婦女身。或現童男童女身。

輪王以聖言者。揀諸小爲凡也。小王者。對輪王稱之也。名粟散王。又中國名大。附庸名小。傳傳相望。小大自異。長者。有長人之德。備說有十。故稱長者。詳見譬喻品。居士。乃愛談名言清淨自居者。宰官者。謂三台。以功能宰政。主於郡縣。亦稱宰官。宰卽主義。官乃功能義也。婆羅門云淨行。此上皆現世間男子身。下明僧俗四眾身。或現長者居士婦女

等。單明現女子身。已上明妙音於人道中示種種身說此妙法也。

或現天。龍。夜叉。乾闥婆。阿修羅。迦樓羅。緊那羅。摩睺羅伽。人。非人等身。而說是經。

釋文皆見序品。然前已叙現天身。此復言天者。乃現一切天眾身也。故列於八部之前。是見菩薩無類不現無處不說也。

諸有地獄。餓鬼。畜生。及眾難處。皆能救濟。

要解云。諸應皆言現身說經。獨於惡趣不言者。惡趣方沉幽昏。無由聞經。但以神力救濟而已。

乃至於王後宮變爲女身而說是經。

知音云此應譯著現長者婦女之前。而置於末者。以王宮禁制。不便遊化故也。△天人最樂之地。三途極苦之場。而菩薩一一皆能現身說法。豈王宮返不能令此法流通耶。但王宮嚴禁之所。非泛泛可得而行。唯菩薩能現女身。乃可說法。故加乃至二字。及變爲女身句。以見難說。而能說者妙音力也。直指云。已上皆是九地十地證法華三昧。能於六道周旋往返。以此法華。普接十類衆生。至如來地。故名爲妙。然此二地。於機不擇者。乃悟衆生平

等。於法則有所擇。而獨說大乘。所謂一相一味三昧也。至普門品。則隨位隨機。卽俗而真。故爲妙行。華德。是妙音菩薩能救護娑婆世界諸衆生者。是妙音菩薩。如是種種變化現身。在此娑婆國土。爲諸衆生說是經典。於神通變化智慧無所損減。

○此去皆示第十一慧炬三昧也。以下有若干智慧。照明娑婆世界等語。△前兩句明妙音實爲娑婆衆生之恃怙也。救護衆生者者字最重。卽指妙音能爲現形說法之主。是妙音下。謂華德汝但知妙音現種種身在此娑婆處處說經。而不知彼一

切淨光莊嚴國中亦如是現身說法神通智慧亦無所損滅也。若於說是經典下。加一切淨光莊嚴國中八字。其義更顯。

是菩薩。以若干智慧。明照娑婆世界。令一切衆生各得所知。於十方恆河沙世界中。亦復如是。

前言救護。是隨類說法。令其脫苦。此言各得所知。是隨類各解。使其得樂。爲菩薩慈悲普及也。若干智慧明照者。顯菩薩方便之多。於十方恆沙下。推廣其益。又不止娑婆與淨光莊嚴中。使一切衆生離苦得樂。更於十方恆河沙世界中。而神通智慧。

亦無所損也。足見以神通遊戲。現種種身。以智慧
照明。說此妙法。其三昧威神。真不可思議者也。
若應以聲聞形得度者。現聲聞形而爲說法。應以辟
支佛形得度者。現辟支佛形而爲說法。應以菩薩形
得度者。現菩薩形而爲說法。應以佛形得度者。卽現
佛形而爲說法。如是種種隨所應度而爲現形。
知音云。前叙六凡。重所應機。說世間人天乘五戒
十善之妙法也。此叙四聖。重能應教。說出世間小
中大頓圓之妙法也。爲欲得小乘者。則法身應機。
作聲聞形。說四諦法。欲得中乘者。則法身應機。作

辟支形。說十二緣法。欲得大乘者。則法身應機。作三賢十地菩薩形。說諸度法。欲得最上一乘。不涉階漸。頓作佛者。則法身應機。作報化佛形。說十力無畏等法也。此土彼土十方恆河沙土。同時遍應。無不皆然。故曰如是種種等也。問。菩薩何以能現佛身。答。初住尚能分身百界。况妙音之深位耶。須知佛界有三教果頭佛。有圓教分證佛。究竟佛。今所現者。或果頭與分證佛。似非究竟佛也。△前段明菩薩現六凡身。爲說妙法。於此界他方。已見神通遊戲之不可思議也。今於四聖人中。亦能現身。

說法。則慧炬照明。尤不可思議也。若但現凡。而聖不能現。又何以當妙音之稱。

乃至應以滅度而得度者。示現滅度。

知音云。上明妙音。證獲法身般若。此方明證。獲解脫德也。謂菩薩不唯現身在此。卽應以涅槃得度者。亦於無生滅中。示生滅也。此如本會如來唱滅。大衆感悟同意。

華德妙音菩薩摩訶薩。成就大神通智慧之力。其事如是。

此以結成所問善根功德也。謂如汝所問。而妙音

所修所種成就如是。大神通遊戲如是。大慧炬照明普益有情。其事如是也。④二問答今住何定。又二。⑤一問。

爾時華德菩薩白佛言。世尊。是妙音菩薩深種善根。世尊。是菩薩住何三昧。而能如是。在所變現。度脫衆生。

此問今果德住何三昧也。謂如妙音菩薩之善根功德及神通之相。我已悉知。但未審卽今住於何定。能如是自在變現於十方刹海。利益衆生也。但因果乃二利之要關。故當細問。⑥二答。

佛告華德菩薩。善男子。其三昧名現一切色身妙音菩薩住是三昧中能如是饒益無量眾生。

○此示第十二莊嚴王三昧。一切色身爲所現。卽前十法界身是也。法身爲能現。卽前不起於座身不動搖者是也。然法身爲一切色身之主。一切色身爲法身之莊嚴。故此問答。明莊嚴王三昧。雖酬華德。亦是答文殊所問行何三昧。願爲我等說是三昧名字也。明十方弘經已竟。(庚)四二土得益。說是妙音菩薩品時。與妙音菩薩俱來者。八萬四千人皆得現一切色身三昧。此娑婆世界無量菩薩亦

得是三昧及陀羅尼

○此雖叙兩土大眾聞法得益。其實示第十三淨光明三昧也。自住法身曰淨。普照衆生曰光明。今一說妙音神智。卽令人同得。豈非三昧及總持乎。并結訖文殊云我等亦欲勤修行之之案。天台云。三昧與陀羅尼。用異而體同也。寂用名三昧。持用爲陀羅尼。又色身變現名三昧。音聲辯說爲陀羅尼。又舌根清淨名陀羅尼。餘根清淨名三昧。俱是六根清淨法門耳。妙樂云。現色身名三昧。音聲名陀羅尼者。語言與色身。但是身口之異耳。豈現身

不能說法耶。從事雖別。其理必同。三昧從定。陀羅尼從慧。卽不思議定慧。故得互用耳。

⑤五還歸本國。

爾時妙音菩薩摩訶薩。供養釋迦牟尼佛。及多寶佛塔已。還歸本土。所經諸國。六種震動。雨寶蓮華。作百千萬億種種伎樂。

○此示第十四淨藏三昧也。以還歸本土。表一切色身神智變現。皆藏於淨法界身之藏海故。問妙音既彼此二土。及十方恆河沙世界。皆同時徧在。又奚重煩來往。答菩薩本具三身。應化身則隨十

法界現。有大有小。報應身則見有往來。法身則遍一切處。而無往無不往。無來無不來也。妙音於諸土隨類現者。應化身也。彼此往來者。報身也。

既到本國。與八萬四千菩薩圍遶。至淨華宿王智佛所。白佛言。世尊。我到娑婆世界。饒益衆生。見釋迦牟尼佛。及見多寶佛塔。禮拜供養。又見文殊師利法王子菩薩。及見藥王菩薩。得勤精進力菩薩。勇施菩薩等。亦令是八萬四千菩薩。得現一切色身三昧。

○此雖叙復命之辭。其實示第十五不共三昧。以復命之辭。不敘其二乘人得益故。所以然者。一則

二乘人皆已受大乘記。無非菩薩也。一則明妙音來往。智慧神通。皆是化菩薩法。不與一切二乘人共也。經文其深玄哉。△妙音作此舉止。其二利功德甚深。到本國者。卽究竟還歸也。八萬四千圍遶者。乃體用兼到也。下叙白本師得利益。謂我到娑婆。使無量衆生得三昧總持。證不思議定慧。可謂饒益無量也。見釋迦卽始覺顯露。於多寶而言見塔。乃本覺無相。但言禮拜供養而已。見文殊卽得大智。見藥王卽得大行。如此行智。非勤精進力。不能作大勇施。由此智行進勇。一切具足。故八萬四

千妙用法門。無不備彰。使化功歸己。無不圓滿。如此運爲。豈徒然哉。庚六聞品進道。

說是妙音菩薩來往品時。四萬二千天子。得無生法忍。華德菩薩得法華三昧。

○此雖通結一品之文。其實示第十六日旋三昧也。以娑婆去一切淨光莊嚴佛國。有百八萬億那由他恆河沙等世界之遙。而妙音來往。可謂如杲日麗中天也。吾人能得此品妙義者。亦如日麗中天。有目有趾者。無不待是而成功也。故叙得益。以四萬二千天子得法忍言。明菩薩報應身之日。雖

有往來。而法身之天。曾無生滅也。法華三昧其體相如是。故華德問此。而亦證此也。問前已叙得益。此奚復叙。答前叙兩土菩薩。是深位有益也。今叙天子及當機。則知見聞之益亦廣矣。三昧之名亦異矣。明妙音往來已竟。

妙法蓮華經授手卷第七之一

音釋

蕪渠宜切域越逼切甄居延切嬰於莖切武鳥文甫切嘴

祖委切歟雲俱切蓄音旭鐸造各切轄胡入聲趾諸氏切

也足

洋書三、名録一、一、一

ニラ

妙法蓮華經授手卷第七之二

清楚衡雲峯沙門智祥集

觀世音菩薩普門品第二十五

品節云。此品大意以法華三昧。始覺因圓。妙契果海。

逆流而出。現十法界身雲。無思而應。所謂聖種類身。一時俱現。乃得種類俱生無作意生身之象也。由永滅根本無明。鏡智顯現。故曰普門示現。良以大士初因如幻聞熏金剛三昧力。故得生滅滅寂滅現。超越世出世間。上同慈力。下合悲仰。能以一身普應一切。獲三種妙用。所以有三十二應十四

無畏十九說法。七難二求。無不感應。此見妙行圓滿。法華三昧之功德成就。妙極於此。故以三種意生身證行成德也。聖旨昭然。深觀可見。然而妙行雖圓。誠恐行人餘習緣影難盡。則又說三種加持。乃可克成妙果。故次以三品終焉。天台引別行立云。觀世音者。西土正音。名阿耶婆婁吉低輸。此云觀世音。能所圓融。有無兼暢。照窮正性。察其本末。故稱觀也。世音。是所觀之境。萬像流動。隔別不同。類音殊唱。俱蒙離苦。菩薩弘慈。一時普救。皆令解脫。故曰觀世音。此卽境智雙舉。能所合標也。普門

者。普是徧義。門曰能通。用一實相。開十普門。無所
障礙。故稱普門。此總釋也。別釋有通別二種。通有
十雙。別有五隻。十雙者一人法爲名。此品有兩翻
問答。人卽觀世音。依前問答而名也。法卽普門。依
後問答而立也。二以慈悲爲名。觀世音者。卽大悲
拔苦。依前問答。百千苦惱皆得解脫也。普門者。大
慈與樂。依後問答。應以得度而爲說法也。三以福
慧爲名。觀世音者。智慧莊嚴。智能斷惑。如明時無
暗。普門者。福德莊嚴。福能轉壽。如珠雨寶。故知前
問答應機拔苦。是慧莊嚴。後問答住首楞嚴定。普

現色身。是定莊嚴。四以真應爲名。觀世音者。觀冥於境。卽真身也。普門者。隨所應現。卽應身也。五以藥珠爲名。觀世音者。如藥王樹。徧體愈病也。普門者。譬如意珠。隨意所與也。六以冥顯爲名。觀世音者。冥作利益。無所見聞。三毒七難。皆離二求。兩願俱滿。普門者。顯作利益。目覩三十二身。耳聞十九尊教也。七以權實爲名。觀世音者。隨自意照實智境。普門者。隨他意照權智境也。八以本迹爲名。觀世音者。不動本際也。普門者。迹任方圓也。九以緣了爲名。觀世音者。根本是了。因種子。普門者。根本

是緣因種子也。十以智斷爲名。觀世音者。究竟是智德。普門者。究竟爲斷德也。經文兩翻問答。義含無盡。略用十雙。釋品通名。其義如是。別論五隻者。卽以觀世音普門五字訓也。第一觀者。亦有多種。謂析觀。體觀。次第觀。圓觀也。析觀者。滅色入空。體觀者。卽色是空。次第觀者。從析觀乃至圓觀。圓觀者。卽析觀乃至次第觀。皆實相也。今揀前三觀。唯論圓也。第二世者。亦有多種。謂有爲世。無爲世。二邊世。不思議世。有爲世者。卽三界世。無爲世者。卽有餘無餘二涅槃世。二邊世者。卽生死涅槃世。不

思議世者。卽實相境。今揀前三。但取不思議也。第
三。音者。音卽機也。亦有多種。人天機。二乘機。菩薩
機。如來機。人天機者。卽諸惡不作。衆善奉行。二乘
機者。卽厭畏生死。欣尙無爲。菩薩機者。卽先人後
己。慈悲仁讓。佛機者。一切諸法中。悉以等觀入。一
切無爲人。一道出生死。今揀前三。唯取佛音機也。
以是因緣故。名觀世音。第四。普者。周徧也。諸法無
量。若不得普。卽是偏法。法若成偏。焉能圓應。略約
十法明普。一慈悲普。二弘誓普。三修行普。四斷惑
普。五入法門普。六神通普。七方便普。八說法普。九

成就衆生普。十供養諸佛普。得此意已。類一切法。無不普也。釋明十義。廣如科註。茲不繁引。第五。門者從假入空。空通而假壅。從空入假。假通而空壅。偏通則非普。壅故則非門。中道非空非假。正通實相。雙照二諦。故曰普門。是故此品爲普現三昧。化他流通也。①三以觀音普門示現周徧流通。分三。②庚一長行。又二。③丑一明兩翻問答。復二。④壬一問觀世音名。分二。⑤癸一當機致請。又二。⑥子一經家叙爾時無盡意菩薩。卽從座起。偏袒右肩。合掌向佛。而作是言。

此以無盡意當機者。顯前品妙音。雖於神通智慧無所損減。由往來之意未泯。則意猶有盡。若觀音以圓照三昧。上同下合。現一一形。說一一法。又不似妙音。但說此經。若此經流通。則妙音亦止。故知普門示現。意無有盡。故當機以無盡意而發問也。爾時者。卽東方之妙音既竟。而西方之觀音又發。正此之時。始見有無盡意從座起也。①二正與問世尊。觀世音菩薩。以何因緣名觀世音。

下有兩翻問答。初問觀世音。人也。後問普門。法也。此是初問。觀字當作平聲讀。乃根本智。若作去聲。

則屬功勳。此爲能觀。世音乃所觀境。智則唯一。而境有萬殊。世字。該有情世。至正覺世。乃十界正報。音字。卽十界衆生所發之言音也。音當耳聞。而言觀者。顯菩薩不思議力用無根不聞也。以何因緣者。謂前妙音。故知奉樂供鉢。以爲因緣。所以得妙音名。今菩薩名觀世音者。觀本屬眼。宜以對色。世音乃聲。宜乎對耳。今根境既不相侔。未審有何因緣。得是名也。④二如來詳答。分三。⑤一總稱名答。又四。⑥一人數。

佛告無盡意菩薩。善男子。若有無量百千萬億衆生。

法華指三身身一之十二
此正答因緣也。天台云。十法界機。實是無量。而言
百千萬億者。非謂十界共有此數。蓋指一業有如
許人。如一地獄同受一苦。以苦驗人。知同一業。以
例諸趣。亦皆如是。故知此數是標同業之意也。此
舉境衆機多。以顯觀深應大。△舉數處。以若有字。
是不定語。或一人十人百千人。已至無量人。是其
正意。⑤二遭苦。

受諸苦惱。

○此明現遭苦厄也。自有多苦苦一人。多人受一
苦。一人受多苦。一人受少苦。今言萬億衆生。多人

也。受諸苦。多苦也。舉多顯少。無不來應。⑤三稱名。聞是觀世音菩薩。一心稱名。

此以善惡相帶。合爲機也。由惡遭苦。因善聞名。大窾云。一心二字。是脫難之本。正謂攝心一處。便是觀音出現時也。蓋菩薩與衆生同體。徧在一切衆生心中。菩薩之名。徧在一切衆生耳裏。但不肯一心注念。循聲流轉。却與菩薩遠隔千里。若能一心稱名。則觀音不離當處。若百千萬億受苦衆生。同時一心稱名。則同時離諸苦惱也。⑥四解脫。觀世音菩薩。卽時觀其音聲。皆得解脫。

天台云上聞卽稱。是機速。今稱卽驗。是應速。皆得解脫者。卽是蒙應利益。皆者。非但顯於多機衆益。亦顯圓徧之應也。△楞嚴云。一者。由我不自觀音。以觀觀者。令彼十方苦惱衆生。觀其音聲。卽得解脫。卽時者。於一心稱名無間無斷時。四相俱空。不覺不知。則得觀其音聲。如從夢覺。菩薩卽時顯現。身心相滅。豈不皆得解脫耶。

- ①二別脫苦答。分三。
- ②丑一口機應物。又二。
- ③寅一明七難。分七。
- ④卯一大火難。分四。
- ⑤辰一稱名。

若有持是觀世音菩薩名者。

○此別答中。不出三業應機。今七難是口機。以稱名故。三毒是意機。令常念故。二求。是身機。常禮拜故。△若有持者。謂一向持名之人。應無火災。下出設遇不燒。乃見持則通靈。所應不虛也。⑤二遇苦。設入大火。

天台云。此下釋諸難。例爲三意。一貼文。二舉事。三觀行。貼文者。若有設有等。皆不定之辭。餘皆難起。方始稱名。今先舉稱名。而後遭難者。或前後互說耳。又或火災卒暴。須預憶持。不入此難也。二舉事證。晉時謝敷。作觀音應驗傳。載祝長舒。晉元康年

中。於洛陽。爲延火所及。草屋下風。豈有免理。由一心稱名。風回火息。隣房亦滅。又僧法力者。於魯郡起精舍。從上谷乞麻一車。法力疲極。小卧於空野。遇火。比覺火勢已及。纔舉聲稱觀。未及稱世音。而火已滅。傳載非一。姑畧引耳。觀行釋者。火有多種。果報火。從地獄至初禪。皆有洞然燒炙。無能免者。業火。通三界。故經云。燒諸善根。無過瞋恚。能破善根。退上墮下。皆名爲火。煩惱火。通三乘。聲聞畏三界如火宅。競其馳走。趣有餘涅槃。支佛及藏通別圓菩薩。修道之時。並爲五住煩惱之所燒害。若能

稱菩薩名。卽得解脫。又三火中。果報是事火。眼見身覺。業與煩惱。但有燒義。通名爲火。④三得脫。火不能燒。

不能燒者。由一心稱名之時。自心火滅。况一切諸境。皆從心生。心若不生。妄緣自息。然正當大火猛燄之際。其能相忘於無事之境。不驚不怖。有幾人哉。遇火不燒。斯由菩薩神力及自心念力故也。

④四明應

由是菩薩威神力故。

楞嚴云。二者。知見旋復。以脫塵內伏。故令一切遇

火衆生。一心稱名。頓免其難。然大火到時。勢不可救。而云不燒者。菩薩威神之力也。△更須知火本屬眼。發於所見。境至而神投。自然勢也。如見愛則欲火頓生。見憎而瞋火疾作。若不旋見還明。何由得滅。④二大水難。

若爲大水所漂。稱其名號。卽得淺處。

天台釋。亦有三。一貼文者。遭水是苦。稱名是善。卽爲機也。得淺處卽應也。言大水者。以小水不成難故。二引證。應驗傳云。海鹽有人溺水。同伴皆沉。此人稱觀音。遇得一石。忽然如夢。見兩人乘船喚入。

開眼。果見人船。及送達岸。人船俱隱。又僧道問三人。乘冰度孟津。垂半一人前陷。一人次沒。問進退冰上。度死無疑。但一心稱觀世音。脚如踏板。夜遇赤光。竟得達岸。此皆神力所應也。三觀釋者。果報水自地獄。以至二禪。無能免者。惡業水通三界。諸惡破壞善業。悉名惡業波浪。煩惱水亦通三乘。所謂煩惱大河。能漂香象。無明所盲。不能得出。聲聞初二三果。名淺處。無學爲彼岸。支佛侵習爲淺處。通教正習盡爲彼岸。別教斷四住惑爲淺處。斷無明爲彼岸。圓教十信位中六根清淨爲淺處。入初

住爲彼岸。△楞嚴云。三者。觀聽返入。致令持名衆生。水不能害。然水本屬耳。出於所聞。愛則水生。怒卽淚注。菩薩由旋聞聲脫。使稱名者。無水難也。

卯三羅刹難。

若有百千萬億衆生。爲求金銀琉璃磈磈碼碯珊瑚琥珀珍珠等寶。入於大海。假使黑風吹其船舫。飄墮羅刹鬼國。其中若有乃至一人稱觀世音菩薩名者。是諸人等。皆得解脫羅刹之難。以是因緣。名觀世音。天台釋難亦三。一貼文者。入海求珍。結伴無定。然亦非獨往。今舉總數。但曰百千萬億也。爲求不出。

其所求之名。以等字。攝諸異寶。必入大海者。以海爲衆寶所聚。賢愚經云。田殖百倍。商賈千倍。仕宦萬倍。入海吉還。得無量倍。故必應入海也。△假使者。偶然值遇。未必入海者。盡然也。此科應重在黑風二字。照前水火。此當風難。不然。與後鬼難。爲重疊矣。大海遇風。甚爲可畏。况其風黑。則向往皆迷。必至於墮鬼國無疑矣。羅刹。乃食人鬼。其畏尤甚。次下明機。謂正當大怖畏時。於多人中。乃至一人稱名。則一切人俱免斯害。豈不爲菩薩威力之所至哉。獨是一人稱名。是一人靈顯。衆感未彰。應何

濫及。然衆口雖默。而求救之心必切。心切而神現。理亦宜然。此亦菩薩不思議大悲所被也。二引證。外國有百餘人。從師子國。泛海向扶南。遇惡風。墮鬼國中。俱大怖。稱聖號。中有一小乘沙門。不信觀音。鬼遂取沙門食。由是狼狽學稱。亦得免難。三觀釋者。不但明世界中風。黑業亦名風。華嚴云。嫌恨猛風。吹罪心火。常令熾然。吹諸行商人。墮落惡趣。果報風至三禪。惡業風通三界。煩惱風通三乘。廣如科註中明。然一稱名。俱得脫苦。此見尋聲救苦之實也。楞嚴云。六者聞薰精明。明徧法界。則諸幽

暗。性不能全。既無黑風。卽不墮諸鬼國矣。以是下
並上水火。以結答當機所問。以何因緣。此謂以是
因緣也。④四王者難。

若復有人臨當被害。稱觀世音菩薩名者。彼所執刀
杖。尋段段壞。而得解脫。

○釋王難亦三。一貼文。遭難是苦。稱名是善。卽機
也。而得解脫。卽蒙應也。二引證。應驗傳云。昔太元
中。彭城有人。被枉爲賊。其人本供金像。常納髻中。
及伏法刀下。但聞金鐵聲。三斫而頸無傷。詢之得
髻中金像。頸有三痕。其他不及廣引。三觀釋者。果

報刀杖。從地獄至欲天惡業。刀杖通三界。煩惱刀杖通三乘。謂凡所修善因。爲三毒刀箭。惡業破壞善心。割斷戒皮。定肉慧骨。微妙心髓等。若能至心稱名。如是刀杖無不解脫。△言臨當被害。正當戮時。乃能所境對。一稱名而刀段段壞。卽能所消亡也。楞嚴云。五者。熏聞成聞。六根銷復。同於聲聽。使其兵戈。猶如割水。亦如吹光。性無搖動。神力所致也。④五惡鬼難。

若三千大千國土。滿中夜叉羅刹。欲來惱人。聞其稱觀世音菩薩名者。是諸惡鬼。尙不能以惡眼視之。况

復加害。

○釋鬼難亦三。一貼文。若三千下。標處。欲來下。明遭難是苦。聞其下。稱名是善。此卽機也。鬼不能害。是蒙應也。△前言漂墮是人入鬼國。此言欲來惱人。是鬼到人。所言大千滿中俱鬼。而亦實有事也。不見教中道。娑婆世界有插針不入的鬼。但人能稱名。鬼心卽滅。豈不如紅爐之點雪耶。二引證。上羅刹難中。已彰其事。茲不繁叙。三觀釋者。若果報鬼。自地獄至天宮。皆有此難。如地獄中。有大力鬼。惱諸罪人。餓鬼中。有惡鬼害諸小鬼。畜生中。有惡

鬼食噉天中。如阿含經云。有大力鬼。坐帝釋床。帝釋大瞋。鬼光亦熾等。惡業鬼通三界。如貪瞋癡俱是鬼義。煩惱鬼通三乘。如謂見心爲男鬼。愛心爲女鬼。見使歷三界有八十八。愛卽思也。有八十一。其大千滿中俱鬼。亦不虛也。二乘人有斯鬼難。菩薩有無明鬼。愚癡羅刹等。若能至心念菩薩名。無不解脫。楞嚴云。四者。斷滅妄想。心無殺害。令諸衆生鬼不能害。使持名者。得益之時。不唯不敢加害。卽欲以惡眼偏視。亦不敢也。④六枷鎖難。設復有人。若有罪。若無罪。杻械枷鎖。檢繫其身。稱觀

世音菩薩名者皆悉斷壞即得解脫

○釋枷鎖難亦三。一貼文。設復下。先標有罪無罪。杻械下。明遭難是苦。稱觀音下。稱名是善。此爲機也。皆悉斷有等。明應也。有罪無罪者。或實有罪。或果無罪。又或推檢未定。皆被囚執也。△無罪者當然。有罪者亦免。何也。此明聖心平等。本以救囚執爲應。不論罪之有無也。在手名杻。在脚名械。在頸名枷。連身名鎖。此則三木一鍊之名。繫卽繫礙。檢是封檢。繫未必檢。檢必被繫也。繫而被檢。憂怖亦深。若能稱名者。重關自開。鐵木易壞矣。二引證。應

法華持三卷第一之二
三
驗傳云。蓋護山陽人。繫獄應死。三日三夜心無間
息。卽眼見觀音放光照之。鎖脫門開。尋光而去。行
二十里。其光乃息。三觀釋。一果報枷鎖。三途及人
不言可知。修羅亦有五縛。唯北洲及天上。自無此
難。二惡業枷鎖。若人修習善法。被惡業覆心。使善
法敗壞。卽爲惡業所縛。於三界中。無由解脫。三煩
惱枷鎖。三乘人未至究竟。皆爲煩惱所縛。不得自
在。若能至心念菩薩名。而一切枷鎖無不解脫。楞
嚴云。七者音性圓消。離諸塵妄。妄塵旣離。夫復何
繫。所以令持名者得解脫也。④七怨賊難。

若三千大千國土。滿中怨賊。有一商主將諸商人。齎持重寶。經過險路。其中一人作是唱言。諸善男子。勿得恐怖。汝等應當一心稱觀世音菩薩名號。是菩薩能以無畏。施於眾生。汝等若稱名者。於此怨賊當得解脫。眾商人聞俱發聲言。南無觀世音菩薩。稱其名。故即得解脫。

○釋怨賊難亦三。一貼文。大千國上者。標難處也。滿中怨賊。明難事也。滿中者。顯國曠賊多。聖力能救也。怨必奪命。賊乃奪財。今賊而復怨。其財命俱奪。必矣。甚爲恐懼。△寶重而路險。賊臨而復怨。害

豈淺鮮耶。此中一人力勸稱名。謂菩薩能以無畏
 施人。若稱者名必當脫苦。何異久旱中之聞巨雷。眾
 商共稱。何異孤旅中之遇父母。是諸知契而二。知
 泯。豈不能成解脫哉。商主等。乃遭難之人。主商者能
 擇貴賤。善解財利。商量得宜。堪為商人之主。一人
 下明機。一明安慰。二勸稱名。三歎聖德。四俱發聲。
 所以安慰者。止其恐怖也。勸稱者。設其上策也。歎
 德者。獎令定瞻也。二引證。應驗傳云。僧慧達以晉
 隆安二年。於隴上掘甘草時。餓羸正捕人食。即獲
 慧達。閉於柵中。擇肥者先食。達怖。但一心稱名。並

誦是經。人食已盡。唯達與一小兒。次擬明晨取食。達竟夜稱誦。似無所感。向曉羗來取達。忽一猛虎從草透出。哮吼不已。諸羗散走。虎齧柵作一穴而去。達並小兒。俱得免害。三觀釋。一果報冤賊。自地獄至六天。俱有鬪爭。二惡業冤賊。若修善時。惡多是冤。三煩惱冤賊。三乘以一切煩惱。是出世怨心。般若是商主。五度衆行是商人。法性實相是重寶。六蔽是怨賊。若能一心稱名。一切怨賊俱得解脫。楞嚴謂入者滅音圓聞。遍生慈力。蓋音聞兩立。則物我成敵。音滅聞圓。則內外無待。故能遍慈而却。

敵也。④二結神力。

無盡意觀世音菩薩摩訶薩威神之力。巍巍如是。天台云。觀音智力既大。加護亦廣矣。豈止但應七難。當知徧法界。皆能救護。故言巍巍。巍巍者。重明高累之辭也。觀音之力。出於同居分段二死之外。豎應方便實報二土之間。故言重明。載沐神應。故言高累。口機應物已竟。⑤二意機應物。分二。④一離三毒。

若有衆生多於婬欲。常念恭敬觀世音菩薩。便得離。欲。若多瞋恚。常念恭敬觀世音菩薩。便得離。瞋。若多

愚癡常念恭敬觀世音菩薩便得離癡

天台云。此三通稱毒者。以能侵害行人故。但有單
複言耳。若云貪瞋癡名單。今從複列。故云姪欲等
也。自愛爲欲。愛他爲姪。自忿爲恚。忿他爲瞋。自惑
爲愚。惑他爲癡。今明三毒多者。而菩薩威力。尙令
得離。况少者耶。要解云。離欲者。由菩薩熏聞離塵
色所不劫之力也。蓋衆生以欲習合塵。故爲色劫。
一蒙妙力。則欲愛乾枯。根境不偶。雖有妖色。不能
劫動也。離瞋者。由根境圓融。無能所對之力也。蓋
瞋由違情而起。對境而生。圓融則無違無對。而瞋

可離矣。離癡者。由消塵旋明。朗徹無礙之力也。蓋
癡爲妄塵所蔽。無明所覆。消塵則無蔽。朗徹則無
覆。故能旋復真明。永離癡暗也。（寅）二顯威神。
無盡意觀世音菩薩。有如是等大威神力。多所饒益。
是故衆生常應心念。

此言如是者。指前三毒等字。攝慢疑及諸見也。然
十結使。皆爲三界深惑。而三毒猶重。故特舉也。今
離三毒。而曰大威神。曰多饒益者。以前七難尙是
外境。而三毒乃一切衆生無始無明之固結。根深
蒂固。若非大威神大猛力。豈易斷哉。三毒不除。生

死何出。今既諸妄銷亡。自應一真顯露。其悟入佛之知見。亦不難矣。故曰多所饒益。前七難中。但曰一心稱名。或曰稱其名號。今必曰常應心念者。由三毒幽微。防之應密。衆生若能常念常敬。毒從何發。稍一忘念。則妄塵競集。而三毒起矣。故使行人於菩薩聖境。常當心念也。⑤三身機應物。分二。④一正明誠求。又二。③一求男。

若有女人設欲求男。禮拜供養觀世音菩薩。便生福德智慧之男。

知音云。凡女人身。以夫貴而貴。然色難常好。夫愛

莫恆。唯有生男。乃可永賴。故女人必欲求男也。若生男無福。家不足興。無德名不足盛。無智身不足貴。無慧道不能行。故求菩薩。卽欲生福德智慧之男也。然求必有遂者。由菩薩融形復聞不動道場。乃至各各佛邊。爲法王子之力。蓋菩薩於諸佛。旣具子道。故令求卽得也。△世人不求而生男女者。尙多。今言欲求者。是有所願欲也。禮拜供養。是誠求之行。便生福德等。乃明感應道交也。④二求女。設欲求女。便生端正有相之女。宿植德本。衆人愛敬。知音云。女不端正。色雖美而內政莫立。不有相貌。

心雖端而外見罔貴。不宿植德本。則不知敬重三寶。亦令人不生愛敬也。然菩薩使誠求人。必生如是女者。由六根圓通。明照無二。乃至承順十方微塵如來。秘密法門。領受無失故也。易云。至哉坤元。乃順承天。今菩薩以圓通妙體。既能明照。又能承受。有坤道焉。坤厚載物。故令求者便生含弘光大。端正有相之女也。然三毒乃眾生所常有之正性。多則爲害也深。二求乃眾生常有之正情。少則爲嗣也絕。故或惡其多。或慮其絕。一念敬聖。名供聖像。皆響應者。乃不思議之妙用也。①二結福不虛。

法華指掌疏卷之二
三
無盡意觀世音菩薩有如是力。若有衆生恭敬禮拜
觀世音菩薩。福不唐捐。

此結身業應機之不虛也。恐疑者謂自有禮拜不
蒙願者。故此云。若能恭敬禮拜。而所得福。必不虛
棄。唐捐者。虛棄也。其所以不蒙應者。由感之未至。
非應之不及也。別答脫苦已竟。

④三勸持名答。分三。⑤一勸持。

是故衆生皆應受持觀世音菩薩名號。

天台云。上說觀音得名因緣。其力廣大。既不辯形
質。但述名論德。若欲歸崇。宜奉持名號。故舉持名

爲勸也。△是故者。指前救七難。離三毒。應二求。種種威神之故。皆應者。廣勸持名也。謂菩薩有如是。大威神力。不唯有難有毒有求者當持。卽一切衆生。皆應受持也。向下較其所當持之福。⑤二格量。無盡意。若有人受持六十二億恆河沙菩薩名字。復盡形供養飲食衣服卧具醫藥於汝意云。何是善男子善女人功德多不無盡意。言甚多世尊佛言。若復有人受持觀世音菩薩名號。乃至一時禮拜供養。是二人福正等無異於百千萬億劫不可窮盡。此明持菩薩名。如食金剛。非食他物可比也。直指

謂初舉一人廣大之福爲本。六十二億福田多。盡形壽時節多。四事具足。供養多。持盡名號恭敬多。舉此四事爲校量本。於汝下問也。無盡意下答也。佛言下。又單舉一人稱觀音名。正格量也。還舉四大以格四多。而其功德正等。○問。何故持諸菩薩之功多。而福返少。持觀音之功少。而福返多。答。諸菩薩尙在五十四位中。而觀音已居等覺。如二人者。一人多奉諸臣。一人專敬於主。則其承恩之差等可知矣。又圓通中自陳。謂我一名號。與彼衆多名號無異。由我修習得真圓通。以是則知自他正等。

也。⑤三結歎。

無盡意受持觀世音菩薩名號得如是無量無邊福德之利。

○一時稱名。福不可盡。大品云。一華散空。乃至畢苦。其福不盡。義疏云。一華供佛。以類一時持觀音名。言畢苦者。二死永盡也。謂直至成佛。而散花之福。猶尙不盡。必以六十二億爲校量者。乃擴六根而言也。已上總成十四無畏。卽是與諸衆生共一悲仰也。問答人名已竟。

妙法蓮華經授手卷第七之二

音釋

析音昔揀音郎切殿切繁音符艱切壅音於容切侔音莫侯切

罔右熒切音扁光也婪同夢踏徒合切舫音紡兩也仕音時

宦音胡慣切狽音邦妹切挿同插旅音呂柵音恥格切

妙法蓮華經授手卷第七之三

清楚衡雲峰沙門智祥集

⑤二問普門示現分二。⑥一問施三業。

無盡意菩薩白佛言。世尊。觀世音菩薩云何遊此娑婆世界。云何而爲衆生說法。方便之力其事云何。

天台云。前問何緣得名。佛答衆生三業顯機爲境。法身靈智冥契爲應。由此境智因緣而得名也。今問云何遊等。佛答以普門示現三業顯應以答冥機。云何遊是身。云何說是口。方便是意。聖人三業無謀而徧應一切。亦名三輪不思議化也。義疏云。

衆生稱名常念。及以禮拜。三業現前。故言顯機。法
身靈智。卽始本二覺分合之眞身也。乃以智拔苦。
故曰冥應。今明菩薩意鑑機。身現相。口說法。令衆
生有覺知見聞。故曰顯應。然且不說衆生三業修
行之相。此由宿善冥伏在懷。乃能致感。故曰冥機。
又以方便問意業者。非是道前取理方便。此爲證
後鑿機之方便也。⊗二答其妙應。分二。⊙一答所
現身。

佛告無盡意菩薩。善男子。若有國土衆生。應以佛身
得度者。觀世音菩薩。卽現佛身而爲說法。

此並答三問也。天台云。應以二字答意。蓋意地觀
機。見其所宜。當示何身。說何法也。現身卽身業。說
法卽口業也。此別答中。凡現三十三身。十九說法。
東爲十界身。而缺菩薩地獄二界。菩薩卽是本身。
豈復言缺。地獄應有。但文畧耳。別答雖無。總中亦
具。謂以種種形。遊諸國土者。是也。三十二身。文分
爲八。一聖身。二天身。三人身。四四眾。五婦女。六童
女。男。七八部。八金剛身。聖身中先明佛身者。或是應
佛。或是化佛。但聖人逗物。具有二義。若一時歛有
爲化。應同始終名應。然應佛卽有兩相。一勝應。二

劣應。勝應。圓別之機。劣被藏通之眾。知音云。國土
眾生者。約大千依正二報。總言機也。應當也。以用
也。謂大千土中。若有一圓頓機。眾生欲不涉階漸。
直下成佛。則此人當用佛身得度。故卽現其身。爲
說圓滿果法也。楞嚴云。若諸菩薩入三摩地。進修
無漏。勝解現圓。我現佛身。而爲說法者。是也。
應以辟支佛身得度者。卽現辟支佛身而爲說法。
○如文殊。二萬億劫作辟支佛。教化眾生。現身說
法。楞嚴云。若諸有學寂靜妙明勝解現圓等。則所
說乃寂靜妙明緣覺法也。

應以聲聞身得度者卽現聲聞身而爲說法

○或作藏通聲聞。或作隨五味轉聲聞。內秘外現。引導衆生也。楞嚴云。若諸有學。得四諦空。修道人滅等則所說乃四諦聲聞法也。此明現四聖身。次明現六凡身。

應以梵王身得度者卽現梵王身而爲說法

○瓔珞經云。四禪皆有王。此言梵者。應是初禪頂。猶有覺觀語法。得爲大千世界主。蓋言觀音修白色三昧。不取不捨。不取故不隨禪生。不捨故應爲梵王。說出欲論。以權引實也。楞嚴云。若諸衆生。欲

心明悟。不犯欲塵等。則所說離欲法也。

應以帝釋身得度者。卽現帝釋身而爲說法。

○以菩薩修白色三昧。不取不捨。說種種勝論。以權引實。楞嚴云。若諸衆生。欲爲天主。統領諸天等。則所說者。五戒十善法也。

應以自在天身得度者。卽現自在天身而爲說法。

○梵語婆舍跋提。此云他化自在。假他所作。以成己樂。卽魔王也。淨名經云。多是不思議解脫菩薩。住赤色三昧。不取不捨。應爲魔王。令諸魔界卽入佛界。楞嚴云。若諸衆生。欲身自在等。則所說遊行

十方之法。此下凡所現身。皆是菩薩住於三昧。以權引實。例此可知。

應以大自在天身得度者。卽現大自在天身而爲說法。

○樓炭經名阿迦尼吒。華嚴稱色究竟。釋論云。摩醯首羅。稱大自在。騎白牛。入臂三眼。乃諸天之將。未知與此同名耶。爲卽指此天耶。又釋論云。過淨居天。有十住菩薩。號大自在。爲大千界主。依此則將非指此也。楞嚴云。若諸衆生。欲身自在。飛行虛空等。則所說欲身自在之法也。

應以天大將軍身得度者。卽現天大將軍身而爲說法

○金光明經卽以散脂爲大將。又云鳩摩伽。此云童子。楞嚴云。若諸衆生。愛統鬼神。救護國土等。則所說救護國土法也。

應以毘沙門身得度者。卽現毘沙門身而爲說法。楞嚴謂。若諸衆生。愛統世界。保護衆生等。則所說保護衆生法也。然楞嚴有現四天王及太子。此以毘沙門該之。蓋此爲四王之一也。解見妙音品。已上叙現天乘主帥。下叙人間王臣。

應以小王身得度者。卽現小王身而爲說法。

小王者。對輪王言也。楞嚴云。若諸衆生。樂爲人王等。則所說十善道法也。然人王。故非平人之所樂爲。而菩薩亦與說法。以遂樂爲之願者。爲欲理治邦國。風化人民。使道法流通。所以亦應求也。

應以長者身得度者。卽現長者身而爲說法。

解見前品。則所說主族姓世間推讓法也。

應以居士身得度者。卽現居士身而爲說法。

此有德無位。以道自處者也。則所說名言清淨自居法也。

應以宰官身得度者。卽現宰官身而爲說法。

三台輔相。州牧縣長。悉曰宰官。則所說治國土斷
邦邑法也。

應以婆羅門身得度者。卽現婆羅門身而爲說法。

西域四姓。此其一也。名淨行。亦名梵志。則所說數
術攝衛法也。數術。卽占相等。攝衛。卽調護身壽醫
藥等。

應以比丘。比丘尼。優婆塞。優婆夷身。得度者。卽現比
丘。比丘尼。優婆塞。優婆夷身。而爲說法。

此應僧俗四衆。則所說五戒十戒。及二百五十戒。

與五百戒之法也。

應以長者居士宰官婆羅門婦女身得度者。卽現婦
女身而爲說法。

知音云。此與楞嚴少異。彼一現女主。二現國夫人。
三現命婦。四現大家。孤山云。女主。卽天子之后。國
夫人。如論語邦君之妻曰君夫人。命婦。謂妻因夫
榮者。大家。如後漢扶風曹世叔妻者。同郡班彪之
女。名昭。字惠姬。和帝數召入宮。令皇后貴人師事
焉。號曰大家。此中長者宰官婦女。合彼命婦。不云
現女主國夫人者。以妙音於王後宮。變爲女身。而

法華指掌疏卷第一之三
說。是經已叙之矣。則所說內政立身以修家國之法也。

應以童男童女身得度者。卽現童男童女身而爲說法。

取妙莊嚴王二子釋。及華嚴童子算沙嬉戲等。是也。則所說不壞男根。不求侵暴等也。已上現世間男女竟。次現八部。

應以天龍夜叉。乾闥婆。阿修羅。迦樓羅。緊那羅。摩睺羅伽。人非人等身得度者。卽皆現之而爲說法。楞嚴開叙爲九科。則所說樂出其倫之法也。

應以執金剛神得度者卽現執金剛神而爲說法
梵語跋闍羅。此云金剛。梵語波膩。此云手。手有執
義。卽以執金剛杵爲名。正法念經云。昔有國王夫
人。生千子。欲試當來成佛次第故。拘留孫佛探得
第一籌。乃至樓至如來得千籌。第二夫人。生二子。
一願爲梵王。請千兄說法。一願爲金剛神。護千兄
佛法。故有此也。答所現身已竟。①二總答度生。
無盡意。是觀世音菩薩。成就如是功德。以種種形遊
諸國土。度脫衆生。

此結上總別答問也。天台云。諸名不一。橫則周徧

十方。豎則貫通三土。隨緣變現。何止三十二身。託化逐緣。豈局娑婆世界。以種種形。總明示現身廣。遊諸國土。明所化處廣。度脫衆生。明所得益廣。言雖畧於上。義則廣於前也。知音謂楞嚴云。是名妙淨三十二應。入國土身。皆以三昧聞熏聞修無作妙力。自在成就。准彼無作自在妙淨之言。則此中十九說法。皆在機感上論。於菩薩法身。如鏡應像。如月現水。此正所謂土合十方諸佛同慈力也。明兩翻問答已竟。

⑧二勸至誠供養。分二。⑨一如來勸供。

是故汝等。應當一心供養觀世音菩薩。是觀世音菩薩摩訶薩。於怖畏急難之中。能施無畏。是故此娑婆世界。皆號之爲施無畏者。

是故者。指前兩翻問答之故。前答問中。先總後別。以難是衆生苦境。意恐菩薩應不普被。故先總曰。受諸苦惱。一心稱名。皆得解脫。是明菩薩悲心無極。而下合衆生也。前重一心稱名。以菩薩眞身冥應。無可尋求。只可稱名而已。後答問中。先別後總。以現身是衆生樂緣。意恐菩薩既普現十法界身。雲其妙應。不過此耳。故後總云。以種種形遊諸國。

土是明菩薩慈心無盡。而上同諸佛也。今此復勸一心供養者。由菩薩於一切衆生前。現身說法。則見種種色。聞種種聲。既聞見分明。所以當一心供養也。前曰一心稱名。是知有菩薩可供。後曰一心供養。是見有菩薩可敬。如是一心。如是恭敬。久而不退。則可以入佛知見矣。楞嚴以十四無畏。卽救七難。赴二求。免三毒等。爲無畏。今於三十二應之後。又言怖畏急難中能施無畏。則是總前兩翻問答。以離苦得樂。皆名無畏。今言娑婆稱施無畏。而楞嚴云。十方微塵國土。皆名施無畏者。益見其所

當供養也。⑤二無盡受旨。分六。⑥一奉命。

無盡意菩薩白佛言。世尊。我今當供養觀世音菩薩。卽解頸衆寶珠瓔珞。價直百千兩金。而以與之作是言。仁者受此法施。瓔珞寶瓔珞。

此見當機奉命。不惜所珍。得法自在。爲法施也。佛云。汝等當供養。則下出其無畏。當機云。我今當供養。則下解其所珍。所以見至重忘而無畏得矣。言衆寶者。乃間錯而成也。瓔珞經云。從初住銅寶。乃至等覺摩尼寶。今日寶珠。其位例可知矣。天台云。頸表中道一實之理。以衆多無着法門莊嚴實相。

法華指掌疏卷一 三
如瓔珞嚴頸也。解者。表菩薩於一切行願功德。乃至佛智涅槃。皆不住着也。百千表一地有萬功德。地地增多也。法施如法而施。卽佛智涅槃。俱能捨故。癸二不受。

時觀世音菩薩不肯受之

解頸瓔珞。正菩薩所嘉與。但無不肯受三字。何以申無盡意解代衆而解。衆亦不喻解之之意矣。自無盡意以愍我等言之。佛又以愍無盡意及愍八部等勸之。而解瓔珞之意。斯人人喻之矣。故觀音之不受。無盡意之懇受。世尊之勸受。俱是令衆知

解一意。于佛萬佛。只要人知解故也。⊗三求愍。無盡意復白觀世音菩薩言。仁者愍我等故。受此瓔珞。

以愍我等三字。爲可受之本。當機以愍衆而施。菩薩以愍衆而受。則二俱法施也。⊗四佛勸。爾時佛告觀世音菩薩。當愍此無盡意菩薩。及四衆天龍夜叉乾闥婆阿修羅迦樓羅緊那羅摩睺羅伽人非人等。故受是瓔珞。

直指云。佛所以勸觀音愍衆而受之者。正爲四衆八部未入妙行。所以囑觀音大悲攝取。乃得終始。

究竟四衆該本迹正記者。八部該本迹外護遺流者。始見意無窮盡。至此則開示悟入佛知見已畢。

⑤ 五卽受。

卽時觀世音菩薩愍諸四衆及於天龍人非人等受其瓔珞分作二分。一分奉釋迦牟尼佛。一分奉多寶佛塔。

此明菩薩奉命卽受。乃愍諸衆而受法施也。知音云。遵佛命愍四衆八部者。表受法施。下合一切衆生同悲仰也。分瓔珞供佛及塔。表上合三世諸佛同慈力也。天台云。以一瓔珞分二分者。表事理二

因。供二佛者。將趣二果也。理圓證法身佛。事圓證報身佛。又表一行必具二因。理則正因。事卽緣了。理事不二。故曰妙因能成法報之妙果也。不論應身者何也。曰。因人趣果。合表二身。法報若成。應用自現。⑤六總結。

無盡意。觀世音菩薩有如是自在神力遊於娑婆世界。

此總結前問。以答當機也。本以菩薩獲二種殊勝。發三種妙用。則三十二應。十四無畏。四不思議。皆名自在神力而遊娑婆世界也。但此文缺四不思

議而知音謂具於四翻結答文中。初云。威神之力
巍巍如是。次云。有如是等大威神力多所饒益。三
曰。是故娑婆世界皆名施無畏者。四曰。有如是自
在神力。所以然者。以同體形咒。異體形咒。破慳感
求。供養佛生。此四不思議。皆大自在威神之力。故
此四答攝無不盡也。長行已竟。

⑧二偈頌。分三。⑨一雙頌二問。

爾時無盡意菩薩。以偈問曰。

義疏記云。頌文什師不譯。諸師皆謂。梵本中有。荆
溪尊者云。此亦未測什師深意。續高僧傳云。偈是

闍那掘多所譯。智者出時。此偈未行。故無所解。荆溪亦於輔行記中。引還着於本人之文。故知具釋理亦無妨。近有天竺寺式法師。分節其文。對於長行問答。宛如符契。故依彼分釋。

世尊妙相具。我今重問彼佛子。何因緣名爲觀世音。此頌先歎佛德。世尊萬德相好。一切畢具。故云妙相具。我今句。頌前二問。以彼字該人法二種。後二句單問名。頌長行以何因緣名觀世音也。

④二雙頌二答。分二。⑤一經家叙答。具足妙相尊。偈答無盡意。

式師云。此頌似緝綴之語。宜當如來直答。或集經者。乘便頌之。或掘多以偈翻之。貫散隨言。亦無不可。⑤二正頌佛答。分二。⑥一加頌總歎行願。

汝聽觀音行。善應諸方所。弘誓深如海。歷劫不思議。侍多千億佛。發大清淨願。

知音云。汝聽者。敕令諦聽。總頌下合六道之願深。謂聖行能應諸方。雖是神通。亦由深大之願所使然。願深由經劫多。亦不可以心思口議者。次總頌上合諸佛之願淨。謂經多劫發大願。不可思議者。由侍佛多而無染着也。△諸方。卽微塵國土諸世。

間也。善應者。於十法界。聞稱卽應也。弘誓下四句。文似間錯。宜云發大清淨願。弘誓深如海。侍多千億佛。歷劫不思議。以願大清淨。故曰如海。此明願也。由侍佛千億。故劫量難思。此明行也。弘誓卽四弘誓。言清淨者。是不爲自求人天權小福報等。

⑩二別頌正明二答。分二。⑪一頌答觀世音名。又二。⑫一總答。

我爲汝畧說。聞名及見身。心念不空過。能滅諸有苦。式師云。畧說者。舉要言也。聞名故稱。口機也。見身故禮。身機也。心念卽意機。聞名是冥應。見身是顯

應。諸有二十五有也。△聞名。卽頌前問答七難二求。一稱名而得滿願也。見身。卽頌後問答三十二應。一注念而得成就也。心念二字。總而答中一心稱名一心供養。然稱名供養。若不一心。則空過處多。所謂暫時不在。還同死人。豈能疾滅諸有苦哉。又諸有。若指二十五有。則不能盡十法界機。然四聖流中。求不遂願者。亦是苦。當知諸有苦。卽一切苦也。⑤二別答。又二。⑥一頌七難加餘。就分十二。⑦一頌火難。

假使與害意。推落大火坑。念彼觀音力。火坑變成池。

知音云。此下皆申頌畧說。火坑嗔所變起。人以嗔害。聖以慈忍。故念聖力。火坑而化爲池。此以性火真空而救之也。△此科云假使。後言或漂或被等。皆非實有。非常有事。設有是事。但念得彼菩薩名。自不爲難。此所謂感應道交之力也。○二頌水難。或漂流巨海。龍魚諸鬼難。念彼觀音力。波浪不能沒。○巨海。貪所成就。貪財似龍。貪姪似魚。貪殺似鬼。一念聖力。五欲頓息。則波浪不沒。此以性水真空而救之也。要解云。於水言漂言浪。則兼風災。自此至電雹消散。皆頌外業。在長行爲十四無畏。而頌

法華抄三卷第十一之三
文事相不同。又加旁頌者。十四無畏。特舉大畧。實具一切功德故也。④三加頌須彌難。

或在須彌峯。爲人所推墮。念彼觀音力。如日虛空住。
○自高大之我慢。踰於須彌。我慢人。人尤慢我。是爲人所推墮也。菩薩謙光照物。故一念聖力。如杲日住空。此以性空眞覺而救之也。

⑤四加頌金剛難。

或被惡人逐。墮落金剛山。念彼觀音力。不能損一毛。
○痴惡逐人。如墮金剛山。無有不傷者。菩薩永絕痴愛。故念者得力。即使墮落不能損一毛。此亦性

空眞覺而救之也。大窾引阿含云。三千大千世界。復有大金剛山。繞大海水。金剛山外。復有第二大金剛山。二山中間。窈窈冥冥。有八大地獄。日月威光所不能照者。是也。⑤五超頌怨賊難。

或值怨賊繞。各執刀加害。念彼觀音力。咸卽起慈心。○冤賊纏於疑暗。是各執刀加害也。菩薩視冤同親。毫無疑害。故念得力者。皆起慈心而救之也。

⑥六追頌刀杖難。

或遭王難苦。臨刑欲壽終。念彼觀音力。刀尋段段壞。○王難生於身見。有此身生。則有彼身死。是爲臨

刑壽終也。菩薩身見消忘。故念得力者。彼身見之
刀。卽段段壞也。㊦七追頌枷鎖難。

或因禁枷鎖手足被杻械。念彼觀音力。釋然得解脫。
○譬邊見爲桎梏也。生此有無斷常等邊見。爲財
產所囚禁。妻子所枷鎖。六親伎倆所杻械也。菩薩
邊見頓空。故令持名者。得解脫也。

㊦八加頌咒藥難。

咒詛諸毒藥。所欲害身者。念彼觀音力。還着於本人。
○咒藥等。邪見所發也。害人而返自害。聖無邪見。
故令念得力者。不遭毒橫也。○譬如經云。有清信

士。初持五戒。後時衰老。多有廢忘。爾時山中有渴
梵志。從其乞飲。田家事忙。未如所願。遂恨而去。梵
志能起尸使鬼。召得殺鬼。敕曰。彼辱我。往殺之。山
中有羅漢。知之往田家。語云。汝今夜早然燈。勤三
自皈。口誦守身口莫犯傷。慈念衆生。可得安穩。主
人如教。鬼莫能害。由不能害。其鬼乃恚。欲害梵志。
羅漢蔽之。令鬼不見。輔行引此云。正是觀音經中
還着本人意。④九追頌羅刹難。

或遇惡羅刹。毒龍諸鬼等。念彼觀音力。時悉不敢害。
○卽諸見取所興也。菩薩諸見消忘。故令念者得

力。斷諸見。龍鬼則無所害也。⑩十加頌惡獸難。若惡獸圍遶。利牙爪可怖。念彼觀音力。疾走無邊方。○譬戒禁取。爲惡獸。具利牙爪可怖也。菩薩無戒禁之取着。故令念者得力。而持牛狗等之惡獸。疾走無邊方也。⑪十一加頌蛇蝎難。

蚺蛇及蝮蝎。氣毒烟火然。念彼觀音力。尋聲自廻去。○蚺蛇等。具忿恨之惡。氣毒如烟火之燒然。觸之卽殺。菩薩無是毒害。故令念者得力。諸惡蟲自廻避也。⑫十二加頌雲雨難。

雲雷鼓掣電。降雹澍大雨。念彼觀音力。應時得消散。

○諂媚如雲之覆日。驕傲如雷之震驚。嫉妒如人之所長。求索人之所短。如掣電之快駛。毫不容隱也。好害人之善。如雹之催。害物也。誑言譖毀於人。如澍雨之傾於物而浸潤也。菩薩無是諸惡。故念者得力。凡遇諸害。應自消散也。式師云。已上頌七難。共爲十二。不出地水火風空識之六種。須彌金剛是地。雲雨亦水。蛇獸咒詛。是有情屬識。由菩薩色身旋復。使求之必遂也。更須知一切色心依正。皆是菩薩妙色妙心。衆生於聖色心中。而自爲難。求救之誠。亦是觀音。是故機成。卽時能應。當以此義。

觀之。何患不同。觀音利物哉。頌七難加餘已竟。

④二頌三毒二求。

衆生被困厄。無量苦逼身。觀音妙智力。能救世間苦。
前頌救諸外難。此頌脫其內業。良以衆生爲貪嗔
等十結使。於三界中。妄作妄受。六凡爲麤惑所纏。
四聖由細惑所蔽。惑之麤細不同。而輕重衆苦。逼
迫則一也。故曰無量苦逼身。凡此衆機。菩薩以妙
智神通之力。於三世間中。無不能救也。則此中衆
生與世間。皆具十法界義。頌答觀音名已竟。⑤二
頌答普門示現。分二。⑥一正頌示現。又二。⑦一超

頌總答。

具足神通力。廣修智方便。十方諸國土。無刹不現身。
此頌長行總答以種種形遊諸國土等。直指云。亦是廣讚觀音神通智慧方便。皆悉具足。乃能於十方國土。普應羣機。以示圓行等虛空界之相。

①二追頌別答。分三。②一頌身業普應。

種種諸惡趣。地獄鬼畜生。生老病死苦。以漸悉令滅。
式師云。長行中別列諸身。身皆三業。頌中三業別示。身業周遍。見頌之功也。此頌身業普應。合具十界。今止示三途。以劣况勝也。九界二死。皆有四相。

漸漸令滅。歸於常寂。斯亦觀音之妙用也。長行中未見現地獄等身。頌文補之。④二頌意業普觀。分二。⑤一明本觀慈悲。

眞觀清淨觀。廣大智慧觀。悲觀及慈觀。常願常瞻仰。此頌妙行之體。觀字當作平聲。屬根本智。要解云。眞以息妄。淨以治染。智以破惑。悲以拔苦。慈以與樂。以是五觀。加被羣迷。故妄染惑苦。應念消滅。所以樂當瞻也。大窾云。眞觀觀聲聞根。清淨觀觀緣覺根。廣大智觀菩薩根。悲觀下合衆生。慈觀上同諸佛。具此五觀。觀五衆機。念念不離。故應常瞻仰。

也。△此頌荅普門示現。其實顯菩薩上合諸佛本
妙覺心。以此五觀名異體同。而實卽是本妙覺心。
體用兼至。所以能於十方微塵國土。現種種身。說
種種法。如月臨空。無所不應也。⑤二明智光徧照。
無垢清淨光。慧日破諸暗。能伏災風火。普明照世間。
光乃發之於外用也。能破暗伏災。顯大用無限。用
既大。而體必周。所以曰無垢。曰清淨。曰慧日者。體
不離本妙覺心也。雖然現十界身雲。其實二俱不
着。故慧日光明。得無垢清淨。以應無盡意之當解
瓔珞。觀世音之不受而奉上如來也。諸暗。乃三惑

無明。卽內障。災風火。意含多種。卽外障。內外障除。大千洞照。故曰普明照世間。④三頌口業普說。悲體戒雷震。慈意妙大雲。澍甘露法雨。滅除煩惱燄。式師云。說雖惟口。必假身意。爲受法之本。爲法現形。本期救苦。故名悲體。說法必以戒行爲先。故曰戒雷震。菩薩與無緣慈濟。作不請之談。無物不覆。無機不被。故曰慈意妙大雲也。甘露乃諸天不死之神藥也。所宣至理。解必無生。若非無生。焉能不死。於慈雲中。注大法雨。衆生受之。三惑燄滅。故曰澍甘露等。大雲是慈悲普。注雨是說法普。滅燄是

利益普。正當頌普門義也。⑤二加頌顯機。

諍訟經官處。怖畏軍陣中。念彼觀音力。衆冤悉退散。
式師云。前長行三業顯應。以被冥機。疏以施瓔珞。
彰顯機義。今重頌普門示現中。有此念觀音之人。
亦顯機也。益見天台冥契聖旨。事係訟庭。身臨戰
陣。心憂刑罰。命慮兵殘。今昔冤仇。此時合會。但一
心致感。而衆難皆祛也。雙頌二答已竟。
⑥三雙頌二勸。分二。⑦一頌勸受持。又二。⑧一明
境智深妙。以勸常念。

妙音觀世音。梵音海潮音。勝彼世間音。是故須常念。

說法不滯。爲妙音。尋聲救苦。爲觀音。音性無着。爲梵音。應不失時。爲海潮音。具此所以勝世間音也。直指云。此承上常願瞻仰而來。畢竟教人瞻仰者。爲菩薩境界深妙。雖隨類現身隨機說法。而更眞俗雙融。故曰妙音。外觀九界之音。不逐聲流轉。返觀觀者。卽令彼解脫。於已則不着法。故以梵音明中道之智也。然九界一時稱名。菩薩亦一時圓應。不先不後。故曰海潮音。以如上三音。隨機說法。自在無礙。勝過彼五十一位智正覺世間之法音。所以教人常瞻仰也。△詳夫菩薩忘音塵而修聞性。

及至稱名勸持。乃獨取音。而不取聞。何也。正顯圓
人不壞法相。而初心忘塵。但圖解根。而圓通之後。
所彰妙用。全在於音也。故三十二應中之說法。四
不思議中之說咒。皆妙音之力也。十四無畏中之
救入難。四不思議中之施無畏。皆觀世音之力也。
十四無畏中之除三毒。四不思議中之破慳慥。皆
梵音之力也。三十二應中之赴徧求。十四無畏中
之赴二求。四不思議中之赴廣求。皆應不失時。潮
音之力也。以持觀音一名。而勝六十二億恆河沙
法王子名。卽勝彼世間音也。故前以一觀。而爲五

觀。觀無異觀。今以一音而爲五音。音無二音。以不異之觀。觀不二之音。則境智俱深。非心可測也。

◎二明感應難測以勸勿疑。

念念勿生疑。觀世音淨聖。於苦惱死厄。能爲作依怙。且菩薩不唯觀聽返入。離諸塵妄。兼之三空。越而二死脫。於聖類身。可謂淨矣。惟其淨聖。故能隨類應感。使一切分段變易生死之厄。籠細塵惑之苦。凡有希求。靡不成就。故能於九界衆生。爲依爲怙。所以力勸持名而勿疑也。前云念念不空過。能滅諸有苦。此言念念勿生疑。能爲作依怙。然纖疑在

念。則本體觀音聖不淨矣。聖不淨卽爲空過。於生死中。而失父母。則無可依怙者也。⑤二頌勸供養。具一切功德。慈眼視衆生。福聚海無量。是故應頂禮。要解云。具一切功德。則所求必應。不止十四無畏也。慈眼視衆生。則無所不度。不止三十二應也。其福聚如海。利澤無窮。故應皈命頂禮也。偈頌已竟。

⑥三明益分二。⑦一持地歎功德。

爾時持地菩薩。卽從座起。前白佛言。世尊。若有衆生。聞是觀世音菩薩品自在之業。普門示現神通力者。當知是人功德不少。

知音云。前以無盡意當機。明耳根圓通持經。其意無盡也。今以持地結證。顯圓通無盡之意。不離一切衆生常住心地也。○寶雲經云。地有十義得名。一者廣大。二衆生依。三無好惡。四受大雨。五生草木。六種子所依。七生衆寶。八出諸藥。九風不動。十獅子吼不能驚。菩薩亦爾。故名持地。式師云。聞是觀音等。是聞初翻冥益問答也。普門示現等。是聞次翻顯益問答也。自在業者。卽不思議力用也。△當知功德不少。有况顯意。然聞有菩薩此普門示現之神通者。而功德尙是無量。况受持名者。供養

形者。讀誦解說書寫此普門示現經者。則其福倍
倍轉增。益不可量也。⑤二聞品獲利益。

佛說是普門品時。衆中八萬四千衆生。皆發無等等
阿耨多羅三藐三菩提心。

此經家叙置印證持地功德不少之文。無等者。卽
物無與等稱。無上者。下等字。卽與物爲等。正等覺
義也。然物無與等。而又能與物爲等。此如來最上
德也。觀音體此。而成普門行。隨類應化。與物爲等。
故聞其風者。皆能發如是心。此所謂以圓行成最
上德也。觀音普門示現周徧流通已竟。

妙法蓮華經授手卷第七之三

音釋

家

姑音

掘

渠

勿

彪

音補

尤

切

姬

音雞

緝

音入

聲侵

綴

音拙

窳

音苦

管切

窳

音杏

桎

音質

桔

音谷

駛

音義

同

試

譖

音聲

側

聲

諛

切

也

去

仇

渠尤切音求

窳也音求

妙法蓮華經授手卷第七之四

清楚衡雲峰沙門智祥集

陀羅尼品第二十六

品節云。此品由前妙行已圓。當克妙果。第藏識幽深。歷劫餘習。潛伏其中。雖有止觀之功。而智有所困。神有所不及者。若非神咒加持。不易斷也。故有後三品三種加持也。一神力。二法力。三現身面言說。楞伽惟二。今多法力。此品正神力加持也。以咒乃諸佛秘密心印。如天子秘符。大將執之。無敵不克。況藏識爲生死窟穴。最極幽深。習氣潛伏。止觀

之力所不及者。必須仗如來秘密心印之力以攻之。所以楞嚴云。若修行人。習氣未除。應當誦我神咒。是也。楞伽亦云。若不以神力建立者。則墮外道惡見妄想。及諸聲聞衆魔希望。故七地已前不加。則墮外道。八地不加。則墮二乘。九至等覺不加。不得入妙。故修行者。所當加也。大窾云。自地湧菩薩持經。如來囑累。心事已竟。復恐諸菩薩久居下界。常處空閑。初入塵寰。利生接物。難堪難忍。故復將此界他方諸大菩薩所證法門。一一拈出。如藥王之忍辱。妙音之法空。觀音之慈悲。與彼下方菩薩。

恆爲模範。若忍辱而不得法空。則心量不廣。若證法空而不行慈悲。則教化不圓。必須入此三種法門。方得流通此經。不斷持經典型也。而復加此品者。正恐末世邪師熾盛。魔事實多。使持經難爲廣益。故諸菩薩說咒護持。不令侵毀此法師者。益見諸菩薩慈悲無盡也。要解云。陀羅尼。此云總持。卽念慧妙力。諸佛密語。有一字多字無字之異。能以一字總無量法。持無量義。摧邪立正。殄惡生善。皆能總而持之之謂也。△凡佛說法。必兼顯密二門。顯以生慧。密以得福。施此二門。使修學人福慧齊

到也。如世醫人。或顯說方。或密授藥。其瘳病之驗一也。然咒者祝也。使持咒人。念念無間。祝邪者正。祝染者淨。祝迷者醒。祝凡者聖。無不遂其心滿其願也。咒語或諸佛弘名。或神王聖號。持其佛名。神鬼擁護。持其王名。神鬼皈崇。必至受持者。福智莊嚴。而永無魔事也。又神咒乃諸佛密語。非心識所能測知。故曰是大神咒。無等等咒。於五不翻中。乃秘密不翻。不唯凡者不知。其實下位菩薩不識上位密語。此皆從如來不思議妙智流出。宜敬心奉持焉。④四以衆聖神咒加持堅固流通。分四。⑤一

問持經功德。

爾時藥王菩薩。卽從座起。偏袒右肩。合掌向佛。而白佛言。世尊。若善男子。善女人。有能受持法華經者。若讀誦通利。若書寫經卷。得幾所福。

此是藥王欲使此經流通不盡。故致此問也。直指云。此品復以藥王當機。是以諸佛心光爲藥。守護地前信等五位。治五蘊結使微細煩惱之病。然又以持經功德爲問者。是欲爲發心說咒之端也。△此問非從前泛常所謂受持者。言讀誦通利。是得證法身之人讀誦。若不通利。去佛尙遠。雖有福利。

猶不足較。書寫卽註釋。是經能註釋者。神入佛心。深契妙理。當爲神咒之所守護者也。故間得幾所福。庚二。若得功德無量。

佛告藥王。若有善男子。善女人。供養八百萬億那由他恆河沙等諸佛。於汝意云何。其所得福。寧爲多不。甚多。世尊。佛言。若善男子。善女人。能於是經。乃至受持一四句偈。讀誦解義。如說修行。功德甚多。

此如來若得多福。明識藥王之心。普也。八百萬億下。舉多佛。是田勝。能供如是多佛。是福廣。以此勝田廣福。較一持四句偈者之功德。不可比也。何故

佛雖多。供雖廣。事也。持經者不惟徒誦。而又能解。義。不獨解義。而又能如說修行。解義者心悟實相。修行者妙契法身。如此等福。甯有量哉。四句者。不
必定指。須知全經字字。皆佛心光。受持讀誦一句
一字者。無不獲益。所謂析檀片片皆香也。

⑧三請以說咒護。分五。⑨一藥王請說。分四。⑩一
求請說。

爾時藥王菩薩白佛言。世尊。我今當與說法者。陀羅
尼咒。以守護之。

前校功德處。以受持讀誦書寫爲問。今說咒處。又

以說法者為言。乃前後互彰也。非說法者無功而受持書寫者。咒不護也。（五）二正說咒。

即說咒曰。

安爾 曼爾 摩禰 摩摩禰 旨隸 遮黎第

賒咩 賒履多瑋 羶帝 目帝 目多履 娑履

阿瑋娑履 桑履 娑履 义裔 阿义裔阿耆膩

羶帝 賒履 陀羅尼 阿盧伽婆娑蘇奈簸蔗切

毘义膩 禰毘刺 阿便哆邏禰履刺 阿宜哆波

隸輸地 歐究隸 牟究隸 阿羅隸 波羅隸

首迦差初几切 阿三磨三履 佛陀毘吉利表帝達

磨波利差帝 僧伽涅槃沙彌 婆舍婆舍輪地
曼哆邏 曼哆邏 义夜多 郵樓哆 郵樓哆憍
舍畧 惡义邏 惡义治多治 阿婆盧 阿摩若
那多夜

天台云。咒是諸佛密語。如王索先陀婆。無有能識。惟
有智臣。乃能知耳。洗時奉水。飯時奉器。食時奉
鹽。遊時奉馬。咒亦如是。祇是一法。徧有諸力。病愈
罪除。善生道合。爲此義故。皆存本音。又孤山所引
四悉檀釋。一世界悉檀。隨方異說。令生歡喜。益二
爲人悉檀。令生善益。三對治悉檀。令破惡益。四第

一義悉檀。令人理益。悉者徧也。檀者施也。謂聖人以此四種徧施衆生也。○入理者。意欲令人入佛知見。所謂惟一大事因緣也。破惡者。倘人未能悟入。且與第二。斷除煩惱種習。故云破惡。其人又未能破惡。且與第三。令其生起善心。建立善事。善力漸生。惡習自退。故曰生善。其人又未能興善。且與第四。令生歡喜。種少善根。爲上三種。作遠因緣。故云歡喜益也。今以咒論四悉檀者。從劣向勝。如持咒脫難求財等。旣遂其心。無不歡喜。此世界悉檀也。又持咒求戒求慧者。無不滿願。善法成就。卽

爲人悉檀也。持咒者。斷除三毒。惡業消除。卽對治
悉檀也。又以持咒求證菩提。入諸三昧。而得成就。
卽第一義悉檀也。大端明四悉檀。秘密利益。非如
顯說可知其故。若可測知。又何以爲神咒也。行人
但當一心諦信。則所有願求。無不遂意。

(五) 三歎護持。

世尊是陀羅尼神咒。六十二億恆河沙等諸佛所說。
若有侵毀此法師者。則爲侵毀是諸佛已。

此歎咒力不可思議。咒旣出於六十二億諸佛所
說。則藥王亦代佛宣揚也。若有下。明非人不可侵

法華經卷第三 名第十一 又四
毀。然則經是顯咒。咒是密經。持經者。卽持咒也。經
咒在處。卽佛現在。所以侵持經人。卽毀諸佛矣。

⑤ 四佛印可。

時釋迦牟尼佛讚藥王菩薩言。善哉善哉。藥王。汝愍
念擁護此法師故。說是陀羅尼。於諸衆生。多所饒益。
此如來喜法流通。故極口稱讚也。大窾云。旣於惡
世。不惜身命。護持此經。而又愍念持經法師。說咒
冥加。令彼諸魔不敢侵凌毀謗。是亦能以無畏。施
無量衆生矣。此藥王能止衆病者也。

⑥ 二勇施請說。分三。⑦ 一求請說。

爾時勇施菩薩。白佛言。世尊。我亦爲擁護讀誦受持法華經者。說陀羅尼。若此法師得是陀羅尼。若夜叉。若羅刹。若富單那。若吉蔗。若鳩槃荼。若餓鬼等。伺求其短。無能得便。

藥王說咒。故以療衆生之心病。則藥王於此經。致力大矣。今復勇施請說。亦是本會上首。故妙音詣娑婆禮覲釋迦。而必欲見文殊藥王勇施者。概可見也。前藥王云。我與說法者陀羅尼。今勇施云。我與受持者陀羅尼。是於六種法師中。前後互出也。富單那。此云臭餓鬼。主熱病鬼也。吉蔗。此云所作。

卽起尸鬼也。鳩槃荼。舊名冬瓜。由陰如冬瓜。行置
肩上。坐便踞之。卽魘魅鬼也。凡此諸鬼皆惱害人。
有此咒力。不得其便。㊟二正說咒。

卽於佛前而說咒曰。

痤隸 摩訶痤隸 郁枳 目枳 阿隸 阿羅婆

第 涅隸第 涅隸多婆第 伊緻柅 韋緻柅

旨緻柅 涅隸墀柅 涅犁墀婆底

㊟三歎護持。

世尊。是陀羅尼神咒。恆河沙等諸佛所說。亦皆隨喜。
若有侵毀此法師者。則爲侵毀是諸佛已。

此先歎咒力。亦皆隨喜者。此咒是諸佛所說。卽諸佛亦順此咒。而生歡喜也。次歎護持。不致令侵毀法師也。④三多聞請說。

爾時毘沙門天王護世者。白佛言。世尊。我亦爲愍念衆生擁護。此法師故。說是陀羅尼。

大論云。毘沙門。此云多聞。福德之名聞四方。居半須彌北水晶埵。主夜叉羅刹二部。光明疏云。西域以北方爲首。次東南西。故先舉此。

卽說咒曰。

阿黎 那黎 窵那黎 阿那盧 那履 拘那履

世尊。以是神咒擁護法師。我亦自當擁護持是經者。令百由旬內無諸衰患。

說咒而又自護。是受囑深而悲救切也。百由旬內。顯驅邪之力廣。凡一人居此。持說修行。爲人演說。不惟邪不入身。而亦使不能入境。邪惑旣離。衰患何至。④四持國請說。

爾時持國天王。在此會中。與千萬億那由他乾闥婆衆。恭敬圍遶。前詣佛所。合掌白佛言。世尊。我亦以陀羅尼神咒。擁護持法華經者。

大論云。梵語提頭賴吒。此云持國。以能護持國土。

故。又云安民。爲上升之元首。乃下界之初天。居半
須彌東黃金埵。主乾闥婆毘舍闍。言在會者。以護
法聞經。故恆不離也。蓋天人乘急戒緩。處處聞經。
無不在會。乾闥圍遶。是主臣隨至也。言我亦者。謂
不但前天。我亦說之也。一以受佛付囑。一以不忘
本願。所以當爲護持也。此旣言東北。而西南已攝
其中。非祇二天獨說也。

卽說咒曰。

阿伽彌 伽彌 瞿利 乾陀利 旃陀利 摩蹉
耆 常求利 浮樓莎梔 頽底

世尊。是陀羅尼神咒。四十二億諸佛所說。若有侵毀此法師者。則爲侵毀是諸佛已。

藥王勇施皆言。咒爲恆沙佛說。而多聞不言所說。惟持國祇言四十二億者。足見菩薩因行廣遠。侍佛必多。而天王宜乎祇四十二億也。

④五諸女請說。分五。⑤一列名。

爾時有羅刹女等。一名藍婆。二名毘藍婆。三名曲齒。四名華齒。五名黑齒。六名多髮。七名無厭足。八名持瓔珞。九名臬帝。十名奪一切衆生精氣。是十羅刹女。與鬼子母。并其子及眷屬。俱詣佛所。

要解云。害人之鬼。無甚於羅刹女。鬼子母等。今既
誓護持。則餘神可知。故王道興而守在四夷。佛道
備而防在魔外也。晉譯云。一名有結縛。二名離結。
三名施積。四名施華。五名施黑。六名被髮。七名無
着。八名持華。九名何所。十名取一切精。教中謂鬼
子母有九十一子。及眷屬者。則羅刹女與鬼子母。
各各眷屬也。(玉)二請說。

同聲白佛言。世尊。我等亦欲擁護讀誦受持法華經
者。除其衰患。若有伺求法師短者。令不得便。
法師短者。卽心念中。稍有空處。偶一時忘照。而邪

得其便。然邪之與正。如明暗然。明少退而暗便興。此所以何得其便也。何求得遂。衰患隨興。故知念念不空過。能滅諸有苦。亦非外得。

卽於佛前而說咒曰。

伊提履 伊提混 伊提履 阿提履 伊提履

泥履 泥履 泥履 泥履 樓醯 樓醯

樓醯 樓醯 多醯 多醯 多醯 兜醯 菟醯

⑤ 三明護

寄上我頭上。莫惱於法師。若夜叉。若羅刹。若餓鬼。若富單那。若吉蔗。若毘陀羅。若犍馱。若烏摩勒伽。若阿

跋摩羅。若夜叉吉蔗。若人吉蔗。若熱病。若一日。若二日。若三日。若四日。若至七日。若常熱病。若男形。若女形。若童男形。若童女形。乃至夢中亦復莫惱。

此正出其所護之心至誠至切也。甯上我頭者。况其持經者不可惱亂。人之頭面極爲尊貴。而女人猶以此爲鍾愛者。且鬼以嗔毒爲懷。尙無敢犯其嗔。甯敢犯彼之頭面哉。故此况云。我頭可上。法師不可惱也。毘陀羅赤色鬼。犍陀黃色鬼。烏摩勒黑色鬼。阿跋摩青臉鬼。夜叉與人吉蔗者。謂此鬼此人皆能爲起尸也。若熱下。謂鬼之害人。有間者。自

一日或至七日。無間者。則常爲病。男女下。明鬼之變相也。乃至夢中者。謂持經者有此咒力。則卧安覺安。無不適意也。

卽於佛前而說偈言。

若不順我咒。惱亂說法者。頭破作七分。如阿梨樹枝。如殺父母罪。亦如壓油殃。斗秤欺誑人。調達破僧罪。犯此法師者。當獲如是殃。

知音云。此述不順命者。得五逆罪。阿梨樹。此云蘭香菑。其枝墮地。自成七段。敢犯法師者。頭破如之。如殺父母。二逆罪也。壓油者。外國壓油之法。擣麻

使生蟲。蟲多益肥。則壓之。是殺命之衆。三逆罪也。斗秤欺誑。謂小出大入也。此方率以爲常。西域其嚴戒者。四逆也。破僧罪者。破和合僧也。謂調達妄構五法。誘佛五百新衆而行。是五逆也。事出科註。所引甚明。茲不繁錄。次總結云。犯此法師者。當獲如是五逆罪也。⑤四誓言。

諸羅刹女說此偈已。白佛言。世尊。我等亦當身自擁護。受持讀誦修行。是經者。令得安隱。離諸衰患。消衆毒藥。

觀前之甯上我頭。及此中身自擁護之言。益見諸

法華指掌疏卷之四
三
女忘身爲法之誠。此或諸大菩薩示身而引同類。不然。其誠懇何其乃爾。⑤五佛讚。

佛告諸羅刹女。善哉善哉。汝等但能擁護受持法華名者。福不可量。何況擁護具足受持供養經卷。華香瓔珞。末香。塗香。燒香。幡蓋。伎樂。然種種燈。蘇燈。油燈。諸香油燈。蘇摩那華油燈。薺蔔華油燈。婆師迦華油燈。優鉢羅華油燈。如是等百千種供養者。臯帝。汝等及眷屬。應當擁護如是法師。

此結讚能護者功德大也。文有四節。一但能護持名者。福不可量。二况顯擁護具足受持者。其福尤

不可量。三復能擁護種種供養者。四召名珍重如法擁護。十羅刹女中。獨呼臯帝。準晉譯名何所者。是無所不具之義。此必福智超勝於衆。故如來特召。令統其同列及眷屬。作擁護也。○蘇摩那。卽須曼那華也。婆斯迦。卽波利師迦。優鉢羅。卽青蓮華。請說咒護已竟。(庚)四聞品得利益。

說是陀羅尼品時。六萬八千人得無生法忍。

此六萬人聞陀羅尼。證無生忍。多是積劫承秘密功能。熏習所至。今一聞宣演。直證無生。則秘密功能。其益人之不可思議。正如醫人不顯說方法。但

以一丸授彼令服。病卽消除也。神咒加持堅固流通已竟。

妙莊嚴王本事品第二十七

品節云。此品意明轉識成智之象。以顯法力加持也。莊嚴王乃如來在纏。爲八識心王之名。二子乃六七二識。轉染令淨之象。夫人乃柔順內助。爲止觀內熏之體。淨治無明。故名淨德。二子先已出家。以六七因中轉故。二子轉父邪心。一同出家。正顯本覺出纏之象也。然此止觀之力。乃法身菩薩得無分別心。與諸佛智用相應。依法力修行。真如熏

習。滅無明故。是所謂法力加持也。大藏云。藥王本
事。是顯藥王因中求法供佛之德本。此品雖名莊
王本事。實顯藥王藥上度生之善功也。知音云。莊
王乃華德菩薩前身。不言華德本事者。以因名成
果德彰。持此經者。因該果海也。由華德曾問妙音
因地。故今爲彼說其本事。天台云。昔有四比丘。結
契山林。精持妙法。以餒乏故。一人分衛。見王者出
遊。忽生愛着。由功德熏修。隨念受報。人間天上常
得爲王。其三友得道。欲救其失。以其邪着。非愛緣
無能感動。於是一爲端正婦。二爲聰明兒。托生設

化轉其邪心。令歸正覺。今叙本事。欲使行人以道自衛。外防見魔。內絕惡覺。消息邪緣。入佛知見。此實諸佛究竟進修。最後垂範。如楞嚴法會將終。說過去佛覺明。分析微細魔事。使行人諸識心垢洗除。與此同意。⑤五由莊王出陳本事轉邪流通。分六。⑥一特明事本。

爾時佛告諸大衆。乃往古世。過無量無邊不可思議阿僧祇劫。有佛名雲雷音宿王華智多陀阿伽度。阿羅訶。三藐三佛陀。國名光明莊嚴。劫名喜見。

前品藥王。雖引天神等說咒護持此經。尚隱而未

顯。今又假莊王本事。因二子神力。以轉邪心。則是藥王顯然。以身擁護也。然能使轉邪歸正。令王與後宮。皆悉堪任受持法華經者。藥王力也。經云。淨眼菩薩於法華三昧。久已通達。故知藥王於此經。悲救之切。護持之至。故如來不待請。而自說莊王本事。其實亦卽藥王之本事也。乃徃古下。據理顯妙法之無始。佛名雲雷音宿王華。是雙舉妙音因果所觀之佛。乃顯妙法莊嚴因果。如不二之體也。國名光明莊嚴。示大圓鏡之境也。刳名喜見。示一直法界之相也。庚二雙標能所。

彼佛法中有王名妙莊嚴。其王夫人名曰淨德。有二子。一名淨藏。二名淨眼。是二子有大神力。福德智慧。久修菩薩所行之道。所謂檀波羅蜜。尸羅波羅蜜。羼提波羅蜜。毘離耶波羅蜜。禪波羅蜜。般若波羅蜜。方便波羅蜜。慈悲喜捨。乃至三十七品助道法。皆悉明了通達。

知音云。彼佛下。具大事因之人。以前之王。卽今之華德也。其王下。成大事緣之人。前之夫人。二子。卽今之光照莊嚴。相與藥王藥上也。作大事因緣訓者。準後文。善知識者。是大因緣故。是二子下。叙所

以能成大事。因緣者。以具神力及福智故。所謂下。釋福智十度。此中具七。前五度福德。後二度權實。二智也。三十七品者。謂四念處。四正勤。四如意足。五根。五力。七覺支。八正道。皆是助成無上菩提之道。直指云。當人於無始已前。一念背覺。遂成無明心王。故引莊王。而表八識也。夫人表五識。淨藏淨眼表六七二識。八識染以二十五。有莊嚴。淨以權實。二智莊嚴。五識與八識同體。非造所造。故名淨德。能生育萬善。有夫人義。七識染污。轉則成平等性智。故名淨藏。六識分別十界依正。轉則成妙觀。

察智故名淨眼。二子有大神力。久修行者。謂六七因中先轉也。

又得菩薩淨三昧。日星宿三昧。淨光三昧。淨色三昧。淨照明三昧。長莊嚴三昧。大威德藏三昧。於此三昧亦悉通達。

要解云。淨三昧。淨藏淨眼之所本也。日星宿。表根本差別。二智之照用也。淨光能現衆像。淨色不爲形礙。淨照照了萬法。長莊嚴非素法身。大威德藏具大神用。知音云。前已釋福德智慧。今正釋神力。以凡神力皆由三昧而成。神力卽下十八變等。三

昧七種。下文次第自訓。於此三昧者。卽指上七種。照前段六度四攝等法。云皆悉明了通達。故此結於諸三昧亦悉通達也。

⑧三能化方便。分三。⑨一明時至。

爾時彼佛。欲引導妙莊嚴王。及愍念衆生故。說是法華經。

○彼佛出世常宣正法。於王緣弱。則非其時。今說法華。是其時矣。故云引導。又云愍念衆生。則知非獨爲莊王說此妙法也。⑩二出論議。分四。⑪一白母時至。

時淨藏淨眼二子。到其母所。合十指爪。掌白言。願母往詣雲雷音宿王華智佛所。我等亦當侍從親近。供養禮拜。所以者何。此佛於一切天人衆中說法華經。宜應聽受。

○先白母者。據其本實。母子元知。今爲化儀。機熟應發。正是槌磙相扣。物器方成也。知音云。淨藏。謂淨如來藏之三性。淨眼。乃淨如來之五眼。經以二淨字。釋成二王子得菩薩淨三昧之名也。不先白父。而白母者。維摩經云。智度菩薩母。方便以爲父。善根成實男。今妙莊嚴。旣以方便。爲二菩薩父。示

墮邪見。然非先智度。則邪見莫除。淨德雖爲二菩薩母。然非先善根成實。則智慧何興。故經上節叙六度訖。復叙方便波羅蜜。此節叙二王子得淨三昧。先白其母。意有在也。勸母往聽。照隨喜品勸人往聽。得與陀羅尼菩薩共生一處之功德也。

⑤二母遣化父。

母告子言。汝父信受外道。深着婆羅門法。汝等應往白父。與其俱去。

外道者。不達惟心之理。從心外強修者也。婆羅門法者。西域九十六種。惟佛一種爲正。餘皆名邪。應

法華指掌疏卷第一
二
往白父與俱去者。智音謂。男女不得雜處。況國母
爲世儀型。不先奏準。詎敢擅便。故云汝父信受等。
此又見持經者。雖有善根智慧。苟無方便。亦不能
得證妙法也。⑤三怨生邪見。

淨藏淨眼合十指爪掌白母。我等是法王子。而生此
邪見家。

知音云。雖爲白母嘆傷之辭。其實明二菩薩得日
星宿三昧也。△佛智如日。世智如星。今怨生邪見。
是覺破世間智。不及佛智。由菩薩二智俱融。故謂
得日星宿三昧也。直指云。五識因六七二識休息。

乃於二六時中。理觀內燭。始知八識習氣濃厚。必用六七。採集種智之藥。念念內熏。乃空賴耶種子。蓋五入同體。必不親緣真如。故以母勸子念父表之。如五識頌云。果中猶自不詮真也。父信外道。指賴耶我法二執。名外道法。與其俱去者。表五入同轉也。子怨生邪。表六七因五識轉。始見八識過患。此是一位證一位工夫。非彷彿之詞。

⑤ 四母囑當念。

母告子言。汝等當憂念汝父。爲現神變。若得見者。心必清淨。或聽我等往至佛所。

徒自憂念。於事無益。既憂念父。當現神變。使伊見而醒悟。則有補於行也。直指云。此理智觀行互嚴之相。⑧三現化身。

於是二子念其父故。涌在虛空。高七多羅樹。現種種神變。於虛空中。行住坐卧。身上出水。身下出火。身下出水。身上出火。或現大身滿虛空中。而復現小。小復現大。於空中滅。忽然在地。入地如水。履水如地。現如是等種種神變。令其父王心淨信解。

知音云。此雖叙二子奉慈旨。以現神變。照前文有大神力。其實明二菩薩得淨光淨色二種三昧也。

以所現神變。總不出地水火風空見識七大所變之光色故。十八變者。身上下各出水火爲四。兩脇各出水火爲四。共八變。九履水如地。十入地如水。十一從空沒而復在地。十二從地沒而復處空。又於空中行住坐卧爲四。兼前成十六。復現大小身。共十八變也。直指云。此表六七已轉十八界之相。然不與八識同轉。而六七轉者。爲八識本體原淨。所有種子。皆六七所積故。須是六七知非。方可轉也。能化方便已竟。

⑧四所化利益。分十。⑨一信子伏師。

時父見子神力如是。心大歡喜。得未曾有。合掌向子言。汝等師爲是誰。誰之弟子。二子白言。大王。彼雲雷音宿王華智佛。今在七寶菩提樹下法座上坐。於一切世間天人眾中廣說法華經。是我等師。我是弟子。父語子言。我今亦欲見汝等師。可共俱往。

知音云。方便之父。不出智母所料。則權符其實。故問師之爲誰。二子白言下。雖是敘荅父王之辭。其實明二菩薩得淨照明三昧也。是以淨佛法而照明父王之信心。故寶積第三經云。菩薩成就三法。得不退轉。於阿耨菩提。父母不信。令其生信。一也。

父母毀戒。令其住戒。二也。父母慳貪。勸令住施。讚
歎菩提。三也。今二菩薩。正是其人。○問。品中曾未
敘二子先以佛爲師。今奚云是我等師。答。經雖未
敘。其義暗合。前文云。久修菩薩之道。旣云久修。焉
知不爲彼佛弟子。問。二子旣有如上神通。奚不卽
以神力度王。必爲子耶。答。二菩薩於王有子之緣。
而亦是父子情同。爲信易生也。④二稱慶願放。
於是二子從空中下。到其母所。合掌白母。父王今已
信解。堪任發阿耨多羅三藐三菩提心。我等爲父已
作佛事。願母見聽。於彼佛所出家修道。爾時二子欲

法苑珠林卷第十四
三
重宣其意以偈白母。願母放我等。出家作沙門。諸佛甚難值。我等隨佛學。如優曇鉢華。值佛復難是。脫諸難亦難。願聽我出家。母卽告言。聽汝出家。所以者何。佛難值故。

二子覆母命。復從空下。故知前對父辭。猶處空未下。觀莊王合掌向子。則向字。猶相去七多羅樹也。父王已信解者。謂母命我等。現通化父。今父見神變。則往昔之心。隆隆復起矣。於無上正等覺心。已堪任能發善心。旣生邪心已除。而我等化父之能事畢矣。但今願母見聽。宜速出家。故復說偈云。願

母放我等。出家作沙門。大窾云。放字。作上聲讀。猶効也。此說方是。有云。作不留之意。似與前後文義欠妥。前云。二子久修菩薩所行之道。故莊王亦言。汝等師爲是誰。誰之弟子。則見二子已出家矣。後云。莊王與羣臣眷屬俱。夫人與采女眷屬俱。此正是引父母出家之實。若但言放我等二人出家。則是父母俱不出家矣。我等隨佛學者。是勸父母同修梵行之言。如優曇下。喻佛之難值。優曇華三千年。尙有可待。而值佛之難。則果難矣。何也。輪王雖聖。尙且輪廻。若得遇佛。衆苦皆脫也。前來率母見

佛。而母不輕諾者。以父邪未轉。今王既見信於子。故母亦得見許於子。故曰聽。既佛難值遇。我必當出家矣。然佛難值。故四字當味。所以智度之母。非善根成實之男。不能發起也。④三重明難值。

於是二子白父母言。善哉父母。願時往詣雲雷音宿王華智佛所親近供養。所以者何。佛難得值。如優曇鉢羅華。又如一眼之龜。值浮木孔。而我等宿福深厚。生值佛法。是故父母當聽我等。令得出家。所以者何。諸佛難值。時亦難遇。

父邪既轉。母亦見聽。而二子之誠意始遂。至此則

雙白父母。催其速出。是踐前言放我等出家之意。所以下。再申偈中諸佛難值一句。又如下。再申脫諸難亦難之句。阿含經云。須彌山下。有一眼之龜。大海之中。有一孔之木。龜得木。可以得達彼岸。而免沉溺之患。然一投不及。必待浮木繞山三千年。而復值木。一孔喻佛法一乘。龜一眼喻眾生偏見。以偏見值一乘。一投不及。萬劫難逢。知音云。此雖請父母踐前言出家。其實明二菩薩得第六長莊嚴三昧也。以王及夫人二子。先世爲僧。莊嚴佛法。今生復求出家。是長莊嚴義。直指云。此喻五八二

識深違實際。故地地克志進前。必假六七催發故也。我等宿福深厚者。意在冥發遠因。若非先世受持法華。焉得此生復值佛法。是故父母宜當出家。何故。以佛之難值。不止優曇華也。時之難遇。不啻浮木孔也。是故的故字最重。意要莊王發宿命通。知前世一念妄動。耽王樂而至墮邪見。陰狗如此也。④辛四化功已著。

彼時妙莊嚴王。後宮八萬四千人。皆悉堪任受持。是法華經。淨眼菩薩於法華三昧。久已通達。淨藏菩薩已於無量百千萬億劫。通達離諸惡趣三昧。欲令一

切眾生離諸惡趣故。其王夫人得諸佛集三昧。能知諸佛秘密之藏。二子如是以方便力善化其父。令心信解好樂佛法。

此方顯昔緣成熟。皆是菩提眷屬。所謂大家團圓頭。其說無生話也。天台云。法華三昧者。攝一切法歸一實相。離惡趣者。一往以三途爲惡趣。具論二十五有。皆乖真起妄。悉是惡趣。今皆離之。卽是破二十五有也。諸佛集者。卽三德秘密之藏。佛集其中也。知音云。二子如是下。雖結上文。其實明二菩薩得第七大威德藏三昧也。以廣大威德。皆藏於

子道中矣。○此申明已轉之相。八萬四千人。表八識中我法二執已成全體大用。故曰皆悉堪任。六識至八地。開佛知見。故曰淨眼。已證十界十如之理。故曰通達法華。六識頌云。遠行地後純無漏。觀察圓明照大千。是也。七識至八地。賴耶種子已喪。故曰淨藏。自三賢位已離三界生死染污之習。故曰通達離惡三昧。而復能現他受用身。應十地機。故云令一切離惡趣也。五識至八地。轉成所作智。同證諸佛無生法忍。返觀覺體。具足如來智慧德相。故曰得諸佛集三昧也。自八地而望九十二地。

及等妙極果。一切種智。皆悉現前。故曰能知諸佛
秘密之藏。

④五俱詣佛所。分二。⑤一見佛而得法力。

於是妙莊嚴王與羣臣眷屬俱淨德夫人與後宮采
女眷屬俱其王二子與四萬二千人俱一時共詣佛
所到已頭面禮足繞佛三匝却住一面爾時彼佛爲
王說法示教利喜王大歡悅

此敘王等受二子化導踐見佛聞法之言以明二
子具足菩薩所行之道故令父母證得檀波羅蜜
也各攜眷屬一時詣佛者所謂轉則同轉而體用

俱到也。然修敬畢而却住一面者。正待本覺開彰。而成法利也。下言彼佛爲王說法竟。不出其所演者何經。而謂示教利喜者。卽是爲說此妙法也。乃結前二子所對。今在七寶菩提樹下。廣說法華經。是我等師之語也。王大歡悅者。向聞子言。難值之佛。如優曇華。難聞之時。如浮木孔。今一旦聞見。俱妙。宜應慶幸無量。故知前見二子神力。雖曰心大歡喜。是淨藏之初開。淨眼之初明。見聞尙在彷彿。所以卽問誰爲師。誰之子也。今所言大歡悅者。乃親見親聞也。⑤二興供而增瑞應。

爾時妙莊嚴王及其夫人解頸真珠瓔珞價直百千。以散佛上於虛空中化成四柱寶臺臺中有大寶牀。敷百千萬天衣其上有佛結跏趺坐放大光明。爾時妙莊嚴王作是念佛身希有端嚴殊特成就第一微妙之色。

知音云。王等因聞法喜。捨身莊嚴。行檀度也。瓔珞成四柱臺。表卽檀度具四無量心。兆王他日得佛之依報也。以牀爲坐臥所依。衣爲行住所依故。其上有佛。卽雲雷音之化身。坐於臺上者。爲後王升虛空之案。兆王他日得佛之正報也。王作念等。乃

爲後讚佛相好之案。亦爲後捨位出家之兆也。○
瓔珞供佛。表行歸於理。成四柱臺者。表圓行於法
性空中而成四智。卽莊王淨德淨藏淨眼也。而四
智中本具法空之座。忍辱之衣。由此四智圓融。則
本覺之物。放大光明。所謂大圓無垢同時發。普照
十方塵刹中也。以上是如來引莊王。一生取證四
智三身。以證當人於一念中。具此妙法耳。

⑥六佛與授記。

時雲雷音宿王華智佛告四眾言。汝等見是妙莊嚴
王。於我前合掌立不。此王於我法中作比丘。精勤修

習助佛道法。當得作佛。號娑羅樹王。國名大光。劫名大高王。其娑羅樹王佛。有無量菩薩眾及無量聲聞。其國平正功德如是。

王未出家。而便得記者。由見佛聞法。卽作是念。佛身希有。端嚴殊特。成就第一微妙之色。便有希望成佛之志。則隱然有佛道誓成之四弘願也。而此之志。人無能知。故佛特爲明告。以授成佛之顯記。亦表卽俗而明真也。然後作比丘精勤修習。助宣道法。是滿足福智二嚴。方得成佛。佛號娑羅樹王者。取其廣被羣生。無所不蔭也。國名大光。乃破諸

一切不善之暗也。劫名大高王。乃超諸高貴。而得自在也。次記菩薩聲聞無量者。由今日一念淨信。風化臣妾。使皆得法喜。成廣蔭也。其國平正者。由捨諸邪見。直取菩提。必無不平之想也。梵語娑羅。此云堅固。⑦出家修行。

其王卽時以國付弟。與夫人二子并諸眷屬。於佛法中出家修道。王出家已。於八萬四千歲。常勤精進。修行妙法華經。過是已後。得一切淨功德莊嚴三昧。以國付弟。是捨家出家。厭塵勞而忻佛道也。弟乃副貳之名。則應緣赴物。皆第二頭也。八萬四千歲

修行法華。所以淨治塵勞也。過是已後。謂塵勞既淨。則三昧現前。遂轉邪見染莊嚴。爲功德淨莊嚴也。⑧入稱歎二子。

卽升虛空。高七多羅樹。而白佛言。世尊。此我二子。已作佛事。以神通變化轉我邪心。令得安住於佛法中。得見世尊。此二子者。是我善知識。爲欲發起宿世善根。饒益我故。來生我家。

由精進修行此經。故得禪定。以定故發通。卽能升虛空也。向佛稱歎二子者。由今具定發通。知宿世事。而昔時結契之原委。始知矣。由是知二子過去

修習此經。致有如是神變。爲欲起我宿世。修習此經所植善根。而饒益於我。則二子實我真善知識也。此是莊王欲引起宿王智佛。顯二菩薩深本。以完藥王修習此經之深心本願也。⑨九佛述行高。爾時雲雷音宿王華智佛。告妙莊嚴王言。如是如是。如汝所言。若善男子。善女人。種善根故。世世得善知識。其善知識。能作佛事。示教利喜。令入阿耨多羅三藐三菩提。大王。當知善知識者。是大因緣。所以化導令得見佛。發阿耨多羅三藐三菩提心。大王。汝見此二子不。此二子已曾供養六十五百千萬億那由他。

恆河沙諸佛。親近恭敬。於諸佛所。受持法華經。愍念
邪見眾生。令住正見。

彼佛知莊嚴語意。潛通那畔。欲露本因。故以二如
是應之。如汝所言下。是將莊王之語廣明而已。謂
凡世間一切善心男女。以一生發起善心爲因。世
世值善知識爲緣。況爲知識者。能種種方便。漸漸
引攝。至於菩提。故曰能作佛事。示教利喜也。此是
通論一切爲善知識者。皆如是也。大王當知下。方
說莊王今日因緣。前來王敘二子神變。是得佛知。
而未明佛見。故今與發明。使王亦得是見。所謂汝

見此二子不面此二人。非但一生修習此經爲善知識。已曾於恆河沙劫供養諸佛。受持此經。爲愍念邪見眾生。令住正見。而廣爲善知識也。天台云。佛讚知識有大義。能作佛事。是外護知識。示教利喜。是教授知識。化導見佛。是同行知識。令入菩提。是實相知識。④十歎佛自誓。

妙莊嚴王。卽從虛空中下。而白佛言。世尊。如來甚希有。以功德智慧故。頂上肉髻。光明顯照。其眼長廣。而紺青色。眉間毫相。白如珂月。齒白齊密。常有光明。唇色赤好。如頻婆果。爾時妙莊嚴王讚歎佛。如是等百

千萬億功德已於如來前一心合掌復白佛言世尊未曾有也如來之法具足成就不可思議微妙功德。教戒所行安隱快善我從今日不復自隨心行不生邪見。憍慢嗔恚諸惡之心。說是語已禮佛而出。

前來升空讚二子神智。是始契法身而得佛知。今承彼佛述其高行。則不住真際。復從空下而讚佛發願。是已得佛見。既得具佛知見。所以廣讚一體三寶也。知音云。如來甚希有下。讚佛法身。頂上肉髻下。讚佛報身。略明三十二相之五。一頂髻。二目廣。三白毫。四齒密。五唇好。如是等下。總讚八十種。

好及諸功德也。已上通讚佛寶。於如來前下。讚法寶。明由二子之力。故令已證得慈悲喜捨。乃至三十七品。所謂具足成就。又云不可思議等者。是無量法門。悉皆明了。得佛所得。故曰微妙功德也。教戒所行者。卽依教修行。得妙法之實證。所以得安隱快善也。此皆通讚法寶。我從今日下。歎已。由見佛聞法而成。僧寶發願永斷一切大小睡眠煩惱也。此文通具四弘誓願。讚佛。是佛道誓成。讚法。卽法門誓學。歎僧。乃煩惱誓斷。然成佛必當度生。故以攝眾生誓度也。禮佛而出者。乃出離本處。而徧

入他處。卽有興慈運悲之想。非辭佛而歸國也。頻婆此云相思果。色丹而潤。已上所化利益已竟。

⑤五結會古今。分二。⑥一正以結會古今。

佛告大眾。於意云何。妙莊嚴王豈異人乎。今華德菩薩。是其淨德夫人。今佛前光照莊嚴相菩薩。是哀愍妙莊嚴王。及諸眷屬。故於彼中生其二子者。今藥王菩薩。藥上菩薩。是。

知音云。此正爲會通今古。前王者而今菩薩。古今無二人也。益見華德之間妙音因果。彼此雖殊。夫婦父子所受持之妙法則同也。○佛前光照天台。

謂佛前放光東召。光照妙音之身故也。言莊嚴相者。謂妙音有無量百千功德莊嚴。其身光明照耀。諸相具足。故是卽指妙音菩薩也。於彼中生者。卽指淨光莊嚴國中。②再得結歎藥王。

是藥王藥上菩薩。成就如此諸大功德。已於無量百千萬億諸佛所植眾德本。成就不可思議諸善功德。若有人識是二菩薩名字者。一切世間諸天人民。亦應禮拜。

知音云。此益見陀羅尼品中與持妙法者之陀羅尼。爲六十二億恆河沙等諸佛所說之不虛也。故

曰已於無量等。若人下。有况顯意。謂但識名字者。尚爲一切天人之所敬禮。况能學二大士之持經。豈不蒙諸佛所護。而與之說陀羅尼耶。

⑧六聞品進道。

佛說是妙莊嚴王本事品時。八萬四千人遠塵離垢。於諸法中得法眼淨。

妙樂云。法眼淨。有云初果。然王及夫人。與八萬人等。皆持此經。皆當作佛。豈聞品者得小果耶。名同義殊。須善斟酌。當須判爲六根清淨法眼位耳。卽七信已上。知音云。佛五眼中法眼淨。爲十地菩薩。

所具明莊王本事轉邪流通竟。

妙法蓮華經授手卷第七之四

音釋

聲	藉	型	刑	奚	經	切	音	瘳	丑	鳩	切	音	籛	補	果	切	表	姪	音	瘥	平	音	坐	
狗	梢	模	模	範	也	也	瘳	抽	病	瘡	也	音	籛	音	駒	駝	切	表	姪	音	瘥	平	音	
二	徇	四	餒	切	罪	詎	上	音	渠	苟	上	音	籛	音	駒	駝	切	表	姪	音	瘥	平	音	
音	循	音	餒	切	罪	詎	上	音	渠	苟	上	音	籛	音	駒	駝	切	表	姪	音	瘥	平	音	
園	園	園	園	園	園	園	園	園	園	園	園	園	園	園	園	園	園	園	園	園	園	園	園	園
鸞	鸞	鸞	鸞	鸞	鸞	鸞	鸞	鸞	鸞	鸞	鸞	鸞	鸞	鸞	鸞	鸞	鸞	鸞	鸞	鸞	鸞	鸞	鸞	
音	音	音	音	音	音	音	音	音	音	音	音	音	音	音	音	音	音	音	音	音	音	音	音	
斟	斟	斟	斟	斟	斟	斟	斟	斟	斟	斟	斟	斟	斟	斟	斟	斟	斟	斟	斟	斟	斟	斟	斟	
針	針	針	針	針	針	針	針	針	針	針	針	針	針	針	針	針	針	針	針	針	針	針	針	
音	音	音	音	音	音	音	音	音	音	音	音	音	音	音	音	音	音	音	音	音	音	音	音	
酌	酌	酌	酌	酌	酌	酌	酌	酌	酌	酌	酌	酌	酌	酌	酌	酌	酌	酌	酌	酌	酌	酌	酌	
音	音	音	音	音	音	音	音	音	音	音	音	音	音	音	音	音	音	音	音	音	音	音	音	
灼	灼	灼	灼	灼	灼	灼	灼	灼	灼	灼	灼	灼	灼	灼	灼	灼	灼	灼	灼	灼	灼	灼	灼	
音	音	音	音	音	音	音	音	音	音	音	音	音	音	音	音	音	音	音	音	音	音	音	音	
窳	窳	窳	窳	窳	窳	窳	窳	窳	窳	窳	窳	窳	窳	窳	窳	窳	窳	窳	窳	窳	窳	窳	窳	
音	音	音	音	音	音	音	音	音	音	音	音	音	音	音	音	音	音	音	音	音	音	音	音	
款	款	款	款	款	款	款	款	款	款	款	款	款	款	款	款	款	款	款	款	款	款	款	款	
音	音	音	音	音	音	音	音	音	音	音	音	音	音	音	音	音	音	音	音	音	音	音	音	
管	管	管	管	管	管	管	管	管	管	管	管	管	管	管	管	管	管	管	管	管	管	管	管	
切	切	切	切	切	切	切	切	切	切	切	切	切	切	切	切	切	切	切	切	切	切	切	切	
似	似	似	似	似	似	似	似	似	似	似	似	似	似	似	似	似	似	似	似	似	似	似	似	
佛	佛	佛	佛	佛	佛	佛	佛	佛	佛	佛	佛	佛	佛	佛	佛	佛	佛	佛	佛	佛	佛	佛	佛	
音	音	音	音	音	音	音	音	音	音	音	音	音	音	音	音	音	音	音	音	音	音	音	音	
弗	弗	弗	弗	弗	弗	弗	弗	弗	弗	弗	弗	弗	弗	弗	弗	弗	弗	弗	弗	弗	弗	弗	弗	
音	音	音	音	音	音	音	音	音	音	音	音	音	音	音	音	音	音	音	音	音	音	音	音	
妥	妥	妥	妥	妥	妥	妥	妥	妥	妥	妥	妥	妥	妥	妥	妥	妥	妥	妥	妥	妥	妥	妥	妥	
上	上	上	上	上	上	上	上	上	上	上	上	上	上	上	上	上	上	上	上	上	上	上	上	
唾	唾	唾	唾	唾	唾	唾	唾	唾	唾	唾	唾	唾	唾	唾	唾	唾	唾	唾	唾	唾	唾	唾	唾	
音	音	音	音	音	音	音	音	音	音	音	音	音	音	音	音	音	音	音	音	音	音	音	音	

妙法蓮華經授手卷第七之五

清楚衡雲峯沙門智祥集

普賢菩薩勸發品第二十八

品節云此品顯以行成德乃現身面言說加持也。此經以智立體故文殊發起以行成德故普賢成終而明入佛知見也釋普賢有二意一道前屬因二道後屬果謂行彌法界曰普隣極亞聖曰賢此在等覺屬因又稱眞法界曰普彌綸萬化曰賢此在妙覺屬果也以此普賢乃法界之全體爲毘盧十身之願身故菩薩依此信解修行而還證此體。

所謂無不從此法界流無不還歸此法界也。然菩薩因圓。至等覺已。而復須加持者。是必假果接。乃得入妙。故此菩薩乃爲證入之終。而以普賢願力守護。必得是經也。所以菩薩必問云。何能得是經。而如來告以四法成就也。然此四法。正與起信論信成就中發三種心。義實相同。論云。一者直心。正念真如法故。此中云。諸佛護念也。二者深心。樂集一切善法故。此中謂植衆德本也。三者大悲心。欲拔一切衆生苦故。此中謂救一切衆生也。又云。如是信心成就得發心者。入正定聚。此中所謂入正

定聚也。然此品顯證。而言信成就者。謂初以文殊發信。依信生解。依解發行。行起解絕。故爲證入。則此證入。亦卽信之所成就也。所謂發心究竟。二不別。如是二心。先心難故。須藉普賢。終以四法。必得是經耳。論依最初發心說。此乃約成就說。故論在初而經居後也。凡有持是經者。普賢卽自現身。而謂現身。面言說加持也。由有三種加持。乃可證成得果之象。故判此品爲入佛知見無疑矣。別行疏云。梵語三曼多跋擦羅。此云普賢。準本經自在神通曰普。威德名聞曰賢。乃十方三世一切諸佛之

法華指掌疏卷第一之三
長子也。故經云：一切如來有長子。彼名號曰普賢。尊若準彼疏。有人法五訓。法有二。一體性周徧曰普。隨緣成德曰賢。二一卽一切曰普。一切卽一曰賢。此二正同此經之妙法也。人有三。一位前。信住行向菩薩。曲濟無遺曰普。隣極亞聖曰賢。正同此經諸新得記菩薩。二當位。十地等覺菩薩。德周法界曰普。至順調善曰賢。正同此經八十萬億那由他發願持經菩薩。三位後。謂已成佛竟。行德周備。障累永祛。上無所求。唯不捨悲願。務在度生。隱實現權。果無不極曰普。不捨衆生日賢。正同此經八

品流通分當機諸大菩薩也。故以普賢爲流通之
終。勸謂勸佛重宣四法。發謂發心說咒護持成就
四法得此經之人。故曰普賢勸發品。此經以彌勒
文殊爲開章。觀音普賢爲奉行。明妙法。慈智爲始。
悲行爲終。○又上判流通爲三。從分別功德品半
已後三品半。舉經力大。以勸流通。藥王品下五品。
舉菩薩化道力大。以勸流通。此品舉普賢誓願力
大。以勸流通也。④三普賢勸發自行流通分四。⑤
一經家叙其發來。

爾時普賢菩薩以自在神通力威德名聞。與大菩薩

去。摩受尸參高七之丘

無量無邊不可稱數從東方來所經諸國普皆震動
雨寶蓮華作無量百千萬億種種技樂。

此明發來之相。要解云。普賢統事法界圓具萬行。
卽事而真。其應身無乎不在。且於法會之終。示從
東方來者。東方震地之所出也。以法會至此。因地
智圓。果地覺滿。十一地妙圓之行條。則進修之功
已盡。妙覺之體已成。於是依無功用行。出震利物。
故示從東方來。華嚴過十一地。說佛海功德旣終。
卽說如來出現利世間行。卽此意也。以不離常行。
無爲應物。故曰自在神通。以德無不徧。名無不聞。

故曰威德名聞。與無邊菩薩俱來者。示萬行圓攝無盡也。所經諸國下。妙音來儀。亦雨華作樂。皆所以彰顯妙行宣流法音也。

又與無數諸天龍。夜叉。乾闥婆。阿修羅。迦樓羅。緊那羅。摩睺羅伽。人。非人等。大衆圍遶。各現威德神通之力。

上叙同來菩薩。是本眷屬。與普賢同行。則自在神通威德名聞無不同也。今叙八部乃爲外護。而曰各現威德神通力者。是叙其所具之德。亦有斯行也。此皆是普賢神通三昧所致。

到娑婆世界耆闍崛山中頭面禮釋迦牟尼佛右遶
七匝

○此叙見佛三業恭敬之儀。西域以圍遶爲至敬。
今言七匝者。表信住行向地等妙七位圓行歸如
如理。④二問答勸發行相。分二。⑤一請問勸發。又
二。⑥一普賢問。

白佛言世尊我於寶威德上王佛國。遙聞此娑婆世
界說法華經與無量無邊百千萬億諸菩薩衆共來
聽受惟願世尊當爲說之。若善男子善女人於如來
滅後云何能得是法華經。

此普賢陳所事佛。與所居之界。爲陳請之由也。知音云。初開法會。白毫相光自西照東。今法會畢。普賢菩薩從東至西。示一大事因緣相首尾也。遙聞者。心聞洞十方。不爲形隔業。聞序正二分經已。惟願下。承流通分中五品言。謂現在過去持經者。旣如藥王等。或以苦行。或以妙音。或以陀羅尼。或以妙莊嚴。無非普門自在之業。是爲極難之事。教未來世人。云何能得極省力易簡之法。以持此經。是我普賢與衆菩薩。其來聽受之意也。故云如來滅後云何能得等。華嚴會終。普賢爲善財說十大願。

此經會畢普賢請佛說其四行。二經始終如出一轍。要解云。前之所問。唯受持讀說而已。獨此問云。何能得。是欲人人自證自得也。

④二如來答。分三。⑤一總標四法。

佛告普賢菩薩。若善男子。善女人。成就四法。於如來滅後當得是法華經。

此標陳四法爲得法之本也。○得者。謂得此七卷經文。受持讀誦。卽得開悟佛知見也。經云。若有聞法者。無一不成佛。又無論佛現在滅後。但聞一偈一句者。皆得與記。⑥二別開四行。

一者爲諸佛護念二者植衆德本三者入正定聚四者發救一切衆生之心

知音云此別釋四法。一佛護念者。夫末世之人。去佛既遠。安能得其護念。所謂護念者。由行人發菩提心。則得法身。佛所護念也。法身者。卽吾人本有之心性。既見是心。時刻照管。卽是護念。然修此行。須以大慈悲爲室。若欲以慈與衆生樂。以悲拔衆生苦。惟見證法身者能耳。二植德本者。吾人既得法身。已卽是佛。何須更植德本也。縱植。又以何爲德本也。然行人雖得法身。不植德本。如有地不種。

則爲無用之邱。是以理性具。苟不廣修六度。必缺莊嚴。亦不得報化圓滿。而度生亦有限矣。是故見法身後。更須培植萬行也。且涉行旣深。魔障滋廣。必當以柔和忍辱衣。爲植德之本。則魔業無能爲礙矣。三入正定者。旣培六度。禪定在中。又奚用入正定耶。然非六度外。別有正定。但修德本。於忍辱苟不達。諸法空座。則忍難持久。是故見得一切法空。以爲正定。則忍而無忍。諸度聚矣。四救一切衆生者。旣定聚法空。則已與衆生皆空。又奚用發救生之心也。約性而觀。自他本空。約相而言。衆生無

盡。苟不發救度之心。則懈怠爲業。願力不克。果海何圓。况等覺菩薩。尙用發心。經云。然後以不懈怠心。爲諸菩薩及四衆。廣說是經也。應知具前三法。始能發後一心。發後一心。始能成前三行也。末世人。欲得此經。須行此四法。如目足相資。缺一不可。故後始云。成就四法。必得是經也。

⑤ 三總結成就

善男子。善女人。如是成就四法。於如來滅後。必得是經。

此結成末世中人。若圓四行。卽便爲得此經矣。大

歎云所謂成就四法必得是經者。如藥王得此而然。身妙音得此而化座。觀音得此而普應。莊王得此而轉邪。普賢得此而勸發。是皆成就此四法者之驗也。○問此與四安樂行同別耶。荅四安樂是說經之法。此是持經之方。總是二利之德。亦同亦別也。⑧二誓願勸發。分二。⑨一護人。又分六。⑩一攘其外難而彰總別。又二。⑪一總。

爾時普賢菩薩白佛言。世尊。於後五百歲濁惡世中。其有受持是經典者。我當守護。除其衰患。令得安隱。使無伺求。得其便者。

此總中言除衰患得安隱。則如觀音之能救七難也。衰。約形貌枯悴。生計蕭條。言。患。約身心病苦事。端。侵。害。言。故知遠來勸發。意不在當會。蓋爲後五百歲。時愈下而信愈淺。聖愈遠而邪愈興。若非普賢之神力加持。其不退失者鮮矣。若不爲威力擁護。必爲衆邪留難者多矣。故此品中。多叙現身面言說。以堅受持讀說者之弱力。是知末世有能堅人信力。勸進深修。不使墮諸見稠林者。得非普賢威神之所被哉。⑤二別。

若魔若魔子。若魔女若魔民。若爲魔所着者。若夜叉。

法華指掌疏卷第一 又三
若羅刹若鳩槃荼若毘舍闍若吉蔑若富單那若帛
陀羅等諸惱人者皆不得便。

此於攘難中單叙魔鬼者。由諸魔鬼愛戀塵勞。行人持此妙法。本欲出離。以定力深重故。多招致也。况魔鬼多伺過隙。倘行人一時忘照。縱有滲漏。一爲菩薩護念。諸鬼雖惡。亦不便行惱亂事也。常陀羅云。厭禱鬼。

⑤ 二教其內法而明誦習。分四。⑥ 一行立讀誦。

是人若行若立。讀誦此經。我爾時乘六牙白象王。與大菩薩衆俱詣其所。而自現身。供養守護。安慰其心。

亦爲供養法華經故。

末世行人。若能行立讀誦此經。是念念常存。必爲菩薩之所守護。故曰我爾時等也。象表如如理。白者。純潔精真也。六牙表六度。法王者。卽能統攝萬事萬理。成普賢行也。菩薩不惟守護行人。而又曰供養者。由行人受持妙法。已爲十方諸佛之所護念。故供行人。卽供佛與經也。然行人旣爲佛護念。菩薩又發心守護。此節卽成就一者諸佛護念也。

○二端坐思惟。

是人若坐思惟此經。爾時我復乘白象王現其人前。

其人若於法華經有所忘失一句一偈。我當教之與共讀誦。還令通利。爾時受持讀誦法華經者。得見我身。甚大歡喜。轉復精進。以見我故。卽得三昧。及陀羅尼。名爲旋陀羅尼。百千萬億旋陀羅尼。法音方便陀羅尼。得如是等陀羅尼。

前行立中。雖蒙現身守護。所謂安慰其心者。以行人功力未純。不免打失。故菩薩現身守護。使外境不入。令得安穩修習。離諸苦患。爲菩薩大悲拔苦也。今於靜定中。思惟此經。卽是入理而言。我復乘象王者。謂前於行立處。已得見身。而今於定中。又

現其身。與其讀誦。必使行人得無限樂。生無限喜。由此因緣。故得三昧及陀羅尼。得三昧是定深。陀羅尼是慧具。此爲菩薩大慈與樂也。旋陀羅者。要解云。由得此經。故卽見普賢常行之體。於一切法。返本還源。名旋陀羅尼。然得總持之體。既能旋末歸本。卽復旋體入用。於一塵一法一切時處。方便利生。逆順自在。名百千萬億旋陀羅尼。此卽普賢徧一切處之行也。前旋爲轉物。所謂旋假入空。後旋爲應物。所謂旋空入假。轉物爲體。應物爲用。若未能轉物而遽然應物。則爲物所轉矣。然則二旋

異用而相需也。法音方便者。卽隨應說法之行。轉復精進。卽成就第二植衆德本也。卽得三昧。是成就第三入正定聚也。○三三七精進。

世尊。若後世後五百歲濁惡世中。比丘比丘尼。優婆塞。優婆夷。求索者。受持者。讀誦者。書寫者。欲修習是法華經。於三七日中。應一心精進。滿三七日已。我當乘六牙白象。與無量菩薩而自圍遶。以一切衆生所喜見身。現其人前而爲說法。示教利喜。亦復與其陀羅尼咒。得是陀羅尼故。無有非人。能破壞者。亦不爲女人之所惑亂。我身亦自常護是人。

此段總束前未得者令得。未解者令解。未修者令修。未證者令證也。於受持前加求索。是未得令得也。於讀誦後加書寫。是未解令解也。前於行坐中思惟未得者。今教限三七一心精進。是未修令修也。至三七期終。現身說法。示教利喜。是未證令證也。前兩度但曰乘象現形。此復叙與無量菩薩及現衆生所喜見身者。是行人功深力極。一心精進之所致也。一切衆生。義該九界。喜見身者。卽十身相海淨妙色身也。三處論現身。必曰乘象。是體不離用之謂。前言魔鬼不便。此曰非人女人。益見其

爲初心信樂之人。作守護也。然魔鬼無定力者。不能引動。所謂賊不打貧家。下曰。我身自護。是人。是人者。卽初心行人也。所以菩薩勸發之心。後後無盡。誠爲恩大難酬。○四正與說咒。

惟願世尊聽我說此陀羅尼咒。卽於佛前而說咒曰。

阿檀地 檀陀婆地 檀陀婆帝 檀陀鳩舍隸

檀陀修陀隸 修陀隸 修陀羅婆底 佛陀波羶

禰 薩婆陀羅尼阿婆多尼 薩婆婆沙阿婆多尼

修阿婆多尼 僧伽婆履父尼 僧伽涅伽陀尼

阿僧祇 僧伽婆伽地 帝隸阿情僧伽兜畧阿羅

帝波羅帝 薩婆僧伽地三摩地伽蘭地 薩婆達
磨修波利刹帝 薩婆薩埵樓陀憍舍畧阿菟伽地
辛阿毘吉利地帝 ⑤三復以神力而使聞持
世尊若有菩薩得聞是陀羅尼者當知普賢神通之
力若法華經行闍浮提有受持者應作此念皆是普
賢威神之力。

菩薩既自現身守護則一切外難無容可入惟恐
行人自心魔礙隱隱作障故復說咒使誦此咒則
沉業亦殞矣今言菩薩得聞者卽指修行四法受
持此經之人謂能聞此咒須知卽爲普賢神通所

護。若非菩薩神通威力。咒尙無有。聞復何生。故今日得聞。實菩薩力也。又言此經行閻浮提有受持等者。閻浮處極濁。人極惡。所以普賢從寶威德上王佛國。入此娑婆。爲勸發者。意在佛滅後之最後五百世。乃良知將泯。國土將壞之時。一切佛法俱不出現。若此時有妙法存。有能信持。豈非菩薩神力之所在耶。故曰皆是普賢威神之力。

④ 四特示勝因而進修持。

若有受持讀誦正憶念。解其義趣。如說修行。當知是人行普賢行。於無量無邊諸佛所深種善根。爲諸如

來手摩其頭。

此明修行此經之功德也。知音云。不出五種法師義。一受持。二讀誦。三正憶念。謂因讀誦純熟。而得正心默念也。要解云。持經之要在正憶念。蓋憶不正。則雜想變亂。念不正。則邪習汨擾。欲成深行。亦難矣。四解義趣。謂因正憶思惟。則義理炳現也。五如說而行。乃依理起行。以上皆行人之功。當知下方明其德。亦有三。一因如說而行。則此人不違法相。卽普賢行也。二因具足修行。此人而無疲厭。則知於無量佛所。深種善根也。三由具足修行。卽是

真因。故感果。佛以手摩頭。而安慰其心也。此約具行五法所感。現世之功德如是。

⑤ 五復示近果而明利益。

若但書寫。是人命終當生忉利天上。是時入萬四千天女。作衆伎樂而來迎之。其人卽着七寶冠。於采女中娛樂快樂。

知音云。此明不能全具五種。但能書寫。此人命終。未來功德。卽得生欲界第二天。受諸欲樂。其樂有三。一天樂來迎。二着七寶冠。三采女娛樂。△問。妙法有不思議勝功。旣得具書此經。則應爲諸聖冥

加當令至不生滅解脫之場。胡爲使生欲界。於采
女中。受諸欲樂。天福若盡。未必不墮也。答。此亦隨
因感果。非經力欲使爲此樂也。且書寫者。由不能
受持讀誦。無正憶思惟。但聞知此經。功深力重。或
爲宿習濃厚。不能捨諸世間恩愛。祇好書寫而已。
由此功力。於世樂中。而增天樂。可謂增上緣也。其
實爲下文作校量章本耳。

何況受持讀誦。正憶念。解其義趣。如說修行。若有人
受持讀誦。解其義趣。是人命終爲千佛授手。令不恐
怖。不墮惡趣。卽往兜率天上。彌勒菩薩所。彌勒菩薩

法華抄三卷第十一之三
有三十二相大菩薩衆所共圍遶。有百千萬億天女眷屬。而於中生有如是等功德利益。

知音云。何況二字。是以劣校勝也。謂書寫一種。其功德尙乎如此。則全具五法。其得勝報可知也。功德亦三。一命終爲千佛授手。勝前但天女相迎也。授手者。提接之義。二無墮惡趣恐怖。返顯忉利樂。盡尙有墮惡之怖也。三由千佛接引。得生彌勒內院。親近補處慈尊。故卽往兜率也。三十二相大菩薩者。乃與慈氏如來。爲同行侶。天女百千者。乃侍從慈氏如來者。非同忉利之爲欲樂也。有如是等。

是總結廣畧功德。以勸發修持也。如是者。指前所出之相等者。等於未舉之功德。猶不可量也。此節卽成就第四發救一切衆生之心。以親近補處慈尊。卽能發是心也。⑤六總結一心而使修行。

是故智者應當一心自書。若使人書。受持讀誦。正憶念。如說修行。

此總結修持也。舉智者。謂重在一心也。心若不一。豈能致普賢而爲守護。是知此經非智者不能書持。非智者不能憶念。所以華嚴經中。亦顯非智者不能剖微塵而出大千經卷也。上節護人已竟。

④二護法。

世尊。我今以神通力故。守護是經。於如來滅。後闍浮提內。廣令流布。使不斷絕。

此以神力守護佛法也。闍浮。爲佛發心修因得果之土。故雖濁惡。利根亦衆。其中衆生不信則已。信則必至成佛。所謂蓮華不生淨地。卑濕淤泥乃生之意也。故經中每每言闍浮提流通其經。意在於此。問答勸發已竟。⑤三述發久修實證。分二。⑥一述護法。

爾時釋迦牟尼佛讚言善哉善哉。普賢。汝能護助是

經令多所衆生安樂利益。汝已成就不可思議功德。深大慈悲。從久遠來。發阿耨多羅三藐三菩提意。而能作是神通之願。守護是經。我當以神通力守護。能受持普賢菩薩名者。

天台云。如來舉勝。述成其劣。增進行者。勇銳弘宣。今先述護法。謂汝能如是外多利益。內積慈悲。又久劫已來。作如此護。則汝之功德無以加矣。凡有衆生。持汝名者。我亦以神力守護。是人爲彼堅其信力。使法有所賴也。○二述護人分五。○一述身教法。

普賢。若有受持讀誦正憶念。修習書寫是法華經者。當知是人。則見釋迦牟尼佛。如從佛口聞此經典。當知是人。供養釋迦牟尼佛。當知是人。佛讚善哉。當知是人。爲釋迦牟尼佛手摩其頭。當知是人。爲釋迦牟尼佛衣之所覆。

此述其示身教法也。天台云。然此六種得法之人。尙乎見我萬德果身。豈獨見汝乘六牙象耶。尙爲佛口讚手摩。以衣所覆。豈獨爲汝以陀羅尼護之耶。知音云。此節印證當機。遵一者爲諸佛護念。

⊙二述舉勝因。

如是之人不復貪着世樂不好外道經書手筆亦復不喜親近其人及諸惡者若屠兒若畜猪羊鷄狗若獵師若街賣女色是人心意質直有正憶念有福德力是人不爲三毒所惱亦不爲嫉妒我慢邪慢增上慢所惱是人少欲知足能修普賢之行

知音云。此節承上明末世六種法師得如佛現在護念故。成第二植衆德本。以結文修普賢行。是衆德之本。其德有六。一不貪世樂德。世樂卽財色名食睡之五欲也。二不好外道人法德。法卽經書手筆。人卽外道六師也。三不親惡者德。惡亦有三一

畜猪等二獵師。三女色街賣者。卽開彰行市也。四正直福力德。五不爲根本大小睡眠所惱德。三毒謂貪嗔痴根本惑也。屬鈍使嫉妒小隨也。我慢等大隨也。屬利使。於七慢中。舉三慢以攝其餘。六知足德。謂於五欲中。隨分受用也。次下總結。若能具此六德。卽名能修普賢之行也。⑧三述示近果。普賢若如來滅後。後五百歲。若有人見受持讀誦法華經者。應作是念。此人不久當詣道場。破諸魔衆。得阿耨多羅三藐三菩提。轉法輪。擊法鼓。吹法螺。雨法雨。當坐天人大衆中。師子法座上。

○通節印證末世六種法師當得菩薩護助使人信其不久成佛。冥照三者入正定聚也。以詣道場等。是正定聚處故。亦結法說一周之文。以轉法輪等。是序品方便品文殊荅彌勒之文故。上節修普賢六種法師具大因也。此節得阿耨菩提等六種法師具大果也。

普賢若於後世受持讀誦是經典者。是人。不復貪著衣服。卧具。飲食。資生之物。所願不虛。亦於現世得其福報。

○此印證得經者。爲菩薩護助。直應恭敬獲福。不

宜輕毀致罪。以成四者發救一切衆生之心也。故其人雖不貪世樂。然於資生之物。有所願求。亦必不虛。而現世得其福報也。④四述攘外難。

若有人輕毀之言。汝狂人耳。空作是行。終無所獲。如是罪報。當世世無眼。若有供養讚歎之者。當於今世得現果報。

此用善惡相對。讚毀互形。先明毀者之罪。謂無知者。不知此經圓具十法界因果。返謂受持者爲狂人。言彼空作持經之行。終不能得成就妙果。由此之言。失佛知見。故報彼世世無眼也。下明供讚者

得福。凡見持經者。不貪衣食等。愈興讚歎。轉加供養。則此人雖未持經。而知此經深利。故其償報。亦同持經者。得現生果報也。

若復見受持是經者。出其過惡。若實若不實。此人現世得白癩病。若輕笑之者。當世世牙齒疎缺。醜唇平鼻。手脚繚戾。眼目角眦。身體臭穢。惡瘡膿血。水腹短氣。諸惡重病。

此舉賢不賢。行人俱不可毀。設於未持已前。有諸過咎。一持此經。如湯銷冰。卽實有過。以持經故。其善大焉。或持經者。有過無過。若於他人前非毀。是

障持者之莊嚴法身。所以報得癩病也。又或輕弄
叱咲持經之者。感世世牙齒疎缺等。然一輕咲而
致罪如此者。由一根舉而諸根隨。故如是報也。手
繚脚戾。乃卷曲不伸也。眼角疎者。瞳子不正也。鼻
穢者。無知見香也。水腹者。由空腹高心無顧無忌
也。短氣者。由輕咲之聲無狀無畏也。諸惡重病。總
結一切不善之業。④五述信功德。

是故普賢若見受持是經典者。當起遠迎。當如敬佛。
此囑敬信受持者也。必曰見而遠迎。敬而如佛者。
以持經行人。有諸佛菩薩守護。而又能發救衆生。

之心是則因果二佛齊在焉。得不如是迎敬耶。知音謂此上乃結喻說一周之文以喻說後多明罪相故明久修實證已竟。

②四述發聞者利益分二③一聞品得益。

說是普賢勸發品時恒河沙等無量無邊菩薩得百千萬億旋陀羅尼三千大千世界微塵等諸菩薩具普賢道。

知音云。此節經家敘置聞品得益之衆結因緣說一周以恒沙衆及微塵衆各具佛知見之因遇佛說普賢道爲緣。故證旋陀羅尼或具普賢道各隨

機契也直指云。獨聞此品而獲益者衆。是大法已終之境界也。言無量得旋陀羅者。當是得十地果。微塵等具普賢道。當是得佛果位。所以言道而不言行也。知音以此三段結盡三周者。乃了完如來出世爲一大事因緣之案。蓋三周事畢。卽說法師品以流通焉。雖結其迹而本門之大事亦具其中矣。如此結歸。不無其見。庚二通結聞經。

佛說是經時。普賢等諸菩薩。舍利弗等諸聲聞。及諸天龍人非人等。一切大會。皆大歡喜。受持佛語。作禮而去。

說是經者。卽前三大分本迹二門皆說已。竟此是結所說之教。次結能聽之機。舉普賢以等該文殊。彌勒藥王觀音及無量大菩薩是本門之衆。舉舍利弗卽攝日連須菩提富樓那等一切聲聞。是迹門之衆。亦攝盡三乘及四衆等也。末舉八部收後。是舉無不盡。則六道法界俱攝盡無餘矣。然序衆中詳演此結處畧標。則詳畧見矣。復舉一切大會。則又該此界他方一切本迹三乘及人天等無不結盡。舍利弗仍存聲聞名者。乃依今迹位而結。以便統攝諸聲聞也。皆大歡喜一句。是統收在會此

界他方聖凡大眾得開示悟入佛知見之慶幸也。其喜踴應有無量。總不出全經本迹兩門之利益也。受持佛語者。受卽領承拜受。持卽執守奉行。佛語者。卽前迹本二門正說流通之語也。作禮而去者。一則儀法之所當行。聞教之後。必應禮謝去者。乃各歸一所。如前序衆中。有恒沙菩薩來。有長者居士來。有天龍八部來。前既有來。今必有去。二則禮者盡其誠敬也。旣聞三周開顯本迹。全彰實相。一乘。朗然開悟。而感謝之私。無以爲喻。但只作禮而已去者。卽各各依教修行。歸自本心。所謂一真。

寂滅場地。亦古謂一念萬年去。一條白練去。冷湫湫地去。古廟香爐去。如是去者。可謂中中流入也。直指云。先德言。一法若有。毘盧墮在凡夫。萬法若無。普賢失其境界。斯語正符此經之旨。蓋此經總一代時教徹底。爲九界衆生。不離當處。全身證入。但爲三乘紐於權小等地。猶墮偏枯。故首以文殊大智。掃蕩羣疑。揭轉八識心王。令根身器界。當體圓明。直下開佛知見。記授劫國莊嚴。於是以法師品。統收在會。則九界該羅。同入信位矣。正信旣凝。乃於寶塔品。圓會三身四土。今古一如。復舉提婆

達多品。重明心佛衆生三無差別。則四智融而十信滿矣。信滿則住。故繼以持品。畧明十住之相。由住而行。故繼以安樂品。深示十行良模。而迹門之能事。于焉畢矣。自湧出至隨喜。乃顯本門眞常湛寂。彌勒頓破迹疑。聲聞同登實際。遂說法師功德品。以明十回向位。以回眞向俗。遂得六根清淨。以上爲衆廣示三賢因行。而如來復自舉爲常不輕菩薩時所行。住行。向地等妙二覺次第因行節目。以示新記。令其觀光而入也。大因必有大果。故現十種神力。以結如來自覺聖智因果一周之大案。

遂於焉囑累流通。復爲新記者。重示十地行相。故舉藥王本事品。始登初地而燃身。終至八地而燃臂。則俱生我法二執謝矣。藥病兩亡。入法師位。故說妙音來往品。以示九地十地行。繇發真如大用。紹繼聖種。就中從初地至十地。步步是捨俗歸真。至觀音普門品。乃示等妙二位回真向俗因行之相。至此回視迹門。法師品十信滿心首尾如如。於佛則一大事因緣顯矣。於衆則一生叅學之事畢矣。時爲凡情雖盡。聖解未忘。故以陀羅尼品。蕩滌五十五位修證。總歸如來秘密妙輪。俾乎迷悟雙

超。始末同泯。而復舉莊王父子一段光明。總顯全經大旨。妙在當人一念之中。四智圓明。十方坐斷。一生取證。更不移易。末上舉普賢大行。成就四法。該括因果。以爲最後流通大結。允矣妙法不可思議。自三周開權顯實。二乘有學同成正覺。繼復開迹顯本。九界衆生共證眞常。語因果。則三世一如。論修證。則前後際斷。圓融行布。月皎空沉。行布圓融。古今一色。正所謂出息不涉衆緣。入息不居陰界。常轉如是經百千萬億卷。斯爲法華妙旨耳。

妙法蓮華經授手卷第七之五

音釋

綸

音倫

擦

初憂切

遽

居御切

率

也音

攘

如羊切

隙

音乞

繚

音了

曲

瞭

即代切

叱

火跨切

顏

音化

叱

狀也

繚

音了

曲

瞭

即代切

叱

滲

所禁切

森

去聲

繇

音遙

隨

也

括

古活切

官

入聲

滲

所禁切

森

去聲

繇

音遙

願此刊印大乘因利益檀施及宗親父母師長並尊

宿老幼均霑福壽寧頓悟一乘真實相離諸慾海不

染塵累世愆尤俱雪淨天樂迎空導師迎先亡脫苦

生淨土親聽彌陀說無生輔捐護助諸淨友所有眷

屬等羣靈歷劫業冤盡解脫惑亂消除破無明見聞

隨喜持真詮權實融通識本源三障蠲除悉清淨究

明性海道體圓承施法寶勝良因三途六道盡霑恩
無始業海皆枯竭彌陀大慈親手迎伏願世世遇明
師訓聞正法融四智受持見聞皆如是同證金身說
三周得涅槃後四入應普化羣迷早離塵覺悟本性
眞如體直指究竟法王城

普為出資及讀誦受持
輾轉流通者回向偈曰

願以此功德
消除宿現業
增長諸福慧
圓成勝善根
所有刀兵劫
及與饑饉等
悉皆盡滅除
人各習禮讓
讀誦受持人
輾轉流通者
現眷咸安樂
先亡獲超昇
風雨常調順
人民悉康寧
法界諸含識
同證無上道

佛曆二五五九年／西元二〇一五年六月

恭印：一〇〇〇套

流水號：13279
書號：CH331-07

法華授手（下冊）

發行人：簡豐文

出版者：財團法人佛陀教育基金會

地址：100 台北市杭州南路一段五十五號十一樓

網址：<http://www.budaedu.org>

E-mail：budaedu@budaedu.org

電話：(〇二)三三九五一一一九八傳 真：(〇二)三三九一一三四二五

劃撥戶名：財團法人佛陀教育基金會 郵局劃撥帳號：〇七六九九七九

銀行名稱：台灣銀行城中分行（請於電匯或轉帳後告知本會用途）

銀行帳號：〇四五〇〇四五九七五〇三

本會經書免費結緣之請取方式如下：

(一)親臨本會三樓講堂。(二)利用傳真：(02) 23965959

(三)撥打電話：(02) 23951198 分機：11、12

(四)網址：<http://www.budaedu.org/books/>。(五)寫信指定：本會法寶流通股。

為提高服務效率，請您嚴謹考量，慎選所需經書；儘量少用電話，多利用文字方式請取，並請詳寫經書名稱、冊數及收件人姓名、地址、電話、郵遞區號，以減少本會之處理時間；若大量申請，請註明用途，且避免姓名、地址等文字上書寫之錯誤。

◎本會經書，歡迎翻印（請勿增刪），贈送流通，功德無量。

◎本會交通：

※捷運：善導寺站5號出口，至杭州南路右轉，過兩個紅綠燈。

※公車站牌：審計部站→212、299、232、205、276、605、257、262

台北商業技術學院→253、297、237 仁愛路二段→253、297 開南商工→208

仁愛路、杭州南路(紹興街)口→630、270、263、245、621、651、37、261

行政院新聞局出版事業登記證局版臺業字第三八六九號



